



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

1/6

Em. B. I. N.

III. Em. B. I.

IV.

V.

VI. (V. 1800)

VII.

VIII. 1812

IX.

X.

XI.

XII.

p. 23. 1812. 1. 2.

p. 23. 1812. 1. 3.

1812. 1812. 1812.

1812. 1812. 1812.

1812. 1812. 1812.

1812. 1812. 1812.

1812. 1812. 1812.

1812. 1812. 1812.

1812. 1812. 1812.


p. 121. 1812. 1812.

1812. 1812. 1812.

1812. 1812. 1812.

1812. 1812. 1812.

1812. 1812. 1812.



Ern. D. I. N. III, 553 Accusatio Program. I. II, VI, VIII, IX, XII. p. 276

III. Ern. D. T. III, 280. G. Jernini Sag. 1010

IV. X, 755. *Arabin* p. 206⁷
416⁵

V. VII, 474. *Arabin* p. 206⁷
416⁵

VI. (VIII, 880) X, 358 *N I, 180*

VII. VI, 474

VIII. *III, 524 VI, 478 N. I, 899.

IX. X, 468 N. D. IV, 329.

X. X, 934

XI. VI, 474

XII. X, 360.

Mitt. 245 *Arabin* p. 206⁷
416⁵

De *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

p. 590 *Arabin* p. 206⁷
416⁵

337 *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵


23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵

23. *Arabin* p. 206⁷
416⁵






D. IOHANN AUGUST ERNESTI

IO. AVG. ERNESTI

OPVSCVLA

THEOLOGICA.



EDITIO SECVNDA AVCTOR.

LIPSIÆ

SVMTIBVS CASPARI FRITSCH

A. C. MDCCCLXXXII.

141. i. 488.

THE UNIVERSITY OF CHICAGO

LIBRARY

1955

LECTORI

S.

Cum Opusculorum Theologicorum ab ipso Io. Augusto Ernesti anno millesimo septingentesimo septuagesimo et tertio editorum exempla paullatim ita divendita essent, ut vix vnum relinqueretur, et multorum summum eius libri desiderium significaretur, curavimus, ut denuo accurate typis exscriberetur. Sed ne quid illarum dissertationum, quae inde ab illo anno et deinceps a Viro summo scriptae essent, intercideret, sedulo elaboravimus, ut

* 2

con-

conquisitae illae et collectae, huic novae editioni adiungerentur. Itaque hoc opus multis nunc partibus auctius, et summa, qua fieri poterat, fide expressum reddimus, habemusque persuasum, fore, ut ex omnium voto ac sententia id nos fecisse iudicemur. Dat. Lipsiae
ipsis nund. vern. MDCCXCII.

PRAE-

PRAEFATIO
IOHANNIS AVGVSTI
ERNESTI

Non putavi fore, qui eorum etiam, quos de rebus theologicis, per varias occasiones, scripti, libellorum, corpus fieri vellent, eiusque rei potestatem a me peterent; praesertim cum eorum multa ab initio exempla facta, quosdam etiam separatim aliquoties repetitos scirem. Sed cum id saepius a me esset petitum, cessi tandem voluntati nuper petentis, et causas illius voluntatis suae probabiles commemorantis. Feci igitur, quod in tali instituto necesse est, ut me ad eos lectione diligente recognoscendos, et, si qua opus reperissem, castigandos darem: quamquam id iam ante factum erat in iis, qui prela iterum subirent: imprimis his, qui sunt *de Eucharistia et de disciplina Christiana*. Hoc

* 3

qui-

quidem tempore, imprimis *Anti-Muratorium* libenter recognoui, quod is mihi libellus, pluribus de caussis, nec tamen illis ad vanitatem pertinentibus, carus et est et esse debet. Nec tamen fuit magnopere, quod adderem, vel confirmandi vel illustrandi causa; cum et perspicua omnia reperissem, et nihil contra eum vspiciam susceptum esse cognovissem, quam ut in Indicem librorum prohibitorum referri iuberetur; quod Romae ante hos fere duodecim annos factum, ad me scripsit vir doctus, qui tum in Italia erat peregrinatus. Nondum videram, quo tempore ista scripsi, *Assmanni V. C. Codicem Liturgicum*, in cuius libri quarti principio est de *Origine Liturgiarum* disputatio, et alia brevior, eiusdem libri quarti parte tertia (p. 181.) contra nostratum Liturgias. Nec vero in his reperi postea, quod mihi vel ad illustrandum magnopere prodesse posset, vel ad refellendum necesse esset commemorare.

In disputatiuncula de *triplici Officio*, quod Christo tribuit vulgaris libellorum scholasticorum consuetudo, accedere quaedam, pauca tamen, vel ad
illu-

illustrandum, vel ad confirmandum profutura. Ratio mea explicandae rei non placuit nonnullis, quibus nec placere in ea re volui. Mihi satis est, eam et ad recte intelligendam rem permagnam, cauendasque et opiniones fluctas et fraudes phantasiae, prodesse posse, et ita ab euidente scripturarum sacrarum interpretatione ductam esse, vt confidere possim, neminem ea, quae dixi, refellere legitima disputatione posse. Sed multi lucem illam non amant, maluntque figurarum vmbreis et ipsi eludi, et eludere alios. — Bene ista habent omnia, scripsit mihi aliquis, non ille de vulgari genere: at ita multae bellae sententiae (meditationes) eripiuntur ad populum dicentibus. Nescio an ferio hoc. At ego has bellas sententias, rectius phantasiae plebeiae oblectamenta dixeris, non amo, quarum ludibriis et liberari Christianorum mentes cupio, et vt ipse liberarem, tum in hoc, tum in aliis generibus, semper elaborauit, et quoad poterit, elaborabo.

Quae de modo doni linguarum scripsi, secutus legitimam interpretationem loci inprimis Paullini,

etfi nemo refellere instituit rationibus grammaticis, quae in hac re valent solae; tamen vnus et item alter, opinionem vulgarem et a pueris susceptam, quae illud donum ad docendi facultatem refert, malle sequi se ostendit: ex his vnus nuper, qui praetermissa interpretatione, maxime hoc niteretur, hoc vrgeret, quod Paullus in Arabia se docuisse diceret; vnde consequens esse, vt arabice loqui potuerit, quod eum non aliunde, quam ab illo dono habuisse. Nempe ita et olim vulgaris rationis auctores colligebant, parum accurate ac vere. Fac autem, Paulo rem fuisse cum hominibus, qui vnam arabicam, vt tum erat, linguam callerent. Non ergo potuere intelligere linguam hominis, aut ipse illorum, quae ab sua tantum vt dialectus alia discreparet: cum Hierosolymis et reliqua Palaestina intelligerent homines ex Arabia ortos; id quod perspicuis sacrorum librorum exemplis discimus. Sed potest Paullus graece ibi locutus esse, et ita locutum esse non dubitamus. Nam Ecclesiae quidem in Arabia antiquissimae, Graecae fuere, Graecos Episcopos habuere, plura per secula, Beryllum,

lum, Titum Bostrenum et alios, qui et graece scripsere, quos etiam ad Concilia graeca misere, vt Antiochenum, Ephesinum, Chalcedonense: vt alia mittamus. Neque enim attinet multa disputare aduersus homines rerum antiquarum parum peritos. Nuper risimus hominem Romanum, non illum ineruditum, qui Marcum defendebat Euangelium suum latine scripsisse, non ille nixus, vt antea solebant Romani, exemplo Veneto, sed hoc maxime, quod Romanis illud destinatum missumque constaret: ad quos latine scribere necessarium fuerit, quod maxima eorum pars, nempe plebeia illa, linguam graecam ignoraret. Non id simillimum illi est? At facile tulerim, homines vulgarem illam opinionem tenere: modo sibi tenerent tacite, nec alios in intelligenda oratione Paulina impedirent, quae, vulgari illa ratione probata, intelligi non potest, vt doctissimi quidam viri iudicauere.

Aliud, quod hoc tempore super huius voluminis libellos dicerem, non habui. Quod

X

si cui eorum lectio ad rerum sacrarum vel in
cognoscendo perspicuitatem, vel in assentien-
do firmitatem, profuerit, operae a me pre-
tium erit factum. Vale. Scripsi d. xxii. Martii

A. C. MDCCC LXXIII.

I N D E X
O P V S C V L O R V M
T H E O L O G I C O R V M
Q V A E
H O C V O L V M I N E
C O N T I N E N T V R.

- I. Anti-Muratorius, siue confutatio Muratorianae dispu-**
tationis, de rebus liturgicis pag. **I**
- II. Brevis repetitio et adfertio sententiae Lutheranae de**
praesentia corporis et sanguinis I. C. in Coena sa-
cra **121**
- III. Vindiciae arbitrii diuini in religione constituenda** **169**
- IV. De-**

INDEX

IV. De disciplina christiana	293
V. Dignitas et veritas incarnationis filii Dei asserta	355
VI. De officio Christi triplici	371
VII. De coniunctione rerum coelestium et terrestrium, <i>Eph. I. et Coloss. I.</i>	397
VIII. Ad I Cor. XIV. De dono linguarum	411
IX. Ad Act. Apost. III, 21	431
X. Narratio critica de interpretatione prophetiarum messia- narum in Ecclesia christiana	445
XI. De libertate ingenii in causa religionis	479 ✓
XII. De avaritia ecclesiastica et Saluiani aduersus auari- tiam libello	495
	XIII.

INDEX

XIII. De Theologiae historicae et dogmaticae contingentiae necessitate et modo vniuerso 511

XIV. De vestigiis prouidentiae diuinae in bello 535 ✓

XV. De metu spectrorum per Lutherum sublato 547

XVI. De satisfactione Christi 555

XVII. Dogma de trinitate aduersus Iuliani calumniam vindicatum 565

XVIII. De scholis et doctoribus veterum Iudaeorum et Christianorum 573

XIX. De emendatione scholarum per Lutherum 585

XX. De voc. Κατάλυμα et Αὐλή ad Luc. II, 7. 593

XXI. Ad Philipp. II. 6-11 599

XXII.

INDEX

XXII. De testimonio Sp. S. quod non fit in verbis, sed in
rebus 607.

XXIII. De necessitate revelationis diuinæ aduersus eos,
qui eius cognitionem rationi humanæ assertum
eunt. 615

ANTI
MVRATORIVS

SIVE

CONFVTATIO
MVRATORIANAE

DISPVATIONIS
DE REBVS LITVRGICIS

Ernesti Opusc. Theol.

A

A N T I
M V R A T O R I V S

Cum Vitebergam quondam studiorum caussa venissem, VENERANDE DEYLINGI, vigeat etiam tum *Io. Guilielmi Iani*, quamquam aliquot annis ante mortui, memoria, et inter iuuenes, sacrarum literarum studia aemulantes, summa cum laude celebrabatur. Etenim qui supererant ex eius disciplina, nihil eo praedicabant excellentius fuisse, vel in dogmatis theologicis explicandis, vel in historia Ecclesiastica enarranda. Neque enim communia modo illa tradidisse, quae ab ynoquoque alio tradi solerent, et e quouis compendio vtriusque doctrinae disci possent, sed multa exquisitiora et reconditae eruditionis copia protulisse, multa de difficilioribus sacrarum literarum, et veterum Ecclesiae scriptorum, locis elegantius obseruata, multa de monumentis antiquis, eorumque vel in Theologia vel in historia vsu, multa de libris melioribus ac rarioribus; vt facile intelligi posset, si illi diuturnior vita contigisset, quantam vel vrbi celebritatem, vel studiosis vtilitatem allaturus fuisset. Fuit sane vir ille Theologi prope perfecti exemplum. Nam cum dogmatum scientia ea, quae e summis corporibusque doctrinae hauritur, omnium bonarum literarum scientiam coniunxerat. Ab excellenti illa Schurzfleischiana disciplina, in qua TV quoque huius TVAE exquisitae et elegantis doctrinae amorem et initia percepisti, profectus, itineribus per Galliam, Britanniam, Batauosque, matura iam aetate atque doctrina, factis excultus et locupletatus, denique ab historica cathedra, in qua aliquot annis cum laude sederat, ad theologicam adscenderat:

studium autem doctrinae, vel legendo vel cogitando augendae, tantum fuerat, vt nec valetudini, nec imbecillitati corporis parvisse diceretur.

Sed illa veteranorum, de qua dixi, praedicatione, vt alios, ita me quoque memini incendi, vt legere cupere, quae audire non potuisssem, vt *Dictata in Neumannii Aphorismos*, in *Compendium Historiae Ecclesiasticae Gothanum* et alia. Descripsi etiam *Lectiones de Vnione Ecclesiastica* inter Lutheranos et Reformatos ineunda, quibus nihil plenius et eruditius in illo genere vidi. Atque his legendis fateor tum esse mihi vel incensum vel auctum studium elegantioris doctrinae Theologicae, comparanti hanc felicem et elegantem copiam cum compendiaris aliorum ieiunitate et elementaria paupertate. Sed cum eodem tempore audirem *Bergerum*, in *Institutionibus diplomaticis*, quas ille vocabat, omnium publicarum literarum vsum, vel in historiae partibus vniuersis, vel in doctrina quacunque, etiam in Theologia, demonstrantem, adfirmantemque nullam dogmatum publicorum esse certam historiam, nisi quae a Conciliorum et Liturgiarum, Legum etiam fontibus duceretur: aduertere animum in istis Ianianae doctrinae reliquiis maxime ea, in quibus eum rationem hanc fecutum videbam: quod fecerat maxime in loco de Eucharistia, vbi Liturgiarum veterum auctoritate Ecclesiae nostrae sententiam vel illustrarat, vel defenderat; quod eum etiam duobus Academicis libellis fecisse non ignoras. Primum tum mihi cognita sunt *Bonae*, *Renaldotii*, *Bretti* et aliorum Liturgicorum scriptorum nomina, et simul studium iniectum Liturgicae rei, quae, vt fere solent, quae prima aetate adamantur, semper postea prope praeceteris antiquitatis Ecclesiasticae partibus mihi iucunda fuit. Itaque cum ante aliquot annos L. A. MYRATORIVS, clarissimi vir nominis, duo Sacramentariorum veterum volumina, *Liturgiae Romanae Veteris* nomine, edidisset, in quibus essent, quibus adhuc caruissem, cupide emi opus, praesertim,

sertim, cui longa disputatio, non modo de istis Sacramentariis, sed de re Liturgica vniuersa adiuncta esset: in qua, spem faciebat fama viri, multa me inuenturum ante incognita, et alibi vix reperienda. Sed cum absolvissem eam disputationis partem, quae ad edita ibi ex antiquis libris *Sacramentaria*, Leonianum, Gelasianum, et Gregorianum antiquum, pertinerent, ecce beabar alia longe maiori disputatione, quae *Bingamo* maxime opposita, Ecclesiae nostrae doctrinam disciplinamque vehementer oppugnaret, telisque vteretur, non modo e Liturgiarum chartis, sed etiam veterum libris scriptorum, depromptis. Multa ibi reperiēbam indigna nobis, plura indigna viri fama, etiam humanitate et moderatione, quam ipse olim libro proprio Theologis suaserat. Quamquam commouebatur indignitate rei animus, et conatus erat, reprimere hominis impetus: tamen, cum alia in manibus haberem, putaremque, e Theologis aliquem, aetate adhuc vigentem, extitutum, qui hic bonae causae defendendae, et laudis quaerendae materiam sibi datam putaret, continui tum quidem animum, ceterum, cum iam sex anni praeterierint, nec quisquam, quod ego quidem sciam, id negotii susceperit, rediit pristina voluntas eius libri refellendi.

Atque ego non ignorabam, locum hunc de Eucharistia, quoad in eo nobis cum Romana Ecclesia intercedit controuersia, ita esse et a nostris Theologis, in his a TE, VIR VENERANDE, et a Geneuensibus, cum alias, tum per famosae illius de perpetua Fide disputationis occasionem, ita diligenter tractatum, ita omnia excussa et cum puluisculo exhausta, ut omnis de eo disputatio consumpta videretur. Itaque admirabar primum, cum eam recoqui a *Muraterio* viderem, suspicabarque, noua, eaque subtiliora ac speciosiora argumenta ab eo esse inuenta, quibus carere rem publicam Ecclesiae Romanae nollet. Quae quantum me sefellerit opinio, non est, ut hic dicam: res ipsa declarabit. Sed tamen huius instituti consilium

TIBI me probaturum confidebam, si non alia de causa, certe hac, quod mihi videbatur esse verendum, ne ipsum viri doctrinae veteris laude florentissimi, et moderationis simulatione probatissimi, nomen apud parum peritos veritati officeret, essentque, qui defuisse magis, qui posset, quam, qui vellet ac necessarium putaret, Muratorianis respondere.

Atque etiam, quicquid molestiae habitura erat haec disputatio apud animum meum, qui mallet vera docere, quam falsa refellere, et laudare recta, quam praua arguere, id omne absterfit cogitatio TVI, cuius imago identidem scribentis occursans et obuersans animo, et erectum retinuit studium, et animaduertendi diligentiam acuit, et laetiora mihi omnia et hilariora effecit: praesertim, cum haec scriberem recenti adhuc gratulatione, quae TIBI facta erat nuper, cum TV annum quinquagesimum explesses, ex quo primum sacerdotii munus obieras. Nondum enim extinctus erat sensus laetitiae illius, quam tum, cum TVA priuatim, tum publice rei Lipsiensis Christianae causa, cum bonis omnibus ceperam. Ac TVA quidem causa laetatus eram, quod doctrinae copia et praestantia, virtutis integritate, meritorum magnitudine, adde benevolentia in me, perfeceras dudum, vt TE et omnibus rebus felicibus dignissimum putarem, et omni parte felicissimum cuperem: rei Christianae Lipsiensis autem causa, quod intelligebam, quantas ei tot per annos, vt alia taceam, vel concionandi perspicuitate et grauitate, vel exempli disciplinaeque domesticae seueritate et sanctitate, vtilitates attulisses. Illa quoque cogitatio mirifica voluptate repleuit animum, cum vniuersae rei publicae Lipsiensis in eo genere felicitas occurreretur, cui hac nostra aetate contigit, vt tam diuturnos ex iisdem Viris fructus posset percipere. Annus amplius est, cum ornare rem publicam literarum in hac vrbe desiit CHRISTIANVS FRIDERICVS BOERNERVS. Ei ad quinquaginta muneris Professorii, cum magna laude administrati, annos

annos non nisi tres defuerunt. At etiamnum fruitur ciuitas (atque vtinam diu fruatur) sapientia et prouidentia IACOBI BORNII, CHRISTIANI LVDOVICI STIGLITII, IOANNIS FLORENTIS RIVINI, Virorum Illustrium, quorum illi quidem breui quinquagesimum senatorii muneris annum, rari exempli felicitatem, gratulabimur, horum alteri iam ante hos quinque annos, alteri ante tres, eundem Doctoratus annum gratulati sumus. TV vero, VIR VENERANDE, nostra pro illis vota precibus TVIS sustentabis: nos interea Deum rogabimus, vt TE quoque per multos adhuc annos nobis concedat, et huic nuperac laetitiae addat aliam maiorem, vt post hos quinque annos diem illum saluus sospesque videas, qui TIBI quinquagesimum Doctoratus Theologici annum expleat: cuius TV nominis, non ad vanitatem, vt sit, sed ad vtilitatem publicam expetiti, dignitatem ita sustinuisti, vt primum probatissimis Observationum libris doceres eruditos homines, mox in hanc urbem vocatus, etiam iuuenes, h. e. futuros rei Christianae antistites, omni parte sacrae disciplinae instructos reddere studeret.

Sed ne TIBI ipsa laudum TVARVM commemoratione molestus sim, qui malis laudes mereri, quam audire: veniam ad id, quod propositum est, disputationis Muratorianae reprehensionem: quam ita moderabimur, vt res, non hominem, praesertim mortuum, et multis nominibus bene de literis meritum, notemus. Lucretur *furores et Diaboli disciplinam*, quibus *Lutheri* nomen polluere ausus est, et similia. Non quid illo, sed quid nobis dignum sit, videbimus. Nec in omnibus acerbum animaduersorem habebit. Non imputabimus in scriptoribus Liturgicis omisso, quos ignorare non debuisse videatur; in his *Thomam Brettum*, Britannum, qui an. 1723 eruditissimum de rebus liturgicis opus, hoc est Corpus Liturgiarum cum disputatione de Liturgiis Londini edidit: non, quod *Buddeum* Lipsiensem Professore, et e duabus *Pfaffii*, V. C. disputationibus vnam fecit cet.

Leuia ista esse didicimus, iisque captandis notandisque paruas animas delectari.

Etiam primam libri partem, h. e. septem priora capita, mitemus: in quibus nihil est, quod pertineat ad eam, quam defendere suscepimus, causam. Sunt enim fere historica, pertinentia ad antiquitatem Liturgiae Romanae, et eorum, quae hic proferuntur, Sacramentarium, ad libros denique antiquos, unde haec exempla ducta sunt: quamquam et in his sunt coniecturae plures, de quibus facile in utramque partem disputes, etiam quae conuelli ac dissolui possint, *Muratorio* ipso fatente, (pag. 71.) nihil in his certi esse. Itaque etiam cum res bene agi videtur, ut cum de Gelasiano, quod vocant, Sacramentario (p. 55 f.) aduersus *Iac. Basnagium* disputat, origines istius ad decimum seculum retrahentem in *Historia Ecclesiae Christianae* (T. II. p. 946.) tamen multa dici contra possunt: in his illud, quod tamen redeunt omnia huc, ut ad interpolationes et additamenta posterioris aetatis confugiendum sit, in vetustate eius asserenda. Quo ipso dignitas Liturgiae valde minuitur: cum ea res magnam facultatem det, omnia inde ducta argumenta eludendi, et pro interpolationibus repudiandi, quibus in disputando premare.

Vnum est caput, de quo, vel exempli causa, contra disputare lubeat, *de origine Liturgiae Eucharistiae uniuersae*, quod est in principio operis. Et primum quidem, quod adfirmat, iam ab Apostolis certum precum ordinem, s. Liturgiam Eucharisticam institutam; si ita intellexit, ut ad exemplum Christi, cuius auditores fuerant, preces et *εὐχαριστίας* fecerint, nihil est, quod contra dicamus: at si formulam certam ac definitam certis statisque verbis intelligit, longe a vero aberrat. Nondum illis temporibus e formula preces factae, neque publice, neque priuatum: formula autem Dominica, velut Compendium quoddam *εὐχαριστιῶν* et *εὐχῶν* omnium, preces, cuiusque ingenio factas, concludebat. (Iustin. M. Apol. ad Antonin.

nin. p. 131. ed. Grab.) Sed hoc maxime agitur in hoc capite, ut refellatur *Petr. Brunus*, nobilis rerum Liturgicarum scriptor, qui defendit, ante quintum seculum scriptas Liturgiarum formulas non extitisse: non quo neget, certis formulis sacerdotes usus: non hoc sustineat erimine se obstringere: sed ut memoriter recitasse, et usu diuturno, h. e. a pueris saepe audiendo, edidicisse, et non omnes statas et constantes fuisse, sed alias ab aliis additas, putet: quam sententiam defendit etiam *Iosephus Pinius* Mosarabicae et aliarum Hispanicarum Liturgiarum editor et illustrator nuperus *) commemoratis tamen dubitationibus aliorum: cuius libro hic non usum *Muratorium* miror. Enimuero causa illa haud bene a *Muratorio* acta est. Et initium quidem facit a mirabili *Iustini Martyris* interpretatione, cuius testimonio *Brunus* erat usus. Antistitem, ait ille, allatis pane, vino, aqua, *εὐχὰς καὶ εὐχαριστίας ἀναπέμψαν, ὅση δύναμις αὐτῶν*. Haec si pro facultate sua veritas, vicit *Brunus*, siue nos potius, qui liberas preces fuisse putamus. Quid ergo *Muratorius*? Hanc esse vim clamat. Immo vero ὅση δύναμις αὐτῶν esse Italice, per la sua parte, vel seconde che a lui appartiene, pro sua parte, scilicet postquam populus stans preces fecerit. Hoc est graece scire et interpretari. Non videbat, illud per la sua parte esse ὁμολως? ὁ προσεὼς εὐχὰς ὁμολως καὶ εὐχὰς α. Illa autem ὅση δύναμις, ut κατὰ δύναμιν, εἰς δύναμιν, numquam aliter accepta sunt, quam pro modo virium, pro facultate, siue etiam, summa vi, ubi contextus finat, qui hic non repugnat, ut ὅσον σθένος et similia, ut paullo ante ap. ipsum *Iustinum*, ὅση δύναμις προερέψασθαι, summa ope cohortari. De quo cum dubitari sine summa inscitia graeci

A 5

sermo-

*) In Tract. hist. Chronol. de Liturgia antiqua Hispan. C. I. praefixo primum T. VI. Iul. Aët. SS. repetito dein Romae 1740. f. et a I. BLANCHINO ibid. 1736 in Collectione Liturgiarum Hispanicarum.

sermonis non possit, clarum est, certam *εὐχῶν καὶ εὐχαριστιῶν* in Liturgia formulam seculo II. nondum fuisse. Qua vna re concidunt omnia, quae praeterea adferuntur in hanc partem, vt ex Apostolica traditione accepta et seruata sit certa Liturgiae formula; ad quae tamen et ipsa separatim responderi potest. *Cyprianus*, ait, formulam commemorat sacerdotis, *sursus corda*, et populi, *habemus ad Dominum*: laudatque librum *de Oratione*, qui nullus extat, vt hunc locum, sicut alios, id quod modus librorum indicandorum declarat, ex alio sumxisse appareat. De *Oratione Dominica* est *Cypriani* nobilis et veteribus in primis laudatus libellus, in quo est locus n. 22. (p. 316. ed. Pamel.) de hac formula. Sed hunc forte intelligebat. At ibi de precibus Eucharisticae Liturgiae, quas sacerdos pronuntiat, non est sermo, sed de iis, quas facit concio stans, ante Eucharistiae Liturgiam auctore eodem *Iustino*, l. c. quibus finitis, initium fit precum ad Liturgiam pertinentium. Ita enim *Cyprianus*: *Quando autem stamus ad orationem, fratres dil. vigilare et incumbere ad preces toto corde debemus - - Idcirco sacerdos ante orationem praefatione praemissa parat fratrum mentes, dicendo sursus corda cet.* Non clarum est, hoc pertinere ad illa *Iustini* verba *ἀνιστάμεθα κοινῇ πάντες, καὶ εὐχὰς πέμπομεν*? Sed tamen facile concesserim, eadem verba et in sacerdotis precibus vsurpata. Nam *Cyrillus*, s. quicumque auctor est, *Catech. Mystag. V.* (pag. 537. ed. *Preuotii*) clare hanc formulam commemorat. At illud certum est, eam in omnibus precibus publicis vsurpatam, neque inde quicquam pro *Muratorii* sententia colligi potest. At *Basilus* (de Spir. S. c. 27.) non contentos Christianos dicit iis, quae commemoret Apostolus, aut Euangelium, verum alia et ante et post consecrationem dicere, quae ex traditione non scripta acceperint. Sed quae necessitas est credere, haec de verbis, et non de rebus, generibus, et capitibus precum et supplicationum, intelligenda esse, quae commemorat *Cyrillus* (l. c. p. 538.)

Nam

Nam si de Muratoriano arbitrio capias, *Basilus* reprehendetur merito, qui sibi pro Apostolicis illas formulas obtrudi passus sit, quae *Iustini* aetate nullae fuissent. Illud autem plane alienum est, quod iterum *Iustini* verbis abutitur ad Missae certam formulam illi aetati obtrudendam, ἀνίσταμεθα κοινῇ πάντες καὶ εὐχὰς πέμπομεν. Quid inde? *Nisi iam constitutae fuissent sacrificii orationes et preces, quomodo concors in iis recitandis populus perrexisset? Si autem constitutae, scriptis quoque traditae fuerint oportet.* At istae preces nihil coniuncti habent cum sacrae Coenae Liturgia, similesque sunt his, quae apud nos subiiciuntur concionibus. Nam lectione librorum sacrorum facta, antistitisque admonitione ad populum finita, surgere populum ait, et precari. Atque hae ipsae preces si submissa voce factae, nulla formulae certae necessitas intelligitur; sin clara, quod concesserim facile, cum et *Cyprianus* vocis mentionem faciat, et precantes vetet ventilare preces inconditis vocibus (de Or. Dom. n. 3.) non tamen necesse est, ut e scripto disci solitas putemus. Quam multos, credibile est, antiquis illis temporibus, cum etiam doctis non admodum expeditum esset, scripta legere, quam multos ergo de plebe homines, mulieres in primis, fuisse qui legere scripta non possent, cum hodie tales inueniantur, in tanta docentium frequentia et discendi facilitate. Viua igitur voce docti, aut usu longo et quotidiano audiendi, edidicere formulas illas, neque vlllo modo scriptura opus fuit. Potuere etiam Psalmi Davidici in communibus precibus usurpari: quod mihi maxime placet: propterea, quod satis constat, iis veterem ecclesiam et in canendo et in precando maxime esse usam, cum mallent diuinitus scripta in Deo colendo, quam humana, adhibere. *Hieronymum* quidem, cum sacrorum librorum versionem latinam veterem, quam vulgo Italicam, nescio an recte, vocant, corrigeret, Psalmos intactos reliquisse constat, ne populum conturbaret, qui illi veteri interpretationi aduersus esset, eaque in supplicatio-

cationibus publicis vteretur. Laodicensi autem concilio Canone 60 cautum est, ne ψαλμοὶ ἰδιωτικοὶ in Ecclesia recitarentur (λέγονται). Sed ne nimis omnia contendamus, concedimus utique, paullatim, quarto quintoque seculo formulas cum ceterarum precum commutnum, tum Eucharisticae Liturgiae factas, a *Basilio*, ab *Hilario* Pictaviensi, aliisque disertis et πειύματι εὐχῶν large donatis diuinitus viris. Tamen nihil lucratur *Muratorius*. Nam eas aut in suos, aut Ecclesiarum suarum, vsus facere potuere. Quorsum pertinet illud, quod de *Apollinari Sidenio ex Gregorio Turonensi* (Hist. 11, 22.) adfert, qui, cum per fraudem ipsi ablatus esset libellus, per quem sacra facere consueuisset, ex tempore omnia solennia peregit, cum summa admiratione omnium: quae res adeo non fauet Muratorianae sententiae, ut ei maxime aduersetur. Ut breui complectar, sic rem intelligo. Primis temporibus, cum Spiritus S. suggereret εὐχὰς et εὐχαριστίας, ut Apostolis, eorumque ministris et adiutoribus, antistitibus item Ecclesiarum, atque adeo priuatis (1 Cor. xiv, 16.) superuacuae erant formulae precandi solennes. Cum porro illud acre rerum diuinarum studium adhuc caleret, essentque multi sancti, et in libris diuinis triti homines, qui vel repente, vel post commotationem aliquam, preces pronuntiare et gratiarum actiones possent ad animos commouendos efficaces: (quidni enim potuerint, quod Maria femina, tacta beneficii diuini magnitudine?) sua sponte precati sunt, ut priuatim domi, ita in conuentibus publicis, ὅση δύναμις ἐκείτω. Cum ille ardor pristinus paullatim refrixisset, in tantaque multitudine eorum, qui sacra facerent, propagata longe lateque religione Christiana, multi reperirentur, quorum nimis tenuis δύναμις esset, denique nonnulli antistitum eloquentiae gloriam nimis appeterent, formularum scriptarum et certarum consuetudo nata est. *Basilii*, *Hilarii*, *Chrysostomi*, *Ambrosii*, *Sidonii*, alique docti et disertis homines, primum in vsus suos preces consigne-

bant

bant domi, quas in sacris faciendis recitarent, deinde et aliis, qui minus disertis aut doctis essent; quibus quisque, ut voluit, usus est. Et sic quoque nemo ab initio eam necessitatem sibi impositam putavit, ut sibi non aliquid vel addere vel demere licere existimaret. Ipse quidem *Muratorius* (c. 2.) de vetere Ecclesiae Rom. Liturgia agens, fatetur, cuilibet Ecclesiae, cuilibet Episcopo licuisse, suam instruere novis orationibus, easque vel amplificare vel minuere: et (p. 227.) Missam *Flavii Illyrici* attingens, eam nihil esse aliud, quam ipsum Ordinem Romanum, variis precum formulis oneratam, *quarum tum usus liber unicuique Sacerdoti fuerit*. His magna parte similia sunt, quae de precibus in S. Eucharistia peragenda differit *Ianus ὁ μακαρίτης*, ad *Eusebii* Or. de Die Dominica, p. 27. quae si tibi probata fuerint, *VERERANDE DEYLINGI*, vehementer laetabor.

Iam veniamus ad caput institutae Disputationis Antimuratorianae: in quo servabimus ordinem a Muratorio ita descriptum, ut *primum de Panis et Vini in Corpus et Sanguinem Christi conversione* e Liturgiis Ecclesiae veteris Romanae, e. g. Ambrosianae, c. 10. ceterarum Occidentalium, c. 11. Orientalium Graecarum et Syriacarum, c. 12. 13. Aegyptiacarum c. 14. disputaret, adiuncta velitatione cum *Sam. Basnagio*, Annalium Polit. Eccl. auctore, in qua de Patrum SS. locis contenditur, c. 15. *deinde Veritatem Sacrificii in S. Missa* e Liturgiis Occidentalis et Orientalis Ecclesiae, c. 16. 17. et Patrum scriptis, c. 18. confirmare conaretur: *tertio, Adorationem Eucharistiae* ex iisdem demonstrare, c. 19. *quarto*, quosdam *Liturgiae ritus*, c. 20. 21. *quinto, Inuocationem SS. in Liturgia*, c. 22. *denique, ad servationem Corporis Christi*, peracta Eucharistia, c. 23: *eique praestitam reuerentiam, expositionem et circumgestionem*, c. 24. defenderet. Erit autem nobis haec in septem capita diuisa disputatio, cum Muratoriana sit sextuplex; propterea, quod eorum, quae de locis Patrum disperse, per octo capita priora,

priora, differit, confutationem in vnum caput congerere placet.

Primo igitur capite clare, vt opinor, demonstrabimus

I. *Conuerfionem Panis et Vini, quam Romana Eccl. defendat, Liturgiis antiquis non firmari.*

Atque ingressus huius demonstrationis Liturgicae a *Muratorio* factus est ab reprehensione Graecorum et Syrorum, quos, cum in ipso conuerfionis dogmate consentiant cum Ecclesia Romana, dissentire in eo, quod negent Consecrationem Eucharisticam fieri solis verbis: *hoc est corpus meum*. Non repetam, quae doctissimi Theologi, etque ipse *VIR VENERANDE*, dudum in *Obf. S.* (III. p. 194 et 339) contra sententiam Ecclesiae Romanae, quae his solis verbis consecrationem fieri decernit, vt falsa et noua, verissime pariter atque doctissime disputasti: quorum tanta est euidentia, vt etiam inter Pontificios extiterint, *Renaldotius* et *Tuttaeus*, qui faterentur, hanc opinionem cum vniuersae Ecclesiae veteris sententia pugnare, eamque adeo a sua Ecclesia alienam esse, credi cuperent. *Muratorius* quidem mirifice se expedit. *Paucis se dicturum*, ait, *rectissime a Catholicis constitutum fuisse, Consecrationem pendere duntaxat e Christi verbis* (hoc est corpus meum) *Dogma namque hoc ex antiquis P. P. elici, praesertim ex Io. Chrysostomo, Ambrosio et Augustino.* Ad quae forte quis paucis respondeat: istam orationem plane indignam esse *Muratorio*, meliusque facturum fuisse, si omnem mentionem eius rei e disputatione sua semovisset, cum nihil melius posset asserre. Sed lenius agamus, quando quaestio de consecratione Eucharistica est eiusmodi, vt nostri quoque nec consentiant satis, nec se expediant facile. *Formulae Concordiae* Auctores (nam in ceteris Confessionum libris nihil est admodum huc perti-
nens) ponunt in sola recitatione verborum Institutionis,
iusque

iisque τὸ εὐλογεῖν peraētum iudicant, de quo est apud Paullum, 1 Cor. X. 16. *Ad externam et visibilem actionem Coenae Dominicae pertinent Consecratio, seu verba institutionis, distributio, et sumtio.* Declar. Art. Conc. p. 1040 ed. Rein. Itemque in Epit. Art. C. p. 846. commemorato illo Paullino loco: *Illa autem benedictio fit per recitationem verborum Christi.* Quam rationem Gerhardus et alii superiorum temporum Theologi sequuntur. At alii ab auctoritate formulae istius declinantes paululum, illis adiungunt preces; quidam etiam distributionem, cum repetitis verbis Dominicis, et sumtionem, totamque adeo actionem Eucharisticam consecrationis verbo complectuntur: ex qua ratione ipsi κοινωνῶντες partem consecrationis obtinent. Praetereo distributiones consecrationis, ipso sono terrentes. Chemnitius autem cum idem illud, quod in Concordiae formula scribi probavit, ante in Tridentini Concilii Examine posuisset, (P. II. p. m. 119.) alio loco (p. 222.) dicit: *quando institutio recitatur et non facimus quod Christus in coena et fecit et facere iussit, non est consecratio, sed tantum historica narratio; quando vero recitamus, et facimus, quod iussit, tunc verbis illis benedicimus pani et poculo:* quibus verbis clare, ut opinor, consecratio communicatur cum iis, qui accipiunt panem et vinum. Iam in ipsis verbis institutionis non eodem modo se omnes expedire video, quibusdam, verba Christi vim consecrandi habere omnia, existimantibus, aliis, partem eorum tantum. Quae indicio sunt, laborare doctos homines in consecratione definienda. Chamierius quidem, eruditissimus ille errorum Romanae Ecclesiae aduersarius, quod merito quis miretur, eo redigitur, ut ipsos, quos impugnat, secutus, consecrationem panis, quae quidem effectum Sacramenti adferat, solis verbis, hoc est corpus meum, fieri dicat (Panstrat. T. IV, qui est de Eucharistia, VI. 5. p. m. 153. a.) C. M. Pfaffium autem, copiosissimae doctrinae Theologum (in Disp. de Consecratione Euch. Vet. p. m. 405.) eorum fauere sententiae, qui

qui consecrationem non in verbis institutionis Eucharisticae, sed in *εὐχαριστία* et *εὐλογία*, h. e. precibus cum gratiarum actione ponant, quae est *Edm. Albertini*, in clarissimo de Sacramentis Eucharisticis opere (l. 4. p. 11.) sententia, satis indicat, cum eorum rationes *solidissimas* appellat: quae aliae intelligi, nisi verae et certae, non possunt.

Omnis illa difficultas nata est ab ambiguitate verbi *consecrandi*, qua sublata, rem expeditam fore arbitror. Etenim Scriptores Ecclesiasticos consecrandi vocabulo dupliciter usus reperi: primum sic, ut respondeat Graeco *ἀγιάζω*, sitque, quamcunque rei sanctitatem ac religionem tribuere, ut profana, aut usus profani ac promiscui, esse desinat; quo modo Paullus cibum quemcunque *ἀγιάζω* dixit precibus et gratiarum actione: iterum hac sententia, ut vim diuinitus, h. e. praecepto ac promisso diuino, rei additam significet; quo modo veteres dicunt coniugium a Deo *consecratum* esse, Gen. I, 28. itemque *aquam* abluendis peccatis *consecratam*, hominesque ipsos, ea aqua tinctos, ut Graeci *ἀγιάζω*, ita Latini *consecrari* dicunt, Christi praecepto et promisso, et Spiritu Sancto, ut loquitur *Ambrosius* de Sacram. I, 5. siue quicumque auctor est. Similisque est *benedicendi* ratio, verbi e Graeco *εὐλογεῖν* facti, significatione Hebraicae consuetudini in verbo *ברך* accommodata: nam bene Graeci et bene Latini tantum pro *laudare* et *recte dicere* usurpant. Cum Deus diem septimum, Christus cibum *εὐλόγησε*, ea primi generis consecratio fuit, quae e profanis eximeret: cum novos idem coniuges *εὐλόγησε*, ea fuit benigna et efficax promissio, unde et beneficii vis ei verbo adhaesit, ut in *εὐλογία* Abrahami cum gentibus omnibus communicata, ut in *εὐλογία* Paulli, 1 Cor. VI, et 2 Cor. X.

Iam si haec ad quaestionem illam Eucharisticam conseramus, liquidum est, consecrationem esse in laudibus diuinis et precibus, si priori sensu accipiatur vocabulum, fin

fm posteriori, in solo praecepto et verbo Christi, et quidem dupliciter: semel, cum ante *κοινωνίαν* recitatur; vnde intelligitur ius et potestas talis rei suscipiendae, pendetque spes, cum pane et vino percipiendi corporis et sanguinis Christi, iterum in ipsa *κοινωνία*, cum panis et vinum ori admouentur et ingeruntur, sacerdosque repetit verba Christi, quorum haec vis est, vt accipiamus corpus et sanguinem Christi. Nam profecto Dominus noster Iesus Christus illa verba, *hoc est corpus meum*, dixit tum demum, cum iam edere inciperent Discipuli: id quod ordo verborum prorsus declarat. Etenim tum demum, cum ederent, poterat hoc dicere. Neque enim ante erat corpus Christi cum pane, quam in ore esset. Homines male faciunt, cum, vt celeriter ista in Euangelio, et vno spiritu ac tenore legunt, *accipite, comedite, hoc est corpus meum*, ita a Christo dicta imaginantur. Nam et illud *τῷτο ποιῆτε* cet. interuallo facto, dixit. Cum comedissent reuerenter, et admiratione beneficii percussi, subiecit illud de repetendo et conseruando semper ritu salutari.

Quodsi illud porro quaeratur: quo sensu consecrationem ac benedictionem vetus Ecclesia in hac re vsurpauerit; profecto res cogit fateri, priori modo antiquissimum quemque dixisse, et consecrationem, itemque benedictionem in precibus et *εὐχαριστία* posuisse. Id sic planissime demonstrari potest. Primum *consecrandi* verbum in latina Ecclesia haud dubie expressum est e Graeco *ἀγιάζω*, eique prorsus respondet. Huius autem verbi de hac re vsurpandi fundus vnus est Paulli locus, 1 Tim. VI, 5. vbi cibus quicumque *δι' εὐχῆς καὶ λόγου Θεοῦ ἀγιάζονται* dicitur, vnde verbum *ἀγιάζονται* ad cibum et potum Eucharisticum est translatum. Id certum fit loco insigni Origenis (Comment. in ss. τ. II. p. m. 253. extr. ed. Rhotomag.) in quo istis ipsis Paulli verbis de cibo Eucharistico vtitur. *Τὸ ἀγιάζομενοι διὰ λόγου καὶ ἐντεύξεως, ἢ τῷ ἰδίῳ λόγῳ* (non per se) *ἀγιάζει τὸν χρωμένον*
Ernesti Opuscl. Theol. B H

εἰ γὰρ τῷτο, ἡγίαζεν ἂν καὶ τὸν ἐσθίοντα ἀναξίως τῷ Κυ-
 ρίῳ, καὶ ἔδειξεν ἂν διὰ τὸ βρῶμα τῷτο ἀσθενὴς ἢ ἀρρώστους
 ἐγένετο cet. Etenim hinc clare apparet, non alium ἀγια-
 σμὸν f. consecrationem intellegendam in S. Coena, quam
 in alio cibo quotidiano: in quo illi veteres hoc minus
 errabant, cum et ipsi Apostoli plane iisdem verbis de ἀγια-
 σμῷ Eucharistici panis et vini, h. e. εὐχαριστίας et εὐλο-
 γίας, quibus de vulgaris et promiscui cibi ἀγιασμοῦ vti
 sunt. Quae cum ita sint, ceterique Graeci antiquiores
 semper, quod ego sciam, verbum ἀγιάζεν in ea re dixe-
 rint, quippe sic adhuc reperitur in Myltagogicis illis Ca-
 techesibus, siue *Cyrilli*, siue iunioris alicuius: eius autem
 verbi latina interpretatio sit *consecrandi* vocabulum,
 necesse est, ut hoc quoque ab initio non aliter dictum,
 et cum *sanctificandi* minus latino verbo promiscue vsur-
 patum credamus. Quod et confirmant loca plurima,
 dudum e latinis Ecclesiae doctoribus prolata, in quibus
 aliter consecrandi verbum intelligere non licet, veluti a
Pfaffio, l. c. p. 407 sqq.

Iam, secundo, *benedicendi* verbum, quod cum *con-
 secrandi* voce promiscue dicitur, ut omnes concedunt,
 exprimit τὸ εὐλογεῖν. Id autem esse vi ac potestate non
 diuersum a τῷ εὐχαριστεῖν, TE quidem ipsum, VIR VE-
 NERANDE, innuere video, *Obf. III. p. 283. 349.* ita
 autem clare doceri posse arbitror, ut id aut conceden-
 dum, aut certissimae interpretandi leges abolendae sint.
 Quid enim primo certius hoc interpretandi praecepto,
 ut, quae vocabula de eadem re, in eodem orationis con-
 texto permutentur, ea pro συνωνύμοις accipi, alterumque
 ex altero explicari debeat? Hoc si quis in dubitatio-
 nem vocare audeat, nae is ab interpretandi peritis vehe-
 menter rideatur, omnemque interpretationem aut tol-
 lere aut incertam reddere iudicetur. Nonne vero, quod
Matthaeus et *Marcus* dixere, λαβὼν τὸν ἄρτον, εὐλογή-
 σας, id *Lucae* et *Paullo* est λ. τ. α. εὐχαριστήσας ἐκλάσας?
 Et cum iidem in calice Iesum εὐχαριστήσαι dicant, *Paullus*
 dicit

dicat *εὐλογῆσαι*, 1 Cor. X, 16? Atque ego non ignoro, quod obiicit *Calouius*: alterum in altero esse intelligendum, in hunc modum: *εὐχαριστῆσαι καὶ εὐλογῆσαι*. Sed ne dicam, ea exceptione legem illam euerti: concedam, hoc *ἐλλείψεως* genus non esse omnino improbandum, sed tum, si coniuncti vtriusque verbi exemplum proferatur, vnde ea *ἐλλείψις* Graecis s. diuinis scriptoribus vsitata, non temere conficta videatur. Nam si *ἐλλείψεως* in interpretatione adhibendae non hic modus seruetur, e quolibet efficere licebit quidlibet. In Religione Christiana nulli rei aliquam vim tribui nisi τῇ ἀγάπῃ, Paullus ait. Intelligendum hic esse κατ' ἐλλείψιν aiunt τὴν πίσιν, τὴν δὲ ἀγάπης ἐνεργεμένην. Recte. Sed eius rei auctoritatem dat et locus alter Paulli, in quod ista coniunguntur, et vniuersa Christianae doctrinae ratio, quae ad fidem refert omnia. At quis diuinorum scriptorum vnquam ista verba coniuncte dixit? Ne scriptorum quidem Ecclesiasticorum antiquorum quisquam, quod ego quidem animaduertim, aut ab alio animaduersum viderim, ea coniunxit. Immo *ποτήριον εὐλογίας* agnouere omnes, esse *ποτήριον εὐχαριστίας* s. *αἰνέσεως*, vt etiam Syrus Paulli interpretes vertit, quippe quod est Ebraeis dictum כַּדִּיחַ s. חֲמֵץ וְיַיִן, *ποτήριον ὑμνήσεως, αἰνέσεως*, vt bene notat *Casaubonus* adu. Bar. p. 456. Vnde non aliter fere consecratum s. benedictum panem et vinum appellant veteres, quam *εὐχαριστηθεῖσαν τροφὴν*, vt *Iustinus* loco supra commemorato (p. 129) et τὰ *εὐχαριστηθέντα*, (ibidem p. 123) quae sunt profecto *consecrata*, vt vertuntur bene, seu benedicta, si quis hebraica malit. Atque ipsa profecto series rei a Christo gestae, id ita esse, clamat. Et enim illa verba, in quibus volunt esse proprie consecrationem et benedictionem: λαβ. -- ἀναμνησιν, Christus dixit post *εὐλογίαν*. Quomodo ergo in his potest esse consecratio et *εὐλογία*, quae iam peracta erat? Sed posterior aetas coepit, in hoc etiam capite, paullatim *consecrationis* et *benedictionis* verbo aliter vti, posteriori illa,

quam supra declarauimus, vi, non vt priorem et antiquiorem aboleret, sed vt hanc adderet. *Augustinus* quidem, cum in notissimo illo, Epistolae ad Paullinum, loco, (n. LIX. T. II. p. 300. ed. Frob. 1569.) *orationes* commemorasset, (h. e. preces) quae fiant, cum *benedicitur et sanctificatur*, et ad distribuendum panis comminuitur, quam statim *petitionem* vocat, oratione Dominica ab Ecclesia concludi solitam, idem, alio nobili loco, de quo post plura dicemus, (init. c. 2.) *panem et calicem in altari dicit sanctificari* (h. e. consecrari, benedici) *per verbum Christi, et ita esse corpus et sanguinem Christi*. Atque haec posterior ratio, in scholasticos libellos recepta, ita in scholis inualuit, vt prior prope obliteraretur. Itaque et Theologi nostri, cum Formulam Concordiae componerent, hanc maxime secuti videntur. Ea autem vis cum tribuitur verbo, non profecto aliter existimari potest, quam vt consecratio primum fuerit in verbis Christi non *εὐχαριστήριος*, sed tradentis ad comedendum bibendumque panem vinumque, et in iis corpus suum et sanguinem tradi affirmantis, nunc autem sacerdotis, Christi verba non modo recitantis in coetu Christianorum, quae est narratio potius, quam consecratio, vt *Chemnitius* aiebat, sed etiam, et quidem vel maxime, praecepto eius et permissu eum imitantis, et panem vinumque cum verbis Christi ori cuiusque ingredientis. Haec paullo pluribus disputare libuit, partim ad refellendum aduersarii decretum, partim ad tollendam confusionem vulgarium libellorum, quae miras diuisiones consecrationis peperit, meque olim male habuit, et nunc quoque iuuenum animos subinde ancipites tenet. Nunc ad id, quod propositum est, veniamus.

Sed cum disputationis Muratorianae duae partes sint, altera, quae corpus et sanguinem Christi non per figuram quandam, sed vere et proprie exhiberi pugnet, altera, quae panis vinique *μεταμόρφωσιν* eiusmodi defendat, qua panis vinumque tollatur: intelligitur, priorem illam nobis praeter-

praetermittendam esse. Neque enim nos sumus ii, qui Christi corpus et sanguinem a pane et vino in Eucharistia sumto abesse putemus, sed qui *proprium corpus et sanguinem Christi*, vt vocatur in *Missâ Flaciana*, siue, vt *Leo M.* (Serm. XC.) ait *Veritatem Corporis et Sanguinis Christi ore sumi* vna cum pane, credimus, idque Liturgiis antiquissimis firmari contendimus: sed panis vinique conuersionem fieri eiusmodi, quæ substantiam eius aboleat, negamus, eamque vlla vetere Liturgia firmari, vt id publicum Ecclesiae dogma fuisse putandum sit.

Quid igitur est in Liturgiis antiquis, quo fretus *Muratorius* Romanam illam μεταμόρφωσιν panis vinique defendat? Nihil nisi verba quaedam, contorta, et ab usu linguae aliena ratione explicata, vt dudum est demonstratum. In *Romano Ordine*, itemque *Flaciana Missâ* (p. 123. extr. 126. pr. 127.) dicitur corpus et sanguis *fieri*: (p. 125. extr.) *confici*, quod eodem redit, itemque *perfici* (p. 126. med.) denique (p. 125. med.) panis *transfigurari* in corpus Christi. Ex quibus sincerum lectorem, ait, et veritatis audum intelligere, veram fieri oblatorum conuersionem in corpus et sanguinem Christi. Si alium, quam Romanis placitis parere aduetum, lectorem intelligit sincerum et veritatis audum, non intelliget ex istis verbis, quod *Muratoria* placet. Neque magis id confici eredet verbis *Ambrosiani Canonis* (p. 131. extr.) *fieri Corpus C. et transformari in Sacramentum C. et S. C.* aut *Gothici Missalis* (p. 141.) *transformare Corpus et sanguinem C.* aut (p. 142.) *e conuertendi et mutandi* vocabulis.

Iam e *Graecis Orientalium* Liturgiis proferuntur loca, vbi panis et vinum dicuntur γίνεσθαι vel ποιεῖσθαι Corpus et S. C. vel μεταβάλλεσθαι in C. et S. C. e *Missâ Chrysostomi*, item *Basilii* nomine nota, (p. 160.) itemque e *Syriacis* Liturgiis (p. 167. 168.) Ex *Aegyptiacis*, cum Graecis, tum Copticis (p. 171.) affertur *transfereudi* vocabulum, cum panes ita transferri dicuntur con-

secratione, vt fiant Corpus Christi, in Liturgia *Coptica*, quae ad S. *Basilium* auctorem refertur, (p. 173.) rogatur Deus, vt per Spiritum S. *transferat dona proposita* (h. e. panem et vinum) *in sanguinem salutis nostrae*, in Liturgia *Alexandrina* S. *Gregorii*: quorum quantam vim putet esse Muratorius, post videbimus: ex *Aethiopica* denique ea, quae *Apostolica* vocatur, locus, in quo Christus rogatur, vt panem calicemque *transmutet, ut fiat corpus eius purum et sanguis eius pretiosus*. Sed in his, vt alii Romanis decretis addiçti, sic *Muratorius* maxime confidit verbis *transformandi, transfigurandi, transmutandi, conuertendi et transferendi*: quibus ille, si veras verborum potestates per interpretandi leges indagare potuisset, nec nimis pueriliter etymologiam et praepositionem in interpretando amplexus fuisset, nihil tale subesse putasset. Igitur, quamquam ab aliis iam de his verbis dictum est, quantum fortasse satis esse possit, tamen de iis nostro modo quaedam disputare placet, praesertim, cum non desinant, ea nobis opponere: si tandem aliquando et illis pudorem incutere, et studiosos ad videndas subtilius verborum notiones his exemplis acuere, denique locis quibusdam veterum scriptorum aliquid lucis adfundere possimus. Sed non alienum videtur, quaedam vniuerse praefari.

Nulla maior graecis, omninoque bonis literis, illata est pestis, quam quod quidam, graece et latine ne mediocriter quidem docti homines, qui e lexicis puerilibus sapere, et ex etymologia verborum, singulis graecorum verborum partibus pueriliter latine vertendis, significationes quaerere cgebantur, ausi sunt profanas manus adferre scriptoribus graecis in latinam linguam conuertendis. Ea enim res peperit monstrosas versiones, quae vel intelligi non possent, vel sensum funderent saepe falsum, frigidum, ineptum. Inde porro iniectus est multis, qui fontes ipsos adire, et ex iis haurire non possent, contemptus praestantissimorum scriptorum, a quibus ingenii humanissimus

nissimus cultus peti poterat: cui enim non ridiculus videatur ille ipse ingenii humani fons, vt *Cicero* adpellat, *Homerus*, ita latine loquens? Et cum in Philosophis, *Platone*, *Aristotele*, homines stultissimi super istis latinis verbis, cum sua cuiusque vernacula lingua comparatis, philosopharentur, noua quaedam Platonica et Aristotelica Philosophia extitit, quam *Plato* et *Aristoteles*, si iis in vitam redire datum fuisset, non modo pro sua non agnouissent, sed ne intelligere quidem potuissent, etiam si Ciceronis latinitatem omnem secum attulissent. Sed eadem plaga iniecta est libris diuinis, doctrinaeque Christianae, per eos, qui primi instituerunt latinos facere. Hi qui et quales fuerint, mea sententia, nunc non disputabo; alius de ea re, et de vniuersa hac interpretatione latina differendi locus commodior dabitur: illud dicam, homines fuisse vel vtriusque linguae vix mediocriter peritos, vel ea, qua eodem tempore, aut paullo post, *Aquila*, infecti superstitione, vt plerumque verbum de verbo, sed hoc quoque pro qualicunque facultate, neglecta latinae linguae indole et consuetudine, sibi vertendam putarent, id quod nemo, qui reliquias istius versionis inspexit, ignorare potest. Quid igitur accidit? Primis temporibus, cum religio Christiana maxime esset apud Iudaeos, isti rationi adfuetos ac deditos, et omnium adeo linguarum praeter suam contemptores, placuit, fuitque apud hos certe tolerabilis, qui comparandis verbis latinis cum suis facile istam latinitatem intelligebant. Placuit vero non Iudaicae originis hominibus modo, sed etiam ex alia gente, qui vel a pueris ei essent adfueti, et rerum praestantia occupati, verborum vitiis non admodum offenderentur, sicuti boni illius *Augustini* stomachus *offsum* (pro osse) non modo facile concoquebat, sed id etiam ab *Hieronymo* sibi ereptum aegre ferebat; vel qui ipsi latinitatis parum periti, in sermone sibi omne genus barbarismi et soloecismi indulgerent, nec eos in aliis animadverterent. Sed paullatim coepit displicere elegantibus

B d

homi-

hominibus, atque, vt ego arbitror, ipsi *Damaso*, Pontifici Rom. homini, vt *Hieronymus* (de script. Eccl.) vocat, elegantis ingenii, qui etiam elegantes et venustos versus scriberet: vt non modo, quod libri nimis variarient, sed etiam, quod genus dicendi rideretur, verendumque esset, ne contentus ille a verbis ad res, qui facilis et brevis transitus est, veniret, correctionem *Hieronymo*, eruditissimo viro et linguarum peritissimo, manderet. Quid? cum bonae literae ante haec tria secula restitui coepissent, non satis constat, eruditissimos quosdam homines, *Lazarum Bonamicum*, *Angelum Politianum*, *Petrum Bembum* et *Iac. Sadoletum*, illos elegantiorum literarum Doctores, hos vero etiam Ecclesiastici ordinis homines et Theologos, contemtim de Psalmis Daudicis et Epistolis Paulli locutos esse? non quo illi Daudem et Paullum spernerent, quos si aut sua lingua loquentes audiissent, et satis hebraice docti fuissent, vt intelligere possent, quorum neutrum illis contigisse satis scimus, aut saltem per interpretem *Buchananum* et *Castellionem* cognouissent, vehementer admirati essent: sed quod istam graecohebraicam latinatam ne intelligere quidem possent, nedum probarent. Nam *Horatius* illo, qui *Pindarum* in coelum ferebat laudibus, et imitari studebat, si nihil aliud quam *Erasmi Schmidii* absurdam versionem vidisset, eundem illum bonum *Pindarum*, siue potius miserabilem *Schmidium* abiecturus erat. Sed vt veniat eo, quo tendebat, oratio, longe maius, certe latius patens illud malum est, quod ea interpretandi ratio generauit dogmata abhorrentia a veritate, per quae turbatae sunt Christianorum mentes, et dissidia, nulla humana ope componenda. Mihi quidem videtur terribilis illa et abhorrens ab omni humano sensu decreti absoluti opinio nunquam in lucem ventura fuisse, nisi ²²¹ *Augustinus* infelix illud praedestinationis verbum, ex etymologia τῷ προορισμῷ factum, nimis amplexatus esset, et suis potius partibus ponderasset, quam consuetudine Grae-

Graecorum, qui in suo verbo non magis tale quid vnquam viderunt, quam Latini veteres, in suo. Sed ille ignoravit graecas literas, quas nimis sero, atque admodum leuiter, attigit. Similesque noxas dedere interpretes veteres latini *Irenaei*, *Origenis*, *Gregorii Nysseni*, aliorumque Graecorum Ecclesiae Patrum, pessimi verborum latinorum opifices, e quorum fabrica multa stolidissime ad graecorum verborum etymologiam efficta prodire, vt *transcorporatio*, *transcorporatus* (e μετασώματῶσις, et μετασώματαθεῖς,) *transelementatio* et similia. Hos recentioribus temporibus imitati sunt, qui Patrum Graecorum scripta cum versione latina edidere: qui hanc sibi legem videntur scripsisse, vt ne aliter verterent e praepositione, vt alias taceam, μετα composita, quam per *trans* et propria alterius verbi interpretatione seruata: vnde in *Cyrilli*, *Basilii*, *Nysseni*, aliorumque libris, quibus frequens vsus verborum μετασχηεῖν et μετασχηεῖσθαι, pro *commutare utcumque*, vel *instaurare*, reperiatur ista verba nunquam aliter exprimi, quam per *transelementare* et *transelementationem*: et alia similiter. Iam in nonnullis hoc tolerabile erat, vbi etiam vetus consuetudo latina ferret: sed illud hinc incommodi ortum, quod Theologistae bonarum literarum rudes in talibus argutati sunt, et partes verborum ad literam, vt male vocant, hoc est, puerili ratione, missa consuetudine graeca et vetere latina, interpretati, dogmata noua procuderunt, eaque sanctis Ecclesiae viris obtrudere conati sunt, quibus nihil tale in mentem venerat. Haec est vera sed admodum sordida origo famosae istius, et non modo a sacris literis, sed etiam ab communi et omni aurium humanarum sensu abhorrentis transubstantiationis: haec sentina, vnde pleraque, et ab aliis, et ab *Muratorio* hausta sunt, quae ad fucandam hanc Helenam scilicet, velut e Patrum sanctorum scriptis et e Liturgiis antiquis, proferuntur. Quae nunc age separatim consideremus.

Ac primum occinitur nobis μεταβολῆς s. *transmutationis*, *conuersionis*que verbum, vt haud dubium μεταστώσεως olim creditae argumentum: sed ita, vt ad firmandum nihil nisi verba ipsa proferantur graeca aut latina. Enimuero verba haec frequentari in illa re a veteribus, id quidem nullam dubitationem habet: quo sensu dicantur, id vero dubitari solet. Iam cum toties demonstratum sit ab *Albertino*, *Claudio*, *Blondello* et aliis, a τε que, VIR VENERANDE, exemplis perspicuis, ex vno *Aeliano* pluribus, quam late pateat μεταβολῆς potestas, et quam saepe qualemcunque nouationem significet: legitima disputandi et digna tali viro ratio postulabat, vt istis locis aliquid inesse ostenderet amplius, demonstraretque, ni substantiae ipsius conuersio intelligeretur, nullum sensum commodum aut consentaneum doctrinae Christianae, sed frigidum et ineptum relinqui. Sed nihil horum illi in mentem venit docere: nisi hoc est docere, cum negat, in iis esse amorem veritatis, aut animum a praedictis opinionibus liberum, qui non videant transsubstantiationem, quae in istis verbis tam perspicue luceat. Enimuero si hoc est dubia ab ambiguitate interpretando liberare, quis est tam rudis omnium literarum, quin omnia explicare possit, quin e quibuslibet verbis quidlibet eruat, cum negantem et dubitantem quemlibet potenti illa demonstratione, *coecus sit, qui videre nolit, hoc in verbis istis esse*, statim coercere possit. Sed quando ille noluit nos hic doctrina sua impertire, nimis alias liberalis ac prope dicam profusus in eo genere: adeo multis et magnis voluminibus rem literarum obruit: nobis, modestis et timidis hominibus, qui non audemus ita pro imperio pronunciare atque edicere de sensu verborum, nobis, inquam, docendum est, Romanam interpretationem ab verbis illis Liturgicis esse alienissimam: quae deinde etiam ad loca Ecclesiasticorum scriptorum graecorum latinorumque licebit conferre.

Apud

Apud Graecos scriptores, praesertim elegantiores, μεταβολή ita late varieque dicitur, ut interdum difficile fuerit interpretibus, veram eius, quoque loco, sententiam adsequi. Auctor consuetudinis eius inprimis fuit, ut opinor, *Thucydides*, qui, cum multa noue insolenterque dixit, tum etiam μεταβολήν vsurpauit durius, modo extendens ad genera late patentia, modo ad formas rerum singulas et angustas contrahens. Sed cum *Thucydidis* tanta esset admiratio, ut in eius lectione assidui essent, qui aut orationibus habendis aut historia scribenda laudem quaerere vellent, atque etiam sententiis eius et verbis exquisitioribus omnes studiose distinguere orationem, factum est, ut cum aliis etiam μεταβολή tali ratione frequentaretur ab oratoribus et historicis, atque inde lectoribus non parua interdum ambiguitas obiceretur. Quicquid est rerum humanarum in vtramque partem, fortuna vtrique, eiusque formae et partes omnes, diuitiae, honores, calamitates belli, victoriae, morbus, recuperata valetudo, mors ipsa, tum, in rebus vitae expertibus, nihil, quod aliquando ortum sit, quod initium habuerit, quod ab aliqua quacunque antegressa causa quomocunque accesserit, quod non μεταβολῆς verbo exprimatur a *Thucydide*, (vid. II, 48. 53. VII, 76. 87.) et eius sequacibus *Polybio*, *Dionysio Halic.* *Iosepho* inprimis, ut Ant. VI, 14. 2. VII, 9. 2. II, 3. XIII, 14. 2. XV, 3. 4. cet. Haec ratio ita fluxit et propagata est, ut sit, ut etiam in communem sermonem venerit, nemoque dubitarit, iis loquendi modis uti, non modo apud Graecos, sed etiam apud Latinos. Haec observatio plurimum profuerit studiosis ad bene intelligendos veteres, hoc est, primum ad indagandum, deinde ad definiendum perspicua ac certa ratione, quid quoque loco in μεταβολῆς nomine intelligi debeat. Etenim, ut apud *Ciceronem* is demum vere intelligit *reipublicae* verbum, qui in loco quoque plane tenet ac dicere potest, vtrum in eo vniuersum imperium vel ciuitas, an pars eius aliqua, aeri-

rium,

rium, leges, magistratus, religio cet. exprimatur: sic μεταβολήν, conuersionem, transmutationem, res nouas, non assequutus est, nisi qui, e proposita obseruationis formula, nominatim definire euentum potest. Vnum o Iustino, l. c. p. 128. locum afferemus, exempli causa, parum vulgo intellectum, sed eundem nostrae causae admirabiliter salubrem. Adscribam autem locum integrum, qui etiam post nobis vsui erit. Consecrationis et distributionis modo ac ritu commemorato, ita pergit Iustinus: καὶ ἡ τροφή αὕτη καλεῖται καὶ ἡμῖν εὐχαριστία -- ἡ γὰρ ὡς κοινὸν ἄρτον, εἰδὲ κοινὸν πόμα ταῦτα λαμβάνομεν· ἀλλ' ὃν τρόπον διὰ λόγου Θεῷ σαρκοποιηθεὶς Ἰησοῦς Χρ. ὁ σωτὴρ ἡμῶν καὶ σὰρκα καὶ αἷμα ὑπὲρ σωτηρίας ἡμῶν ἔσχηεν ἔσως καὶ τὴν δι' εὐχῆς λόγῳ παρ' αὐτῇ εὐχαριστηθεῖσαν τροφήν, ἐξ ἧς αἷμα καὶ σάρκες κατὰ μεταβολὴν τρέφονται ἡμῶν, ἐκείνῃ τῇ σαρκοποιηθέντος Ἰησοῦ καὶ σὰρκα καὶ αἷμα ἐκιδάχθημεν εἶναι. De prima parte huius loci post dicetur: nunc de posteriori videamus. Consecratam τροφήν, panem, aquam et vinum ante vocauerat, et a Diacono distribui in Ecclesia dixerat, eandem (sic prius καὶ capiendum totus contextus clamat) credi esse carnem et sanguinem Christi humanitate induti: ea autem τροφήν ali carnem et sanguinem nostrum. Super his verbis quae disputentur mox commemorabimus. At id fieri ait κατὰ μεταβολήν. De his verbis video tacere interpretes. Latina versio recte illa quidem interpretatur *per mutationem*: sed vereor, vt illam ipsam versionem et auctores et alii satis intellexerint: ita ea verba, in disputatione de hoc loco, negligunt et Romani et caeteri. Ex nostra autem illa ratione consideranti apparebit, sic planius interpretanda esse: *per concoctionem*: illa nutrimenta, panis, vinum, aqua, alunt corpus nostrum per concoctionem, at eadem sunt caro et sanguis Christi, et hactenus alunt animam per fidem. Μεταβάλλειν τροφήν pro *concoquere* est apud physicos et medicos graecos. *Aristoteles* de vsu partium III, 14. de ventriculo exponens, conuenisse

venisse ait, vt non idem esset locus τῆς τε ἀπέπτυ τρο-
 φῆς καὶ τῷ περιττώματος, sed vt esset locus proprius, ἐν
 ᾧ μεταβάλλει, h. e. vbi fieret πέψις s. concoctio; quod
Nemesius plenius expressit μεταβάλλειν εἰς χυμὰς, de Nat.
 Hum. p. m. 110. Sicut alii coniungunt μεταβάλλειν
 καὶ πέψαι, sic alii πέψαι καὶ χυλοποιῆσαι, vt *Theophilus*
Protospatharius de Fabrica Corp. Hum. II, 4. (ap. *Fabric.*
B. G. Vol. XII.) quamquam non bene hic χυλοποιῆσαι:
 is enim locus non est ventriculus. Inde fluxit genus
 dicendi et Latinos, vt et *Cicero* de Nat. D. II, 54. ventri-
 culum diceret *mutare et concoquere*, quod receperit, κατὰ
 συνωνυμίαν iungens vtrumque, et more suo, explicans
 obscurius per notius vocabulum: cum *Lactantius* de Opif.
 D. c. 11. *percoquendi* verbo solo contentus sit. Iam, sic
 intellectis *Iustini* verbis, etsi sua sponte patet, eum recte
 fronte pugnare cum Romanorum opinione, tamen post,
 vbi de Patrum Eccl. locis disputatio erit, eius nobis vsus
 futurus est. Nunc illud modo voluimus efficere, vt
 intelligeretur, in ipso verbo μεταβολῆς, et hinc ductis
 latinis, *mutionis, transmutationis, conuersionis*, nihil
 praesidii esse Romanae sententiae, et studiosos ad id recte
 vbique intelligendum acuire.

At vim fortasse hanc accipiet e locis iis, vbi commu-
 tationis istius modus pressius exprimitur: in quibus prin-
 cipatum tenet *Cyrilli* ille in Catech. Myst. IV. init. τὸ
 ὕδωρ ποτὲ εἰς οἶνον μεταβέβληκεν ἐν Κανᾷ τῆς Γαλιλαίας,
 οἰκίῳ νεύματι καὶ ἐκ ἀξιοπιστός ἐστιν οἶνον μεταβαλὼν εἰς
 αἷμα; quo prolato, velut in certo triumpho proclamat
Muratorius: *Habes hic in meridie positam Catholicorum*
transubstantiationem! Sed huic quoque loco respondere
 dudum viri docti, inprimisque copiose *Albertinus* p. 24.
 negans, hanc conuersionem vini in sanguinem Christi
 necessario ad substantiam referri. In quo profert magnam
 copiam locorum aliorum e scriptis Patrum, in quibus et
 ipsis μεταβολὴ vnus rei in aliam commemoratur, vt
 μεταβολὴ τῷ σωτῆρος εἰς τὴν θειότητα, ex *Eusebii*
 De-

adiungeret, vt, quemadmodum corpus Christi, propter coniunctionem cum diuina λόγος natura, verba sunt Nysseni ex Oratione magna Catech. c. 37. si tamen est Nysseni: πρὸς τὴν Θεϊκὴν ἀξίαν μεταποιῆθῃ, in diuinam dignitatem conuersum esset, proptereaque Deus et esset et diceretur, non tamen per se, sed propter coniunctionem cum diuina natura, ita panis consecratus, ὁ τῷ λόγῳ τῷ Θεῷ ἀγιάζομενος ἄριστος, εἰς σῶμα τῷ Θεῷ λόγῳ μεταποιῆται, in corpus Christi conuerti crederetur, dicereturque corpus Christi, non per se, sed quod esset cum corpore Christi coniunctus. Sed hanc Patrum Ecclesiae, omninoque veteris et incorruptae Ecclesiae mentem fuisse, altero capite intelligetur. Sed Liturgiarum concinnatores ita sensisse, planissime probem loco Canonis Ambrosiani, a Saxio V. C. ex antiquo Missali Ambrosiano descripto, et ad *Muratorium* misso, in quo sacerdos post consecrationem, qua illam μεταβολὴν ἐσιώδῃ fieri putat cum Ecclesia Rom. *Muratorius*, tamen Deum rogat, vt mittat Filium suum, vt veritatem Dominici corporis et sanguinis hauriant κοινῶντες. Quibus precibus quorsum opus, si iam conuersa est in corpus Christi panis substantia, si e vino facta est substantia sanguinis. Illud addere, quamquam leue est, non alienum videtur: quod *Muratorius* se desiderare, ait, in *Bingamo* animum ad veritatem sincere quaerendam compositum, qui se dicat in *Nysseno* quaesiuisse, quae conuersioni Romanae fauerent loca, nec inuenisse, cum talia sint plura in eius scriptis, e quibus vnum affert illum, e Catechesi magna; in eo iniuriam ipsi facere. Non minus enim quam *Muratorius* illum locum, et alia similia apud *Bellarminum*, *Perronium*, atque etiam *Albertinum*, repererat *Bingamus*: sed in eo ipso nihil, quod substantiae conuersionem iuaret, reperit, vt nec nos villo modo videre possumus. Satis dictum, in hoc quidem capite, de μεταβολῇ, transmutatione et conuersione: ad μεταμόρφωσιν, transfigurationem et transformationem, cui multo magis confidit *Muratorius*, transeamus.

Ac

Ac verbis quidem his vti Liturgias et Ecclesiasticos scriptores, notum diu fuit, nec admonitore opus erat *Muratorio*. Illud bene fecisset, si iis recte interpretandis dignum se praestitisset fama nominis sui. Nunc nulla in alia re magis se turpem dedit. Ac primo vehementer confirmata est opinio, quae dudum insedit animo, totam hanc transubstantiationis fabulam natam esse e Metamorphosis Ovidianis. Imperiti ac stulti Theologistae ista μεταμορφώσις, transformationis s. transfigurationis, notione imbuti a pueris, cum in veterum Theologorum libris eadem verba reperissent, iis mythicam istam notionem subiicere maluerunt, quam Christianam et e sacris literis haustam. Quas si audire voluissent de Christi μεταμορφώσις, itemque de μεταμορφώσις Christianorum in εικόνα Dei tradentes, intellexissent sane ista verba, praeterquam in fabulis, ad substantiae commutationem non pertinere. Quanquam *Muratorius* maius flagitium patrauit, qui ad Romanae transformationis commentum confirmandum obscenissimo Neronis facinore abusus est. Sed ipsa audiamus, quamquam parum caste loquentem, Catechetam Mutinensem. Capite decimo, prolatis Ambrosiani Canonis excerptis, adiungit loca ex *Ambrosii* scriptis, in quibus est transfigurationis in re Eucharistica commemoratio. Dehinc quaerit: *quid sit transfiguratio et transfigurari Ambrosio?* respondetque: *Utique substantia's conuersio et mutatio alienius rei in alteram.* Quomodo hoc docet? Audi, inquit, *Suetonium*, haec scribentem (in Nerone c. 28. de Nerone) *Puerum Sporum, ex selectis testibus, etiam in muliebrem naturam transfigurare conatus est.* Non impium est, hoc tam infandum facinus cum re sanctissima comparare? Talis est illa Eucharistica transfiguratio? Ergo Sporus desuit esse puer, et conuersus est in naturam et substantiam puellae? Sed obscenum illud et ab hac re alienissimum Neronis piaculum mittamus. Quid amplius? Audi *Plinium* inquentem (H. N. IX. 3.) *sole Cancri signum transeunte, cancerorum, cum exanimati sint, corpus transfigurari*

Ernesti Opusc. Theol. C gurari

gurari in scorpiones narratur. Fabulam idem Plinius censet (VIII, 22.) homines verti in lupos, homines transfigurari in lupos. Haec e mediis fabulis sumta, hinc ipsa adeo transsubstantiatio sumta. Sublicitur ad extremum locus Tertulliani, velut omnium luculentissime vim verbi huius explicantis, e Libro c. Prax. (c. 27. in ed. 2. Pamel. p. 659. C.) transfiguratio autem interemptio est pristini: omne enim, quod transfiguratur in aliud, desinit esse, quod fuerat, et incipit esse, quod non erat. Atque hunc locum nos heterodoxi legere ac relegere iubemur, vt intelligamus, quam bene nobis sedeat tam praeфраcta Impanationem venditare et transsubstantiationi ob nouitatem verbi insultare. At o! bone, quam vehementer falleris! Vis ergo hoc pro certo poni, vt transfigurationis verbum semper e Tertulliani praescripto accipiatur? Quid fiet primum Seruatori nostro Iesu Christo? qui in monte Itabyrio μεταμορφώθη, transfiguratus est: vt vetus interpretes habet, et Tertullianus non vno loco c. Marcionem? An hic quoque e definitione Tertullianea desinit esse, quod fuerat? et in aliam naturam ac substantiam est conuersus? Quid? animi nostri per fidem et sanctitatem μεταμορφώσις, apud Paulum ad Romanos c. 12. estne animi nostri interemptio et substantiae mentis in aliam conuersio? Ipse profecto Tertullianus nolite verba sua ex hac lege iudicari. Quid enim? Cum a Satana hominis spiritum malitia transfiguratum dicit (de cultu fem. L. II. p. 176. D.) cum licentiam artis transfigurare materiam vulgarem, lignum, saxa cēt. in Deos: (Apologet. c. 12. p. 14. B.) cum id, quod in nuptiis accidit virgini, carnis transfigurationem appellat (de Virginib. velandis p. 200. D.) cum transfigurari Satanam in Angelum lucis, auctore Paulo, dicit (adu. Marcion. V. p. 600. B.) et Pseudapostolos atque hypocritas transfiguratores sui, (ibid. A.) in his igitur putemus istam suam definitionem in animo habuisse, conuersiones substantiarum cogitasse? Ridiculus vero sit, cui tale quid in mentem venerit:

Sed

Sed ipsas Liturgias de hoc verbo audiamus, ut vanitas et inscitia ex eo aliquid pro sua opinione colligentis *Muratorii* appareat. In Sacramentario Gelasian. p. 514. extr. in benedictione Presbyterorum, haec verba sunt: *ut corpus et sanguinem Filii tui immaculata benedictionis transforment*: quae totidem literis sunt in Missali vetero Francorum, subiecta collectioni *Murator.* p. 668. extr. sicut in Missali Gothico. p. 534. extr. Sacerdos orat, *ut fiat Eucharistia legitima* - - - *in transformatione corporis ac sanguinis Domini Dei nostri I. C.* Si transformatio et transfiguratio, e *Tertulliani* formula, quam tantopere probat *Muratorius*, capienda est, iam ipsum corpus Christi et sanguis interimetur et in aliam substantiam transibit: quod cuius aures non reformidant et abhorrent?

Iam in Ambrosianae Missae excerpto (p. 131.) cuius supra mentio iniecta est, *Panis et vinum in Sacramentum corporis sui et sanguinis a Christo*, instituyente Eucharistiam, *transformatus* dicitur; quae forma et in aliis Missis occurrit: cui par est illa *Isidori Hispalensis* de Eccl. off. 1. 18. cum, *panem et vinum visibilia quidem esse*, dicit, *sed sanctificata per Spiritum S. in Sacramentum diuini corporis transire*. Non hinc clarum est, consecratione effici, non ut panis aboleatur, et corpus Christi in locum eius succedat, sed ut aptus fiat Sacramento, ut sanctitatem accipiat hinc, quod cum eo aut per eum Christianis contingat frui corpore Christi? Denique *transformationem* nihil aliud esse, quam *ἀγίασμός*, clarum est e Missa sancti *Leudegaris Martyris*, in qua sacerdos orat: *ut descendat benedictio tua super hunc panem et calicem in transformatione Spiritus Sancti*. Spiritus Sanctus e mente veteris Ecclesiae, in Missarum formulis expressa, panem et vinum *ἀγιάζει καὶ μεταβάλλει*, ut catechesium Mystagogicarum auctorem loqui supra vidimus, vel *μεταμορφῶν*: quae sunt synonyma omnia e legitimae interpretationis praeceptis.

Longiores fuimus in duobus verbis, quae maxime in hac controuersia iactantur, et imperitis facillime fecum faciunt. In ceteris licebit esse breuioribus. Post superiora autem illa plurimum tribuit ad causam suam obtinendam verbo *transferri et transire*, cum panis et vinum dicuntur vel transferri, vel transire in corpus et sanguinem Iesu Christi, ut in Liturgia Alexandrina et S. Gregorii (ap. Renaldot. T. I. p. 31.): *Mitte super nos gratiam Spiritus S. qui sanctificet et transferat haec dona proposita in corpus et sanguinem salutis nostrae*: qua in Missa etiam commutari proposita dona dicuntur, et *Iesus panem facere corpus, calicem autem sanguinem suum*. Eo loco commemorato, subiicit demonstrationem potentissimam hancce: *Qui in eiusmodi verbis ac petitione transmutationem donorum ab antiquis depraedicatam non agnoscit, libero animo haec minime contemplatur*. Ac talis semper est, tales omnes eius demonstrationes. Nihil ille de usu loquendi, ad rationem Grammaticorum: nam Theologum agit. Nempe in Grammatica ratione ipsi ante in aliis libris saepe res male cesserat. Potentiores sunt atque efficaciores oratoriae siue sophisticae potius demonstrationes: *Coecus fit, qui videre nolit, hoc esse in verbis istis: habes hic in meridie positam transubstantiationem. Haec Liturgiarum excerpta nihil aliud exposcunt nisi sincerum lectorem et veritatis unius avidum, ut intelligat, quid ipsis vetustis seculis Ecclesia Rom. de Eucharistia tradiderit et crediderit. Iam tot loca adduximus ex Eccl. lat. Liturgiis - ut cuicunque sincere agenti constare possit, non aliam fuisse Ecclesiae veteris mentem cet.* At doctissimi viri, istorum verborum hanc vim non esse, clamant, consuetudinem loquendi istorum temporum consulendam esse, eam docere aliter, quam Romani velint, ista verba intelligenda esse. His vero ille non dignatur respondere, non immittere se istis Grammaticis minutiis et verborum concertationibus: res scilicet verbis praefert, cum magnis Philosophis, et reales istas demonstrationes verbalibus.

Sed

Sed ut ad rem redeamus, remittit nos ad extremum ad *Renaldotium*, quem dudum, ait, ostendisse, quam futile ac violenta interpretatione *Cl. Salmasius* eludere ac depravare conatus fuerit in his verbis mentem perspicuam ac fidem Aegyptiacae Ecclesiae. Talia scilicet designant Grammatici et Critici, toto coelo, ut aiunt, a Theologis diuersi, cum suis minutis interpretationibus verborum. At *Renaldotius* (T. I. Liturg. Or. p. 396.) nihil aliud fecit, nisi ut ista verba male ab *Salmasio* (Epist. p. 72.) versa ex Arabico esse ostenderet: deinde eius interpretationes μεταβαλλειν, μεταποιειν, μεταφορικειν, μεταφωτισκειν, alienas esse a mente Patrum ediceret, sed id se non agere profiteretur, ut accurate eas refelleret. Nec id agebat *Muratorius*. Nos autem desideramus hoc, ut ostendatur legitime, verba ista, sanctificet ac transferat haec dona in corpus et sanguinem salutis nostrae, habere hanc vim, ut μεταμωρφωσιν aliquam, quales in physicis queniunt, ut in Ouidiano Opere descriptae sunt, quae substantiam alteram perimat atque proferat nouam, significare debeant: nam veram corporis et sanguinis Christi praesentiam Liturgia hac et aliis Orientalibus firmari accipimus, dante *Renaldotio*, in Diss. de Liturg. Orient. Orig. et Auctor. p. LVII. et accepit dudum *Ignus ο μακαριτης* in Diss. de Liturgiis Orientalium in loco de S. Eucharistia Euangelicae veritati suffragantibus, Propos. V. p. 32. Sed id fieri non posse, plane demonstrari potest. Ac primum hoc mihi debet concedi, illud transferre, quod et in latina Liturgiae *Cyrilli* Copticae versione ap. *Renaldotium* (T. I. p. 48. extr.) occurrit, esse ductum a Graeco μεταποιειν, quod est in *Gregorii* Liturgia graeca (ibid. p. 105. extr.) eiusque adeo esse interpretationem. Nam Arabica versio a Graeco expressa est, et quae ibi est Arabica vox (هزج) nihil aliud, quam verbum μεταποιειν, h. e. μεταβολην, mutationem, significat. Inde fit, ut hoc verbum non efficacius sit, quam μεταβαλλειν, mutare, commutare, siue transmutare, ut Graecum vertit *Renaldotius*,

itur, idque malunt sere, pueriliter amplexi illud *trans*, quasi *transmutare* plus sit, quam *mutare*; quod non esse, nemo nisi rudis linguae latinae neget. Atque etiam imperitiae interpretandi merito reus arguitur *Renaldotius*, qui verbum Arabicum per *transferre* interpretatus est, quod latini neque de mutatione quacunque, neque de conuersione rei vnus in aliam vsurpant, (quamquam etiam in Missali Gothico haec forma occurrit p. 548 extr. et subinde apud Ecclesiasticos scriptores infimae aetatis, vid. *Blondell* sur l'Eucharistie c. 5. p. 185. 186.) estque a tota hac re alienissimum: socordiae autem *Muratorius*, qui ista exscripsit e versione *Renaldotiana*, negligens securusque linguae. Quanto melius *Salmasius* fecit, cum *contuere* interpretatus est. Sed imperiti linguarum, qui verba magis, quam vim vident, cum legunt *panem transferre in corpus*, facile inducuntur, vt nescio quam emphasin ac vim in isto verbo esse putent, vt facere videmus omnes linguarum non satis peritos, quibus omnia plena sunt emphasium. Ac fortasse hoc quoque spectauit callidus interpres. Sed nihil agit. Illud *transferre in C. et S. I. C.* nihil aliud est, quam quod supra docuimus esse *transformare et transmutare in C. et S. I. C.* quod indicat etiam locus alter in *Cyrilli* Liturgia, vbi sacerdos orat, vt mittatur Spiritus Sanctus *super hunc panem et super hunc calicem, vt purificentur et transferantur: et hunc panem quidem faciat Corpus C. et.* Hic *purificare et transferre* nude ponuntur: eaque verba expressa sunt & Graecis ὀψιάζειν καὶ μεταβάλλειν ἢ μεταποιεῖν: quorum coniunctio quam vim habeat, supra dictum est, e formula Catechetae Graeci, *quidquid Spiritus S. attigerit, id ὀψιάσαι καὶ μεταβέβληται*. Adde tertium in Liturgia Coptica *Basilii: benedic eos (panem et calicem) sanctifica eos, consecra eos, transfer eos, ita, vt panis quidem et.* vbi quatuor verba idem significantia coniunguntur. Haec dictis C. *Iani* (loco ante indicato p. 57.) admodum leuiter defuncti disputatione hac, qua ostenderet non esse in
Litur-

Liturgiis Orient. transubstantiationem, addi commodè a studiosis poterunt.

Restat, vt dicamus de locis iis, vbi *Spiritus Sanctus* dicitur *panem facere, conficere corpus Christi, vinum autem sanguinem Christi*, vbi *panis fieri caro s. corpus Christi*; quae sunt permulta in Occidentalium et Orientalium Liturgiis. Has autem loquendi formas non pertinere ad substantiae conuersionem, ita saepe dictum est a multis, *Mornaeo, Albertino, Claudio, Blondello*, nostratibusque Theologis, vt taceat aliquid addere. Sed virorum praestantissimorum opera his se finibus continuit, vt aliis Ecclesiasticorum Scriptorum locis ostenderent, verum esse quod *Cyrillus Alex.* in Thesauro assert. 20. dixit: τὸ γινέσθαι ὃ πάντως φύσεως σημαίνει μεταβολήν. v. *Albertin.* p. 509. a. Mihi autem optime Romana ratio refelli, et vera eius formulae vis reperiri posse videtur, si originem eius indagemus et consideremus. Ego autem mihi dudum habui persuasum, hanc *Φεάσι* arcessitam esse e Iohanneo Euangelio, et verbis illis notissimis, ὁ λόγος σὰρξ ἐγένετο. In eam sententiam duae me res maxime impulere. Prima, eaque grauissima, quod antiquissimi Scriptores Ecclesiastici mysterium hoc Eucharisticum comparant cum mysterio ἰσαρκώσεως, simillimamque esse vtriusque rationem pronuntiant, denique illud ex hoc intelligi, explicarique volunt, vt altero capite videbimus. Antiquissimus eius rei auctor est *Iustinus*, loco supra proposito, qui, quemadmodum ὁ λόγος, Filius Dei aeternus, homo factus sit (σαρκοποιηθεὶς) sic panem illum et vinum εὐλογημένον, quo per concoctionem corpus nostrum alatur, illius σαρκοποιήσεως Iesu σὰρκα καὶ αἷμα esse dicit. Altera est, quod et in ipsa illa comparatione, et alias, cum verbo γίνεσθαι, fieri et facere vtuntur in hac causa, libentius prope carnem, quam corpus dicunt. Iam si inde fluxit forma ista loquendi, quis non videt, inde etiam interpretationem eius repetendam, existimandumque esse, panem ita fieri corpus Christi, vt

cum spectabili pane, corpus Christi, inadspectabili quadam ratione, coniungatur. Quod confirmari potest loco Liturgiae S. Gregorii ap. Renaldotium (T. I. p. 35. med. et 118.) *Purifica nos, inquit sacerdos, sicuti sanctificasti has oblationes propositas, et fecisti illas inuisibiles ex visibilibus* cet. Etenim clarum est, horum verborum sensum esse: fecistisque, ut pani et vino visibili inuisibile quid, h. e. Corpus et S. C. adiungeretur. Nam oblationes adhuc erant visibiles, cum eas velut digito demonstraret, *has oblationes.*

Atque ita arbitror satis perspicue esse demonstratam, nihil eorum, quae Muratorius attulit e Liturgiis antiquis, vim aliquam habere ad labefactandam nostrae quidem Ecclesiae sententiam, et stabiliendam contra illam, Romanae Ecclesiae tantopere probatam, *μεταμορφωσιν*. Nihil amplius a nobis postulari potest, qui nihil aliud, quam Muratorianae disputationis confutationem promissimus. Verum non agemus e syngrapha: sed aliquod huic disputationi velut auctarium adiiciemus, ostendemusque, nostrae Ecclesiae sententiam Liturgiis praeclare firmari: si firmamentum est in veteris Ecclesiae consensu. In quo praeterrittam vniuerse docere id, quod Blondellus instituit demonstrare (sur l'Eucharistie c. 21.) Romanam illam conuersionem aduersari Missae Canonis: in qua ille demonstratione suae magis Ecclesiae causam priuatum egit, quam communem et nostrae. Si *coniunctionem* panis et corporis Christi clare inesse Liturgiis ostendero, illud quoque sua sponte intelligetur. Sed ut ab aliis hanc diligentiam postulamus, ut ne verborum sono decepti, affingant Liturgiis alienam sententiam, ita nos quoque eam lectoribus nostris debere putamus. Itaque non utomur Mozarabicae Liturgiae verbis, in quibus *Coniunctio corporis et sanguinis Christi* memoratur: Et *coniunctio corporis et sanguinis D. N. I. C. fit summentibus et potantibus nobis ad veniam*. Nam ibi *coniunctionem esse κοινωνίαν*, quae fit

fit edendo: atque bibendo, *perceptionem*, etiam e Concilio Toletano quarto, quod Sec. VII. fuit, Can. 18. patet: *Post orationem Dominicam et Coniunctionem Panis et Calicis benedictio sequatur.* Ille autem locus est plane evidens, cum in Iacobitarum Liturgia, et quidem e Codice Colbertino (ap. Renald. T. II. p. 368.) in παραφράσει verborum Dominicorum sic sacerdos ait: *Quotiescunque sacrificio hoc divino reficiemini, et panem hunc manducabitis, calicemque hunc bibetis, ego in medium vestri veniam, super thronum sedens, PANEMQUE ET VINUM PER VNIONEM ASSUMENS*, atque in patena et in calice habitabo etc. Quo loco ipse Renaldotius (p. 369.) fatetur, in Syriaco exemplo idem esse verbum, quo vnionem λόγῳ et σαρκὸς in Christo exprimant, et hanc esse solennem Iacobitis doctrinam, ut panem et vinum dicant fieri corpus et sanguinem I. C. per assumptionem et vnionem, sicut corpus humanum e carne et sanguine Marie formatum, factum est corpus Verbi Dei, assumptum et vnitum Verbo Dei: id quod etiam locis ex Homiliis Syrorum docet. Huic accedat locus supra commemoratus e Liturgia S. Gregorii. Sacerdos post consecrationem primum dicit: *praeparasti nobis panem coelestem, corpus hoc tuum sanctum* etc. Post orat: *Purifica nos, Domine, sicut sanctificasti has oblationes propositas, et fecisti illas invisibiles ex visibilibus.* Si praesens est corpus Christi, neque figurate, sed vere et proprie, quod credidisse Orientales pluribus Liturgiarum locis docet Janus Diff. c. Prop. V. patetque et hinc e verbis *hoc corpus tuum*; praesensque adhuc est panis cum vino, *has oblationes*: quae alia est ratio istius rei explicandae, nisi per vtriusque coniunctionem? In Liturgia Graeca S. Gregorii Alexandrina (p. 103.) sacerdos ait: *σύ μοι τὴν μυστικὴν παραδωκὰς τῆς σαρκὸς ἐν ἁγρῷ καὶ οἶνῳ τὴν μέθεξιν*: tu mihi tradidisti mysticam hanc corporis tui cum (sic malim quam in: centies enim in Novo Testamento in pro σύν) pane et vino perceptionem: quae sunt prorsus Lutherana.

C §

Et

Sacramenti verbo nihil aliud significari, quam *signum visibile*, continens donum diuinum: panem et vinum esse signa, quae corpus et sanguinem Christi contineant, etiam post consecrationem, quanquam eorum substantia sit in corpus et sanguinem Iesu Christi conuersa.

Primo, quanquam in omni sacramento, quod quidem proprie a Theologis dicitur, est signum visibile, tamen sacramenti vox ipsa, praesertim hoc in loco, non sonat tale quid: alioqui dicendum foret, mox *mysterium* idem significare. Nam clarum est, quod ante *Sacramentum C. et S.* dicatur, idem post *mysterium C. et S. C.* vocari. Poterat discere rem e loco *Augustini*, de quo mox (p. 110.) *ista fratres ideo dicuntur sacramenta, quia in iis aliud videtur, aliud intelligitur*: ibidemque, *panis et calix magnae rei sacramentum continere* dicitur. Sed hoc causae neutri neque obest, neque prodest. At illud mirum est, panem et vinum, cuius substantia perierit, tamen signa visibilia esse. Abhorret enim a sensu communi, substantiam rei perisse et tamen eius attributa omnia sensibilia mansisse. Profecto *Facundus* nihil aliud cum omni vetere Ecclesia sentit, quam quod nos *Lutheri* e disciplina statuimus: panem quidem et vinum, quae corpus et sanguis Christi dicantur, proprie, *καὶ ἀγγέλλειν*, non esse C. et S. C. quod est sane verissimum, alias non esset verus panis et verum vinum: sed dici tamen recte corpus et sanguinem Christi, quia utramque in se contineat, siue cum utroque coniuncta sint: quod ille bene vocat *mysterium* et *sacramentum*, quia ea coniunctio est sanctissimum *mysterium*, quod omnem vim mentis humanae superat. Atque hoc ita euident est, ut *Muratorius* ipse in eius loci explicatione repente Lutheranus factus sit. Audiamus ipsum: *Ergo etiam si sacramentum, id est, signum visibile C. et S. D. proprie non sit ipsum Corpus et S. D. qui tamen sacramentum sumit, veram et non figuratam Carnem et S. C. recipit, quid Species panis et vini (s. panis et vinum) reuera in se mysterium, h. e. arcanum, tremen-*

tremendamque praesentiam corporis et sanguinis Domini continent, et nos in pane et poculo consecrato, carnem eius et sanguinem sumimus, uti disertus Facundus testatur. Obtestor omnes, qui haec legunt, an haec non sint ymoia Lutherana. Idque ipse Muratorius, ea vis est veritatis perspicuae, sensit. Itaque addit: Fatendum nihilominus est, quemquam ex hoc Facundi loco posse inferre Lutheranae sectae, ut aiunt (calumniatores) impanationem, quasi in Eucharistia panis et vinum, servata sua substantia, cum veritate corporis et sanguinis Domini coniungantur. Quid ergo impedit, quo minus hoc ex illo loco colligi debeat? Quia perpetuus moris fuit, panem et vinum appellandi consecratas oblationes, etiam si crederent, nullum panem et vinum amplius adesse. O! mirabilem Dialecticum! Hoc autem ipsum est, de quo quaeritur, quod hoc ipso loco refellitur. Quaeritur scilicet, an panis et vinum proprie in Eucharistia, etiam a consecratione, dicantur. Ad hoc vincendum affertur hic Facundi locus, in multis aliis. Quid noster? Fatundus non proprie vult, panem adesse: quia in hac re non proprie dicitur.

Alter locus est ex Augustini Sermone ad Neophytos, servatus a Fulgentio; in quo Berengariani magnum suae causae praesidium ponunt, unde iam ab Albertino ante Binghamum prolatus est. In eo accipimus, quod Muratorius defendit, nihil esse praesidii isti sententiae. Falli tamen ipsum credimus cum Perronio in eo, quod aliquid excidisse statuit, velut aliter expediendi se inde facultas non detur. Adponemus locum ipsum: Hoc quod videtis, Augustinus dicit Neophytis, in altari Dei, etiam transacta nobis vidistis: sed quid esset, quid sibi vellet, cum magnae rei sacramentum contineret, undum audistis. QVOD ergo VIDETIS PANIS EST ET CALIX, quod vobis etiam oculi vestri renunciant: quod autem fides vestra postulat instruenda, PANIS EST CORPUS CHRISTI, CALIX SANGVIS CHRISTI. Tum neophyti inducuntur interrogantes, quomodo, cum

cum Christus sit in coelo, panis esse possit corpus Christi cet. Ad haec *Augustinus* respondet sic: *Isthaec ideo dicuntur sacramenta, quia in iis aliud videtur, aliud intelligitur. Quod videtur, speciem habet corporalem, quod intelligitur, fructum spirituales. Corpus autem Christi si vis intelligere, Apostolum audi dicentem fidelibus, Vos autem estis Corpus Christi et membra, mysterium vestrum in mensa Dominica positum est cet.* In hac igitur posteriori parte aliquid excidisse volunt, quod responsio Doctoris non videtur congruere interrogationi neophytorum. Si Crisostomus exercere libeat, in prima parte dicam insititia esse verba *Panis et Calix*, legendumque: *quod fides vestra postulat instruenda, est Corpus Christi, sanguis Christi*: in quo non admodum difficiles me puto habiturum eos, qui facultatem de talibus iudicandi habent. At in altera parte nihil desidero; omnia integra puto. Sed intelligendum est, *Augustinum* ante oculos habuisse et in animo locum *Pauli* in Epistola ad Corinthios prima X, 17. *ἐκ αἵματος ἐν σῶμα οἱ πολλοὶ ἰσμεν* cet. et fructum percepti corporis et sanguinis C. exprimere maluisse, quam corpus et sanguinem ipsum *). Intelligi enim e disciplina Christiana neophytis ante tradita putabat sua sponte, huius coniunctionis cum Christo, et in Christo vinculum esse perceptionem eiusdem corporis et sanguinis Christi. Non demonstrare vult, quomodo Christi corpus possit esse praesens in Coena S. quis enim hoc potest? sed esse haud dubie praesens, quod satis est: Sane, inquit, corpus et sanguis Christi non cernuntur: sed inuisibili quadam ratione adsunt, eamque ipsam ob causam haec sacramenta, mysteria, dicuntur, quia per fidem modo intelligitur ista praesentia, nixam verbo Christi, sed id quod intelli-

*) Simillimus est locus *Gaudentii* Brixiani, tr. 2. ad Neoph. quem nemo non integrum agnoscit: *In pane accipitur figura corporis Christi, quia nominamus e multisitudine humani generis unum esse corpus effectum.*

intelligitur, corpus et sanguis Christi, habet fructum hunc, ut omnes unum Christi corpus simus. Atque ex hoc ipso, quod per S. Coenam unum corpus Christi fiunt Christiani, intelligi docet, praesens esse inaccessibile corpus Christi. *Si ergo vos, inquit, estis corpus Christi et membra, mysterium vestrum in mensa Dominica positum est:* quo scilicet percepto fiunt Christiani corpus et membra Christi. *Mysterium vestrum* certe non est panis adspectabilis, sed corpus et sanguis Christi. Si autem corpus Christi tantum figuratum s. ideale perciperemus in S. Coena, quomodo in mensa Dominica positum diceretur? Sed hoc nihil ad hanc nostram disputationem. Illud autem velim ostendisset, quomodo hic locus cum μεταμορφώσει, panis substantiam tollente, consistere posset. Sed hoc ille transit. Non disputare hic lubebat in hanc partem: *Quod videtis in altari, panis est et calix: quod fides vestra postulat, corpus et sanguis Christi.* Sicut, quod fides postulat, non est mera figura C. et S. C. sic nec, quod oculi vident, est figura inanis panis et vini, sed panis verus, et verum vinum. Eademque verba repetuntur in eodem sermone: *Debetis scire - - - quid quotidie accipere debeatis. Panis ille, quem videtis in altari, sanctificatus per verbum Dei, est corpus Christi.*

Sed fortius telum nobis, Lutheranis, intentatur & Catechesibus Mystagogicis, primum & loco supra commemorato, de comparatione mysterii huius cum vino nuptiali Canae: cui quia ibi iam satisfacimus, eum hic praetermittimus: deinde ex alio eiusdem Catecheseos: *μη προσέχετε ὡς, ὡς ψιλοῖς, τῷ ἄρτῳ καὶ τῷ οἴνῳ· σῶμα γὰρ καὶ αἷμα Χριστοῦ κατὰ τὴν δεσποτικὴν τυγχάνει ἀπόφασις. εἰ γὰρ καὶ ἡ αἰδοῦσι σοι τὸ τοῦ ὑποβάλλει, ἀλλὰ ἡ πίστις σε βεβαιῶται. μὴ ἀπὸ τῆς γύσεως κέρησ-τὸ πρᾶγμα, ἀλλ' ἀπὸ τῆς πίστεως cet.* Haec aduersus Bezae aemulos perspicua esse video: pro transubstantiatione nihil habent, ut putat Muratorius. Quid dicturus erat, si non loca ex aliis congestisset, sed Catechesin illam totam

totam ipse legisset. Etenim multo speciosius erat, quod in extrema est: ταῦτα μαθαὶν καὶ πληροφορεῖσθαι, ὡς ὁ φαινόμενος ἄρτος ἔστιν ἄρτος ἔστιν, εἰ καὶ τῇ γεύσει αἰσθητός, ἀλλὰ σῶμα χρεῖσθαι καὶ ὁ φαινόμενος οἶνος ἔστιν οἶνος ἔστιν, εἰ καὶ ἡ γεύσει τῆτο βάλειται, ἀλλὰ αἷμα χρεῖσθαι. Non hunc locum praetermisisset, si legisset ipsam Catechesin. Hic multo magis dixisset: *habet in meritis positam transubstantiationem Catholicorum!* Sed nec hic locus causae isti prodest, etsi omnium, quos quidem noverim, speciosissimus est, propterea valde innotatus *Bellarmino*, *Perro-
zio*, et aliis. Primum φαινόμενος ἄρτος et οἶνος non est species inanis panis et vini, ut illi volunt, commemora-
tis ἀγαθοῖς φαινόμενοις, quae ἀληθινῶς opponantur: sed *adspectabilis panis et visibile vinum*, ut recte respondit *Albertinus*, et exemplis docuit p. 429. b. f. in hoc vno non satis accuratus, quod hanc quoque significationem vocis φαινόμενος esse dixit, cum dicere debuisset, in oratione populari, et sacris libris, φαινόμενα semper esse *visibilia*: illam alteram significationem, qua ea τοῖς ἀληθινῶς opponuntur, esse Philosophis propriam, in disputatione de bonis et virtutibus, quae extra philosophiam in interpretando adhiberi nequeat. Iam porro, quod non vult panem et vinum esse, etiam si sapor vtriusque, et quidem solus percipiatur, id clarum est ex superioribus intelligendum de pane ψιλῶ: *Iustinus* κοινὸν vocat, loco supra allato: idem Catechesium auctor λιτὸν (Catech. M. I, p. 229. C.) non de pane ac vino simpliciter.

Prolatis porro e Canone Ambrosiano Excerptis, ad quae supra respondimus, subiicit loca varia ex *Ambrosii* libris. His, non est, ut diu immoremur. Nam in omnibus, praeter vnum, nihil est, nisi *mutationis vel transfigurationis* verbum, quorum vim, supra clare ostendimus, nullam esse. Vnus est, qui conturbare aliquem possit, e libro de *Mysteriis* c. 9. *Fortē dicas*, verba sunt *Ambrosii*, aliud video. *Quomodo tu mihi adferis, quod corpus Christi accipiam? Proberimus, non hoc esse, quod natura*
forma-

formauit, sed quod benedictio consecrauit, maioremque vim esse benedictionis, quam naturae: quia benedictione etiam natura ipsa mutatur. Tum commemoratis Prophetarum in V. T. miraculis, subiicit hanc argumentationem: *Quod si tantum valuit humana benedictio, ut naturam conuerteret, quid dicemus de ipsa consecratione diuina, ubi verba Saluatoris ipsius operantur? - - Sermo Christi, qui poterat e nihilo facere, quod non erat, non potest ea, quae sunt, mutare, quod non erant.* Hunc locum *Muratorius* hanc quidem ob causam attulisse videtur, vt veram praesentiam corporis Christi inde intelligi vellet, sed verbis, *benedictione natura ipsa mutatur*, diuerso literarum genere expressis, satis indicat, ea etiam ad conuersionem substantiae panis in corpus Christi pertinere. Ceterum de more suo ita haec verba attulit, quasi ignoraret, quae *Albertinus* dudum ad hunc locum, ab aliis prolatum, respondit, primum perspicuis locis veterum Doctorum, si quid esse aliud dicatur, quam ante fuerit, id non ad substantiae interemptionem ac conuersionem pertinere. Nec id potest esse obscurum ei, qui vsum loquendi omnium linguarum obseruauit, quod de *Muratorio* quidem sperare licebat. Sed quod in aliis scriptoribus omnes vident, ad id nescio quo modo caeci sunt multi in iis, qui ad religionem pertinent: et quod in istis interpretandis rideretur, id sibi in his rectum esse, et licere putant. Deinde demonstraui, *naturam*, quae hic mutata benedictione dicitur, non semper substantiam significare, quod pueris etiam, mediocriter latine doctis, notum est: in hac quidem causa nullo modo hanc vim habere, cum alii, non minus probati Ecclesiae doctores, naturam panis et vini eam, quae substantia dicitur, nequaquam mutatam clare dicant, in his *Theodoretus*, qui (in Dial. I. p. m. 29.) adspectabilia in Eucharistia signa corporis et sanguinis sui appellatione Christum honorasse dicit, *ὃ τὴν φύσιν μεταβαλόντα*, non mutata substantia, sed *τὴν χάριν τῇ φύσει προστεθεικότα*, sed gratia naturas

Ernesti Opusc. Theol. D *addita.*

addita. Sed quod illo ipso in Dialogo *Theodoretus* *Eraniſtae* dicit (p. 31.) κατὰ τὴν παροιμίαν, εἰς τετετημένον πῖθον ἀντλήμην. μετὰ γὰρ ἐκείνας ἀπάσας τὰς ἀποδείξεις, καὶ τὰς τῶν ἀντιθέσεων λύσεις, τὰς αὐτὰς λόγους ἀνακυκλῆς. *Secundum prouerbiū dolo pertuſo haurimus.* Nam poſt omnes illas demonſtrationes noſtras, et obieſtorum refutationes, eadem repetis: idem nobis in iſta cauſſa accidit, idem fecit *Muratorius*, ſatis habens, repetere dicta centies, nihil reſpondens ad ea, quae contra dicta erant.

Capite XII. (p. 150 ſq.) eſt diſputatiuncula de nobilibus locis *Io. Chryſoſtomi* in *Epistoſta* ad *Caesarium*, *Theodoret*i in Dialogo ſecundo, *Ephrem*i apud *Photium*, (cod. 229.) et *Gelaſii I.* in libro de duabus naturis: in quibus quid leſtori animaduertendum ſit, pro virili ſe expoſiturum profitetur. *Lutheranos* quidem, iis confirmari, exiſtimare, ſuam de corporis et ſanguinis *Chriſti* cum pane vinoque coniunctione ſententiam, ſed facile perſpici, quam iuſte *Romana Eccleſia* hanc opinionem damnauerit. Si adeo facile eſt: nos quoque, opinor, perſpiciemus *Lutherani*: neque enim adeo obtuſa geſtamus peſſora, vt quod facile ſit perſpicere, nos aſſequi nequeamus, animaduertendum modo eſſe, (illuc ſumus) manifeſtam adeo eſſe vim vocum, quibus *Liturgiae* et *S. S. Patres* vtantur ad exprimendam *mutationem*, quae per conſecrationis verba fiat, et per *transubſtantiationis* vocem deſignari ſoleat, vt abſurdum plane ſit cogitare, ſuperſtitem eorum elementorum ſubſtantiam in ſacramento, et agnoſcere cogamur, conuerti illorum ſubſtantiam in corpus et ſanguinem Domini. Poſt haec commemorat ea, de quibus capite ſuperiori dictum eſt, verba. Haec vero miſeranda potius eſt, quam reſellenda oratio, qua ſtultiſſimus quiſque in quaque re poteſt vincere, ſi ea aliquam vim poteſt habere. Ac nos ſupra de verbis iſtis omnia alia docuimus, ſecuti certas interpretandi leges, et uſum loquendi certum et de ridicula *tranſelementatione*,
quam

quam hic addit superioribus verbis, satis dictum a *Salmasio* de transubstantiatione, p. 51 sqq. quae si quis potest, saluis Grammaticis praeceptis, refellere, eum audiemus.

Sed deinde tentat respondere de locis singulis: et primum de *Chrysostomi* verbis. In quibus multo potius nobis licet vsurpare illud *Muratorii*: loci illius vim ita manifestam esse, ut absurdum plane sit, aliud ibi quid, quam Lutheranam sententiam, quaerere, eam non agnoscere. Neque ista mera verba sunt, quae Sophistarum more iactamus, ubi nihil aliud habemus, quod dicamus: sed res ipsa hoc loquitur, et historia huius epistolae. Nam si non manifeste transubstantiationis figmentum tollit ista epistola, quare, primum, ab initio nihil aliud responsum est a *Perronio* et aliis, quam epistolam illam a *Petro Martyre* esse consistam? quare deinde hoc tanto studio, tanta cura, adde etiam vi, actum est, ut epistola illa in Bibliotheca Florentina occultaretur, edita supprimeretur? Quare post haec tantopere laboratum, ut vel spuria putaretur, vel aliter intelligeretur? Nonne haec signa sunt laborantium, et ob perspicuitatem verborum in angustias eas redactorum, unde se expedire non possint? Tum, quod etiam Zwinglianae rationi addicti, nominatim *Bingamus*, fatentur, hunc locum certe favere Lutheranae sententiae; non clare indicat, hic esse eam perspicuitatem, cui refragari non possis? Age vero, quid noster hic molitur? Nihil aliud expectavi, quam ut, sicut antiquus ille *Aristarchus*, versus *Homeri*, quos non probabat, pro spuris reiciebat, ita ipse, velut alter *Aristarchus*, Epistolam hanc *Chrysostomo* abiudicaret, qui etiam *Paullino* in *Anecdotis Latinis* multa verba et formas dicendi abiudicat, etiam hemistichia, quae totidem literis sunt in Virgiliana Aeneide, et hinc a *Paulino* repetita. Sed fortasse noluit sibi aliquid porro negotii esse cum Critica, quae se in Inscriptionum Corpore tam saepe, tam foede fesellisset. Aequus est ergo Epistolae

ipsi: si non *Chrysostomi* sit, antiqui auctoris tamen esse, atque adeo audiendi. Verum partes eorum sequitur, qui hic nihil esse aduersum Romanae opinioni existimant. Atque hic prorsus mirabilem se interpretem praebet. Nullum Epigramma graecum in toto illo Inscriptionum Corpore tam dextre, tam callide interpretatus est. Auctor illius Epistolae Eutychianum errorem refellens, qui profecto *Muratorio* probandus fuit, quando in *Mutationis* verbo tantam vim, et perspicuam μεταμορφωσιν agnoscit, utitur comparatione illa vtitatissima istius mysterii cum S. Eucharistia, ut ostendat, non esse consequens, quia Christus Deus dicatur, ut propterea humana natura in diuinam conuersa, aut a diuina absorpta sit: *Sicut antequam sanctificetur panis, panem nominamus, quia reuera panis est, diuina autem sanctificante gratia liberatus quidem est ab appellatione panis, dignus autem habitus est Domini corporis appellatione, etiam si natura Panis in ipso permansit, et non duo corpora, sed unum Filii corpus praedicatur: Sic et hic, diuina infidente corporis natura, unum Filium, unam personam utraque fecerunt.* Audi iam, VIR VENERANDE, interpretem: nunquam acutiorem TE audisse credo. *Liberatus est, Chrysostomus ait, panis de appellatione panis.* Quomodo? quia panis, inquit *Muratorius*, non amplius est, et factus est corpus Christi. Mirum sane, hanc liberationem panis ab appellatione sua dici! Immo, o! bone, liberatur panis a nominis sui humilitate, quia accipit nomen corporis Christi, propter eius adiunctionem: ut homo Iesus liberatur appellatione hominis, et accipit nomen Filii Dei propter ἐνωσιν: haec enim est argumentatio *Chrysostomi*, ut *Iustini*, *Theodoretii*, et aliorum. Quid porro facit istis: *etiam si natura panis in ipso permansit?* Ea sic interpret clarus παραφύλαξι: cum tamen color, odor, friabilitas, palpabilitas, aliaeque panis qualitates, siue species post consecrationem permaneant, propter ea natura panis remanere dicitur. Ergo etiam Eutychi similiter dicere licebit: cum tamen figura, color et

et aliae qualitates, s. species humanitatis post incarnationem permanent, propterea natura humana remanere dicitur: quam *παράφρασις* admittere cogitur Chrysostomus, si Muratoriana illa vera est. Immo, o! magne interpres, natura panis non dicitur remanere, sed *permanfit*. Atque tu ante pugnabas, naturam esse substantiam pag. 135. et naturae mutationem esse substantiae conuersionem. Quomodo repente natura in speciem externam conuertitur. Nempe virgulam diuinam habetis Vos, Romani Grammatici, atque interpretes, atque multo magis Theologi, qua omnia, cum lubet, conuertitis, transelementatis. Enim vero pergit: Quod si *sophisticando* exigis: sicuti corpus C. in Eucharistia realiter existit, ita illic remanere debere corpus panis: nos cum eodem auctore respondemus, non duo corpora, sed vnum corpus Filii praedicari de Eucharistia, quia panis substantia in Corpus Domini per diuinam virtutem conuersa est cet. Illud recte: non duo Corpora praedicari, sicut in Christo, vnus Filius, vna persona, non duo Filii, duae personae: sed vt utraque natura, diuina et humana, *unum filium, unam personam fecerunt*, sic hic vtrumque, panis et corpus Christi, non duo corpora, sed vnum filii Corpus praedicantur. Ad extremum redit ad illud suum, vt haec verba obscura et confusa dicat mireturque, quare non aliis potius perspicuis Chrysostomi locis nitamur, quem pag. 158 extr. solum omnem hanc controuersiam dirimere posse dicit. Si de praesentia vera C. et S. C. intelligit, concedo, de transubstantiatione nihil legi, aut prolatum vidi, cui non facile respondeatur. Quamquam nos detertere poterat, quo minus alia loca Chrysostomi attingeremus, cum eum coecum aut impudentem pronunciet, qui in iis non videat dogmata Romana, ibi in meridie posita (p. 164.) tamen ausi sumus inspicere, quae ipse attulit. Credibile est, de grandi, vt ait, aceruo summis maxime perspicua et graua. Sed quamuis coecum me iudicent, qui eadem hic cum Muratorio vident, fateor, me in iis agnoscere

veri corporis et sanguinis Christi praesentiam, μεταμώρ-
φωσιν Romanam nullo modo, quamvis intendens oculo-
rum aciem, videre potuisse. Neque enim aliud ibi est,
praeter verba ἀγιάζειν καὶ μεταβάλλειν et e propositis in
mensa donis ποιῆν σῶμα καὶ αἷμα, quae ad efficiendum
id, quod placet Muratorio, nullo modo valere, satis
ostendimus superiori capite. Alia loca indicare voluissem
bono Viro, quae maiorem speciem habent, si me con-
sultuisset, vel e libris de sacerdotio: sed et his respondere
potuissem.

Iam Theodoreti locus ab eo disceptatur dupliciter:
primum aduersus Zwinglianos (p. 155. 156.) in qua
parte nos ei plane adstipulamur: deinde aduersus nos
breuiter pag. 157. extr. Theodoretum, ait, non diffiteri,
mutationem in symbolis fieri per consecrationem. Recte
facit: nec quisquam dubitat. At quae est ista mutatio?
Factum esse et credi corpus et sanguinem Christi. Hoc
quoque vere. Quomodo facta statuit? Hic nihil Mura-
torius. At enim vero hic inprimis audiendus erat Theo-
doretus. Symbola, ait, post consecrationem non recedunt
a sua natura. Manent enim in priori substantia, et figura,
et forma, et videri tangique possunt, sicut et prius. Haec,
haec o! Muratori, conciliare debebas, cum tua μεταμώρ-
φώσεις! Atque hic plane nullum effugium patet, nec vlla
deprauatio locum habet. Nam his illustrat mysterium
incarnationis Dominicae, et sicut in Eucharistia verus panis
maneant post consecrationem, sine conuersione substan-
tiae, sic in Christo post incarnationem mansisse verum
hominem. Tota ratiocinatio, quae est communis
omnium doctorum veterum, in controuersia cum Euty-
chianis, perit, fitque absurda, et contraria, et fauens
Eutychianis, si aliter ista verba accipere velimus. Itaque
hic mirabiliter se torquet Natalis Alexander H. E. Sec. V.
c. 4. p. 152 b. nec tamen se expedit.

Sed de Ephremi loco mox disputans, in quo et ipso
panis a sensibili substantia non discedere dicitur, videtur ali-
quid

quid respondere voluisse. Quid illud est? Nihil aliud, quam quod a *Bellarmino*, *Perronio*, *Natale Alexandro*, *Arnaldo*, aliisque allatum, dudum repudiatum est. Qui instant se in verbis *substantiae* atque *naturae*, vbi causae ipsorum fauere videantur, ii hic, vbi contra est, non nimis dicunt vrgenda esse, nec *απερίσταν* Scholae sequendam: Proprietates etiam corporum istis verbis designari: externam igitur naturam et substantiam remanere a consecratione, nec transire in corpus et sanguinem Christi, sed internam: hoc sensisse Doctores Ecclesiae veteres, atque id suffecisse ad retundendos Eutychianos. Quae sunt anilibus fabulis simillima. In verbis *naturae*, atque etiam, si quis ita velit, *substantiae* (quanquam inaudita est in omni antiquitate substantiae externae et internae diuisione), esse quandam ambiguitatem, concedam. Sed hoc vno nemo se in tali quaestione expedierit commode; videndumque potius, quam vim quaeque causa desideret. Quod in his locis perfacile est definire. Dico igitur: qualis sit naturae et substantiae vis, cum aduersus Eutychianos disputatur, naturam atque substantiam humanam in Christo non esse abolitam atque absorptam a diuina, talem etiam hic intelligendam esse, propterea, quod alias, vt ante dixi, argumentatio Doctorum Ecclesiae nullam vim haberet, sed esset perinepta. Enim vero falsissimum est in ista controuersia substantiae et naturae nomen Doctores vsurpasse de quibusdam externis proprietatibus, et vt in scholis loquuntur, accidentibus, nec vlllo modo sufficiebat demonstrare, ista sensibilia hominis attributa remansisse. Nam Eutychiani non erant ita insani, vt negarent, ista ex humanitate in Christo post *ἕνωσιν*, in qua humanam substantiam perisse dicebant, remansisse: qui sciebant, eum spectari tangique potuisse, et omnia fecisse, quae veri homines facerent, edisse, bibisse, ambulasse, dormisse: quae sunt a diuinitate aliena. Internam substantiam haustam ab diuinitate atque abolitam dicebant, quod aliter duas personas in

Christo statuendas putarent. Vnde fit, vt ea verba in illa controuersia plane sic dicta fuerint, vt nos volumus, eamque ob causam in locis *Chrysostomi*, *Theodoreti*, *Ephremi*, atque *Gelasii* sic sint accipienda. Quo constituto, panis et vini conuersio Romana prorsus tollitur.

Ceterum quodniam verbis *symbola facta sunt C. et S. C.* hic quoque abutitur, poterat e nullo alio veterum doctorum planius discere, quam parum ea verba fauerent causae suae, et quae vera eorum esset vis. Neque enim quisquam luculentius *Theodoro* in istis dialogis explicauit: vt in primo (pag. m. 57.) ὁ λόγος σαφὲς ἐγένετο, καὶ μετάπτωσιν τῆς φύσεως σημαίνει, ἀλλὰ τὴν ἀνάληψιν τῆς ἡμετέρας φύσεως: idque illustrat altera formula *Paulli*, quae Christum dicit pro nobis γεγενῆσθαι κατὰραν: totusque Dialogus in hoc consumitur, vt in γεγενῆσθαι nullam conuersionem substantiae intelligendam ostendatur. Atqui eandem rationem esse in Eucharistia dixit. Quae deinde ex iisdem Doctoribus affert verba, quibus transisse symbola dicuntur in diuinam substantiam, ea quia capite superiori refutata sunt, de iis nihil hic addere necesse est.

Sed occurritur nobis e Catechesi Mystagogica quarta, vbi ἐν τύπῳ ἄετι (p. 530.) dari nobis corpus Christi traditur: figuram interpretantur bene: vnde non modo corpus Christi adesse, sed etiam de pane sola species relinqui videtur. Quo cum loco coniungi possunt ea, quae alibi e *Tertulliano* c. *Marcion*. IV. 40. et *Gaudenio* tr. II. ad *Neoph.* adferuntur, vbi panis Eucharisticus dicitur *figura corporis Christi*, in quo se mirifice torquet *Muratorius*. Videbimus de utroque et vtrumque ab interpretationibus prauis vindicabimus. Intelligendum autem est, τύπον, σχῆμα, figuram significare signum vel adspectabile, vel omnino sensibile alicuius rei, non absentis modo, verum etiam praesentis, quae non incurrat in oculos, aut data opera occultetur, sed per illud signum, per illam figuram, indicetur: eaque vis istius verbi frequentata est inpri-

inprimis a scriptoribus Ecclesiasticis, qui hanc rationem e sacris libris duxisse videntur. Non commemorabo *causdicorum et historicorum figuras*, e Suetonio, et aliis: quae sunt formae loquendi, non tam propter id usurpatae, quod proprie indicant, sed propter alium latentem sensum, quem plane et aperte quis proferre non vult: quis est ita hospes in scriptorum Ecclesiasticorum libris, qui nesciat, v. c. Sabbatum dici figuram vitae coelestis, agnum paschalem figuram Christi mortui, et multa alia similiter? In quo illud animaduertendum est in primis, in omnibus istis formis loquendi id, quod sub figura latet, non modo esse potius figura, sed etiam rem ipsam et quasi corpus, quocum id, quod figurae locum obtinet, vt umbra cum corpore comparetur. Ex quo intelligitur, cum *Corpus Christi* nobis in *figura panis dari*, dicitur, id primo veritatem corporis Christi indicare, deinde etiam veritatem panis: neque illa verba aliud significare per legitimam interpretandi rationem posse, quam cum adspectabili et sensibili pane dari nobis inadspectabile et non incurrens in oculos corpus Christi, quod tamen non minus verum ac proprium sit, quam panis ipse. Cum porro *Tertullianus* et *Gaudentius* panem *figuram corporis Christi* dicunt, primum id nullo modo prodesse Zwingliae rationi patet, e verbis ipsis ante declaratis: *Muratorius* autem, in angustias redactus, mirabiliter se hinc expedit: primum rursus tenebrosa ista verba iudicans, deinde ea sic post alios explicans, vt *Tertulliani* mentem esse dicat, panem in veteris Testamenti libris fuisse figuram, i. e. typum corporis Christi: quod est alienissimum. Consilium disputationis est, refellere *Marcionem*, qui in Christo verum corpus humanum fuisse negabat, vt nemo ignorat. In aliis argumentis vtitur hoc, quod ductum est ab Eucharistia. In ea Christum, ait, dixisse, hoc est corpus meum: quorum verborum non hunc sensum fuisse, vt, quod in manu eius viderint, esset corpus ipsius, sed vt id, h. e. panis ille esset figura corporis,

signum visibile latentis, et in oculos non incurrentis corporis. Iam, si Christus verum corpus non habuisset, si ista species mera et inanis corporis fuisset, panem signum corporis esse nullo modo potuisset. Nam profecto rei non positae in natura signum esse nullum potest. Istae sunt perspicuae et planae, ut ego arbitror, nec ullo modo obscurus ille locus *Tertulliani* debet putari.

Afferuntur etiam, per occasionem Liturgiarum Aegyptiacarum, loca *Origenis* atque *Cyrilli*, de quibus disputare nihil attinet, cum tantum pertineant ad veritatem corporis et sanguinis Christi, nec quicquam in iis insit huc pertinens, quam formula *fieri corpus C.* cui iam dudum satisfacimus: eademque est ratio locorum omnium, quae in disputatione aduersus *Samuelem Basnagium* c. XV. proponuntur. Itaque hic nobis liceret hoc caput finire, nisi liberet, vel tironum causa, breuem, sed eam euidentem et certam demonstrationem sententiae Lutheranae, ductam e libris Doctorum veteris Ecclesiae, proponere, atque ita TIBI, VIR VENERANDE, etiam disciplinae nostrae hac in parte rationem reddere. Etenim nimis longa est ista disputatio de veteris Ecclesiae sententia, quam ut multi eam accurate, vel ipsis Patrum scriptis, vel libris iis legendis cognoscere possint, in quibus de ea re est disputatum, qui sunt, ut scis optime, permulti, quidam etiam satis grandes.

Ad veritatem autem *panis* primum uti maxime soleo loco *Iustini* supra (p. 3^o r.) commemorato, qui sane est ita evidens, ut, si quis mihi hunc eripere possit, nihil iam esse, neque in diuinis, neque in humanis libris, tam evidens concedam, quod non eripi nobis ac peruertere possit, Scepticismum iam dominari in interpretando sinam. Docere instituit *Antoninum*, apud quem defendit Christianam religionem, quid de Eucharistia sentiant Christiani. Hic eum diligenter hoc egisse, quis dubitet, ut plane ac perspicue loqueretur, et verbis vteretur clari-

ris, et e consuetudine vulgari loquendi; quod maxime opus est fieri tum, vbi nobis disputandum est cum iis, qui sunt a disciplina nostra in quocunque genere alieni. Neque is fuit *Iustinus*, qui non hoc consecutus esset exercitationibus differendi, vt, cum id ageret, plane et perspicue loqui posset. Habemus ergo in isto loco primum disertam panis vinique mentionem. Non profanum panem, nec tale vinum sumi, ait, sed panem tamen et vinum; sicut Christus non κοινός et λιτός άνθρωπος fuit, sed, cum sic dicimus, homo tamen isque verus intelligitur. Habemus deinde εὐχαριστηθεῖσαν τροφήν, *alimentum consecratum*: eo alimento intelligi panem, vinum et aquam, nemo Romanorum negat: hoc modo volunt, esse, v. c. panem, ex quo Eucharistia conficiatur, non e quo iam facta sit. Sed id non patitur εὐχαριστηθεῖσα, quae vox non nisi *consecratum* alimentum significare potest, vti paullo post τὰ εὐχαριστηθέντα sunt *consecratus* per preces, et laudes diuinas, *cibus et potus*. Hic porro panis consecratus, hoc vinum cum aqua consecratum, dicitur *alere carnes et sanguinem nostrum*, et quidem κατὰ μεταβολήν, *per concoctionem*. Iam hic magnopere cupiam audire, quomodo panis et vini inanes species, sine substantia materiali, possint alere, h. e. augere sanguinem nostrum et carnes nostras? Immo si panis consecratus et sumtus concoquitur, et habet vim naturalem suam alendi, profecto verus panis sit necesse est. Nam Christi corpus et sanguinem descendere in ventriculos et concoqui, non erit ita insanus quisquam, vt dicat: et quod *Irenaeus*, IV, 34. v. 2. *carne et sanguine Domini ali carnem et sanguinem fidelium*, ait, id ibi per allegoriam dici, clarum est ex eo, quod verba *Paulli* Eph. V. 30. adiungit, vbi fideles ait esse ἐκ τῆς σαρκὸς Χριστοῦ καὶ ἐκ τῶν ὀστέων αὐτοῦ. Atque ita statim concidit inepta *Muratorii* etiam in hoc loco calumnia (p. 182.) cum verba εὐχαριστηθεῖσαν τροφήν εἶναι σὰρκα καὶ αἷμα Χρ. interpretatur, *non amplius esse panem, sed carnem et sanguinem Christi*

Christi mala fide inserto verbo *amplius*. Hunc locum igitur *Iustini* etsi sufficere arbitror iuuentati, quia est antiquissimus, et clarissimus, et sumtus e narratione Apologetae, et Professione fidei, Ecclesiae nomine edita, vbi nullis allegoriis tropisque, aut durioribus formis loquendi locus est, vt in Concionibus popularibus et libris Controuersiarum praesertim eorum, vel de Graecis vel Latinis, Patrum, qui eloquentiae vsu, vel adeo ostentatione ablati, aut disputandi ardore elati, subinde insolentius loquuntur: tamen ei adiungi non alienum est aliquem ex his, quae a deprauationibus *Muratorii* vindicauimus, velut *Augustini* illum: *Quod videtis panis est et calix: quod fides vestra intelligit corpus Christi et sanguis Christi - - Panis ille, quem videtis in altari - - est corpus Christi; aut Theodoretus, symbola post consecrationem non recedere a sua natura, dicentis, sed manere in priori substantia et figura et forma.* Nam haec sunt perspicua, eaque si quis interpretando in alium sensum conuertere tentat, hoc ipso rem facit manifestiorem, cum nihil, quod non durum contortumque sit, proferri possit, quo nullum certius est falsae interpretationis et calumniae signum.

Iam in *Veritate Corporis et sanguinis Christi*, quam ex altera parte oppugnant ii, qui *Reformati* vocantur, vtor eodem *Iustino* auctore, iisdem, quibus ante dictum est, de causis, et quia in narrationibus interpretandis non tam facile locum reperiunt argutationes: *ὃν τρόπον*, inquit *Iustinus*, *Iesus Christus σαρκοποιηθεὶς, καὶ σὰρκα καὶ αἷμα ἔσχεν, ὥτως καὶ τὴν εὐχαριστηθεῖσαν τροφὴν - - ἐκείνη τῇ σαρκοποιηθέντος Ἰησοῦ Χρ. καὶ σὰρκα καὶ αἷμα ἐδιδάχθημεν εἶναι.* Atqui nemo hodie dubitat, quin filius Dei vera carne et vero sanguine indutus fuerit: vnde nec conuenit dubitare, quin *Iustinus*, atque adeo illorum temporum Christiani crediderint, verum corpus et sanguinem Christi in S. Coena sumi. Sed in hoc loco non minus misere se torquent illi, quam Romani Theologi. Et primo, quia illa verba *ὃν τρόπον* et *ὥτως* nobis fauent, negant,

negant, ea semper perfectam aequalitatem rerum comparatarum indicare, idque exemplis plurimis firmant, *Albertinus*, *Grabius* ad *Iustini* locum ex ipso *Iustino*, et alii: quasi hoc quisquam dubitaret, et non omnes pariter negarent. At ea re nil in utramque partem conficitur. Nam non quaeritur, an semper, sed an nunquam adhibeantur rebus aequalibus, non utcunque similibus. Si autem aliquando, si possunt in rebus paribus adhiberi, quod nemo non stultissimus neget: an non talis sit iste noster locus, videndum est. Frigidius est, quod *Grabius* ait, *Iustinum* carnis et sanguinis per ἐνσάρκωσιν adsciti mentionem, non explicandae Eucharistiae causa, fecisse, sed ut ostenderet, hunc totum ritum esse institutum in memoriam σωματοποιήσεως. Immo naturam Eucharistiae *Iustinus* explicare *Antonino* volebat, non finem: qui et a Christo separatim expressus est. Similia legi plura ad eludendi huius loci vim prolata: in quibus et hoc numerandum, quod *Salmasius* (l. c. p. 137.) ex hoc loco intelligi, ait, corporis Christi participes fieri tantum eos, in quibus sit vera fides; quod statuunt necessario, qui verum corpus Christi adesse negant: propterea quod *Iustinus* dicat, nemini licere accedere ad Eucharistiam, nisi τῷ πιστεύοντι ἀληθῆ εἶναι τὰ δεδιδαγμένα ὑφ' ἡμῶν: quasi sit hoc consequens, ut, qui doctrinam Christianorum veram putet, in eodem sit vera fides, qua Deo probamur, et quasi non et nos Lutherani, qui et ab improbis corpus et sanguinem Christi sumi defendimus, cum alias intelligere nequeamus, quomodo rei profanati corporis et sanguinis Christi dici a *Paullo* possint, neminem ad Eucharistiam admittamus, qui non credat, veram esse doctrinam Christi, et, quod *Iustinus* addit, baptismo usus sit. Sed hae argutiae in hoc et aliis Patrum locis explicandis, ut supra dixi, indicia sunt malae causae, et falsae interpretationis. ῥᾶδιον τὸ ἀληθὲς καὶ ἀπλὴν, inquit *Lycurgus* Orator, error tortuosus est, et artibus indiget. Sed, ut ad rem redeam, unde intelligitur, illud, ὃν τρόπον, ἕτως καὶ,

καί, in loco *Iustini* plus quam similitudinem qualemcunque, sed aequalitatem exprimere? Hinc, ut arbitror, quod inde ab *Iustini* aetate, perpetua serie, Doctores Ecclesiae, id quod satis constat, ex incarnatione Christi, naturam Eucharistiae, et contra ex hac naturam incarnationis explicarunt. Vnde necessario efficitur, ut, quemadmodum in posteriori ratione, veritatem corporis Christi adspectabilis ex veritate adspectabilis in Eucharistia panis, sic e veritate inuisibilis diuinitatis in visibili humanitate Christi, veritatem carnis et sanguinis Christi in Eucharistia voluerint intelligi. Non opus esse arbitror tam euidenti loco, tam antiquo, ita explicato et illustrato, alia posterioris aetatis, quae tantam auctoritatem non habet, addere. Posterior aetas de veritate corporis et sanguinis Christi ita loquitur, ut appareat, opinionem hanc, si non omnium, at multorum fuisse, ut Christi corpus et sanguinem statim adiungi pani et vino putarent, ubi *ἀγιασμός*, siue consecratio, per sacerdotem ante *κοινωνίαν* facta sit; vnde *ἀνάκεισθαι*, iacere corpus Christi in altari, dicunt frequenter. Is error abest ab nobis, qui incorruptae antiquitatis disciplinam conseruamus. Eius autem nulum est vestigium in *Iustini* verbis: immo contra est hic locus. Non ut vulgarem panem λαμβάνομεν, edimus, sed eum esse putamus Corpus Christi quando? Nempe cum edimus. Etenim istis posterioribus verbis possunt substitui haec, sed ut corpus Christi λαμβάνομεν, edimus: quod nemo, qui aliquid in interpretando videt, potest dubitare. Si quis posterioris aetatis locum desiderat, ei commendem verba ex *Anastasio*, Sec. VI. Scriptoris, *ὁδηγῶ* (c. 23.) qui est ita euidentis, ut *Lutherus*, aut quisquam nostrorum non planius rem exprimere potuerit: quippe et *ἄρτον ψιλόν* esse negat *Anastasius*, qualis vulgo vendatur, et *ἀντίτυπον τῷ σώματι Χριστοῦ*, signum merum et figuram corporis Christi, qualis fuerit in Iudaeorum victimis cet. Sed non ignoro cauillationem dissentientium, qui, cum hic interpretatio in suam partem omnis prae-

praeclusa sit, in hoc loco initia ponunt deprauatae veteris et antiquae sententiae cum *Albertino* pag. 903. cum *Bingamus* nostram sententiam etiam in Chrysostomo agnoscat.

III. *Sacrificium verum ac proprium esse in Eucharistia antiquis, nec Liturgiis, nec S. S. Patrum scriptis firmatur.*

Quod seculi huius initio ex Orientalis Ecclesiae Liturgiis demonstrandum suscepit *Renaldotius*, veterem Ecclesiam in Eucharistia verum ac proprium sacrificium agnovisse, in quo sacerdos pro hostia immolaret Iesum Christum ad placandum Deum viuis atque mortuis, id ex Liturgiis vniuersae Ecclesiae docere instituit *Muratorius*, adiunctis etiam, vt in superiori disputatione, velut in subsidium, primae et antiquissimae Ecclesiae doctoribus. Negat se vniuersam illam controuersiam disputatione amplexurum: duo tantum sibi proposita esse: primum ex antiquissimis omnium Ecclesiarum Liturgiis ostendere, perpetuum fuisse vniuersae Ecclesiae consensum, de vero et non imaginario sacrificio altaris: deinde breuiter palam facere, quam concordēs sint cum S. Liturgiis Patres, qui primis Ecclesiae seculis vixerint. Atque ita intellectum iri existimat, an iure veteres Liturgias suae opinionis testes atque auctores commemorauerit *Pfaffius* Vir Cel. in Disputatione scilicet, quam sibi visam negat, de *Oblatione Eucharistica Veteris Ecclesiae*. Intelligi sane a nobis et iudicari potest: sed vellemus ipse *Muratorius* *Pfaffianum* librum, in Germania valde obuium, sibi comparasset, vt ipse iudicare potuisset, et respondere ad ea, quae ibi dicta sunt. Sed melius fecit, cum cauit, ne istum librum videret. Magna et multiplici molestia se liberauit. Primum si librum vidisset, longe aliter suam sibi demonstrationem instituendam vidisset; quae nunc nihil est, nisi farrago locorum Liturgicorum, in quibus sacrificii, hostiae, holo-

holocausti, *immolandi* item, *offerendi* verba occurrunt: quasi hac sola commemoratione res confecta esset: ad multa deinde respondendi necessitas exorta esset, quae est misera et taedii plena in tam mala causa. Sed nobis, in disputatione instituta, non tam videndum est, quid non dixerit, quam quid dixerit, idque accurate refellendum. In quo tenebimus hanc rationem, ut primum universae disputationis vitium demonstremus, deinde de singulis quibusdam vel Liturgiarum verbis, vel *Muratorii* dictis respondeamus.

Quod igitur ad primum attinet, parum diligenter fecit *Muratorius* in capite eo, in quod latinarum Liturgiarum testimonia congeffit, quod nihil aliud, quam loca proposuit, in quibus ea, quae ante diximus, verba commemorantur. Qua in re dupliciter peccavit. Etenim nemo dubitat, aut nescit, in Liturgiarum carminibus ista verba frequentari: illa autem duo dubitantur: primum, an ea proprie vel tropice dicantur, quorum illud Romani, hoc nos contendimus: deinde utrum sint in parte ea Liturgiae, quae proprie eam, quam consecrationem dicunt, continet, qua facta multi credebant, praesens esse verum corpus et sanguinem verum Iesu Christi, an in oblationis formula, quae consecrationem praecedit in Missae Canone, pertinetque sine controuersia ad naturale vinum et panem, et utriusque ad Eucharisticum sacrum destinationem. Etenim si hoc est, non modo nihil profunt causae Romanae, quia in ista oblatione nondum adest corpus et sanguis Christi, etiam ex ipsorum sententia, sed etiam obsunt mirifice propterea, quod inde intelligi clare potest, ea verba tropice dici, nec ad corpus et sanguinem Christi pertinere, atque porro tropice accipi posse, etiam ubi in consecratione propria occurrant. Itaque debebat novus ille sacrificii Eucharistici assertor hoc in primis docere, verba illa ab omni tropo libera esse. Sed grammaticas illas disputationes, ut omne interpretum vulgus facit, diligenter vitavit.

Sunt

Sunt enim impeditae, hac de causa, quia vitium nimis facile apparet, nimis facile conuincitur: quod secus est, ubi rebus solis vtare, h. e. compendiorum et elementorum decreta et verba identidem repetas et inculces, quam Theologicam interpretationem imperiti appellant. Semel tamen huc se demisit in verbo *immolandi*, quod monet esse victimae et hostiae animatae, eoque vel ipsos ethnicos scriptores verum sacrificium indicasse: de quo post videbimus. In auctoritatibus porro ponendis debebat hoc delectu vti, vt e consecrandi formulis peteret omnes, nullas e *προςφωγας* carminibus, idque vel in singulis admoneret, vt lectoribus quaerendi molestia demeretur, et iudicandi facultas expeditior daretur. Quorum ille nihil pensi habuit, certe nihil fecit, et ipse satis habens Sacramentarium nomina ponere, et lectores istis vagis indiciis contentos fore, nec quicquam ultra inquisituros sperans. In quo sane iniuriam fecit lectoribus, cum eos tam imperitos, nihilque in hoc genere videntes finxit: nam ipsum adeo tyronem in hoc capite fuisse, vt, qua via modoque id tractandum esset, ignoraret, suspicari nos non sinit cetera viri doctrina.

Sed de singulis auctoritatibus, primum vnde ductae sint, deinde quam vim habeant, videamus. E *Leonino* igitur quae proponuntur, in quibus sacrificium et cognata verba insunt, omnes praeter duas sunt ex parte missae ea, in qua dona Christianorum ante consecrationem offeruntur, h. e. si latine loqui velis, Eucharistiae destinantur, per preces et laudes diuinas. *Gelasiani* Sacramentarii testimonia ex eadem parte, praeter vnum, omnia petita sunt. Nec aliunde sunt pleraque, quae e *Gothico*, *Francisco* et *Galliano* proferuntur, quibus similia plura ac prope innumerabilia ex omnibus Liturgiis, et his, quae Muratorianum volumen exhibet, et aliis, afferre et nos possemus. Nulla enim prope pagina est, ubi non in oblationis carmine hostiae, sacrificia, et immolationes oblationesque commemorantur: eiusque generis loca e *Eruesti Opusc. Theol.* E variis

variis Liturgiis dudum collegerat *Pfaffius* in Disputatione de oblationibus §. 40. Iam haec testimonia in hac controuersia nullam auctoritatem habere, sed pro alienis repudianda esse, duobus modis planum fit. Nam primum, cum quaestio sit, an corpus et sanguis Christi per sacerdotem Deo immoletur pro peccatis uiuorum ac mortuorum; ea immolatio non habet locum ante, quam sit consecratio, de Romanorum sententia, facta, post quam demum adesse corpus et sanguis Christi creditur. Vnde fit, vt, quicquid ante consecrationem de hostiis et sacrificiis dicatur, id nullo modo ad corpus et sanguinem Christi pertinere possit. Quomodo enim, quod non habeas, non adsit, immolare queas? Sed hanc rationem idem ille *Pfaffius* aliiue praeclare explicauerunt. De altera ratione videbimus, quae proficiscitur a verbis ipsis, quae, plane demonstrari potest, perabsurde et per summam ac pudendam inscitiam, addo etiam impietatem, ad Christum referri.

Primum igitur comparatio formularum oblationis, quae sunt in Liturgiarum libris innumerae, docet, quae in aliis *hostiae*, *sacrificia*, *holocausta* etiam dicantur, easdem in longe pluribus, in eodem contextu, cum iisdem verborum attributis (*praedicata* schola vocat) vocari *dona* ac *munera* et *oblationes*. Deus rogatur, vt *suscipiat*, *respiciat* *dona*, *munera*, *hostias*, *sacrificia* cet. Ex quo per certas interpretandi leges conficitur, vt *hostiae*, *sacrificia*, *dona* et *munera*, sint res eadem, habeantque haec verba prorsus eandem potestatem: et quae proprie *dona* et *munera* dicantur, eadem tropice *hostias* et *sacrificia* appellari. Atque ea forma loquendi, vt *hostias* vocarent *dona* Christianorum, quae et in Eucharistia consumerentur, quorumque reliquiae ad absentes, pauperes, aegrotos, mitterentur, recte se habet, et ducta est ex epistola extrema Paulli ad Philippenfes. Enimuero *munera* ac *dona* nullo modo esse possunt corpus et sanguis Christi. Nam si essent, deberent profecto *donum Dei* vocari,

vocari, qui Iesum Christum donauit hominibus eorumque salutem. Sed vocantur primum *dona* et *munera* in multitudinis numero, vt *hostiae* et *sacrificia*, deinde *dona* et *munera fidelium* p. 296. In Sacramentario Leonino, (e quo solo exempla commemoramus) *plebis* p. 348. *Ecclesiae* p. 337. *munera seruitutis nostrae* p. 363. *munera deuotionis*, pag. 376. quae stultissimus sit, qui de corpore et sanguine Christi capiat. Atque etiam omnia ista verba coniunguntur, quo modo synonyma solent, vt in Sacramentario Gregoriano: *vt accepta habeas et benedicas haec dona, haec munera, haec sacrificia illibata*: vt eadem esse, nullo modo dubitari possit. Sed porro illa munera qualia crediderint veteres Liturgiarum auctores, videamus exemplis. P. 368. in oblationis carmine sacerdos ait: *Deus, qui, cum muneribus nullis indigeas, ipse nobis munera cuncta largiris, accipe propitius, quae de tuis donis tibi nos offerre voluisti: non solum nostrae reputans deuotioni, quae tua sunt, sed etiam cet. et p. 370. Offerimus tibi, Domine, munera, quae dedisti, vt et creationis tuae circa mortalitatem nostram testificentur auxilium, et remedium nobis immortalitatis operentur. Videte o! Romani, munera illa, oblationes, hostiae, dicuntur munera Dei, creata a Deo in auxilium mortalitatis, h. e. ad vitam conseruandam. Calumniamini hic quantum vultis: nihil aliud nisi panem et vinum vilo modo hic reperiri sano cuiquam persuaseritis. Quam clara porro illa forma est, pag. 413 extr. in qua etiam *munera et hostiae* iunguntur: *Munera tua, Deus institutor, illustra, et per has hostias* (hostias et munera hic eadem esse, nemo sanus dubitet) *quibus te placari voluisti, sanctifica misericors immolantes. Qui sunt illi, quos Deus sanctificet per illa munera et hostias? Nempe Christiani, non solus sacerdos. Ergo et Christiani immolauere, non solus sacerdos. Atqui Christiani nihil nisi panem et vinum obtulerant. Iam, Sacrificium oblationis Deus rogatur in Missali Gothico, vt sua benedictione benedicat, et Spiritus S. sui rore perfundat,**

ut fiat omnibus legitima Eucharistia. Hoc sacrificium sine βλασφημία Iesus Christus intelligi potest? Non magis profecto quam illud in Sacram. *Lednis* p. 301. cum Deum rogat sacrificulus, *ut hostiam nostram martyris S. L. veneranda et beata commendet oratio*: sicut p. 332. ait: *oblationes fiant tibi placitae tuorum deprecatione*, p. 335. *placentium tibi precibus fiat grata deuotio.* Hostiae ipsae ubi occurrunt, ut in hoc, attribuuntur iis, quae qui credere possit, de Christo intelligi posse vilo modo, eum credam omnia, quamuis absurda, crediturum, p. 329. in loco a *Muratorio* ipso proposito, dicuntur istae hostiae imponi altari, *ut honoretur potentia diuina*: quod ad creationem non ad redemptionem pertinere, in qua amor potius Dei erga genus humanum intelligitur, quis non intelligit? Tum porro p. 359. *non vult munus aestimari nostris meritis*: quod ad Christum sine summa impietate et stultitia referri nequit. Ad haec si quis de coetu Romano potest respondere, sed non *Muratoriana* ista vaga ratione, verum presse, et per singulas partes, et ea diluere, hoc est, docere, *munera et hostias*, in his formulis per interpretandi leges, non esse eadem, deinde, quae istis muneribus et hostiis tribuuntur Christo conuenire: tum vero nihil aliud desiderabo, statim vietas manus dabo. Sed addam locum insignem e Liturgia *Cyrelli* (ap. *Renald.* T. I. p. 42.) *sacrificia*, dicit sacerdos, *oblationes in gratiarum actionem eorum, qui offerunt laudem et gloriam nomini tuo sancto.* Diaconus interfatur: *orate pro illis, qui de suo sacrificia et oblationes fecerunt.* Tum pergit sacerdos: *suscipe ea super altari tuo spirituali, coelesti - - sicut ad te suscepisti munera iusti Abel cet.* Sequitur alterum sacrificium laudis et placationis: *Ita quoque vota seruorum tuorum accepta atque cet.*

Sed quid fiet locis Liturgiarum iis, quae sunt ex ipso consecrationis carmine? cuius generis duo e *Leonino*, vnus e *Gelasiano* libro proferuntur, poterantque alia proferri in primis e *Gregoriano*? Primum eorum nulla vis esse

esse potest propterea, quod sunt in praefationibus consecrationis, quam Romani in solis verbis Christi, *hoc est corpus meum*, ponunt, vbi nondum, de ipsorum sententia, est corpus Christi, nec adeo immolari potest. Atque etiam primus statim locus est ita alienus, vt appareat, *Muratorium* nil nisi verba singula spectasse, de sensu eorum assequendo ne cogitasse quidem. Verba sunt haec e *Leonis* libro (p. 303.) *Vere dignum: quis enim aut possit, aut audeat, a tua laude cessare, perpendens mirandae dispositionis effectus, quod de substantiae genere peccatricis immaculata hostia gigneretur, cuius, pro eiusdem naturae reatu, possis immolatione placari!* Est sane hic hostia, eaque Iesus Christus, est immolatio, est placatio Dei. Sed vbi ista immolatio facta intelligenda est? Scilicet in cruce. Sicut ista hostia non in altari per sacerdotem consecrando facta, sed de substantia peccatrice genita dicitur, sic et in cruce immolata intelligitur. In altero, ex eodem libro est *laudis hostia*, quam de Christo intelligi non posse, mox videbimus: intelligiturque vel ex altero tali loco e *Sacramentario Gothico*, vbi haec verba sunt: *Dignum et iustum est nos tibi laudes dicere: hoc proprie: sequitur tropice: et hostias immolare.* In alia porro praefatione, proposita e *Gelasii* libro, Christiani dicuntur *corpore C. et sanguine*, quo a peccatis redempti sumus, ad vitam aeternam sacrificiis coelestibus pasci. Bene. Sed corpore et sanguine C. vt coelesti sacrificio pasci nos, nemo dubitat: an sacerdos corpus et sanguinem C. immolet, id quaeritur: cuius rei nullum hic est vestigium. Et eius generis sunt cetera.

Sed Liturgiarum testimoniis *Muratorius*, velut bonus caussarum patronus, Ciceronis disciplina conformatus, interfatur subinde, adspiciens aliquid callidae admonitionis, vnde vis et grauitas testimoniorum intelligatur. De his quoque videndum est. In *Leonis* libro dicitur *sacrificium immolari*. Recte, addo etiam *hostias immolari*

dici, quod est maius, si quis velit pueriliter verba aestimare e Vocabulario triobolari. Quid ergo? *Immolationis autem voce*, inquit, *vel ipsi ethnici scriptores verum sacrificium designarant, uti ex eorum verbis, quae referre superfluum foret, euincitur. Immolare enim supponit victimam, eamque animatam.* Non putaram, tam versatum fuisse in istis ethnicis scriptoribus: eam latinitatem viri, eam interpretandi rationem animaduverteram! Sed non nulli sapientiam, ut auari numos, clam habent, et occultant consulto. Cur vero non et addidit, *hostiam* apud istos ethnicos de victima viua dici? Nam et hoc ita est. Sed quam vult eius tam rarae obseruationis vim esse? Nempe hanc, ut in Missa viuum et animatum sacrificium Deo per sacerdotem fiat. Quod ille per se intelligi putat: adeo ne diserte quidem posuit. Sed quae est haec ratio interpretandi Liturgias ex ethnicis scriptoribus. Quasi non planum esset, id quod antea monuimus, formas has loquendi esse e sacris libris sumtas, ubi beneficia Christianis tributa dicuntur *Δουλαὶ δεξταὶ* et *εὐάρεστοι τῷ Θεῷ*, *hostiae acceptae, placentes Deo*, vetus latina habet: quae verba centies in Liturgiis, de illo hostiarum Liturgicarum genere, occurrunt: in primis e Psalms XLIX. verbis: *Immola Deo sacrificium laudis*; quae verba saepe in Liturgiis ad oblationes panis et vini Eucharistici accommodantur. Hic quaerere lubeat, an, quia *immolare supponit hostiam animatam*, apud Dauidem quoque *supponat*, sitque laus illa, quam Deus sibi immolari iubet, animal viuum et animatum? Sed nihil est tam stultum, quod non dicere audeant homines, cum fixum est, defendere errores. In Leonis libro p. 312. *munera Ecclesiae* dicuntur immolari. At ea certe munera sunt panis et vinum, non animalia viua. Totum igitur hoc ineptum est ac puerile. At enim stulti sunt *Protestantes*, qui, cum in Missa Romana inueniunt sacrificium laudis, non ultra pergunt. Sed ibi etiam requirant, ac inuenient sacrificium placationis, quod etiam in Sacramentario Gelasiano legitur, Gregoriano et Gothico.

Haec

Haec Muratorius. Nimis impatientes in legendo fingit nos. Immo nos quoque *hostiam placationis et laudis* ex iis, quae prodidit, et aliis locis reperimus. Sed nos iidem veram istorum verborum vim requirimus: ipse autem cum suis gregalibus, ubi verba sacrificii et hostiae et immolationis et placationis reperit, non ultra pergit, nec requirit, qui per leges interpretandi sensus istorum verborum esse debeat. Bis hic peccauit *Muratorius*: primum, quod placationis verbum e vulgaribus Theologiae compendiis intellexit, deinde, quod consuetudinem et sententiam veteris Ecclesiae in oblationum formulis ignorauit, cum de rebus Liturgicis scriberet, et tot Libros Liturgicos ederet. Primum igitur ignorauit latinitatis vim, cum existimauit, *placationem* in hac formula necessario significare expiationem irae diuinae, peccatis humanis irritatae, et veniae impetrationem. Nihil tale cogit latinitas, quae *Deum placari* etiam dicit, cum aliquid sit, quod sit Deo gratum, vt preces, laudes, recte facta, quod sit Deo placitum. Itaque sacrificium laudis, idem placationis dicitur, quia Deo placet praeter omnes partes cultus religiosi, suntque *sacrificia placationis* Pauli *Θυσίαι εὐαρέστοι*. Hoc ita esse, clarum faciemus locis ipsarum Liturgiarum. In Sacram. Leonis mens. Apr. n. 43. pag. 312 extr. oblationis formula haec reperitur: *Oblationes nostras*, i. e. Populi, Ecclesiae, vt alibi, *quaesumus, Domine, tua tibi dignatione fac placitas: quia nihil in nobis, quod placare te possit*, i. e. nos tibi placitos et nostra tibi placita reddere, *nisi, deprecantibus sanctis nos tua propitiatione praeuenias*, i. e. tua sponte nobis propitius sis, et sic nos et nostras oblationes tibi placitas esse sinas. p. 332. *Oblationes populi tui, Domine, quaesumus, Apostolorum tuorum passio conciliet, et quae nostris non aptae sunt meritis, fiant tibi placitae tuorum deprecatione iustorum*. Vnde et p. 335. *nostris meritis non est digna fiducia: placentium tibi precibus fiat grata deuotio*. Sed si maxime quis malit placationis verbum sensu scholae

theologicae accipi, tamen nihil efficitur. Nam nihil frequentius est in oblationibus, quam ut ista munera panis et vini, quia vñsibus Eucharisticis et deinde pauperibus destinantur, prodesse dicantur ad remissionem peccatorum. P. 300. Sacerdos in oblatione orat, ut *munera, quae deferuntur, et medelam afferant et gloriam.* Ante p. 399. *huius oblationis obsequium ad placationem tui nominis nobis fac provenire,* p. 312. *respice propitius munera, quae immolamus pro nostris offensionibus,* et sic centies. Atque hae formulae, etsi non satis exactae sunt ad subtilem Theologiae rationem et summam veritatem, quae talibus muneribus, et liberalitati nullam vim ad veniam peccatorum relinquit: tamen commoda interpretatione molliri possunt, ut nihil habeant, quod reprehendi possit: praesertim cum in ipsis libris diuinis quaedam non absimilia reperiantur loquendi genera, de quibus dicere non est necesse.

Illud quoque magnopere cupiam doceri ab Sacrificii huius Eucharistici defensoribus, quomodo, si hostiae et sacrificii nomine Liturgiarum auctores intellexerint corpus et sanguinem Christi, quomodo, inquam, in Canone Gregoriano aliisque Liturgiis sacerdos rogare Deum possit, ut *illud sacrificium, illam oblationem benedictam, ratam, rationabilem facere dignetur, ut nobis corpus et sanguis fiat dilectissimi filii, Domini Dei nostri I. C.* Nam profecto, si sacrificium, cuius ante mentio facta, est verum et viuum corpus I. C. perabsurdum est rogare, ut fiat corpus I. C. Multa huiusmodi disputari possent: sed et ab aliis dudum proposita, nec dum refutata sunt: et nos non totum hunc locum perfecte disceptare, sed Muratoriana refellere constituimus: quod nos quidem, quoad latinas Liturgias perfecisse confidimus: ad Graecas et ceteras Orientales progrediamur: quarum testimonia c. XVII. p. 202 sqq. edidit.

In iis autem principem locum obtinent ea, quae S. Chrysostomo tribuitur, et Clementina, quae vocatur, in
Consti-

Constitutionum Apostolic. VIII. 12. Ex his igitur primum excerpta proponuntur a *Muratorio*, itemque ex ea, quae *S. Basilio* tribuitur. Sed in hac parte disputationis idem peccavit, quod in superiori, proponendis locis ex oblationum formulis, quae consecrationem praecedunt: in quibus nullo modo per sacrificia intelligi posse corpus et sanguinem Christi, ante vidimus. In iis autem, quae afferuntur e verbis sacerdotis post consecrationis formulam, λογικὴ λατρεία Deo dicitur offerri pro mortuis: sed eam, quis dicat esse corpus et sanguinem Christi, et non potius preces et supplicationes. Quod etiam in sequentibus clarum fiet, et plane patet e loco Paullino (Rom. XII. 1.) vnde haec verba sunt ducta. Nam quae in *Clementina* post consecrationem commemoratur *Oblatio*, nulla alia est, quam quae ante consecrationem fuit: itemque sacrificium precum pro vivis et mortuis: sequunturque preces ipsae. In Liturgia Graeca *S. Basilii* (ap. *Renald.* T. I. p. 69.) post consecrationem, inter preces, s. sacrificium precum, etiam haec verba reperimus: Μνήσθηθι, κύριε, τῶν τὰ τίμια δῶρά σοι ταῦτα προσφερόντων, καὶ ὑπὲρ ὧν καὶ δι' ὧν, καὶ ἢ οἷς αὐτὰ προσεκόμισαν. Hic clarum est commemorari eadem dona panis et vini, quae ante consecrationem: et consecrata aut nondum esse corpus et sanguinem Christi, aut tantum in iis coniuncta putari. Dicit enim haec dona, digitoque demonstrat: ea porro indicat esse non oblata a sacerdote consecrante, sed a Christianis allata, προσκομιθέντα: quod est συνώνυμον alteri προσφέρειν. Atqui corpus et sanguinem Christi non attulere. Ad haec prorsus nihil est quod reponi possit, tanta est evidētia. Sed eadem sunt in *S. Gregorii* Liturgia Gr. p. 108. Iam in Liturgia *S. Marci* p. 145. in praefatione *Vere dignum*, sunt notatu dignissima haec verba: δι' ἧ, (Ἰησοῦ Χριστοῦ) σοι σὺν αὐτῷ καὶ ἁγίῳ πνεύματι εὐχαριστοῦντες, προσφέρομεν τὴν λογικὴν καὶ ἀνάμικτον λατρείαν ταύτην. Quid? an Christus per Christum a Sacer-

dote offertur Deo? Immo vero haec λογική καὶ ἀναί-
μακτος λατρεία fit gratiis agendis Deo, et laudibus eius
celebrandis: nam illud εὐχαριστῶντες profecto est *gratias*
agendo: quod Graeci, cum verbo vtuntur, aliter quam
per participium exprimere non possunt. Enim vero quid
sequitur! hanc λατρείαν, pergit, προσφέρωσι πάντα τὰ
ἐξ ἡμῶν cet. ὅτι μέγα τὸ ὄνομά σε ἐν πᾶσι τοῖς ἔθνεσι. an
quisquam potest haec de alia re quam de laudibus diuinis
intelligere? quae etiam sumta sunt e Psalmis Dauidicis,
vt patet e sequentibus: καὶ ἐν παντὶ τόπῳ θυμίαμα προσ-
φέρεται! τῷ ὀνόματι ἀγίῳ σε καὶ θυσία καὶ προσφορά:
quae vt Dauides de laudibus Dei dixit, ita hic intelli-
clarum est. Sequuntur deinde deprecationes et suppli-
cationes, et fit accessio ad consecrationem. Ibi p. 155.
pr. ait sacerdos, πλήρωσον ὁ Θεὸς καὶ ταύτην τὴν θυσίαν
τῆς παρὰ σε εὐλογίας, διὰ τῆς ἐπιφοιτήσεως τῆς παναγίας
σε πνεύματος: et sequuntur verba institutae a Christo
Eucharistiae καὶ ταύτην θυσίαν, ait, *etiam hanc victimam*:
nempe alia, hostia laudum et precum praecesserat: et
haec est altera hostia, oblatus et donatus panis cum vino
per piam liberalitatem, corpus et sanguis Christi esse non
potest, quia alienum est ab iis, quod rogat Deum, vt
per Spiritum S. ea victima impleatur diuina vi. Speciem
maiores habet in caussa Romana locus e Liturgia Chry-
sostomi, qui etiam repetitur in Liturgia S. Gregorii Gr.
(ap. Renald. T. I. p. 94. in Oratione veli) σὺ εἶ ὁ προσ-
φέρων τε καὶ προσφερόμενος, ὁ δεχόμενος καὶ ὁ διαδίδο-
μενος. In Gregoriana plenius est: σὺ εἶ ὁ ἀγιάζων καὶ
ἀγιαζόμενος, προσφ. τ. κ. π. ὁ δεχόμενος καὶ δεικτός, ὁ
διδῶν καὶ ὁ διαδιδόμενος cet. Sed hic locus intelli-
gi potest ex alio in Liturgia Iacobitarum Syrorum, in quo
haec sunt: *Deus, tu factus es sacrificium, et tibi sacrifi-*
cium offertur: Suscipe hoc sacrificium pro. qui locus
(p. 205 extr.) stultissime a Muratorio adfertur pro caussa
sua. Sermo est de Christo, qui factus est sacrificium
pro nobis in cruce, et cui nunc sacrificia laudum et pre-
cum

cum offeruntur: quae rogatur, ut benigne accipiat. Male autem *Muratorius* versionem latinam *offeris* corrigit *offeretis*. Immo, *oblatus es*. E graecis Liturgiis pauca attulit *Muratorius*, plura e ceteris Orientalibus a *Renaldotio* editis: sed ea nullius ponderis. Nam pleraque sunt ex oblationis aut precum consecrationem antecedentium formulis, quibus nulla talis sacrificii, quale *Muratorius* vult, mentio locum habet; idque genus est a nobis iam satis confutatum. Profertur *Sacrificium rationabile, incruentum*: quo maxime confidebat in hac causa *Renaldotius* (T. I. p. 302.) id esse in laudibus et precibus, ante dictum est, cum de Graecis agebamus. Sunt autem, id quod non parum valet ad causam nostram, estque capite primo admonitum, hae Liturgiae ductae e Graecis, atque ex his adeo intelligendae. Sed maxime noster videtur confidere epitheto sacrificii, cum *tremendum* Gr. φοβερὸν, σεβερὸν vocatur: in quo cum aliis inscitiam mirifice prodit, cum ait: *haec sola vox supereminentem maiestatem sacrificii Christiani indicat*: nempe, quia est corpus et sanguis C. *Ianus ὁ μακαρίτης*, disputans de eadem re aduersus *Renaldotium*, pag. 34. ait: *magis alienum ab hoc* (quod nos volumus intelligi) *sacrificio videri poterat epitheton hoc*. Sed φοβερὸν hoc loco idem haud dubie est, ac venerabile, s. cum reverentia peragendum, quo sensu in eadem Liturgia Gregorii p. 93. de toto ministerio s. cultu diuino dicitur, τὸ γὰρ διακονεῖν τοῦ μύστυα καὶ φοβερόν ἐστι. De posteriori forte quis dubitet, quando et *Chrysostomus* de Sacerdotio III, 5. 7. e consuetudine loquendi Graeca intelligit τὸ φοβερὸν τῆς διακονίας: prius verissimum est. Sed vellem grammatica ratione docuisset: ne, ut ipse simpliciter adfirmavit, alii item simpliciter negarent: praesertim cum ipse intellexerit, in hoc verbo haerere etiam nostros posse, aestimantes id verbum consuetudine loquendi latinis, et comparantes cum voce vernacula, ut fit saepe etiam a Theologis, in primis concionatoribus,

in

in hoc ipso verbo, vt saepe audiui. Est autem in hoc verbo merus hebraismus, ductus e Psalmo secundo, et frequentatus *D. Paulo* in epistolis: vnde per interpretes hebraismi imperitos venit etiam in latinos libros. Colere nos Filium Dei iubet *Dauides* דָּוִדִּים, et laetari בְּרָעָה: quod *Paulus*, de seruorum ministerio, itemque de suo inter Christianos, graece exprimit μετὰ φόβου καὶ τρέμω, vel ἐν φόβῳ καὶ ἐν τρέμῳ: quod est *modeste, cum reuerentia*, vt docent *Amama* in *Antibarb. Bibl.* p. 446. *Camero Myrothec.* ad Phil. II, 2. et *Grotius* ad Ebr. XII, 28. et alii. Atque sic etiam intelligendus in hoc verbo *Chrysostomus* de Sacerdotio VI, p. 306. ὅταν δὲ καὶ τὸ πνεῦμα ἅγιον καλῇ, καὶ τὴν φρικτωδέστατην ἐπιτελῇ θυσίαν ceteris, πόσῃ αὐτὸν (sacerdotem) ἀπαιτήσομεν καθαρότητα, καὶ πόσῃ εὐλάβειαν. Non bene *Bengelius*, plenissimum horrois, vt III, 4. p. 100. vbi tamen synonymum φοβερόν bene *venerandum*. Sed alia loca videamus a *Muratorio* proposita, quae quidem aliquid scrupuli iniicere alicui possint.

E Liturgia *S. Basilii* Graeco Arabica (ap. *Renald. T. I.* p. 89.) affertur (p. 205.) hoc sacerdotis post communionem orantis: *digni facti ministrandi altari sancto tuo, qui tibi obtulimus incruentum sacrificium* (haec duo verba omisit *Muratorius*) *immaculatum corpus et pretiosum sanguinem magni Dei et Saluatoris nostri I. C.* Quae verba sunt sane speciosa pro *Muratorii* causa. Sed primo animaduertendum, eas non ad sacerdotem proprie pertinere, sed communi τῶν κοινοῦντων nomine fieri: nec impedit verbum λειτουργεῖν, quod etiam de κοινῶσι dicitur. Nam λειτουργοῦντες iidem dicuntur καταξιώθοντες τῆς μεταλήψεως τῶν μυστηρίων. Quae observatio statim tollit vim huius loci in ista causa, quae defendit, sacerdotem (non κοινοῦντας) sacrificium facere immolando corpore et sanguine Iesu Christi. Formula deinde *obtulimus tibi incruentum sacrificium, immaculatum C. et S.* hanc vim habet: obtulimus tibi panem, vinum, cum laudibus et precibus, quibus fumendis accepimus corpus et

et S. C. beneficio tuo. Simillima est haec forma verborum alteri, cum sacerdotes dicuntur *consecrare corpus et S. C.* pro consecrare panem et vinum, quibus sumendis deinde accipiatur corpus et sanguis Iesu Christi, in Liturgia S. Gregorii Alexandrina ap. Renaldotium T. I. p. 94. *dignum me fac*, inquit sacerdos, *adstandi sanctae huic mensae et consecrandi immaculatum corpus tuum, pretiosumque sanguinem tuum.* In Graeco est *ἱερεῖσαι*, quod est verbum sacrificantium, et miror a Renaldotio non verum esse *sacrificandi*, quod rectum foret. Verum id quid sit, statim ipse sacerdos docet: *Dignum me fac, ut tibi offerantur dona ista a me peccatore.* Dona autem ista sunt panis et vinum, a Christianis allatum. In Liturgia Iacobitarum Syrorum, dum lauat manus sacerdos, orat Deum, ut pure tractet sacramenta, et *offerat ei sacrificium vivum, simile sacrificio eius glorioso.* Sacrificium vivum, ex loco Paullino satis constat, esse *λογικὴν λατρείαν*, de qua supra vidimus. Id vult esse *simile* sacrificio, quod Christus ipse obtulit, non *idem*, ut placet Romanis. Quae autem ista est similitudo? ipse sacerdos docet: *quod placeat diuinitati tuae.* Atque hae non sunt imaginationes et arbitraria verborum et sensus supplementa, quae nobis hic obiicit Muratorius, sed interpretationes e sacris literis, et contextu, consuetudine veterum loquendi, secundum leges veras interpretandi, ductae: contra quae non satis est declamare: demonstratione exacta ad interpretandi leges opus est. Ex eadem Liturgia (ap. Renald. T. II. p. 22.) proponitur particula orationis, quae recitatur, cum margarita, h. e. particula panis consecrati, mittitur in calicem: *Pater veritatis, ecce Filius tuus, hostia tibi placita - - hoc sacrificium e manibus meis, ut mihi placatus sis* cet. Haec si quis legat, haereat fortasse. Sed qui totam orationem perspiciat, statim expediatur. Et est hoc vel artificium impostorum, vel inscitia semidoctorum, decerpere tales particulas, quae extra contextum speciem accipiant. Etenim hic
non

non intelligi verum et proprium sacrificium, quod sacerdos immolet pro omnium peccatis, clarum est primum ex eo, quod id sibi vult prodesse, fumentum videlicet, vel *deprecanti*: deinde, quia de sanguine sic loquitur: *Ecce sanguis effusus super Golgotham ab iniquis, qui interpellat pro me. Suscipe deprecationem meam propter eum*: hoc est illud: *suscipe hoc sacrificium* cet. Atque ad hunc modum cetera Liturgiarum loca intelligenda sunt, cum post consecrationem similes formulae verborum reperiuntur, quibus sacrificium refertur clare ad corpus et sanguinem Iesu Christi, neque aliquid est eiusmodi, quod ad dona fidelium referre iubeat, quae qualia sint, supra demonstratum est. Affert *Muratorius* e Coptica Liturgia locum, in quo ad fractionem Diaconus alta voce dicit: *Behedic, Domine, iterum per oblationem hanc sanctam et sacrificium propitiatorium, quod Deo Patri oblatum, sanctificatum completum et perfectum est per illapsum Spiritus S.* Hic clarum est, intelligenda esse dona Christianorum Eucharistiae destinata, quia verba ultima non nisi impie ad Christum referri possunt. Itaque male hic locus a *Muratorio* argumenti causa propositus est. Sequitur alter Diaconi, ante communionem dicentis: *Virtutes coelorum stant nobiscum in medio sanctuarii, et ministerium exhibent corpori filii Dei, qui immolatus est coram nobis.* Hic clare immolandi verbum refertur ad Corpus Christi, sicut in quibusdam aliis *Muratorio* commemoratis verbum offerendi aut sacrificii: quibus locis quantumvis, post *Renaldotium* (T. II. p. 345.) tribuat, iactans etiam se, et nos (nouatores) prouocans, ut contorqueamus hic, si possimus: tamen eorum locorum nullus alius sensus est, nisi, ut corpus et sanguinem Christi sacrificium vocari dicamus, quia olim in cruce hostiam semet obtulit Deo pro peccatis, eiusque rei memoria de praecepto Christi, non iteratio, celebratur in S. Coena, per quam etiam fructus illius in aeternum valituri sacrificii capimus, per remissionem peccatorum. Quod si quis nolet concedere,

cedere, eum rogabo, ut me doceat, quomodo intelligere me velit verba, quae e *Missâ S. Basilii* afferuntur (p. 204.) sacerdotis in Sabbato ante Pascha post consecrata dona: *Rex regnantium et dominus dominantium progreditur, ut MACTETVR et detur in cibum fidelibus.* An Christus etiam in S. Coena a sacerdote crucifigitur et interficitur, atque ita proprie et vere, ut hostia, mactatur? Ceterum parum diligenter fecit *Muratorius*, qui testimoniis his Liturgicis, sine delectu et ordine positis, admiscuit etiam, quae potius ad veram corporis et sanguinis Christi praesentiam asserendam, quam veritatem sacrificii Romani in Eucharistia confirmandam pertinent. Et sunt alia, quae reprehendi in hac disputatione possint: velut cum (p. 204 med.) vituperat Protestantes, qui Iudaeis vera sacrificia concedant, et tamen hoc Eucharisticum improprium sacrificium esse pugnent: quo nihil ineptius dictum vidi. Nouum foedus habet et ipsum sane sacrificium verum et proprium, Iesum Christum, sed id sacrificium, si credere potestis *Paullo*, nec eo vobis potior est, Romani, scholae vestrae auctoritas, semel factum perpetuam vim habet, hoc ipso nomine praestantius Iudaicis, ut *Paullus* demonstrat. Eius autem *ἀνάμνησιν* celebramus in S. Coena: quod cum facimus, etiam in communionem istius victimae sanctae admittimur, edendo, bibendo de ea, et omnia per eam parta bona consequendo. Quid vultis amplius? Non his contentis nobis esse conuenit?

Illud autem mihi concedent omnes, nihil eorum me in hac disputatione fecisse, quorum reos agit alios *Muratorius*. Non de qualitatibus et ritibus veterum sacrificiorum et victimarum disserui, ut per ea eluderem vim testimoniorum: quas quiuiss, bona cum pace mea, cauillationes vocet. Neque ad suspiciones confugi, de interpolationibus et supplementis Liturgiarum, earumque antiquitate et *αὐθεντία*: omnia pro antiquis, genuinis, puris, uti voluit, probaui. Ex ipsis Liturgiis autem et consue-

consuetudine loquendi, vel e sacris libris ducta, vel paulatim in Ecclesiam inuecta, et ex ipsis Liturgiis, cognoscenda, comparatione locorum similium, secundum veras interpretandi leges, omnem disputationem repetii. In quibus, et in quo genere, si quis me convincere aberrationis potest, eum libenter audiam. Restat, ut de locis Doctorum veteris Ecclesiae pauca addamus.

Primum autem grauem dicam ignorantiae Dialecticae impingit *Buddeo*, *Pfaffio*, et aliis, magnus, ut Grammaticus et interpres, ita Dialecticus, qui, quod scriptores Ecclesiastici trium primorum seculorum sacrificium Eucharisticum non commemorant, eum modum loquendi, a simplicitate doctrinae antiquae abhorrentem, quarto demum seculo usurpari coeptum, opinioni nouae locum fecisse existiment. *Si nemo nec Apostolorum nec ceterorum per tria secula Doctorum hoc sacrificium commemoravit: an negauit ex iis quisquam?* Ita callide interrogat. *Eratne eis lex imposita, ut, cum Eucharistiam memorabant, etiam sacrificii mentionem facerent?* Ad quae facile responderi potest. Viri illi docti non ignorabant, silentii quae vis esset in monumentis scriptorum. Non omne sane silentium est eiusmodi, ut propter id solum aliquid pro falso repudiemus. At si silentium non est vnius, aut paucorum, sed omnium, inque re, de qua tam saepe, tam clare loquuntur, cuius totam naturam et rationem ex instituto explicant, quae est eiusmodi, ut eam nullo modo tacere debuerint: ne tum quidem silentium illud valebit? De primo mox videbimus: alterum ne ipse quidem negauerit *Muratorius*: tertium autem quomodo dubitari potest ab eo, qui sacrificio Eucharistico tantum tribuit? Hanc tantam rem omnes tacere? nec cuiquam verbum de ea excidere? cum posteriores tam frequenter eius mentionem usurpent. Non vero simile est. Quod si probare velimus rationem Muratorianam, ut dogma alicuius momenti et a *Θεοπνεύματος* et a ceteris trium seculorum Ecclesiasticis scriptoribus perpetuo silentio premi,

premi, et per traditionem conseruari possit: omnia obtrudi nobis poterunt, quae posterioribus in mentem venerint, quamuis absurda, velut per traditionem quandam ad ipsos inde a Christo propagata. Atque illa traditio *Irenaei*, per quam dogmata quaedam non scripta ad posteros peruenisse vult *Muratorius*, a TE, VIR VENERANDE, ita confecta et abiecta est in praeclara aduersus *Massuetum* disputatione; vt pudere debeat omnes, eius ultra mentionem iniicere, praesertim talem virum, qui in antiquis monumentis, graecis et latinis, bene versatus videri voluit, vnde discere potuit ac debuit *παράδοσιν* et tradere, cum de dogmatis dicitur, semper vel disciplinam viui, vel libros mortui significare, cum autem de praeteritis rebus, imprimis memoria nostra maioribus, sermo sit, semper de monimentis literarum intelligi, nunquam de fama et sermone hominum. Itaque cum historici aliquid tradi, vel traditum esse dicunt, id semper de aliorum historicorum libris accipi debet: quando etiam fama ipsa de rebus antiquioribus sic dici solet apud *Liuium* et alios: nec id ignorat quisquam, ab idoneo magistro literis graecis et latinis eruditus.

Enimuero non opus erat *Muratorio*, *illegitimas et abominabiles leges logicas* obiicere iis, qui ista ratiocinatione vsi sunt: satis erat, recte demonstrare, falsum esse, quod sumtum esset de isto trium seculorum silentio. Ea demonstratio quam male processerit viro, facile doceri potest. Sed huic demonstrationi aditum parat per observationem mirabilem, qua bonus *Paullus* perspicui erroris coarguitur. Christum, ait, sacerdotem esse similem Melchisedeco, auctore *Dauide*: sacerdotem autem esse, qui sacrificia administret: Iam Christum vtique sacerdotem et hostiam fuisse in cruce. Haec bene. Quid amplius? Sed ibi *sacrificium non peregisse*, vt sacerdotem Melchisedeco similem deceret: itaque id facere in S. Coena: ibi et *sacerdotium et sacrificium exercere*, in consecratione panis et vini, et eorum oblatione: ibi alterum

Ernesti Opusc. Theol. F eius

sus sacrificium intelligendum esse. Et hanc observationem in primis teneri vult. Haec si vera sunt, profecto *Paulus* erravit, qui Christum non, vt ceteros sacerdotes, necesse habere, ait, sacrificare pro peccatis hominum saepe ac quotidie; *sed id fecisse semel, cum semet ipse immolaret* (Ebr. VII, 27.). Atque etiam ipsa Ecclesia Romana conuincitur erroris, quae Christum in S. Coena immolari dicit a sacrificulo: eoque putauit pertinere loca e Liturgiis a *Muratorio* allata. Nunc audio, non sacrificuli esse hoc, sed Christi ipsius. Sed hoc Theologi Romani viderint. Tota igitur observatio est commentitia et falsa, vt leniter dicam, vel hoc nomine, quod S. Eucharistia antecessit mortem Christi: vnde planum fit, non peractum ibi sacrificium: in cruce coeptum. Dehinc sequitur locus *Malachiae* I, 10. comparatus cum locis *Iustini* duobus e Dialogo cum Tryphone, iam saepe a Romanis Theologis in hac controuersia allatus frustra; vt taedeat aliquid reponere, cum ipse nil responderit iis, quae contra dicta sunt a multis, in primisque praeclare a *Pfaffio* V. C. in eruditissimis ad *Irenaei* Anecdota notis p. m. 684. *Malachiae* quidem מנחה טהרה נא־תָּעָרֵם דְּמִצִּיָּא tropice accipiendam esse, puer intelligat ex adiuncto solo. Non victimas enim modo puras per totum orbem terrarum faciendas praedicit, sed etiam מִקְטֹר דְּמִצִּיָּא: et *Tertullianus* adu. Iud. (p. 211. ed. *Rigalt.*) sacrificia *Malachiae* diserte interpretatur de laude diuina, et corde contribulato; itemque apud *Iustinum* et *Irenaeum*: nam et hunc addit *Muratorius*: non modo προσφορὰ fieri in S. Coena dicuntur, sed etiam a *Christianis*, noui Testamenti sacerdotibus ac Pontificibus, et quidem e *creaturis diuinis*, h. e. pane et vino, non a Christo, aut sacrificulo Clerico, nec de corpore et sanguine Christi. Sed de his non erat sermo ac disputatio. Itaque illa loca sunt aliena omnia: nec minus cetera. *Tertullianus* Christum vocat *nouorum sacrificiorum sacerdotem*, adu. Iudaeos l. c. Bene: sed *spiritualium, cordis contribulati*, vt dixi, *precum et laudum*

laudem diuinarum: nam de his ibi sermo. Indignatione subinde opprimor, VIR VENERANDE, in talibus locis, quae nimis clare sunt aliena, qui alias facile diffensum fero, et imbecillitatem ingenii humani non ignoro. Profecto aut puer sit stultissimus, aut impudentissimus, qui in hoc loco sacrificium S. Coenae e mente Romanae Ecclesiae reperiatur, et inesse aliis persuadere conetur, aut aliud dicat, aliud corde premat. Sed fortasse et *Muratorius* et alii gregales eius in legendis scriptis veteris Ecclesiae ita adficiuntur, ut ille apud *Horatium* Athenis felix homo, qui, cum in portum venisset, omnes, quae ibi essent, naues, et in iis merces, suas putabat, et mirifice laetabatur tantis diuitiis suis. *Sacrificiorum orationes* commemorantur ab eodem (de oratione p. 155.) *Rigaltius*, praeclarus *Tertulliani* interpres, intelligi admonet preces. Verissime. Et si quis quid ibi aliud videt, eum male videre certum est. At a *Muratorio* eo nomine male accipitur. Quo argumento? quia *Tertullianus* diserte sacrificia ab orationibus distinguit. Quomodo? *Sacrificiorum orationes* dicit, non *orationes*. Proh! hominum fidem. Si hoc non est nugari in re seria, quid est aliud? O quicumque iuuentutem docetis interpretari, huic homini vos in disciplinam committite, ab hoc discite interpretari. Diebus stationum quidam negabant *interueniendum orationibus sacrificiorum*, ne statio solueretur, quod fieret accepto corpore Domini. Quae sunt istae orationes sacrificiorum? nempe Eucharisticae oblationes, et cum iis coniunctae laudes diuinae et preces: quibus qui aderant, etiam Eucharistiae participes fiebant. Sed omnino, quae sacrificia Christianorum statuatur *Tertullianus*, docet *Pfaffus* V. C. de Obl. Euch. §. 38. Post longam deinde et inutilem de altaribus disputationem, e quibus et ipsis argumentum rei propositae exprimitur, offertur locus *Origenis* e IV. homilia in Leuiticum: *Sacerdos, qui diuinis adfuit altaribus, aliis indumentis utitur, cum est in sacrificiorum ministerio.* Qui locus nullum euidens argu-

mentum habet. Nam sacrificiorum nomine possunt etiam intelligi preces, laudes diuinae, oblationes panis et vini, quae sacrificia vocari a veteribus, qui neget, nihil sciat necesse est, et est supra demonstratum. Nec locus alter, e libris contra Celsum, illi aliquid roboris addiderit; in quo Christus, vt summus Pontifex, *preces et sacrificia nostra Deo fistere* dicitur, i. e. commendare, vimque iis addere: quod profecto alienum sit, intelligere de ipso, et de hostia corporis eius, a sacerdote immolata: quae, si literis sacris fides est apud Romanos, non indiget aliqua commendatione et deprecatione. Enimvero eas preces et victimae sunt Christianorum omnium, non sacrificulorum modo, vt contextus plane declarat: quae profecto indigent commendatione ad dextram Dei sedentis Seruatoris nostri.

Haecenus nihil in scriptoribus trium priorum seculorum repertum, quod antiquitatem Romanae opinionis firmet: et restat vnus, qui ad testimonium dicendum producitur, *Cyprianus*, cuius verba sunt speciosiora. Sed hunc quoque nihil statuisse diuersum a superioribus, inprimisque *Tertulliano*, vel illud arguit, quod hunc magistrum suum vocat, cuius disciplinam diligenter sequatur. Itaque si quid amplius dicere videatur, quam in istius libris de sacrificiis Christianorum traditur, id, pro ingenio hominis Africani, dictum durius; sed lenius et e *Tertulliani* disciplina explicandum videtur. Et primus quidem locus a *Muratorio* propositus est ex Epistola LXIII. ad *Caecilium*, in qua primum, *Christus Deo Patri sacrificium obtulisse*, dicitur, *idem quod Melchisedecus, i. e. panem et vinum, suum scilicet corpus et sanguinem*: deinde, *idem fieri in sui commemorationem, praecepisse*: denique, *sacerdotem vice Christi vere fungi, qui Christum imitetur, et sacrificium verum et plenum in Ecclesia offerre Deo Patri*. Huic autem loco similia sunt cetera, in quibus *Dominica sacrificia* commemorantur, et *sacrificium Christi* (sermo autem est de S. Coena) et *Dominicae hostiae* (in S. Coena) *veritas*, et *sacrificium pro Dormitione*. In his vnum illud respon-

responsione indiget, quod *Christum* in Eucharistia *Deo Patri sacrificium obtulisse* dicit. Cetera, quae sacrificium ad sacerdotes referunt, expediet *Augustinus*, quem interpretem nemo Romanus repudiet. Eius sunt in Libro X. de Ciuit. D. et c. Faust. XX, 2. haec verba: *Quod ab omnibus appellatur sacrificium, signum est veri sacrificii.* Ita profecto se res habet. Quia Eucharistia habet *ανάμνησιν* Christi mortui, et sacrificii eius in cruce peracti, propter ea paullatim coepta est tota Eucharistia sacrificium dici: eius initium factum arbitror in Ecclesia Africana, fortasse per ipsum *Cyprianum*. Nam Africani, id quod nemo nescire potest, qui vel *Tertullianum*, vel *Cyprianum*, vel *Arnobium*, degustauit leuiter, tropos duos amant et allegorias, hyperbolas etiam, et insolentes loquendi modos: quos si nos, frigidiori sub coelo nati, nostra loquendi consuetudine aestimare vellemus, quid non interdum inde eruere possemus. Sed forte omnino eloquentiae turgidiori, quae ista aetate, in Africa quidem maxime, sed etiam in Graecia valuit, ea res tribui potest. Consideret quis hunc locum *Chrysostomi* in Opere disertissimo de Sacerdotio, III, 4. *ὅταν γὰρ ἴδῃς τὸν κύριον τεθυμένον, καὶ κείμενον, καὶ τὸν ἱερέα ἐφυσῶτα τῷ θυματι, καὶ ἐπενυχόμενον, καὶ πάντας ἐκείνῳ τῷ τιμίῳ αἵματι Φοινισσομένης* cet. An haec proprie omnia intelligi volumus? si *κύριος τεθυμένος, καὶ κείμενος* et *Θῦμα* ita accipi debet, vt volunt Romani: age etiam τὸ *ἴδῃς* et *Φοινίσσασθαι αἵματι* proprie accipiant. At si haec improprie dicta fateantur, illa quoque ita intelligenda concedant necesse est. Oratorie hic loquebatur, vt saepe in isto libro, *Chrysostomus*. Quod si vero quis desiderat verum viri sensum cognoscere, ipsum audiat in sermone XVII. ad Epistolam *Paulli* ad Ebr. interpretantem perspicue, non oratorie differentem (p. 1872. ed. Sylb.) *ὁ ἀρχιεὺς ἡμῶν ἐκεῖνός ἐστιν, ὁ τὴν θυσίαν τὴν καθάρουσαν ἡμᾶς προσενεγκών. ΕΚΕΙΝΗΝ ΠΡΟΣΦΕΡΟΜΕΝ ΚΑΙ ΝΥΝ, τὴν τότε προσενεχθεῖσαν, τὴν ἀάλωτον. τῆτο εἰς ἀνάμνησιν*
F 3 γίνεται

γίνεται τῷ τότε γενομένῳ. τῷτο γὰρ ποιῶτε, φησὶν, εἰς ἐμὴν ἀνάμνησιν. ΟΥΚ ΑΛΛΗΝ ΘΥΣΙΑΝ, καθάπερ ὁ ἀρχιερεὺς, ΑΛΛΑ ΤΗΝ ΑΤΤΗΝ ΠΟΙΟΙΜΕΝ, μᾶλλον δὲ ΑΝΑΜΝΗΣΙΝ ἐργαζόμεθα ΤΗΣ ΘΥΣΙΑΣ. Ad hanc igitur normam verba Doctorum veteris Ecclesiae, de sacrificio corporis et sanguinis Christi in S. Coena, interpretabimur, si bonorum interpretum munere fungi velimus.

Sed de primis istis verbis videamus, quibus *Christum* in Eucharistia *Deo Patri sacrificium obtulisse*, dicit *Cyprianus*. In eo autem sacrificium Christi non proprie dici, sic clarum fieri arbitror. *Cyprianus* non ignorabat, victimam viuam non immolari proprie, nisi caesa sit. Itaque nullo modo credere poterat, Christum a se proprie immolatum in Eucharistia, cum adhuc viueret, sed potius existimabat, Eucharistiam a Christo celebratam fuisse figuram veri sacrificii mox futuri. Hoc est corpus meum, inquit Christus, quod pro vobis, salute vestra, mox interficietur, i. e. immolabitur. Vt nostram Eucharistiam ἀνάμνησιν τῆς θυσίας γεγενημένης cum *Chrysostomo* statuebat, sic primam illam Christi, προέγνωσιν et προδήλωσιν γενησομένης. Iniuriam faciunt sancto et erudito viro, qui eum aliter iudicasse, hoc est, nec sacrificii veri naturam tenuisse, nec verba Christi intellexisse contendunt. Quo ergo sensu dixit, *Christum sacrificium Deo Patri obtulisse*? Volebat conuincere erroris grauis Aquarios, qui, vino e S. Coena sublato, aquam vsurpabant. Vtebatur solenni illa Melchisedeci comparatione eum Christo, et ostendere instituebat, eum Christi figuram etiam in hoc fuisse, quod panem et vinum *obtulerit*, (sic diferte dicit §. 2. extr.) et hinc colligi existimabat, vinum in S. Coena esse debere, cuius imago sacrificium Melchisedeci fuerit. Non dicam errasse *Cyprianum*, qui panem et vinum Regis interpretatus sit de sacrificio, et *נָתַן extulit*, sc. ex vrbe sua, Abrahamo et militibus, commutarit in *obtulit*, sc. Deo. Illud dico, sacrificium Christi

Christi Eucharistiam vocasse, et consuetudine oblationum panis et vini in S. Coena, ob quas tota Eucharistia sacrificium appellata, neque ei in mentem venisse, corpus Christi proprie immolatum a Christo, aut immolari a sacerdotibus. Clarum igitur est, *Muratorium* e trium primorum seculorum libris nullum idoneum testimonium protulisse, quo sententia Romana de sacrificio Eucharistico confirmaretur. E sequentibus seculis nil proferre lubuit *Muratorio*, quorum scriptores et saepius et crassius de illo sacrificio locuti sunt, et magis apte ad Romanae Ecclesiae sententiam, ut fatentur nostri quoque eruditi Theologi. Sed omnia illa dicta e *Chrysostomi* formula, ante proposita, intelligi debent, neque de iis quicquam dicere opus est.

Absoluta est de sacrificio disputatio: sed ad duo praeterea aliquid respondendum, quae in Muratoriana disputatione dicta sunt. Impios vocat maiores nostros, per occasionem Cyprianici loci, qui aquam e S. Coena proscripserint: negatque ferendam temeritatem nostram, qui aut ignorantiae aut praeuagationis accusamus primae Ecclesiae Patres, qui Dominicam hanc et Apostolicam traditionem vocent, ut aqua vino admisceatur. Maledicus est, qui nobis affingit iniurias istas in viros sanctos. Nemo eruditus nostrae formulae Theologus neget, veterrimam hanc consuetudinem fuisse, quae apud *Iustinum* memoretur: nec *Lutherus* dubitauit. Immo diu haesit dubius, utrum aquae usum relinqueret in Eucharistia, an tolleret. Ad extremum vini verbo stare, et merum vinum adhibere decreuit. Non hoc nomine impietatis accusandi sumus; nec ego exprobrem Romanis aquae usum. Immo credo, Christum aquam admixtam vino dedisse Apostolis, et Apostolos idem fecisse, cum omni vetere Ecclesia: idque crederem, si nullum eius rei vestigium in libris Christianorum scriptorum superesset, sola hac verissima inductus causa, quod nemo fere olim in Asia, aut Graecia, aut Africa, aut

Italia, vinum bibit merum, sed semper aqua mixtum, et quidem ita, vt fere plus aquae esset, quam vini. *Où Phé-
ren ta réia*, Graecum est de vino non satis bono aut generoso dictum, h. e. cuius vni sextario non terni sextarii aquae admisceri possent, salua saporis suauitate. Intemperantis hominis putabatur, merum bibere: quod est a Christo et Apostolis alienissimum. In vini ergo verbo veteres semper aquam admistam intelligunt. Sed tamen recte fecisse *Lutherum* in aquae vsu tollendo existimo: propterea, quod aqua in vino Eucharistico non aliam ob causam fuit, quam quod mos esset, vinum non aliter bibere, quod apud nos secus est, qui vinum sine aqua bibimus, sine turpitudinis nota: neque vlllo modo dubitari potest, quin, si his in terris Christus vixisset, et Eucharistiam instituisset, merum daturus fuerit. Itaque mihi semper ridiculus visus est *Wagstaffi*, *Bretti*, aliorumque Britannorum conatus, aquae vsum in Eucharistia reuocare tentantium, quem male abolitum ab veritatis Evangelicae instauratoribus putabant, miratusque sum, eos non et hoc postulasse, vt accumbentes acciperemus corpus Dominicum: inprimis cum etiam frangi velint panem in Eucharistia *Caluini* sectatores: quia a Christo fractus est: quasi nesciremus, id non factum alicuius rei significandae causa, sed quia cultris in coenis non utebantur, vt nunc, Orientis populi.

In principio huius disputationis de sacrificio Eucharistico, mirifice se iactat *Muratorius* in eo, quod *I. E. Grabijs*, vir antiquitatis Ecclesiasticae peritissimus, agnouerit sacrificii antiquitatem, minimeque probauerit, id e Protestantium Ecclesiis per *Lutheri* et *Caluini* errorem esse sublatum, sed reuocari voluerit, in notis ad *Irenaei* IV, 32. in quam partem multos claros in Britannia Theologos procliuos fuisse satis constat, vt illo ipso loco tradit *Grabijs*. Sed non erat, quare tantopere gloriaretur hoc nomine *Muratorius*. Etenim longe aliud sacrificium est, quod Britannis placet: illud videlicet, quod est in panis

panis et vini oblatione, cum laudibus diuinis et supplicationibus, quod in Liturgiis latinis frequentatur: incruentum sacrificium corporis et sanguinis Christi, cuius haec vis sit, vt Christus a sacerdote imoletur, nec agnoscent, vt opinor, nec probant: quod, cum multis aliis rebus, discere potuisset ex eo, contra quem disputat, Ven. *Pfaffi* libro, si eum legisset. Quamquam ne hac lectione quidem opus erat. Clarum enim est, nullum aliud a *Grabio* sacrificium intelligi, quam de quo *Irenaeus* dicat: quod quale sit, h. e. quam discrepans ab eo, quod defendit *Muratorius*, ante demonstratum est.

IV. *Adorationem Eucharistiae Liturgiarum et Patrum Eccl. auctoritate non firmari.*

Tam manifesta est nouitas Adorationis Eucharisticae in Ecclesia Romana, vt praedare est a TE, VIR VENERANDE, demonstratum, ab instituta panis et calicis post consecrationis formulam eleuatione, cuius nouitatem agnoscit ipse *Muratorius*, agnoscique ab omnibus eruditissimis Catholicis p. 227. adfirmat, inuectoque transubstantiationis commento orta, vt mirum videri possit, *Muratorium* eius antiquitatem defendere tentasse. Sed quid ille non tentauerit, qui, vt ante multis exemplis vidimus, mira felicitate an impudentia, quicquid vellet, vbique reperire potuit. Vfus autem est in aditu demonstrationis cauta aliqua et callida praemunitio. *Vt etiam pusillis satisfiat* p. 228. med. (quos pusillos vocet, et quomodo, non satis latine scio, vt assequi possim) *animaduerti vult*, quidnam? haud dubie aliquid eiusmodi, quo perspicua res fiat, e quo, tanquam e principio, tota demonstratio ducatur? Quid ergo? *mirum esse, qui ab hominibus non ineruditissimis, ob adorationem C. et S. Domini in Missa ad eorum eleuationem lis moueatur.* Sane qui hoc animaduertat ac teneat, is facile capiet demonstrationem subiectam, eiusque vim sentiet. Iam proponitur res

demonstranda: Quamuis noua sit eleuatio, tamen adorationem non esse nouam, sed semper usitatam fuisse. Adorationis autem nomine intelligi animi submissi obsequium, quod Deo praestetur: quod ut ipsum sufficiat Deum adoranti, tamen etiam gestibus corporis declarari posse, ut genibus flexendis, procumbendo in genua, etiam sola capitis inclinatione: eosque semper inter homines viguisse. Sed qui gestus maxime sit usurpandus, Ecclesiam praescribere posse. Haec vere disputantur. Sed quorsum? quid id ad propositam causam? Nempe ut, quia adorationis verbum raro in Liturgiis occurrit, omnibus locis uti possit, ubi inclinatum caput, aut genuum flexio commemoretur: quae loca ille omnia, pro admirabili sua interpretandi solertia, qua e quolibet eruere potest quidlibet, ad adorationem eam, quae nunc valet in Ecclesia Romana, vltimae antiquitati adserendam conferet. Sed nihil proderit homini ista philosophandi calliditas, praesertim cum ea iam usu crebro patefacta et abiecta sit. Et cum *Muratorio* visum sit, demonstrationi Liturgicae praemittere talem philosophiam; nobis quoque aliquid vniuerse dicendum videtur.

Adorationem, et προσκύνησιν, et similis potestatis verba in Liturgiis et Ecclesiasticorum scriptorum libris de Eucharistia occurrere, de eo nunquam dubitatio aut disputatio fuit apud intelligentes. Itaque si quis nihil aliud, quam verba ista in re Eucharistica usurpata olim, exemplis ostendat, ut dudum *Bellarminus*, *Perronius* alique fecere, operam perdit et famam doctrinae. Nam verba illa non necessario aut semper pertinent ad honorem eum, qui diuinæ naturae debetur, sed cuiusunque honoris ac reuerentiae significationem possunt habere, ut etiam pueri norunt. Atque etiam satis constat, orientales gentes procliuiiores fuisse occidentalibus ad procumbendum in terram, etiam in humanis honoribus, eamque consuetudinem nunc quoque in multis nationibus vigere. Itaque ipso fatente *Bossueto*, p. 234. callidissimo isto Liturgiae Romanae defen-

defensore, et *Muratorio*, adorationes factae in Eucharistia ante consecrationem, cum panis et vinum, et vasa adferrentur. Nam quod hic inter *adorare* et *venerari* discrimen facit, id est ab antiqua Latinitate alienum, quae *venerari* libenter de Deorum honore usurpat. Neque vero quisquam nostrum intercedat, si in accipiendo pane et vino, h. e. corpore et sanguine Christi, quis adoret, ita scilicet, vt, cum preces ac supplicationes solennes facimus, h. e. non propter panem in corpus conuersum, aut necessario, (nam Christi quidem discipuli, cum e Christi manibus acceptum panem ederent, non adorant;) sed reuerentia in Deum et Iesum Christum Seruatorem, cuius corpus sumitur, idque etiam si, vt *Calixtus* voluit, corpus Christi verum non sumeretur, tamen recte fieret, fierique potest in omni Dei cogitatione, sed, vt dixi, non necessario. Etenim si ob praesentem Deum et Christum procumbendum est necessario, semper in terra prostrati iacebimus, cum semper adsit, simusque in conspectu eius. Nihil horum aut quaeritur, aut in dubitationem adducitur. Sed an adoratio ea, quae Deo propria est, quam solam Theologi in arte sua ac disputationibus intelligunt, fieri possit, ac debeat, vel in Eucharistia, cum nondum accipias, vt verbis sacrificuli, *hoc est corpus meum*, velut fulmine prosternare, tanquam ille panis nunc esset repente Deus adorandus, aut extra Eucharistiam cum panis, super quem ista verba pronuntiata sunt, conspicitur vsquam, ea quaestio est, hoc disputatur inter Theologos: an talem adorationem vetus Ecclesia usurparit, probarit, hoc nunc disputandum erat, hoc quae indicarent clare, loca proferenda erant. Talia an sint Muratoriana, iam videbimus.

Atque initio quidem in Liturgiis suspensiones serit quasdam ex eo, quod nullum ex antiquis Sacramentariis habere nos dicit, in quo rubricae, seu ritus omnes legantur, in Missa olim usurpati: vnde multum lucis ad dignoscendam antiquitatem adorationis in Eucharistia detrahatur

Etum sit. Vult enim homines suspicari, adorationem tamen factam, etsi in Liturgiis non clare commemoretur. Cui rei nos silentium *Iustini Martyris* opponimus, qui omnes ritus Eucharisticos narrat, etiam surgendi consuetudinem in precibus Eucharisticis, nec vlllo modo taciturus erat adorationem, si tum vsitata esset. Sed tamen satis perspicuum huius ritus vestigium superesse ait. Id impressum videt in vtroque *Ordine Romano*, post alios a *Mabillonio* edito, in quorum altero *) *Pontifex vel Diaconus inclinato capite salutare sancta dicitur.* (in Mus. Ital. T. II. p. 8 med.) *adorare* autem in altero (ibid. p. 43.) vnde sumsit ac repetiit *Amalarius* in Ecloga ad h. l. a *Baluzio* in Append. Capitularium et *Mabillonio* l. c. editus. Enimuero quam non bene discernat rerum vestigia diuersarum, plane demonstrabimus, et totum hoc Liturgicum argumentum dissoluemus. *Sancta* in vtroque loco esse Eucharistiam, quod sumit *Muratorius*, demonstranti *Mabillonio*, Commentar. in Ord. Rom. p. XXXVI. facile concefferim, h. e. panem *σὺχαριστήρια*, vt *Iustinus* vocat, siue consecratum antea, in superiori Eucharistia, nec consumtum in distributione, sed residuum: eaque res ipsa nobis in vltima huius disputationis parte plurimum aduersus *Muratorium* proderit. Nam et vsus loquendi Graecorum, vnde Latini duxere, et loca, in quibus id verbum reperitur, satis euidenter rem arguunt. Sed adorandi verbum hic non habere eam vim, quam disputationis praesens desiderat, clarissimum est. Nam in loco altero, qui est huic par, in *Ordine Primo*, synonymum ei ponitur *salutare*: quod verbum esse quidem honoris habendi, sed non necessario diuini, permultis eiusdem ordinis locis patet. Nam et altaris latera salutant *Diaconi*

*) *Primum* vocat *Muratorius* apud *Cassandrum*, *Historpium* et *Mabillonium*. Sed est primus modo apud hunc: apud illos est secundus, et primus contra, qui est apud *Mabillonium* secundus.

eoni (p. 8.) et Pontifex salutat altare, cum ad id ascendit ad accipiendas oblationes (p. 11 extr.) quod insanus sit, qui de adoratione, quam Theologi dicunt, capiat; et *salutatur Pontifex*, *Ord. R. III*, p. 54. 55. Itaque etiam in Cruce adorare et salutare permutantur (p. 23. et alibi) Tum honos habetur et reuerentia quaedam pani, qui ex superiori *σὺχαρίστα* aliquid sanctitatis habere videtur. Omnia autem sancta quocunque modo, salutantur et adorantur inclinato capite, vt ex omnibus Ordinibus patet, ipse etiam Pontifex, vt statim docebimus. Nec prodest *Muratorio*, quod haec *Sancta* etiam vocantur corpus Domini (p. 26.) quod si ille vidisset, in capite ultimo, commemorare non neglexisset: retinent enim nominis honorem ex pristina consecratione. Atque etiam modus illius adorationis ita clare exprimitur, vt dubitare non liceat, salutationem fuisse, qualem tribuere etiam homines hominibus solent, velut nos sacerdoti, & cuius manu accipimus panem vinumque in S. Eucharistia. *Pontifex inclinato capite adorat vel salutatur Sancta*. Ipse *Muratorius* pro documento adorationis per totum Canonis tempus durantis affert verba eiusdem *Ordinis Primi* Mabilloniani, quibus Episcopi, Presbyteri, Diaconi, et Subdiaconi *inclinati* dicuntur *permanere*, durante Canone, in Missa Pontificali p. 48. Enim vero ista capitis inclinatio in Liturgia est nihil nisi honos, reuerentiam quamcunque demonstrans, vt multis Ordinum locis patet. Nam, vt ante dixi, *Prior scholae se inclinat Pontifici*: (p. 9.) *Quartus scholae dicit inclinato capite ad priorem scholae, vel secundum, siue tertium: Domini iubete*: (p. 55.) *Pontifex veniens in tribunal Ecclesiae inclinat caput contra altare*, quo tempore nondum ibi sunt Sancta. Et talia sunt in Ordinum libellis permulta, quae pudorem incutere debent iis, qui ex locis ante prolatis cum *Muratorio* exsculpere adorationem propriam velint. Atque etiam hoc aueam scire, quare solus Pontifex, vel Diaconus adoret, nusquam in rituum Eucharisticorum, qui in his

Ordi-

Ordinibus exponuntur, enumeratione, populus? At hoc ipsum erat, quod quaerebatur, an adoratio talis religiosa fuerit consecrati panis et vini, qualis nunc in Eucharistia Romana usurpatur, ut ad verba, *hoc est corpus meum*, omnes procumberent. Cur porro in *Ord. II. p. 48.* vbi, quid Pontifex et Presbyteri et Diaconi faciant per Canonem, distincte traditur, nemo quisquam ad illa verba prosterni dicitur: nisi quod, stante pontifice consecrante, ceteri Ecclesiastici ordinis homines omnes sunt inclinati, inde a principio precum oblationis.

At in Graecis Liturgiis, nominatim ea, quae *Chrysostomo* tribuitur, etiam populo *προσκύνησις* clare tribuitur, facta consecratione, ostensoque populo pane consecrato, firmante etiam, *Anastasi Sinaitae* narratione in Orat. de Sancta Synaxi, (ap. *Canisium* T. I.) Sed et *Ronaldotius*, qui tanta cura rem Liturgicam tractauit, et *Muratorius* parum diligenter illum locum considerarunt, nec cum vniuersa Liturgiae Orientalis ratione contulere: quod si fecissent, haud dubie intellexissent, τὸ προσκύνησιν non pertinere proprie ad panem et vinum consecratum. Age igitur rationem *προσκύνησεως* in Liturgia Orientali paucis exponamus. Vt omnis cultus diuinus, et priuatus, et vero etiam in primis publicus, duabus rebus continetur, quarum prima et summa est in laudibus diuinis, et memoria beneficiorum diuinorum, in primis eorum, quae per Christum data sunt, cum gratiarum actionibus celebranda; altera in precibus et supplicationibus pro nobis et alijs: ita Liturgia Eucharistica, in quam apud veteres omnis prope cultus Dei publicus conclusus erat, haec duo habet. Iam in parte priori, quae est laeta et hilaris, stant Christiani erecto vultu, et Liturgiae Orientalis formula: in parte altera, quae debet habere submissionem animi, tristitiam e peccatorum et indignitatis conscientia, *προσκύνησι*, inclinantque capita. Hoc iam testimoniis confirmabimus. In Liturgia *S. Basilii* Graeca p. 65. in principio oblationis (*προσκομιδῆς*) quae

quae est in laudibus diuinis, Diaconus iubet Christianos sedentes surgere: οἱ καθήμενοι ἀναστῆτε· quod fit eodem loco in Liturgia *Gregorii* p. 100. Atque ita stat per totum consecrationis Canonem, vsque ad verba populi, σὲ αἰνῶμεν, σὲ εὐλογῶμεν, in vtraque Liturgia. Tum Diaconus (p. 68. 100.) proclamat: κλῖνατε Θεῷ μετὰ φόβου: quod idem est cum τῷ προσκυνεῖν: sicut ante inclinante capita, idem facit *Muratorius* in verbo adorandi. Enimvero hic nondum, e mente Orientalium, adest corpus et sanguis Christi. Quorsum igitur iubentur adorare? Quia incipiunt hic preces sacerdotis, primo pro panis et vini ἁγιασμῷ, deinde pro κοινωνήσασιν, et denique pro omnibus viuis et mortuis: καὶ δέόμεθα καὶ παρακαλεσμέναι σε, pergit sacerdos. Diaconus etiam postea iubet τὰς κεφαλὰς κλῖναι (p. 77.) et sequitur deprecatio, item eodem modo (p. 79 et 85. 105. 119.) Atque ita plane est in Liturgia *Chrysostomi*, Sacerdos Diaconus προσκυνῶσιν, et similiter totus Christianorum coetus. Quare autem? ob deprecationis submissionem: λέγοντες μυσικῶς τρεῖς, ὁ Θεὸς ἰλάσθητί μοι ἁμαρτωλῷ. Ergo Deum adorant, submisisse deprecantes peccatorum veniam. His autem dictis surgunt, et Diaconus non proclamat κλῖνατε, cum vult facere ὑψώσιν ἁγίων, sed προσχωμεν attendamus. Et tamen ex his verbis efficere volunt miserrabiles interpretes, hostiam consecratam eleuatamque, adorari solitam fuisse in Ecclesia Graeca, solo verbo nixi, omnium aliarum rerum, quae in legitima interpretatione spectari debent, negligentissimi atque securi. Non igitur hoc dubitationis oppono, quod nolebat *Renaldotius* pag. 266. quod antiquiores libri non habeant, quae in recentioribus reperiantur. Habeant per me omnes. Verba ipsa aliud sonare, quam isti volunt, doceo.

Est autem simillima ratio eorum, quae e Liturgiis Syrorum et Coptorum proferuntur. *Renaldotius*, ceteris paullo diligentior in hac etiam parte, qui etiam reprehendit gregales suos, qui omnem inclinationem capitum aut

aut *κοινωνία*, ad adorationem hostiae referant, in vtraque de hac re disputatione T. I. p. 269. et T. II. p. 214. is igitur nullum in ipsis Liturgiis antiquis repertum locum proposuit, e quo adoratio intelligeretur: sed aliorum de ritibus scriptorum testimoniis usus est, de quibus statim videbimus. At multo oculatior fuit *Muratorius*. Nam e Liturgia Syrorum ea, quae *Gregorio* tribuitur, profert locum eum, ubi post consecrationem Diaconus clamat: *Adorate Agnum, Verbum cet.* et addit: nil referre, vtrum statim, ab consecratione, i. e. verbis *hoc est corpus meum* adoratio fiat, vt a Romanis, an ante *κοινωνία*, vt apud Graecos: satis esse, adorationem usurpatam fuisse. Primum multum interest ad quaestionem eam, quam supra posuimus: deinde, quis neget, adorandum esse I. C. cuius corpus et sanguis sumitur. Immo omni tempore est adorandus pia mente, nedum eo tempore, quo tam arcte nobiscum coniungitur. Sed ipse sensisse videtur imbecillitatem huius testimonii. Itaque se repente a Liturgiis transfert ad scriptorum Ecclesiasticorum auxilia, quibus et ante, in hac ipsa disputatione, usus erat.

Sed horum scriptorum, qui et ab *Muratorio* et a *Renaldotio* testimonii causa commemorantur, non eadem ratio est. Quidam sunt antiquiores, sed ita, vt inferiores tertio quartoque seculo sint omnes; quidam valde recentes, e seculis multa iam barbarie et superstitione inquinatis, et mole caeremoniarum nouarum oppressis. Iam, qui ex his consuetudinem antiquae et incorruptae Ecclesiae cognoscere velit, is idem faciat, ac si e *Cerimoniali Constantini*, quod nuper in hac vrbe editum est, discere velit ritus aulae Romanae, qui sub *Augusto* ac *Tiberio* fuere. Tales autem sunt Renaldotiani omnes, et e Muratorianis, *Theodorus Studites*, *S. Maximus*, *Pseudo Dionysii* Scholiastes, *Lucas Iunior*, homines, etiam si planissime dicant, quod iubentur, nullo modo audiendi. Sed nec hi, nec locupletiores, *Ambrosius*, *Augustinus*,
Theodo-

Theodoretus, Cyrillus, Renaldotio et Muratorio pariter commemorati, dicunt, quod caussidicus volebat et sperabat. Adorari in S. Eucharistia Christum et corpus eius dicunt, siue, vt diserte *Cyrillus a pronis, inclinatis adorationis in modum, summa cum reuerentia et veneratione*, vt *Hieronymus* ait, sumi. Nam vt, quemadmodum *Renaldotius* bene docet, *γωνυκλισία* inclinatio capitis et corporis, quae est adoratio visibilis et corporea, fit etiam ad suscipiendam benedictionem sacerdotis (E. II. p. 253 extr.) sic haec adoratio et veneratio pertinet ad suscipiendum ore corpus et sanguinem Christi, et benedictionem adeo diuinam. Atque *Chrysostomus*, cuius ipsius locus profertur ex sermonibus in Epistolam Pauli primam ad Corinthios (p. 537. 538.) nihil aliud postulat, nisi vt summa cum *εὐλαβεία* ad corpus Christi edendum accedamus, ne temere vescentes iram Dei prouocemus. Quid hoc, quod nos quoque postulamus, commune habet cum illa Romana hostiae adoratione?

V. *Castigationes Disputationis de Ritibus Eucharisticis quibusdam. C. XX. XXI.*

Profligatae sunt maximae et grauissimae Disputationis nostrae aduersus *Muratorium* partes. In quibus si nobis, vt speramus, res non infeliciter cessit: multo minus, in his veluti reliquiis, conatus noster irritus est futurus. Primum autem dicendum est de *Confessione Peccatorum*, quam Romani etiam Angelis et ceteris Coelitibus fieri volunt. Nam hanc quoque e Liturgiis tentat *Muratorius* aduersus eos defendere, qui soli Deo eam confessionem deberi, et in vetere Ecclesia fieri solitam, contendunt. *Binghamus* in Orig. Eccl. XV, 1. Gallicani Officii Confessionem vetustam attulerat, qua ostenderet, eam olim ad Deum solum pertinuisse. Noster ad hoc nihil: ceterum se repente confert ad rubricas illas, quibus etiam in superiori disputatione vsus fuerat, eaeque

Ernesti Opusc. Theol. G cum

cum desiderentur in exemplaribus antiquis Liturgiarum, negat sciri posse, quibus verbis in aliis Ecclesiis Confessio facta sit. In quo mihi venit in mentem illud *Ciceronis* aduersus *Gratum*, in defensione *Archiae*: *Est ridiculum, ad ea, quae habemus, nihil dicere: quaerere, quae habere non possumus.* Habet disertum antiquae Confessionis exemplum, quae soli Deo facta sit: ad id nihil dicit: in aliis Ecclesiis quid factitatum sit, ob rubricarum defectum negat sciri. Quid desideras, quae non sunt, et non potius vteris oblati? Non credibile est, si in Gallicana Ecclesia, quae est veterrima, soli Deo confessio facta est, in ceteris quoque eandem consuetudinem fuisse? Quid dixisset *Muratorius*, si quis ad vnum illud e Liturgiis exemplum, quo adorationem Eucharisticam firmare tentabat, nihil aliud respondisset, nisi hoc vnum: non possumus ob rubricarum defectum scire, quid in aliis Ecclesiis fieri fuerit? Mirabiles sunt homines: ut quidque commodum est, ita dicunt. *Renaldotius* negat aequum esse, aduersarios Ecclesiae Romanae repudiare ritus eius Eucharisticos, nominatim adorationem hostiae, ob rubricarum in antiquioribus exemplaribus defectum: *Muratorius* confessionem coelitibus in Eucharistia factam credibile putat, ob eundem defectum. Sed quid opus rubricis? *Satis est, nihil esse in ista Confessione, quod cum disciplina Ecclesiae Rom. non conueniat.* Quomodo? Quia est in illa disciplina locus de Sanctorum Inuocatione. Enimuero in hoc erroris gravis arguitur Ecclesia Romana. Arguatur vero: *Legitimis rationibus, et consensu Ecclesiae praeae niti, infra demonstrabimus.* De eo igitur videbimus illo in loco. Sed vide mihi lepidam et callidam diuisionem confessionis: sentit enim homo non obtusus, durum et absurdum esse, homines hominibus mortuis confiteri peccata: *Aliter Deo confitemur, inquit, aliter Sanctis: illi, ut parcat, his, ut pro nobis orent.* Quasi constet confessionis nostrae scientiam ad Sanctos in coelo peruenire. Atque etiam profert formulam confessionis

ex

ex *Hittorpii* et *Morini* collectis, ex qua fit confessio Deo Patri, Iesu C. et Spiritui Sancto, *coram S. S. Angelis et coram omnibus Sanctis*. Miror hoc vnum exemplum prolatum esse, idque eiusmodi, cui facile reponi possit hoc aliud esse coram Sanctis et Angelis confiteri, quod et *am Paulus* fecit, aliud Angelis et Sanctis? cum et plura sint et magis speciosa, in Libellis Poenitentialibus, veluti iis, qui *Morini* operi de Poenitentiae Sacramento subiecti, aut in *Canisii* Lectionibus (T. II. P. II) editi sunt: in quibus etiam reperitur formula confitentis (ap. *Morin.* p. 176.) *Deo et Sanctis suis*: item alia confitentis *coram Deo S. Christo et Sanctis*: ibid. a. p. 13. a. Sed ne sic quidem aliquid profecisset *Muratorius*. Nam et antiquitas libellorum istorum in dubitationem vocatur a doctis hominibus, ut *Morinianorum* a *Basnagio* (in praef. ad *Halitgarii* libellum Poen. T. II. Lect. *Canis.* P. II.) et posterior aetas paullo aliter confessionem peccatorum dixit, quam antiqua; quae hebraicae consuetudinis tenax, pro deprecatione, veniae impetrandae causa, dixit. Nam verbum *וְהוֹדָה* ut gratiarum actionem significat in commemoratione beneficiorum, sic deprecationem veniae habet, cum peccatorum mentio adiuncta est. Ex quo Graeci dicunt *προσδέξασθαι τὸν ἐξομολογούμενον*, pro veniam dare deprecanti, ut in libello Poenitentiali *Ioannis Ieiunatoris*, si quidem auctor est, p. 77. apud eundem *Morinum*. Et de tali confessione quaeritur in hac disputatione: eaque est antiqua, vis verbi, ea confessio ad vnum Deum pertinet. At posterior et recentior aetas dixit etiam confiteri peccata iis, quibus testibus et in quorum conspectu, vel praesentia, deprecatio fieret, unde et *coram altari*, et *reliquiis Sanctorum* in libellis istis *confitentes* inducuntur, non minus inepte, quam coram co-

litibus.

Alter ritus, cuius defensio suscipitur, est usus candelarum inter Eucharistiam: quem etiam *Brunus*, propter *Hieronymi* auctoritatem, negantis clara luce in sacris

Christianorum accendi lumina, inferiorē aetate *Hieronymi* putabat, nisi cum Euangelium legeretur, in quo omnis Orientis Ecclesias luminibus accensis vsas, ad laetitiam significandam, idem *Hieronymus* auctor est. Non est nobis consilium, eam controuersiam tractare copiosius. Neque enim nos vsum candelarum, vel in S. Eucharistia, vel in sacris publicis, per dies Dominicos et festos, repudiamus. Illud existimamus non satis verum esse, quod *Muratorius* in hac disputatione ait: *sine luminibus profecto peracta non fuit postrema Saluatoris coena*: quamquam vulgo nostris hominibus idem videtur, qui hanc pueris rationem reddere candelarum ardentium in Eucharistia solent. Homines antiquorum coenas nostris moribus aestimant. • At apud veteres in coenis nulla lumina, nisi in tempestiuis. Nam coenae aliquantum ante solis occasum factae, imprimisque Paschales tota amplius hora ante solis occasum agitatae: vnde plus satis temporis, duae saltem, vt opinor, nostri moduli horae, ad comedendum Paschalem agnum, antequam luminibus opus esset. Immo aut memoriae antiquae vsurpandae causa lumina adhiberi coepta, quod primis temporibus, facientibus in Christianos tyrannis, per noctis tenebras et silentium conuentus facti Christianorum, et Eucharistia ad lumina celebrata, vel laetitiae causa, quam et nunc luminibus accensis testari mos est. Quorum vtrumlibet teneas, nihil habent lumina in Eucharistia accensa, quo prudentis animus offendatur.

Sequitur *Oblatio*, quam a *Luthero* abolitam, et abominationis verbo infamatam, adeo indignatur, vt superbiam et furorem, et impotentiam, et temeritatem, et omnia, ei exprobet. Haec tanta mala omnia comprimi posse putat, vnius *Clementis Romani* testimonio, qui quae dixerit, ea, vt ab ipsis Apostolis profecta, probanda esse. Quid ergo est in *Clementis* testimonio? Omnia *Clemens* ait (in Epist. I. p. m. 52.) eo ordine agenda esse, quem prae-

praescripserit Dominus, et προσφοράς καὶ λειτουργίας ἐπιτελεῖσθαι oportere, quo ordine et quo tempore iufferit. Quae sunt istae προσφοράς καὶ λειτουργίαι? *Noli somnare*, inquit, *esse dona pauperum*. Nemo nostrum hoc somniat. Neque enim nos ita felices sumus, ut ea, quae velimus, somniemus. *Muratorii* et gregalium ista felicitas est. Optimum putamus, interpretem audire *Clementem* ipsum, qui paullo post, ἕκαστος ὑμῶν, inquit, ἀδελφοί, ἐν τῷ ἰδίῳ τάγματι εὐχαριστεῖτω θεῷ, ἐν ἀγαθῇ συνειδήσει ὑπάρχων, μὴ παρεκβαίνων τὸν ὀρισμένον τῆς λειτουργίας αὐτῶν κανόνα. cet. Ex quibus verbis clarum est, προσφοράς καὶ λειτουργίας esse τὰς εὐχαριστίας, laudes Dei cum gratiarum actione, quas tropice προσφοράς appellat, quia cum Iudaicorum sacerdotum munere comparat munus antistitum Christianorum, non sacrificia propria, cum et laicis λειτουργίαν, sed diuerso κανόνι, h. e. finibus diuersis, tribuat. Sed si maxime προσφοράς essent de S. Coena accipiendae, nihil profecto lucraretur *Muratorius*. Itaque lubentes volentesque largimur, in ceteris locis, quae proferuntur, in Canonibus iis, qui Apostolici dicuntur, et Conc. Nic. I. Can. 18. et Conc. Arelat. Can. 15. oblationis et offerendi verba dici de S. Coena. Etenim tota Eucharistia ab illa parte, quae ad oblationes panis et vini pertinebat, quae erat magna istius sacri in vetere Ecclesia, ut ex Liturgiis patet, pars, nomen accepit, ut a laudum, diuinarum celebrandarum, et gratiarum agendarum solennitate Eucharistia dicta est. Neque vero est, quod tantopere irascatur *Luthero*, ob sublatam ex Eucharistia oblationem. Nam priscae illae et propriae προσφοράς, quae et προσκομιδαί vocantur, ab afferendo, hae ergo προσφοράς piorum, dudum usu abolitae erant: quae improprie et falso dicebatur oblatio ipsius Christi corporis et sanguinis, pro peccatis quotidianis viuorum, et praeteritis mortuorum, eam quomodo non tollendam putaret, quam aduersam sacris litteris, abhorrentem ab antiquitatis integrae usu, et impietatis,

securitatis improbae, et licentiae peccandi matrem ac nutrimentum cognouerat?

Aequior nobis est in controuersia ea, quae pertinet ad genus linguae, quod in Liturgia adhibetur. Non improbat vernaculae usus, nec rationes, quibus inducti maiores nostri eam in Liturgiam receperint: sed eum iudicii inopem iudicat, qui in consuetudinem Romanae Ecclesiae inuehatur, seruantis linguam veterem. In quo mirabilibus rationibus utitur. Maiestatem, ait, conciliari sacris a latina lingua, in qua instituta fuerint. Praeclaram maiestatem, quae est sine sensu et intelligentia! Hac Deum delectari credibile est, qui solos animi motus ab bene intellectis rebus diuinis natos spectat? Immo nulla sacris maiestas est vera et Deo digna, nisi e diuinae maiestatis et beneficiorum diuinorum magnitudine intellecta et plane cognita, quaecumque aliis rebus sensibilibus mouetur, puerilis est, et a sanctitate Christianorum sacrorum abhorrens. Atque etiam falsum esse patet, in lingua latina instituta esse sacra Eucharistica: et si maiestas vera accedere potest Eucharistiae e linguae eius usu, in qua instituta est, Syriaca utendum erit, qua Christus usus est, aut Graeca: in qua etiam Romae ab initio Eucharistiam agitatam esse, cum aliis rebus minime dubiis doceri potest, tum, quod Graece Christianis, qui Romae essent, non latine scripsit Paulus. At versionibus vernaculis uti, per indulgentiam Ecclesiae, possunt imperiti latinae linguae. Audio: sed quorsum istas ambages? quae et ipsae habent incommodi plurimum, praesertim apud plebem, quae comparare latina cum vernaculis nescit.

Binghamus instituerat facere in Origgen. Eccl. XV. 3. 25. quod, ut supra diximus, pluribus fecerat ante *Blondellus*, ut ex ipso Missae Canone ostenderet, veteres a *μετανοεω* opinione alienos fuisse, et quidem e. c. ex eo, quod post consecrationem Deus rogatur, ut dona oblata propitius accipiat, ut quondam munera *Abelis*, *Abraham*, *Melchi-*

Melchisedeci: unde clarum est id, quod nos quoque ante docuimus, post consecrationis formulam tamen adhuc panem et vinum superesse, propterea, quod istae preces in sacrificium C. et S. C. nullo modo conueniant, cui nec *donorum* verbum, nec comparatio cum humanis sacrificiis apta sit: item *ut haec dona per manus S. Angeli perferantur in conspectum diuinæ maiestatis*: cum Christus sedeat iam in coelis ad dextram Dei: denique quod *Deus dicitur per Christum omnia illa bona* (eadem autem sunt, quae ante dona) *semper creare, sanctificare, benedicere* cet. ex quo nos quoque supra demonstrauius, consequens esse in μεταμορφώσεως opinione, ut corpus et sanguis Christi semper per Christum a Deo creetur. In his diluendis partim protrita dudum affert *Muratorius*, partim mirabiliter se implicat ipse. Dona et data primum ait, (p. 125.) esse victimam coelestem, corpus et sanguinem Christi, quod in iis sit incomparabile beneficium: mox dona (i. e. panem et vinum) in rem diuinam conuersa: ad extremum, vota et preces offerentium C. et S. C. p. 252. de quibus etiam intelligenda esse loca reliqua: non victimam corporis et sanguinis Christi cum sacrificiis Abelis, Abrahæ, comparari, sed vota et preces Christianorum, cum precibus illorum; hæc perferri ab angelis in Aram coelestem: denique per bona, quae Deus per Christum creet, sanctificet cet. esse intelligenda beneficia Dei, ut fructus terrae aut panem et vinum, per quae Eucharistia conficiatur. Sola commemoratio rerum tam repugnantium, et pro libidine confictarum, refutationis vim habet: praesertim lectis iis, quae capite tertio disputata sunt. A principio totius Liturgiae dona sunt panis et vinum, et mox repente, quia ita lubet *Muratorio*, sicut e carne piscis, cum placet istis rerum arbitris, ex iis fit corpus et sanguis Christi, et cum aliter videtur, votum et supplicatio, et rursus ubi satis profuere, alimenta humana, quae ab initio fuerant. Nullus Vertumnus tam varias figuras sumit, quam huic verbo imponuntur. Non, si non

statutum esset, quavis ratione malam causam defendere, nec plane perfricta esset frons, fateri necesse esset, haec dona post consecrationem esse eadem, quae ante toties *haec dona* dicta erant: haec ascendere ad Deum cum precibus et gratiarum actionibus, ut illius Centurionis *Cornelii* eleemosynae et preces ascenderant ad Deum, ut preces suas *Dauides* velut nidorem victimarum ascendere cupiebat: denique haec bona esse eadem illa dona a piis oblata, quae sunt prius bona Dei (Psalm. L. 10 sqq.) quam fiant dona fidelium, quibus Deus, quamquam ipsius ante fuerant, tamen delectatur. Haec sunt plana, haec univuique primum totam Liturgiam vno tenore legenti, et a praeiudicatis opinionibus integro, nec afferenti secum iam et certo, quid in verbis esse velit, sed verum sensum et natura verborum, et structura orationis indaganti, in mentem veniant necesse est.

Illa etiam bella ratio est, propter quam existimari posse negat, Ecclesiam optare, ut proprie Christi corpus de altari in coelum per angelos feratur. *Hoc sine miraculo, eoque perenni*, inquit, *fieri nequit, et quotidie cernuntur coelestia dona ex altari terreno non dimoueri.* Verissime. Sed quis ista dicit? Nempe is, qui nos non audit, cum negamus, panem et vinum in corpus et sanguinem Christi conuerti, sublata priori substantia, quod *id sine miraculo, eoque perenni fieri nequeat, et quotidie cernamus, panem, et vinum non tolli, sed permanere.* Hoc non iniquum, non impudens videatur? Par iniquitas est in eo, quod, ut vidimus statim, ipse verba Canonis tropice interpretatur, cum autem nos pariter oblationis, et sacrificii, et cetera similia verba tropice interpretanda dicimus, in eoque sequimur consuetudinem loquendi sacrorum librorum, et veterum Ecclesiae Doctorum, manibus pedibusque repugnat. Sed hoc est commune vitium omnium, qui nihil minus in docendo ac disputando spectant, quam constantiam, nec certis ac perpetuis rationibus reguntur, sed casu et temere feruntur, quo libido impellit. Itaque quod

quod hodie rectum; verum, aptum, certum, perspicuum est, cum ipsorum opinionibus defendendis prodest; idem, cras, immo eadem die, altera statim hora, pravam, falsum, alienum, dubium et obscurum est, cum obest. Cuius generis multa exempla commemorare possem, si hic locus esset. Sed nobis cum *Muratorio* iam res est, a cuius doctrina celebrata talis inconstantia valde est aliena.

VI. *Supplicationes Coelitibus in Ecclesia Romana, et pro mortuis fieri solitas recte in Augustanae Professionis Formula repudiari, nec firmari antiquis Liturgiarum formulis.*

Quoniam Liturgiae Eucharisticae pars est commemoratio mortuorum, primum eorum, quos *Sanctos* vocant vulgo, deinde horum, qui *fideles*, famuli ac serui Dei, appellantur: hoc quoque sibi negotii sumsit in hac Disputatione *Muratorius*, ut et Liturgiam aduersus *Bingamum*, eiusque interpretationes et reprehensiones, et consuetudinem Ecclesiae Romanae vniuersam vel supplicandi Sanctis, vel precum faciendarum pro mortuis, aduersus Augustanae Confessionis placita explicando confirmandoque defenderet. Quem locum etiam molli articulo tractat, omni modo moderans rem, ne quid offensionis habeat: tamen ne sic quidem aliquid proficit, multisque nominibus nobis reprehendendus videtur. Sed quoniam in hac disputationis parte quaedam sunt, ad *Bingamum* proprie pertinentia in eo, quod Liturgiae rationem non satis accurate perspexisse videtur, ea, quoniam consilium nostrum non attingunt, nec disputatio nostra attingat.

Iam primum *Muratorius* negat, aut in Liturgiis pro omnibus mortuis preces fieri, aut veteres Ecclesiae Doctores fieri voluisse. Nam eos, qui sint coelo recepti, non indigere precibus nostris, cum summa felicitate fruantur. Itaque pro iis nunquam preces factas: sed eorum tantum cum laude et Dei et ipsorum fieri mentio-

nem in Liturgia, vt eorum exemplo incendatur pietas. Atque huc pertinent ea, quae p. 263. e latinarum Liturgiarum carminibus testimonia proferuntur. Itaque intelligendum esse, preces fieri tantum pro fidelibus vita functis, qui nondum in coelum atque in chorum coelitum sint a Deo recepti. Pro his autem preces fieri solitas, et Liturgiarum omnium testimoniis, et S. S. Patrum antiquissimorum auctoritate firmari. Iam, quod ad supplicationes sanctis fieri solitas attinet, eas negat pertinere eo, vt Dei maiestati, aut Christi dignitati fiat iniuria. Nam nec ab ipsis beneficia peti, nec in iis spem beneficiorum impetrandorum collocari, quorum illud Deo proprium esse, hoc Christo: verum vt utile sit, vel de nostra Lutheranorum confessione, commendare se precibus piorum, dum sint in viuis, ita nihil impedire putat, quo minus nos precibus mortuorum, qui in coelo sint, et apud Deum gratiosi, commendemus. Sed vtraque haec ratio, quamquam moderata et lenis, tamen maxima vitia habet: quae age breuiter aperiemus.

Ac illud quidem ei demus, quod ait, pro coelitibus supplicationes nunquam factas esse, quod etiam pugnare *Renaldotium* video, in notis ad Liturgiam *Nestorii* p. 645. nixum satis diserto *Augustini* testimonio: quamquam et Nestoriana illa Liturgia, et aliorum loca, videntur aduersari, propterea quod, si quid eiusmodi in Liturgiis reperitur, pariter eodemque modo explicari potest, quo supplicationes pro ceteris fidelium mortuorum intelligendas docebimus. In altero autem capite, de precibus pro fidelibus vita functis, vitium permagnum hoc est, quod non firmavit Liturgiarum et Patrum testimoniis id, quod maxime quaeritur. Etenim nostri vbi cum Theologis Romanis de hoc genere precum disputant, quaerunt de precibus iis, quae prosint mortuis hanc in partem, vt eos liberent a purgatorii ignis cruciatibus ac suppliciis, impetranda eorum peccatorum venia, quae in illa Utopia luere dicuntur: has sine auctoritate, immo vero contra
prae-

praecepta sacrarum literarum, et antiquioris et incorruptae Ecclesiae inuectas pugnant. Has igitur, tam fructuosas viuis, i. e. sacerdotibus et monasteriis preces debebat *Muratorius* diuinorum ecclesiasticorumque librorum auctoritate defendere, si gratiam ab suis inire, si contra nos aliquid efficere volebat. Sed bene fecit, quod ab ea re se abstinuit, quae nullam facultatem habet. Quamquam quid dico, abstinuit? immo verbis disertis illam rem se agere negavit, in principio disputationis. Mox prodidit satis mentem, et omissa purgatorii cruciatu mentione, defendit preces factas pro mortuis haec tenus, ut iis prosint hanc in partem, ut ad felicitatem coelestem perueniant. Hoc vero est, quod nullo modo Liturgiis antiquis et SS. Patrum testimoniis firmari, clare ostendam.

In Liturgia Gregoriana haec sunt verba: (*qui nos praecesserunt et dormiunt in somno pacis*) Domine, et omnibus in Christo quiescentibus, locum refrigerii, lucis et pacis ut indulgeas, deprecamur. Haec verba magnifice ostendit *Muratorius*, haec neminem non videre existimat, pro vita functis, nondum gloria coelesti donatis, duntaxat dici: comparatque locum *Tertulliani* notissimum et saepe in hac causa iactatum, e libro de Monogamia (p. 682.) ut a *Millesio* ad *Cyrillum*, et aliis, itemque formulam precum pro mortuo in Constit. Apost. VIII. 41. ubi rogatur Deus, ut eum collocet in sinu Prophetarum et Apostolorum cet. Vellem addidisset, ubi eas animas piorum putaret esse, pro quibus fiant deprecationes. Sed quamquam non addidit; tamen quia Ecclesia Romana nullum alium locum intermedium inter coelum, sedem Dei Angelorumque, et Orcum agnoscit, nisi Purgatorium, ibi illas fidelium animas statuerit necesse est, pro quibus preces fiant. Quod falsissimum esse, et a TE, VENERANDE DEYLINGI, in praeclaris *Cyrilli* Vindiciis §. 25. 26. demonstratum est, et nos breuiter demonstrabimus.

Est

Est autem duplex ratio istorum locorum interpretandorum. Prima, quae maxime mihi arridet, et in locum Liturgiae propositum satis conuenit, haec est, ut ista precantes fidelium felicitatem laetis ac piis ominibus prosequantur, Deumque rogent, ut eam ipsis augeat, et summa cum suauitate frui sinat: quod nihil habet absurdi. Atque ego saepe olim audiui, talibus ominibus ac precibus prosecutos sacerdotes pie mortuos in iustis funerum. An quis dubitet, eos, qui, ut hoc utar, in pace et otio uiuant, tamen Deum rogare posse, ut sibi pacem, otium, tranquillitatem indulgeat ac praestet? Si in praesenti pace ita precamur, atque adeo, ut det pacem Deus, quis nos reprehendat, nisi quid rideri velit? Neque hoc alienum est a *Tertulliani* loco, si modo inspiciatur recte. *Feminam*, ait, *pro anima mortui mariti orare, et refrigerium ei adpostulare*. Sed addit, quod non omittere in hoc loco commemorando debebat *Muratorius*, addit, inquam, *et in prima resurrectione consortium, et offert annuis diebus dormitionis eius*. Dico, qua ratione posterius hoc intelligendum, *adpostulat marito in prima resurrectione consortium*, eadem et priora illa capienda esse de anima eius. Iam, nunquam putauere veteres, nemo Christianus vnquam somniauit, precibus nostris effici posse, ut aliquis particeps fiat primae resurrectionis: contra credidere omnes, qui sanctam vitam ad extremum egerint, eos, vi mortis Christi et promissionis diuinae, primae illius resurrectionis participes fore. Quorsum ergo adpostulat mulier marito pie mortuo primae resurrectionis consortium? Nempe amoris testificandi causa, ut mortuum beneuola memoria, et felicitatem eius piis ominibus prosequatur. Hoc quidem ita euident est, ut profecto nihil commodum contra dici possit. Itaque calide solent haec verba omittere, cum superiora illa commemorant. Ex quo efficitur, ut etiam, cum *refrigerium animae mortui expostulat*, nihil aliud facere videatur, quam, quod ante dixi, hoc est, laetis et beneuolis ominibus feli-

felicissimam eius inter coelites conditionem prosequatur. Nam verbum *refrigerii* si quis opponat nobis, idque recreationem a cruciatu aliquo arguere, dicat, quod foret contrarium interpretationi nostrae, foedam verbi ignorantiam prodat. Ἀνάψυξις, quam *refrigerium* interpretantur Latini ex Aët. Apost. III. 19. est, ut viri doctissimi demonstrant, felicitas, atque, ut dies ἀναψύξεως est felicissimum tempus, sic locus ἀναψύξεως sedes beatissima. Atque etiam si verbum vel graecum, vel hebraicum (מנוחה) unde graecum expressum est, ad superioris conditionis tristitiam aut miseriam referatur; tamen nulla alia, nisi ea, quae est in hac mortali vita, intelligi debet. Nam et παράλυσις, quae pariter de coelitem felicitate, ex eodem hebraico verbo dicitur, estque ἀναψύξεως plane συνώνυμος, ad solam vitae humanae miseriam refertur, ut e Lucae XVI. 25. patet.

Quod si tamen quis, verborum tenacior, putet esse aliquid amplius in istis verbis, vel Liturgiae, *locum indulgeas*, vel *Tertulliani, adpostulat refrigerium*: tamen nihil lucrabitur, neque aliud quicquam efficiet, nisi id, quod minime placere video *Renaldotio*, T. II. p. 104. sed placet diuino *Erasmo* ad e. XV. primae ad Corinthios epistolae-Paullinae, ut ea verba pertinere dicamus ad opinionem, quam veteris Ecclesiae Doctores multos, inque his imprimis *Tertullianum* defendisse constat, e libro de Anima, Apologetico, contra Marcionem tertio et quarto, in primisque de resurrectione carnis, cum dicerent, animas piorum non statim a morte in coelum euolare, sed venire in locum inferiorem coelo, non ut ibi purgentur a reliquiis peccatorum, ut volunt Romani, sed qui sit, ut ait in quarto c. Marc. (p. 560.) *temporale animarum fidelium receptaculum, in quo delineetur futuri* (h. e. coelestis felicitatis) *imago*: siue ut in tertio (p. 499.) *post decursum vitae in sinu Abrahae refrigerium*. Enimuero primum locus is, in quo futurae felicitatis est delineatio et adumbratio, quomodo potest aliquem cruciatum habere talem,

talem, qualem ignis purgatorius habet? Deinde ille *locus refrigerii* s. *refrigerium*, contingere putabatur statim a morte, *post decursum vitae*. Vnde fit, ut etiam in hac sententia verborum, preces pro mortuis nullae aliae esse possint ex istorum mente; quam quas descripsimus ante, bona omnia potius vel congratulationes, quam preces, quas proprie dicimus. Nam in locum eum fidelibus aditum per preces parari, nemo ne somniavit quidem. Atque has preces inuentas esse nullam aliam ob causam, quam, ut honore prosequerentur memoriam mortuorum, eosque vel ipsos sibi caros fuisse, vel virtutes eorum sibi amabiles, et imitatione dignas videri, testarentur, vel ex eo patet, quod pro verbis, *ut animae famuli tui proficiat haec oblatio*, alibi est, *ut illis* (sc. sanctis) *proficiat ad honorem*. Itaque *Augustinus* bene non praesidium salutis, sed *humanitatis officium* in istis precibus ponit: quamquam ille interdum sui oblitus; scilicet in re nugatoria, ut rectissime *Erasmus* vocat, et humani inuenti, durius loquitur. Sed ea loca ex his verbis, aliisque *Tertulliani* et *Cypriani* iudicanda, in quibus eas preces et oblationes *εὐχαριστίας* faciunt, non *ἰλαστικὰς*. Nam quod discrimen facit *Muratorius* precum pro *Sanctis* h. e. in coelum receptis, et *fidelibus*, quos Sanctos non putat, scilicet, et purgatorii ignis cruciatibus addicit, ut illis proficiat ad honorem, his ad salutem, id etsi consentaneum est discrimini *Augustini*, et aliorum quorundam Doctorum veteris Ecclesiae somniis, qui Martyres non in locum refrigerii, siue Paradisum, sed statim in coelum ascendere putabant, praecipui scilicet honoris ac praemii aliquid, velut Agonothetae diuinitus constituti, Martyribus tributuri: tamen stultissimum est, quippe prorsus a sacrorum librorum disciplina abhorret, et tamen nihil prodest Purgatorio, si mentem veterum sequimur, qui animas fidelium, non in coelesti quidem illa et summa felicitate, sed felicitate tamen collocant. Atque haec de precibus pro mortuis.

Preces

Preces autem eas, quae fiunt mortuis, in choro Sanctorum apud Deum agentibus, etsi molliter explicantur ac defenduntur a *Muratorio*, ut supra dixi, tamen et ea ratio habet vitia maxima. Primum est, quod nulla nittitur auctoritate diuina, sine qua nihil in sacris rectum est, aut probari potest. Nam quod *προσευχὰς τῶν αἰγλων*, e Ioanne Apocalypsi, commemorantur, primum, ut supra diximus, libri sacri ignorant discrimen Sanctorum et Fidelium: deinde quod iis adsignatur coelum, non est, ut ego arbitror, qui in illo libro me nihil magnopere intelligere scio, non est, inquam, illud, quod proprie, et in sermone communi, vocamus, sed quod Prophetae dicunt, Ecclesia Christiana, regnum Christi inter homines; ut sancti illi Ioannei commode de viuis intelligi possint. Quanquam quis negauit, aut dubitauit, coelites supplicare Deo pro salute generis humani, pro Ecclesia, sanctis hominibus: immo id facere credimus, sed, ut sancti homines viui, atque adeo multo magis, sua sponte et non rogati. Itaque nec opus erat, hoc testimoniis sacrorum librorum firmare, nedum vti locis alienis: qualis est vel maxime alter e secunda *Petri* Epistola (I. 15.) ubi ne vestigium quidem precum talium. Curaturum se *Petrus* dicit, ut post mortem suam possint *τῶν μνήμων ποιῆσαι*, harum rerum meminisse, sicuti nunquam viuus neglexerit, eos *ὑπομνήσκειν περὶ τῶν*, admonere earum rerum, i. e. praeceptorum de studio pietatis et virtutum Christianarum omnium. Quid haec habent commune cum isto genere precum, de quo nobis est disputatio? Quid autem? Hoc non viderit *Muratorius*, etsi non ἀκριβῶς doctus graecas literas, attamen non adeo rudis, ut hoc videre non potuerit? praesertim postea quam huius loci auctoritas in hac quaestione dudum repudiata est a nostris. Immo nihil aliud in Theologorum Romanorum libris repperat, aut ei loco in ea re vsurpando e puerili disciplina adsuetus erat, cuius commendatione si quid ingeniis humanis persuasum est, haud facile vitium eius agno-

agnoscitur. Sed maximum vitium in ea re hoc est, quod non demonstrat id, quod maxime postulatur, quomodo earum precum scientia ad coelites perveniat, ut iis commoti faciant libentius, quod etiam non rogati faciunt, ut pro nobis supplicent Deo: quod secus esse, cum viutorum precibus necessitates nostras commendamus, in promptu est. Ita profecto res habet. Quamquam multa in singulis Disputationis huius Liturgicae partibus falsa, aliena, interdum prorsus nugatoria, dixit, ut vidimus: tamen non sustinuit hanc rem attingere, cum nec nugas Theologorum suorum commemorare auderet, ut opinor, nec aliud melius ipse haberet.

Sed, quoniam consilium *Muratorio* fuit, Liturgiarum antiquiorum testimoniis confirmare opinionum rituumque Romanae Ecclesiae antiquitatem, expectabam hic talia testimonia, quibus appareret, Sanctis supplicatum esse, ut Deum nobis suis precibus placarent. Enim vero ea plane nulla sunt prolata, nec e Liturgiis antiquis et incorruptis, nec e SS. Patrum antiquiorum libris. Proferuntur sane loca plurima Liturgiarum latinarum, p. 258. sed iis nihil aliud conficitur, nec conficere velle videtur *Muratorius*, quam morem fuisse, laudare Deum Sanctorum et Martyrum causa, eumque rogare, ut eorum precibus commotus bene faciat viuis. Sed repente, quasi hoc iam clarum esset, (p. 259 med.) *confugium ad Sanctos coelo potitos* commemorat, idque a nobis improbari queritur. Quod quis non videt esse sophistae, quam rem serio agenti et legitime demonstranti similis?

VII. *Pani consecrato post Eucharistiae solemnia male honorem haberi.*

Si pani consecrato, inter ipsa consecrationis solemnia, male honos *προσκυνησως* habetur, neque Liturgiarum ille antiquarum, et veteris Ecclesiae auctoritate firmatur: multo minus profecto probari potest ea ratio post Eucharistiae

risine:solemnia. Itaque tota haec disputatio, de honore Eucharisticarum reliquiarum et panis consecrati extra Eucharistiam, superuacua et inutilis debet videri. Sed ne partem aliquam Disputationis Muratorianae praetermisisse, aut ei non occurrere potuisse videamur, patere, viderande DEYLINGI, me eam quoque excutere, et quid in ea vanitatis sit, paucis demonstrare. Est autem haec disputatio apud *Muratorium* duplex. Nam primum, C. XXIII. de adseruatis reliquiis Eucharistiae disputat, deinde C. XXIV. de honore panis consecrato post Eucharisticum sacrum habito, eiusque proponendi locis sacris et in supplicationibus solemnibus circumferendi consuetudine.

Cum in vetere Ecclesia pii homines plurimum panis virique afferrent in Eucharistico sacro, idque omne precibus et laudibus sacerdotis consecraretur: fieri non potuit, quin aliquae, interdum magnae, reliquiae fierent. Nam et hoc spectabatur ab iis, qui afferebant, ut esset aliquis reliquum, unde absentibus, pauperibus imprimis, mitti posset: eaque erat liberalitas quaedam, quam Deo gratam esse credebant, ut Liturgicae formulae planissime docent. Itaque nihil ab initio aliud factum reliquiis istis, quam ut mitterentur Christianis iis, qui sacro Eucharistico adesse non potuissent. καὶ ἡ διάδοσις καὶ μεταλήψις, inquit *Iustinus*, ἀπὸ τῶν εὐχαριστηθέντων ἑκάστω γίνεται, καὶ τοῖς ἑκ παρῶν διὰ τῶν διακόνων πέμπεται. Atque huic beneficentiae iungebatur alia pecuniaria eodem tempore, i. e. diebus Dominicis, qua viduae, pupilli, aegroti, alique, aliqua necessitate pressi, iuuarentur, eodem *Iustino* auctore. In ea re subinde aliquid mutatum est, sed ita tamen, ut primis sex seculis non discederetur a distributione reliquiarum, nec id negare sustinet *Muratorius*. Sed labente disciplina antiqua, paullatim alii mores inuecti sunt; quam boni ac probabiles, disputare nihil attinet. In quibus maxime tolerabilis fuit hic, ut reliquiae panis seruari in templis: quod arbitror factum reuerentia quadam, et opinione sanctitatis alicuius, quae panis e con-

Ernesti Opusc. Theol.

H

secre-

secratione adiuncta videretur. Sed eius adseruationis nulum aliud consilium fuit, nisi vt eius panis vsus esset, cum iterum Eucharisticum sacrum ageretur. Neque panis ille adseruatus est eo, quo nunc fit in Ecclesia Rom. modo; sed in loco eo, vbi cetera supellex sacrorum seruabatur; et inter illam supellectilem, *secretarium* vocant Ordines Romani. Id ipsum fatetur *Muratorius*, vsus loco *Humberti*, Sec. XI. scriptoris: de qua re post plura dicemus. Sed siue superstitio, quae istis reliquiis impie abuteretur, siue causae quaecunque fecere, vt, quibusdam locis, reliquiae plane igni, aut alio quomodo abolerentur.

Hinc exoritur grauis et magna difficultas *Muratorio*, et omnibus *μεταμορφώσεως* defensoribus. Negant enim eius aduersarii, eos, qui panis consecrati reliquias, post solenne Eucharisticum, abolerent, credidisse, panem in corpus Christi fuisse per consecrationis carmen conuersam, sublata omni panis substantia. Ex hac difficultate se expedire dum conatur *Muratorius*, et parum subtilem et accuratum disputatorem se praestit, et multis se modis ipse impedit. Nam nec factum negare audet: quomodo enim neget, in tam claro *Hesychii* testimonio, atque etiam *Humberti*, testis sui? sed vel paucorum eum morem fuisse contendit, vel parum reuerentiae corpori Christi habentium: nec concludendi modum vitii arguit, vel conuincit: certe in eo ita fluctuat et errat, vt appareat facile, quantopere hic laborarit. Etenim primum (p. 137 sqq.) nihil aliud agit, nisi vt late de veritate corporis et sanguinis Christi in S. Coena disputet, proferendis locis SS. Patrum, qualia in superiore disputatione, qua hoc proprie agebatur, protulerat: quae sunt omnia ab hoc loco aliena, suntque argumenta quaerentis effugia, et certo loco, pede collato, dimicare detrectantis. Sane fatemur nos, haecenus falsam esse *Albertini*, *Bingami*, ceterorumque earum partium Theol. rationem, ex *Hesychii* verbis intelligi posse existimantium, veritatem corporis Christi in S. Coena creditam ab iis non esse, qui ea consuetudine abolen-

abolendarum Eucharisticarum reliquiarum vterentur. Et enim hoc modo intelligitur, quod nostri Theologi defendunt, idem veteres illos credidisse, corpus Christi tantum adesse, cum panem in ipso sacro sumimus atque edimus, et dum edimus, neque quicquam sententiae nostrae contrarium ex illo instituto intelligitur. Id secus est in ratione ea, quae panem prorsus abolet, et in substantiam corporis Christi consecrando conuertit. Ea si vera est, profecto infandae impietatis rei agendi sunt ii, qui igni aut alia vi aboleuere consecratum panem: eaque impietas ita conspicua est, ita in oculos incurrit, ut nullo modo latere veteres istos potuissent. Tandem (p. 279.) ad rem redit, postquam (p. 272. 273.) leuiter, velut per prolusionem, tetigerat, et conciliare institutum illud cum *μεταμορφω-σες* tentat. Id quomodo ei successerit, age videamus.

Causam ergo moris illius ait fuisse hanc, quod *sacra-
tis species post aliquot dies mucorem et corruptionem con-
trahant, et aqua, tineis, muribus, aliove modo vitientur.* Quibus paria sunt, quae supra, (p. 272 extr.) dixerat, non ignorasse illius moris auctores, *species quidem Eucharisti-
cas destrui, sed nihil inde officii incorruptibili Domini corpori.* Hem! quid audio? *Species*, i. e. ea, quae schola *accidentia* barbare vocat, in quibus nihil est substantiae, nulla mate-
ria: esset enim verus panis: haec igitur species inanis mu-
corem ducit, aquam bibit, tineis muribusque pabulum
praebet? Philosophos esse mures illos necesse est, qui ci-
bum tam metaphysicum expotant, et accidentibus sine
materia pascantur atque alantur. Profecto si hoc non ri-
diculum est, nihil vnquam, quod ridiculum sit, nec vidi,
nec audiui. Immo vero, o! bone *Muratori*, si possit sa-
crum, in capsula, aut quocunque receptaculo, esset ve-
rum corpus Christi, non contraheretur vitium tale, quod
non esse nisi in concreta materia potest: quod illud vitium
contrahi potest, euidens est, tum non adesse Corpus
Christi. Quomodo porro credi potest, ignem destruere
species, quae materiam non habent? cum eius vis de-

struendi sit in dissoluendis concretæ substantiæ partibus? Sed vehementer in tota ista ratione fallitur *Muratorius*. Nam primum reliquias illas aut in puteum coniecere statim, ante quam istius vitii periculum esset. Deinde poterant, ut alii fecere, in proximo Eucharistiæ sacro uti: atque ita fecissent haut dubie, si in iis esse etiam post sacrum crederent verum Christi corpus. Profecto ita est, ut ante dixi: supersticiosa aliqua opinione decepti putabant, non decere, panem eum, qui rei sacrae destinatus per *σὺχαριστὰς* fuisset, profanis usus servire, et ut cibum vulgarem absumi: aut, quod supra innueram, timebant superstitionem hominum, quæ illo pane improbe abuti coeperat, ut factum constat a *Gregorio Nazianzeno* sorore, quæ eo usu erat, ut morbum depelleret. Itaque etiam in pane tantum istud usurpatum, ut aboleretur, non in vino, quod talibus superstitionibus non ita aptum erat, et statim bibendo absumebatur.

Sed vide mihi aliam non minus bellam rationem. Veteres, ait, ex illo ipso vitio, quod contraxisset panis, collegisse, *corpus Christi a pane illo recessisse*: atque ob hanc causam sibi religioni non duxisse, abolere eum. Hic quam multis modis se implicat. Primum ita confingitur prorsus nova *μεταμóρφωσις*. Nam si Christi corpus recessit, profecto aut illa species inanis una evanescere debuit, quod nulla subiecta esset materies, cui inesset, aut panis materia debuit rursus redire, et illam speciem destitutam a corpore sustinere: quod sine vi diuina fieri potuit. Huius autem rei, sine omni idonea causa et auctoritate, confingendæ quod ius est? Omnia commentis explebimus, si talium confingendorum licentia concedatur. Sed ante, in priori ratione, dixerat, abolitas esse igni reliquias, quod *possent* vitium contrahere: quod committere, scilicet, parum decorum videbatur: nunc propterea id factum, ait, quod ex illo vitio intelligerent, corpus Christi recessisse. Quæ sunt prorsus repugnantia. Nam si hoc est, expectare semper debuere, dum putrefactio appareret. Enim vero, ita non potuit caueri, ne putresciet. Atque hoc etiam cadit tantum

tota in eam rationem, cum vitium concipit panis a situ
ab humore. Quid? mures et tenere etiam tum demum
appetum faciant, cum discessum illum et seiunctionem fa-
ctam intelligunt? Profecto tota res est falsa et nugatoria.

(Atque etiam in eo parum eleganter disputat *Muratorius*, quod docere instituit testimoniis antiquorum scrip-
torum, panem consecratum in multis Ecclesiis adserua-
tum post Eucharistiam esse. Nam id nec *Albertinus* aut
Binghamus, nec quisquam negavit. Immo posteaquam re-
cessum est ab antiquissima illa primæ et incorruptæ Ec-
clesiæ consuetudine distribuendarum comedendarumque
reliquiarum, adseruari coepere; idque concedimus fa-
ctum esse in plerisque Ecclesiis, ob reverentiam quandam,
superstitiosam illam quidem, sed tolerabilem tamen, con-
secrati panis, ut hunc etiam sit apud nos, cum aliquid
superest e pastillis, nec numerus accurate initus est.
An post sacrum, et extra usum, adesse creditum sit cor-
pus Domini, id quaeritur: id illa demonstratione non
conficitur: immo id credidere nullo modo, qui istas
reliquias vel ighi absumerent, vel in puteos abicerent,
atque ita vñibus humanis subtraherent.

Sed tamen illas ipsas panis *σῶμα καὶ αἷμα* reliquias
vivificum corpus appellavit, quis? Antiqua et incorrupta
Ecclesia, et priorum seculorum aliquis doctor magnæ
auctoritatis? Non. Quis ergo? Obscurus aliquis et igno-
bilis sæculi VI, si tamen, auctor, qui inducit seminam
dicentem Abbati: *Accipe mihi sacrum vas vivifici corporis
et sanguinis Christi, tantis mysteriis dignum* p. 273. Hoc
ergo auctore credemus, veterem Ecclesiam omnem sem-
per statuisse de reliquiis Eucharisticis ita, ut Romanis pla-
ceret? Nullo modo. Nam nec necessitas vlla nos coegit hoc
concedere, ut illa verba in hanc sententiam accipi de-
beant, in quam vult *Muratorius*. Panis ille, ut *Chryso-
stomus* ait, per consecrationem liberatus nomine panis,
non modo corpus Christi appellatus est, cum sumeretur,
sed etiam eius neminis honorem in vulgari consuetudine

loquendi retinuit post sacra solemnia. At reuerentiae plurimum habitum est istis reliquiis in vetere ecclesia. De hoc iam, quale sit, et quid id profit Ecclesiae Romanae, videamus.

In hac autem altera disputationis parte (C. XXIV.) maxime res est *Muratorio* cum *Lutheri* sectatoribus, qui extra usum negant esse cum pane coniunctum corpus Christi. Sed in hoc non magis, quam in superiori, nobis satisfecit. Ac prima quidem totius istius capitis pars est plane aliena, nec vltius utilitatis in causa proposita. Nam reliquias Eucharisticas alio missas, quod clarum esse ait multis SS. Patrum testimoniis, scimus ipsi: sed ut supra diximus, ea res pertinuit ad usum, ut comederentur, et ita vel beneficeret pauperibus, vel beneuolentia, et communio cum iis et coniunctio utcumque indicaretur. Hoc igitur ut doceret, non desideramus: hoc autem demonstrandum erat, eos, ad quos missae essent, accepisse, ut verum corpus Christi, et adorasse eas: quorum nihil factum videmus.

Iam quod reliquiae, quamquam primis seculis factum non est, illatae in Pastophorium, ut vocat auctor Constitutionum Apost. VIII, 13. aut *Secretarium*, (Ord. Rom. I, p. 8. II, p. 23.) siue quo alio nomine appellatus iste locus fuit, siue in ipso altari repositae et adseruatae sunt, id ipsum quoque nil *Muratorii* causae prodest. Nam totum hoc pertinet, non ad eam consecrati panis post Eucharisticum sacrum venerationem, quam hodie usurpat Ecclesia Romana, sed ad reuerentiam eam, quam supra descripsimus, et ad usum in proximo Eucharistico sacro. Id clarum est e loco *Humberti* supra commemorato a *Muratorio*: *Si quid e sancta et venerabili Eucharistia superfuerit - - in pyxidem mundam recondunt, et sequenti die communicant ex ea populum.* Cui nos addemus alium ex Ordine Rom. II, n. 35. p. 23. ubi describitur praeparatio Eucharistiae in Missa Pontificali: *Presbyteri duo - - intrant Secretarium vel ubi positum fuerat corpus Domini, quod*

quod pridie remansit, ponentes eum in patena: et subdiaconus tenet ante ipsos calicem cum vino non consecrato, et alter subdiaconus patenam cum corpore Domini oet. Hic locus planissime docet, corpus Domini esse nil aliud, quam panem consecratum: deinde non propositas fuisse istas reliquias, ut spectarentur, adorarentur, sed in sacrario conditas in pyxide (Ordo I. p. 8. vocat *capsam, conditorium*) denique cum eximerentur e pyxide, non adoratas esse, nisi quod Pontifex accedens missae celebrandae causa, caput inclinavit: in quo nullam adorationem intelligendam esse, supra docuimus. Reliqua omnia sunt superstitione inutili contaminata, quae, ubi semel adseruatio reliquiarum inualuit, mox in Ecclesiam irrepsit.

At *Cyrillus* Alexandrinus (Epist. ad Colosyrium adu. Anthropomorph.) reprehendit eos, *qui dicere audeant, Eucharistiam nullam sanctitatem accipientibus conferre posse, si de altero in alterum diem seruetur.* Audio. At id non habet hanc sententiam, ut seruatus panis interea, dum seruaretur, corpus ipsum verum Christi manserit, aut omnino fuerit: sed ut ille panis, etiamsi non iterum consecraretur solenni ritu, tamen in altero Eucharistico sacro, ubi ederetur, corpus Christi adiunctum haberet. Nam profecto panem illum, ab consecratione adseruatum, non iterum consecratum esse, etiam superior ille Ordinis Romani locus videtur indicare. Atque per illum ipsum morem nobis videtur sparsum esse aliquod semen opinionis de *perpetua* Quæstione Eucharistica, et venerationis superstitionis, unde paulatim ipsa adoratio religiosa nata est. Neque enim ubi incipit superstitio, ibi desinit. In principio fere est inconsulta pietas, paulatim fit foeda impietas: præsertim ubi huic nascenti lolio fatus et alimenta accedunt a disputationum calore, a pertinacia, superbia, aliisque talibus vitiis, itemque ab ignorantia barbarieque: ut factum est in hac ipsa re, de qua agimus. Nam *Mutatorius* ipse docet, post Berengarianam controuersiam, nihil antiquius fuisse Ecclesiis (h. e. Clericis) quam reue-

rentiam erga augustum hoc Sacramentum quotidie et quovis modo augere: hinc natum Festum corporis Christi, propositionem panis sacraei in altaribus, circumgestationes, et similia: in quibus quoniam consistentem habemus *Muratorium*, nulla res disputatione indiget. In his tamen nullam mentionem facit adorationis, quae fit, cum consecratus pastillus, inclusus capsae, gestatur per publicum, et ad quemvis eius conspectum homines procumbunt. Sed eam rem fortasse putavit consecram supra, quo capite de Adoratione consecrati panis actum est. Quamquam quae ibi dicta sunt, facile huc accommodari possunt: hic causam suam deteriore fecit *Muratorius*. Nam cum superiori capite (XXIII.) innuerit, recedere corpus Christi a panis specie posse: profecto incertos ac dubios reddidisse videri potest gregales suos: qui definire non audebunt, quando illa discessio fiat, atque ita in periculo erunt, ne subinde meras species, siue panem reducem adorent. Sed cum tota illa res sit nugatoria, vix attinet, de ea aliquid addere. Et quamquam adhuc restant quaedam passim etiam in his capitibus sparsa, in quibus aliquid dici contra possit: tamen, quia non coniuncta sunt magnopere cum causa ea, quam disceptamus, ea praetermittere lubet. Atque etiam et ipse satietate iam defessus sum refellendi ea, quae tam nulla cum specie dicuntur, et TV, VIR VENERANDE, legendi. Itaque hic finem faciam scribendi, nunquam autem TVI colendi, TVAEQUE doctrinae, virtutisque admirandae. Quod si quid in hoc libello a me scriptum inueneris, quod TVO in hoc genere acutissimo iudicio probetur, tum vero me operae pretium fecisse, et magnum in primisque suauem huius mei laboris fructum cepisse arbitrabor.

 BREVIS

**BREVIS
REPETITIO ET ADSSERTIO
SENTENTIAE LVTHERANAE
DE
P R A E S E N T I A
CORPORIS ET SANGVINIS
IESV CHRISTI
IN
COENA SACRA.**

Interpres Ed. Juxta Typ. 46. — Editio in 4. 17. 18. 19.

THE
JOURNAL OF THE
ROYAL ANTHROPOLOGICAL INSTITUTE
OF GREAT BRITAIN AND IRELAND
VOLUME 38
PART 1
1908

DE PRAESENTIA
CORPORIS ET SANGVINIS I. C.
IN
COENA SACRA

P R A E F A T I O.

Superuacuum laborem suscepisse videamur, et fortasse plus periculi in publicum, quam utilitatis habiturum, cum dogma Ecclesiae nostrae de praesentia corporis et sanguinis I. C. in Coena sacra explicare et vindicare instituimus. Nam quaestio est ea, quae multis multorum literis explicata, et acerrimis saepe controuersis agitata, vix aliquid nouae lucis accipere posse videatur: tempora autem nostra sunt eiusmodi, vt, in disputatione illa et controuersia reuocanda, causae nostrae valde metuendum videatur: quippe homines etiam nostri ita inclinauere ad licentiam de mysteriis religionis Christianae iudicandi, eademque suis interpretationibus aptiora faciendi ingenio humano, et prope penitus tollendi, vt verendum sit, ne, si controuersia haec rursus agitari vehementius coeperit, plures discedant in partem eam, quae rationi humanae expeditior est et mollior, quam quae Scripturae Sacrae auctoritatem seuerius defendit. Enimuero causas instituti nostri habuimus, ita et ab vanitate alienas, et ab studio controuersiae serendae, vt eas nos cuius, non nimis iniquo iudici, facile probaturos consideremus.

Ac primum nos et e scriptis multorum nostrae aetatis, et sermonibus, ipsa denique fama, accepimus, praesentiam corporis et sanguinis Iesu Christi in Coena sacra
ita

ita coeptam esse explicari, ut re, et ut vera praesentiae sublatam, merum nomen relinqueretur, eamque rationem ita serpere et propagari per disciplinam doctorum, ut verendum sit, ne paullo post miretur Ecclesia nostra, se prope totam Zwinglianam factam esse. In quo, etiam aliud maius periculum proponitur doctrinae sacrae veritati, ut posthaec demonstrabimus. Ei igitur malo occurrere, quantum in nobis esset, voluimus, partim cauendo iis, qui vel nondum imbuti essent tali opinione, et adhuc abessent ab erroris pertinacia, partim admonendo hos, qui bona fide errorem talem tenerent, putantque se cum *Luthero* in hac causa sentire, cum re vera ab eo longe discesserint. Quod nos sperauimus perfecturos esse, in sententiam veram Ecclesiae nostrae cum suis rationibus breuiter repeteremus, et nouis rei explicandae modis refellendis, firmaremus.

Nec vero illud nos parum ad hoc scribendi consilium impulit, quod non modo in parte ea, quae veritatem praesentiae, vel praesentis in Coena sacra corporis et sanguinis I. C. palam oppugnat, repereramus subinde, qui vel sententiam nostram labefactare conarentur rationibus iis, quae speciem habere possent apud parum peritos rerum, vel totam rem nullius momenti esse ad summam religionis defenderent, atque ita negligentiam causae vniuersae inducere tentarent; sed etiam inter nostros extiterant, qui vel palam a nobis dissentiendo, vel suspiciones ferendo, labefactarent animos multorum, aut saltem in graues et molestas dubitationes coniicerent. Enim vero, ut, in certa pace arma mouere, vel superuacuum vel iniquum est; cum alii mouere, studium securitatis tuendae et honestum et necessarium videri debet: ita nobis quoque licere, et honestum videri debet, in illo aliorum conatu, subinde circumspicere munimenta causae nostrae, ea conseruare, firmare, augere, et aduersus vim vel insidias defendere.

Sed

Sed cum causam ac defensionem doctrinae publicae, omninoque veritatis, cum ceteris Ecclesiae doctoribus, tam multis tamque praeclaris, communiter sustineamus, non proprie hanc veluti provinciam attributam habemus; cum hoc tempore, et in hac parte, suscipere non venisset in animum nobis, qui praesertim aliis: sat multis et magnis oneribus premebamur laborum vel publicorum vel priuatorum, nisi eam nobis imposuisset multorum bonorum voluntas, etiam ignotorum, qui sibi scrupulos iniectos faterentur cum aliunde, tum ab Hœmofianiana professione et indemonstrabili demonstratione, quos sibi, etiam nostra opera, eximi cupere, tota hac causa a nobis explicanda, et eo, quo instituimus, modo, disceptanda. Cupiebamus etiam fidem a nobis datam (in *Bibl. Theol. T. V. p. 157.*) Viris bonis exsoluere, qui per talem aliquam occasionem sibi satisfieri veluissent. Omnino semper hoc factum est salubri instituto maiorum, ut magna illa capita doctrinae, per tales Exercitationes interdum repeterentur, inculcarentur, noua luce, si fieri posset, perfunderentur: idque institutum etiam nunc publica lege sancitum in Academiis nonnullis durat.

Illud autem in principio rogamus lectores nostros; ut nobis, praesertim in parte ea, quae habitura est demonstrationem dogmatis ipsius e Scripturis, liceat nostro delectu et modo uti in argumentis vel vsurpandis vel tractandis: quam libertatem et aequam et iustam esse, et semper vsurpatam ab doctoribus Ecclesiae praestantissimis, nuper a nobis est demonstratum, cum de libertate doctoris, praesertim in causis ad religionem pertinentibus, differebamus. Atque nos ea libertate utemur, ut semper, hoc est, modeste et sine reprehensione aut inspectione aliorum, quibus et ipsis suam in tali genere libertatem concedimus. Satis est veritatem bene defendi: nec eius defendendae ubique una rata forma est aut esse debet. Neque vero nobis consilium fuit, congerere omnia, quae dogmatis huius confirmandi causa ab aliis allata sunt,

sunt, sed vt nos, pro ingenii nostri modo, putemus posse facillime et planissime defendi, ostendere. Itaque sua quisque argumenta, quibus in docendo solet vti, nobis non inuitis, salua poterit et idonea existimare. Atque haec nobis de consilio nostro institutoque dicta sunt. Ad rem ipsam veniamus.

TRACTATIO.

1. Primum igitur defendimus, ipsum corpus Christi et sanguinem adesse fumentibus, et sumi vescendo et bibendo, non modo cogitatione ac fide, eamque appellamus praesentiam vtriusque veram, et quae proprie dicitur, hoc est, substantiae, quam *non* cogitatio credentis efficit; nam ea est perpetua et in potestate credentis, nec opus habet sacramento aut actione edendi ac bibendi; nec actio modo Christi spiritualis et salutaris in mente fideliter fumentis symbola; nam et haec perpetua est in fidelibus per verbum Euangelii ad fidem alendam, et per eam tranquillandum exhilarandumque animum pium: sed quae contingit per benignam voluntatem Christi, promissione eius diserta declaratam, sine qua eius spes esse non posset, et per quam Sacramentum est constitutum. Talem ergo praesentiam, siue hoc genus praesentiae defendi Ecclesiae nostrae doctrina publica, partim diserta Confessionum nostrarum verba testantur, vt *Apolo-
logiae A. C. art. 10.* quod in Coena sacra *vere et substantialiter* adsint corpus et sanguis Christi, et *vere exhibeantur cum* illis rebus, quae videntur, *pane et vino: conf. Form. Concord. art. 7.* vbi diserta *substantialis praesentia* commemoratur: partim aduersae partis professio, quae se, ait, praesentiam, quae contingat per fidem in animo, sitque operantis in animo Christi, concedere, substantiae nullo modo. Quamquam in hoc quoque sunt faciles nonnulli, voluntque substantiae praesentiam agnoscere videri, sed quae sit in efficientia corporis et sanguinis Christi,

Christi, non autem in *admiranda*, quam solem proprie praesentiam appellari, alteram autem, quae efficientiae est, figurate, liquidum est. Sed de hoc post haec diligentius dicendi locus dabitur.

2. Iam huius talis praesentiae, ipsiusque adeo corporis et sanguinis Christi, in Coena sacra, promisso ipsius propositae, veritas et proprietas, quomodo intelligatur ademonstretur, videamus. In eo autem, cum dubium esse non debeat, quin primum locum teneant verba instituentis Coenam sacram Christi ipsa; ab iis initium faciunt omnes, qui hanc demonstrationem recte suscipiunt: quorum nos rationem nostro modo sequemur. Nam qui verborum Christi ipsorum nullam in hac demonstratione rationem habendam dicunt, non minus perite faciunt, quam qui legis alicuius, edicti, decreti, testamenti, pacti, sensum non ex ipsius verbis petendum dicant; si quis super iis dubitationem mouerit cupiditate aliqua vel prauitate commotus. Qui autem iis loca alia adiungenda esse defendunt, nihil aliud, si recte sentiunt, dicant necesse est, quam verborum Christi interpretationem fieri comparandis aliis locis Scripturarum, per quae verborum potestas intelligi possit, et firmari iis, quibus intelligatur, Apostolos ipsos verba Christi non aliter intellexisse: quod est commune totius interpretationis biblicae. Est autem genus argumenti duplex, alterum generale, quod ab indole vniuersa orationis ducitur, alterum a verbis ipsis et contextu verborum.

3. Et in illo quidem maxime in promptu solet esse hoc, verba ea, quia testamenti sint, proprie intelligi debere ac sine figura, ut sint clara, nec ambiguitate sua et obscuritate fallant audientes. Id etsi recte intellectum, non est inane; tamen parum valuisse, aut elusum esse exceptionibus aduersariorum, non est mirandum. Nam et tropica oratio potest esse clara et perspicua, estque non minus visitata vulgo, quam propria, denique ea non abstineat, etiam imperitam plebeculam docens, Iesus Christus.

Sed,

Sed, ut opinamur, mens maiorum nostrorum fuit haec, quam alibi explicauimus, ut negarent, tropis et figuris, praesertim durioribus et inusitatis, uti solere, qui hoc agant, ut facile et sine ambiguitate pateat, quid sentiant; in quo genere sunt non modo testatores, sed et legislatores, iudices, item vel maxime doctores, cum agunt hoc, ut doceant, ut explicant aliquid, non modo obiter et per occasionem aliquam, et velut aliud agendo, attingant; maximeque, cum aliquid primum tradunt, idque graue et magnum, et quod bene intelligi ab omnibus velint, aut posthaec non sint rursus tradituri. Nam haec sunt consentanea sensui communi et vsui, nec vocari in dubium possunt ab aduersariis, immo vltro conceduntur, et in interpretando subinde adhibentur, velut *Bocharto*, *Placato*, *Perizonio*, quos in *Interpr. Nou. Test.* commemorauimus p. 57. et aliis. Enimuero ista omnia conuenire in verba Coenam sacram instituentis Christi, in promptu est, nec habere dubitationem potest. Etenim oratio Christi habet praecceptionem et explicationem instituti noui, eiusque magni, quod volebat et bene intelligi et teneri; eaque tum utebatur primum, nec erat postea vsurus, instante morte et discessu e terra.

4. Ac nos non ignoramus, in ea re locum esse posse exceptioni huic, *extra quam si* figura ante cognita vsu sit, ut obscuritati aut ambiguitati locum non faciat. Neque nos sumus ii, qui eius aequitatem non agnoscamus. Enimuero, quae sit huius exceptionis in hac causa vis, non intelligimus. Nam si quis dicat, et sic dici scimus, notam fuisse discipulis Christi hanc figuram e sermone Christi, a Ioanne litteris tradito, in quo *edere carnem Christi et bibere sanguinem eius*, figurate dictum esse, nemo ambigat, itaque potuisse in hac oratione et in docendo adhiberi figuram hanc, et ex illo ipso sermone a discipulis intellectam esse; eum multis modis falli dicamus, nec quid sit id, de quo in hac causa quaeratur, satis tenere. Etenim non dubitatur;
an

an edere carnem et bibere sanguinem Christi per figuram dici possit de his, qui per fidem amplectuntur Evangelicam doctrinam, et morti eius pro peccatis hominum acquiescunt: sed quaeritur hoc, an ea verba ita intelligi possint ac debeant, primum tum, cum panis vescendus, corpus Christi, et vinum bibendum, sanguis eius dicatur, et vesci et bibere iubeantur, quia panis ille sit corpus Christi, vinum autem bibere, quia sit sanguis Christi, ut est in ipsis Christi verbis: quod secus est in illa Christi apud Ioannem oratione, et causa, cum neque panis edebatur, neque vinum bibebatur. Nec porro quaeritur, an ita haec intelligi possint in oratione, quae manifeste tota sit figurata, nitaturque praecedente commemoratione cibi naturalis, quo melior cibus, isque spiritualis commendetur, ut est apud Ioannem: sed an tum, cum nihil tale praecesserit, unde intelligi possit, figurate haec dici, quod negamus. Atque hic ille ipse est scrupulus, qui vrebatur *Zwinglium*, cum ei esset a Scriba Ciuitatis iniectus; qui non requirebat exemplum Scripturarum, in quo verbum *esse* significandi vim haberet: quis ita imperitus sit vel Scripturarum vel omnino sermonis humani, ut de eo dubitare possit, atque eius rationis exemplum petere? quamquam in talibus vis significandi non est in verbo *esse*, quod nullam nisi coniungendi praedicati cum subiecto vim habet, sed in ipso praedicato: immo hoc quaerebatur, an vspiam in Scripturis sic diceretur absolute, h. e. extra parabolam et allegoriam, aut cum nulla allegoria vel simile quid praecessisset, in cuius explicatione, quod figurate dictum erat, accipit interpretationem, quae cum verbo figurato per verbum *est* copulatur. Atque ex hac dubitatione se tum expedire *Zwinglius* non poterat, ut ipse narrat in *Subsidio Eucharistiae*, et inde *Chemnitius* noster in *Annotat. hist. ad calcem Fundam. S. Coenae* §. 144. nec se post inde potuit explicare; quippe exemplum, quod ea causa attulit, pariter est ex interpretatione caerimoniae paschalis, h. e. rei figuratae: quo genere nihil proficitur.

Ernesti Opusc. Theol.

I

Atque,

Atque, ut id hoc loco addamus, ex eodem genere sunt omnia, quae ab aliis post eum allata sunt; in quibus maxime solet usurpari illud Pauli, 1 Cor. 10, 4. *ἡ πέτρα ἣν κρείσας, illa autem rupe erat Christus.* Nam ibi est applicatio narrationis, exempli causa propositae, ad rem praesentem. Enimuero, quis non videt, illam orationem instituentis Coenam sacram Christi nihil praecessisse huiusmodi, ex quo pateat, figuratum sermonem haberi, aut esse interpretationem alicuius figurati verbi, sed, quid sit id, quod tradatur, doceri.

5. Ac ne quis dicat, cibi paschalis functionem praecessisse, a quo transitus factus sit, ut in illo Ioanne sermone, ad figuratam orationem, quae agni melioris carnem et sanguinem sumi iuberet, ut in illo, per fidem: primum clarum est, non primi velut actus conuiualis, h. e. sumti paschalis agni, continuationem esse in institutione Coenae S., in qua commemoratio fiat alius et melioris agni, sed nouum actum, cuius pars altera etiam post coenam suscepta sit: deinde, si nihil aliud agebatur, quid opus erat, panem et vinum dare, quo sine illa interpretatio et de meliori agno per fidem vescendo oratio fieri poterat, ut illa apud Ioannem de meliori pane. In ipsis potius agni carnibus distribuendis dixisset: haec est caro mea. Sed haec vniuersae de proprietate verborum Christi dicta sunt. Ad argumenta alia veri corporis et sanguinis Christi, praesentiaeque propriae, veniamus.

6. Quorum primum genus est, quod ex ipsis verbis I. C. eorumque contextu sumitur. Ac nescimus, an magnum argumentum sit in ipsa fluctuatione eorum, qui verba, hoc est corpus meum, tropice interpretantur: aliis tropum in subiecto, aliis in copula, aliis denique in praedicato quaerentibus: praecudicium certe non leue facit pro causa nostra, quae ab illa inconstantia longe abest. Proprie autem arguit et indicat proprietatem verborum et praesentis corporis et sanguinis I. C. quod
ca

ea negata, et figura admissa ea, quam defendunt aduersarii, frigida existit et parum digna Christo tautologia. Quid enim efficitur illis verbis, si tropice accipiuntur, nisi, in pane et vino esse figuram et cogitationem Christi necati, cum fide et grato animo vsurpandam: et sic intelligi volunt. Enimuero id est pariter in clausula orationis. Neque enim ἀνάμνησις illa est alia, quam cogitatio memor Christi necati, cum fide et grata mente recolenda. Quippe sic dici ἀνάμνησιν in Scripturis, talibus in rebus, clarum est, non de simplici commemoratione, sed quae coniuncta sit cum aliquo religioso motu et actu animi et reminiscencia. Ἀνάμνησις quidem ἀμαρτιῶν, *memoria vel commemoratio peccatorum in sacrificio*, Ebr. 10, 3. haud dubie est, quae coniuncta sit cum dolore et deprecatione fidelium, qualem ipse Philo de Victimis agnoscit. Et eam ἀνάμνησιν ac memoriam proprie sic referri ad mortem Christi, plane docet Paullus ex illis ipsis verbis et praecepto Christi 1 Cor. 11, 26. demonstrans, mortem Christi pro nobis pie et religiose cogitandam esse; quam esse vim verbi καταγγέλλειν et similium in Scripturis, per hebraïsmum, cum de religiosis actibus dicitur, ex 1 Petr. 2, 9. clarum est, vbi ἐξαγγέλλειν τὰς ἀρετὰς τοῦ καλίσαντος ἡμᾶς, *commemorare virtutes eius*, qui nos traduxerit ad salutis veram cognitionem, iubemur, i. e. grata memoria et praedicatione prosequi. Nec vero illa clausula habet explicationem verborum, hoc est corpus meum, hic est sanguis meus; quod est inuentum Bataui, iuuare volentis Zwinglium, cum se expedire non posset ex ea, quam diximus, difficultate, saepe post frustra iactatam ab Reformatis in illa disputatione (v. Arnaud Perpetuité de la Foi T. II. p. 120.) incognitum vniuersae antiquitati. Nam forma orationis ipsa, et explicatio Paulli 1 Cor. 11, 26. docent, in iis esse praeceptum de modo illius Sacramenti rite vsurpandi, non explicationem verborum superiorum.

7. Nec hoc contemnendum argumentum videtur, quod Christus, iubens omnes bibere, hanc causam addit, quod vinum porrectum sit sanguis suus. *Τὸτο γὰρ ἐστὶ τὸ αἷμά μου*: nam hic est sanguis meus. Neque enim id alio pertinere potest, quam, ne quis detrectet bibere, per causam satietatis, ut fit. Enim vero, si nihil aliud in sanguine Christi intelligendum erat, quam figura sanguinis per mortem fundendi, et cogitatio imminentis mortis, non tollebatur excusatio praetermittendi calicis: quippe ea cogitatio et ante oblata erat sermonibus Christi, et poterat sine potu vini usurpari: unde aliud firmamentum causae nostrae exoritur, de quo post dicemus.

8. Qui negant proprietatem verborum Christi et veritatem corporis et sanguinis in Coena sacra, solent hoc, ut inprimis speciosum argumentum, usurpare, ut dicant, si res ita sit, ut nos velimus, a discipulis Christi verba intelligi non potuisse. Unde enim intellexisse, cum in omnibus sermonibus Christi nihil simile occurrat? Nec aut a Christo de ea re monitos, esse ad intelligendum praeparatos, aut ipsos admiratos esse rem talem, et interrogasse quicquam. Sed tropicam rationem iis notam fuisse e sermone, quem saepe commemorauimus. Fate-mur, Christum usum esse phrasi, cuius verus sensus discipulis notus esset, quia tradebat rem nouam, nec ipse explicabat verborum sensum, nec discipuli de eo interrogabant, quod solebant facere, cum haerent. Si autem constitit iis de sensu verborum, ut primum ea audiuerant, eum tenuerunt vel e superiori aliquo sermone Christi, vel e libris Testamenti veteris, quorum sermo iis erat usu frequenti et certo cognitus. Atqui illo modo non cognouerant. Nam sermo ille apud Iohannem non huc et ad hanc causam pertinet, propter eas causas, quas ante commemorauimus, et dissimilitudinem rerum: quippe ibi non edebant aut bibebant, in quo Christus carnem filii homini edi aut sanguinem bibi diceret. Ergo relinquitur, ut e Testamenti veteris et
Mosaico

Mosaico sermone vim horum verborum tenuerint. Et verba ea sunt manifeste sumta e secundo Mosis 24, 8. vbi sacrificio solenni sancitur foedus, cui, vt veteri, a Christo, Coenam sacram instituyente, opponitur nouum et melius, sacrificio corporis sui sanciendum. *Hic est sanguis foederis* (quo sancitur foedus) *quod pepigit vobiscum Deus super cunctis verbis his*: idque bene monet Auctor Scholiorum in Epistolas Pauli, quae inter *Ambrosii* opera eduntur, *Hilarii Diaconi* esse putant, et ea verba ad interpretandum confert ad 1 Cor. 15, 25, 26. Ad horum igitur verborum formam cum Christus in re simillima, et superiori illi (τύπω) respondente, diceret, *hic est sanguis meus*, sanguis, quo nouum foedus, i. e. promissio Euangelii, sancitur: aliter intelligere non poterant, quam nos volumus, nisi monerentur et docerentur Christi interpretatione; nec aliter intellexisse patet ex eo, quod nihil interrogant. Ergo, vt illa verba Mosis proprie dicta sunt, sic et haec ita intelligi debent; nec absurdum est *Arnaldi*, *Perpetuité de la Foi T. II.* et *Bossueti* in *Expositione Doctr. Cath. n. X. p. m. 70. ed. tert.* postulatum, si figurate accipi voluisset verba sua Christus, (aliter quam dixisse constabat Mosen) monere debuisset discipulos: et id ferre debent hoc aequius, qui, (vt *l'Abbadie* in *Epist. IV. de S. Coena*) postulant praeparationem talem et admonitionem necessariam fuisse, si Christus proprie accipi verba sua vellet: quod sane alienum erat postulare, cum forma illorum verborum esset nota. Sed illud postulatum accipit vim maiorem et necessitatem in nostra hac ratione, per quam intelligimus, discipulos Christi, illi formulae adsuetos, saltem procliues esse debuisse ad proprietatem verborum amplectendam, nec de figurato sensu iis, sine admonitione, in mentem venire potuisse. Nam quod aiunt, per formulas in epulo paschali vsitatas, et a Magistris Iudaeorum proditas, velut: *hic est panis, quem patres nostri comederunt in deserto cet.* praeparatos esse animos ad figuratum sensum intelligendum, omni-

noque in verbis Christi esse illarum formularum imitationem, quo valde inclinant recentiores Reformatae Ecclesiae Theologi: primum, incerta est tota illa magistrorum traditio, saltem hactenus, vt, illas formulas Christi aetate vsitatas et ab ipso vsurpatas fuisse, pro certo adfirmare non liceat: nec eae proprie ad paschalem agnum pertinebant, aut praeceptum diuinum habebant: nec denique similitudo formularum dat certam causam colligendi, alteram factam esse ad imitationem alterius; praesertim cum habeamus formulam haud paullo certiore, a qua Christi verba ducta esse, ita euident est, vt contra dici nihil possit, mirandumque sit, eius ignorantiam tantam vel fuisse, vel simulatam esse, vt eam nunquam, quod quidem sciamus, in hac controuersia tetigerint.

9. Sed alia argumenta sunt sententiae nostrae, quae partim ratiocinando ex locis Scripturarum ducuntur, ad Coenam S. pertinentibus, partim e natura rei ipsius, et principijs communibus vtrique parti. Et e primo quidem genere maxime vsitatum est, quod e verbis Pauli I Cor. 10, 15. repetitur, vbi panis illé Eucharisticus *κοινωνία τῷ σώματι τοῦ Χριστοῦ* dicitur, *communicatio vel participatio corporis Christi*: quamquam in iis plerique nostrorum (*κατὰ ἑνὸν*) diserte inesse dicunt id, quod defendimus, et illam communionem interpretantur *coniunctionem panis cum corpore Christi*. In quo nobis liceat ab iis discedere, salua argumenti vi; cum illam interpretationem, vt nobis videtur, nec linguae rationes satis ferant, nec contextus orationis Paullinae, saltem non ea euidentia sit, vt apud aduersarium acrem et acutum valere satis possint. Idemque videtur iudicandum de antiquiori nostrorum interpretatione, quae sumtionem corporis Christi cum pane intelligit. *Form. Conc. p. 847. ed. Rein. Panis quem frangimus cet. i. e. qui panem edit, corpus Christi edit*: quae est interpretatio Chemnitii *Fund. S. Coenae c. 9.* et ipsius *Lutheri Confess. mai. p. 885. (T. IV. Altenb.)* qui tamen melius et pressius ad communitatem sumtionis vel

vel boni sumti et accepti refert: tanquam in verbis Paulli esset, *communio panis est comm. cet.* Sed argumentum, quod ex eo loco perspicue ducitur, huiusmodi est: Si, qui pane Eucharistico vescuntur, adducuntur in communionem corporis Christi: (nam hunc sensum etiam aduersae partis Theologi faciunt, et hunc saltem admittere debent, nec improbat hanc interpretationem *Calouius* ad h. l. si recte intelligatur:) ore sumant corpus Christi necesse est, non per figuram, et spiritu modo per fidem. Nam si hoc esset, fideles tantum ad illam communionem peruenirent, quod ipsi volunt ac defendunt, non omnes pariter, qui panem sumunt. Enim vero omnes ex aequo, secundum Paullinam rationem, in communionem corporis et sanguinis Christi perueniunt, qui sumunt. Vnde efficitur, vt falsum sit, quod ab illis sumitur, verum, quod nos defendimus. Sed ex mente Paulli, omnes sine discrimine vescendo ac bibendo in communionem quandam corporis Christi venire, id sic intelligitur. Primum oratio Paulli et admonitio, quae commemorata corporis Christi per panem Eucharisticum communionem firmatur, ad omnes Corinthios, qui se Christianos ferrent, ex aequo pertinet, non modo sanctos et fideles, sed etiam, et multo magis, ceteros; de eoque dubitari non potest, tota disputatione Paullina aduersus eos, qui conuiuia e carnibus victimarum obirent, clamante. Nam quis dubitare potest, partem eorum maiorem fuisse de numero hypocritarum, quam vere fidelium et sanctorum: nam minae illae Paullinae profecto non fidelibus proponuntur, sed hypocritis, his certe maxime. Et hos tamen ipsos ab ea licentia deterret Paullus hoc argumento, quod per Eucharistiam fiant participes corporis et sanguinis Christi. Quid? quod clare v. 17. quia omnes ex eodem pane vescantur, omnes eiusdem corporis esse docet, nempe per participationem eiusdem corporis Christi in Coena sacra. Quae ratio tota inanis est et frigida, si impii et hypocritae solo pane vescuntur, non vna percipiunt

cupiunt ore corpus Dominicum; cum, animo et fide non percipere, in promptu sit.

10. Sed aliud graue argumentum nobis praebet eadem Paulli disputatio, in qua (1 Cor. 11, 27.) eos profanati cum graui culpa corporis et sanguinis Christi reos facit, qui indigne modo sumserint panem vinumque Eucharisticum, h. e. non eo, qui v. 26. exprimitur. Nam, vt ex eo loco veritas panis et vini in Eucharistia intelligitur, sic pariter veritas corporis et sanguinis Christi, et vtriusque praesentia talis, qualem defendimus, demonstratur. Ac primum, intelligi perfecto non potest, quomodo, qui non edit verum corpus Christi, sed merum panem, qui tantum significationem Christi pro nobis mortui habeat, quomodo ipsum Christi corpus violet ac profanet? quomodo magis profanet, eo, qui signo crucis inter precandum per meram consuetudinem, sine pia cogitatione, vsus, aut, verbum Euangelii de salute per mortem Christi speranda sine vera fide ac sensu pio audit et legit? Improbe facere omnes, palam est, sed violati et proprie profanati corporis Christi reos nemo dixerit; nec sic loquuntur Scripturae. Ergo, quod est consequens, intelligi debet in pane et vino Eucharistico aliquid amplius figura et signo. Id autem esse ipsum corpus et sanguinem Christi, vincunt sequentia; in quibus Paullus seuerè pronunciat, eum sibi perniciem edere ac bibere, qui indigne sumat: quod ipsum grauius est, quam pro abusu, aut peruerso vsu signi meri, per arbitrium constituti. Enimuero causa adiungitur haec, *quod non discernit corpus Christi*. Id vero nostrò quidem iudicio, rem dirimit. Quid enim est, *μὴ διακρίνειν τὸ σῶμα τοῦ Κυρίου*, non discernere corpus Domini, nisi, corpus Domini ita edere, vt cibum profanum et vulgare, quod sit, cum sine fide et religione sumitur. Nam verbum discernendi, hoc quidem in loco, est e significatione discernendorum ciborum secundum legem Mosaicam: in qua non discernere cibos dicuntur, qui puris et profanis ac lege

lege vetitis pariter vescuntur, nihilque discriminis faciunt; qui cibos profanos et vetitos lege ita comedunt, vt legitimos et pro legitimis. Neque id *non discernere* propria refertur in illa phrasi ad iudicium animi, sed ad ipsum actum edendi promiscue. Ex quo profecto fit, vt edamus ipsum corpus Domini. Quomodo enim vt: cibus promiscuus sumitur, si omnino non sumitur, aut quomodo possumus corpus Christi ab alio vulgari, corpus alente cibo discernere et religiosus sumere, si prorsus non corpus ipsum, sed eius vmbram modo et signum accipimus; si hypocritae, de confessione aduersae partis, omnino nihil praeter merum panem accipiunt? Dixisset potius, qui indigne edat de pane, nihil nisi pane, non corpore domini, vesci, et nullum fructum capere, siue; profanare panem, qui per *εὐλογίαν*, sanctitatem aliquam acceperit. Profecto, quo diutius ac diligentius hunc locum consideramus, ita magis firmatur animus noster in sententia Ecclesiae nostrae, et, vt nihil durius dicam, in re sancta et ad religionis sanctissima mysteria pertinente, plane sensus nostri repugnant, cum fingere conamur, Paullum nihil aliud dicere voluisse, quam hypocritas nihil praeter inane ac sine re signum accipere, quod iis nihil profit: ad confirmandam et augendam fidem, quam omnino nullam habeant; id autem illis verbis expressum esse, *edere ac bibere perniciem, corpus Domini profanare, et pro cibo vulgari sumere*. Ac nos non ignoramus, quid hic dicatur elabendi causa: profanantur Symbola corporis et sanguinis Christi, inquit Reu. *Beckius* in *Synops. Theol. p. 292*. Audimus. Sed primo, hic sensus profecto nemini in mentem veniat, primum legenti, nec iam imbuto Zwingliana sententia; quod est argumentum falsae interpretationis inprimis graue: deinde, abusus hic estne tantus, vt propterea edat sibi perniciem, et non discernat corpus Domini? An ergo etiam, qui paschalem agnum, vt symbolum Christi mactandi pro peccatis, sine fide et pietate edebant, perniciem edebant, et non discer-

nebant Christum et sacrificium pro peccatis nostris? An etiam, qui cibum quemlibet sine precibus piis et gratiarum actione accipit, sibi perniciem edit, quia non discernit donum Dei, quod cum precibus et gratiarum actione sumendum erat 1 *Tim.* 4, 5.

II: Et haec quidem argumenta ducta sunt e testimoniis Scripturarum: ad ea veniamus, quae a rei natura petuntur, hoc est, e natura communi Sacramenti. In quo utemur principiis tantum iis, in quibus consentientes habemus, qui in causa summa a nobis discrepant. Primum igitur fatentur nobiscum, in Sacramento *aliquid accipi, bonum aliquod inuisibile*, unde fructum capere spiritualem possint, qui recte utantur: idque eiusmodi, ut sit Sacramento proprium donum ac beneficium: foret enim alias inane et superuacuum Sacramentum ipsum. Hoc autem constituto, quaeramus, quid accipiatur in Coena sacra, praeter panem et vinum, si non accipitur verum corpus et verus sanguis Christi, e nostra sententia? Profecto, secundum Reformationum rationem, nihil accipiunt, neque qui recte, neque qui male utuntur Sacramento: non hi, quia mera symbola accipiunt, de ipsorum confessione. Nam bonum, quod accipiatur, ponunt in perfectione et corroboracione fidei; quae in eos non cadit. Nec plus accipiunt recte utentes ac fideles, quicquid illi dicant. Nam sibi dant ipsi id incrementum, non in Sacramento ac per Sacramentum ipsum proprie accipiunt. Quomodo enim volunt fidem augeri per hoc Sacramentum? Nempe cogitatione fidei mortis Christi et gratiae Dei propter illam. At cogitationis talis suscipiendae nihil sane praeter admonitionem nec habent symbola, nec habere possunt, per naturam suam. Cogitatio tota est hominis, a qua, quia corroboratio fidei nascitur, eam homo fidelis accipit a se. Ergo sicut fideles extra Sacramenti usum, quacunque re, ut dicto aliquo doctoris, aut signo crucis vel imagine Christi, admoniti, suscepta tali cogitatione pia firmant sibi et augent fidem, non a cruce et imagine acci-

accipiunt; sic nec in Sacramento aliter fieri, secundum illam sententiam, potest; nec quicquam erit discriminis, nisi hoc, quod illa symbola panis et vini, a Christo instituta sunt, haec ab hominibus, quod ad rem ipsam nihil refert.

12. Atque ita porro etiam perit penitus ea, quam *Vnionem* vocant *sacramentalem*, agnoscuntque ac defendunt nobiscum, qui contra nos stant, sed profecto tantum nomine, non re, ut facile intelligi potest. Nihil est mirabilius, ut mihi videtur, in tota eorum sententia, quam illa *Vnio*, quam dicunt, cum plerisque nostrum, fieri in consecratione, ut nuper is, quem diximus *Reu. Beckius* p. 287. At in promptu est, coniunctionem corporis Christi cum symbolo panis fieri, secundum eorum opinionem de praesentia corporis et sanguinis Christi, ab fumentis fide, non factam esse a Christo, aut fieri a sacerdote consecrante. Nam fides, secundum eos, facit praesens corpus Christi, nec id proprie iungit fides cum symbolo panis, sed admonitus a symbolo, ut alias a cruce aut alia figura, id iungit menti suae; cogitatione sua spiritualiter vescendo. An hic umbra est unionis, quae symbolum panis et corpus Christi intercedat?

13. Denique etiam hoc est inter concessa de Sacramentis, ut *vim* aliquam habeant et *efficaciam* salutare. Nam queri solent nobiscum hoc nomine contrariae sententiae defensores, quod eos dicamus, Sacramentis nullam vim et efficaciam relinquere; cum fateantur, iis tribui clare in Scripturis, et sine ea merum lusum fieri: immo in eo capite plane se, aiunt, nobis consentire. Enimuero, cum veniunt ad explicandam illius efficaciae naturam, totam tollunt, solum nomen relinquunt: nec aliter finit fieri eorum de natura Sacramenti sententia. Nam veram quidem efficaciam et vim agnoscere nemo potest, nisi hanc, quae est ei rei, cui tribuitur, insita, haeretque in eius vel uniuersa natura, vel parte aliqua. Vbi igitur est talis efficacia, eorum sententia probata? In symbolis panis aut vini? Nequaquam. Nam in iis nihil

nihil est nisi admonitio aliqua ex instituto Christi cognita. Haec vero non est illa efficacia salutaris, quam nos defendimus re, illi verbo. Et haec est omnibus hypocritis cum vere piis communis; quod secus est in efficacia propria Sacramenti. Quod si ipsum corpus Christi verum cum sanguine eius adest, habemus, in quo efficaciam ponamus, quod efficaciam habere possit insitam. At si non adest, ubi haerebit, quando nihil præter illa symbola relinquuntur. Non certe in ipso Sacramento, quod est diuinæ institutionis. Ergo amandabitur ad sumentis cogitationem piam: ea sola dabit Sacramento efficaciam: nam ea sola firmat in illa ratione fidem: si planius dicas, ea habet efficaciam et vim augendae fidei, non Sacramentum, quod nihil aliud, quam admonuit Christianum, ut fidem cogitando excitaret.

14. An vero, quaeso omnes Christianos, Sacramentorum reuerentia quadam imbutos, placet Sacramentum Christi, quod ipsum nullam vim habeat, sed ad summum accipiat aliquam ab homine? quae pendeat ab eius cogitatione? Non profecto, nisi mentallunt omnia. Ac videamus, quae porro consequantur. Nam si nulla alia vis est in illo Sacramento, quam talis admonitionis: quorum institutum dicemus a Christo? An aliud in eo quicquam erit, quam *αἰσθητὴς καὶ πτωχὸν στοιχεῖον*, *tenuis et leue elementum*, ut Paullus ritus V. T. vocat, *Gal. 4, 9*. hoc est, exercitationem admonendi, comparatam infantiae Christianae Ecclesiae, qua non sit opus adultis, h. e. fidelibus, qui adfueti sint melioribus et virilibus exercitationibus legendi et cogitandi Euangelii, nec indigentibus tali admonitione? Quis vero iam reprehendat Socinianos, qui, ab illa Zwingliana opinione profecti, et, quid consequens esset, percipientes; nullam illius Sacramenti usurpandi necessitatem esse contendunt, et liberum cuique relinquunt, uti eo velit nec ne? aut quis iam indigetur Fanaticis, qui se carere posse hoc Sacramento iactant, laetarique se dicunt, quod ita profecerint, ut
sibi

sibi non opus sit Eucharistiae Sacramento? Nam nihil horum absonum est, aut ab veritate et aequitate abhorrens, si in eo mera est significatio corporis et sanguinis Christi. Enimvero, cum ista prorsus abhorreant ab sensu Christiano, sintque dedecori Sacramento sanctissimo; efficitur, rationem nostram potius esse probandam, quae vim, et dignitatem, et necessitatem Eucharistiae non modo saluam relinquit, sed etiam commendat et illustrat; immo, sine qua dignitas eius et vis salua esse nullo modo potest.

15. Fuerunt, qui magnum argumentum et firmitermentum causae nostrae peti posse dicerent ab epulis, post sacrificia fieri solitis, de carne victimarum. Est autem haec ratio Coenae sacrae comparandae cum illis epulis a *Cudwortho* vel inuenta, vel inprimis exornata in libello de *Vera Notione S. Coenae*, quem latine versum *Systemati intellectuali* subiecit cum notis suis *Moshemius*. Existimabat ille, Coenam S. respondere imitatione quadam epulis iis, quae ex carnibus victimarum fieri solerent apud Iudaeos atque etiam Gentiles. Eas porro existimabat hanc vim habuisse, e mente utrorumque, ut per eas homines venirent in communionem eius Dei, cui sacrificium factum esset, quod etiam firmari putabat disputatione Pauli 1 *Cor.* 11. Id inuentum placuit quibusdam non modo Britannicis Theologis, nuper etiam *Warburtono*, Episcopo Glocestriensi, in libello de *natura Eucharistiae*, sed etiam de nostris, eruditissimis Theologis, *Gottfr. Oleario*, *Pfaffio*, *Iano* cet. qui hinc putabant effici, ut qui Coena S. fruerentur, carnem ipsius victimae pro nobis mactatae ederent. Sed ea ratio recte repudiata est a *Moshemio* in praef. ad Cudworthianum libellum, argumentis sane idoneis; quae ibi legent, qui velint. Nobis addere liceat ab eo bene disputatis haec duo. Primum res sunt valde dissimiles. Nam e victimis Iudaicis, quae non totae comburerentur, particulas tantum reliquae carnis comederunt, vel ipsi, qui victimas obtu-

obtulissent, vel conuiuiae plures, ad quos sacrificium non pertineret: in Coena sacra totam corporis victimam accipimus vescendo. Deinde tota ratio earum epularum profecto non est satis intellecta, estque omnino eiusmodi, vt Coenae S. nullo modo apta sit. Etenim, vt ab epulis gentilium incipiamus, eae nullam coniunctionem habuere cum religione: sed quoniam victimarum pars tantum solebat immolari, exta fere et adeps, vt notum est e poetis graecis et latinis, ceterae carnes reddebantur iis, qui animalia mactanda dedissent. Eas porro carnes licebat sibi seruare omnes, ad vsum familiae, etiam, si absumi recentes non possent, sale conditas seruare ad vsum ceteri temporis, denique etiam vendere, vel per partes pluribus, vel vniuersas laniis, a quibus venderentur in macello, quod etiam Paulli verbis intelligitur 1 Cor. 10, 25. Sed moribus Graecorum hoc sordidum putabatur et illiberalis; vnde ab *Theophrasto* in partibus illiberalitatis ponitur *Charact.* 22. Itaque locupletes, liberalius et honestius viuere soliti, earum carnum partes donabant amicis, itemque epulas faciebant, in quibus earum pars absumeretur: quod intelligitur loco *Xenophontis Mem. S. II*, 3, 11. Nec coniunctionem harum epularum cum religione arguit locus Paulli 1 Cor. 8, 10. vbi epularum talium in delubro aëtarum est commemoratio. Nam primum, id non perpetuum fuisse indicat alter locus 10, 27. vbi profecto non est sermo de epulis in delubro, quod in iis sine indicio constabat, e victimis carnes praebere: deinde, ibi epulas tales in porticibus instituebant, quibus domi locus commodus non esset; in iis autem etiam alia humana agi solita esse, satis constat. Et, quod gentiles ad eas epulas etiam inuitabant amicos e Christianis, a quibus Deos suos sciebant contemni, id profecto clare docet, eas nihil coniuncti cum religione habuisse. Apud Iudaeos autem tales epulas religiosas fuisse, nullo literarum sacrarum testimonio deceri potest: sed e partibus victimarum iis, quae sacri-

ficanti-

ficantibus redditae essent, conuiuia facta sunt, ut dies sacrificii per laetitiam honestam et liberalem transigere-tur. Itaque argumentum, quod ab iis epulis ducitur, vim habere nullam potest.

16. Sed multo minus probandum est argumentum, quod nonnulli ab ipsis sacrificiis gentilium repetunt. Nam in sacrificiis iis, quibus, ut opinor, foedera sancirentur, morem hunc fuisse, ut sanguis victimae patera exceptus circumferretur gustandus his, quos inter foedus patratum esset. Ad huius autem moris imitationem referendum esse Coenae sacrae calicem, quem diserte foederis noui Christus appellet, sanguine suo sancienti; cum ex altera parte constet e victimae foederalis carnibus com-edisse, qui foederis sancienti essent participes. Malle-mus utique abstinuisse Viros doctos et defendendae veri-tatis, quod laudamus, cupidos, ab huius rei comme-morandae et ad firmandum dogma Ecclesiae nostrae con-ferendae consilio, quam eius rationis refellendae necessi-tatem nobis imposuisse. Nam, ut alia mittam, certe inter Iudaeos, quibus omnino nefas esset, sanguinem gustare, talem morem non fuisse, et, si aliarum gen-tium fuerit, ab eo rei a Iesu institutae explicationem petere, parum religiosum videri; tota res profecto est commentitia. Omnibus enim populis abhorrens ab humanitate, ut est, ita visum esse satis constat, san-guinem recens fustum e venis bestiarum bibere: nec vllum in graecis latinisque scriptoribus extat ritus talis, quod ego cognouerim, vestigium. Atque ego memini me audire dogmatis Zwingliani asseclam, qui foederum priscorum ritu ad id firmandum abuteretur. Nam in illo foederum per victimam sancientorum actu, aiebat, pateram vini circumlatam esse bibendi gratia, ut eo potu foederis participes fierent; idque vinum datum esse loco sanguinis, quem gustare nefas esset moribus humanis. Ad eum igitur modum Christum nos ad com-munionem foederis, victima corporis sui, perpetrati adduci

adduci voluisse vino bibendo, in quo esset figura sanguinis sui, quod id vice sanguinis daretur. In quo saltem illud verum erat, quod de vino ab immolantibus sumto dicebatur: sed alterum totum a veritate alienum, vinum loco sanguinis fuisse. Nam vini usus fuit in parte necessaria sacrificii talis, multorumque aliorum, nec quicquam habuit coniunctionis cum sanguine: quippe caesa victima et fuso ad aram sanguine, accedit demum vini libatio, per quam guttatim funditur primum e patera vini pars in victimam caesam, posthaec autem circumfertur patera, ut degustetur vinum pariter ab sacrificantibus, ut factum est etiam in aliis sine victima libationibus religiosis. Quid hic igitur est similitudinis cum Coena sacra? et si esset tamen: quid id ad Coenae sanctissimam cerimoniam? in qua Christum sumsisse exemplum ab sacrificiis impiorum, sine iniuria in ipsum et eius institutum, dici non potest. Mittant ergo veritatis adsertores totum hoc genus argumentorum, quae e ritibus gentilium captantur, satisque habeant uti Scripturis, et iis recte ac diligenter explicandis veritatem firmare; quae non destituent recte tractantem, ut antea demonstratum est.

17. Sed duobus illis legitimis generibus argumentorum, quibus supra usi sumus, addi solet tertium, quod ab consensu antiquitatis arcessitur. Nec id profecto leue et contemnendum videri debet. Quamquam video, nonnullos secus iudicare, siue inscitia antiquae doctrinae, et quia, quod quis ignorat, ad id contemnendum proclivis est, siue potius, ut interpreter, inconstantia et leuitate iudicandi. Nam ita sumus plerique: cum commodum est, extollimus, quod alio tempore; cum secus vel est, vel videtur, deprimimus; ut fecit in eadem re *Dallaeus*, vir antiquitatis Christianae scientissimus: qui cum antiquitatis testimoniis premebatur, toto libro usum Patrum in Controuersis religionis impugnauit, et quantum in ipso fuit, depresso: vicissim, cum eum in pari causa deprimerent aduersarii eius, *Adamus* et *Cottibaeus*, plane contra-

contrariis argumentis eius vim asseruit et vindicauit: *Repl. aux livres d'Adam et Cottiby P. 1.* cui libro prope principatus inter cetera viri opera debetur. Antiquitas ipsa profecto stulta fuit, quae tanti fecit consensum seculorum priorum, si in eo nulla vis est ad illustrandam veritatem; stulti *Flacius* noster, *Gerhardus*, *Bebelius*, et alii egregii viri, in demonstrando consensu Ecclesiae nostrae cum antiquitate vltima: stulti nostri omnes, qui tanto studio inuentum, inprimis *Zwickeri*, acerrimi Socinianorum, impugnauere testimoniis antiquitatis, cum, seculis prioribus, aliter de Christo sensisse Ecclesiam, demonstrare tentasset, quam Nicena synodus sanxerit: stulti *Claudii*, *Albertini* et multi alii, qui integris, etiam magnis voluminibus, et magno doctrinae apparatu, *Nicolium* primum, deinde *Arnaldum*, *Perronium* aliosque, representare, transubstantiationis dogmati consensum antiquitatis asserere conantes: stulti denique omnes, qui nouitatem dogmatum Romanorum demonstrare conati sunt, *P. Molinaeus*, *Dallaeus*, *Hunnius*, etiam noster nuper *Deylingius*. Sed abest longe ab his tot praeclaris viris haec tanta iniuria, nec vlllo modo in iis haerere tam ingratum crimen potest. Et ipse sensus communis vim huius argumenti defendit. Itaque ea semper fuit apud animos hominum permagna: nec alia magis causa praeclari illi, quos ante commemorauimus, Viri in Francia, tanto cum apparatu doctrinae *Nicolinum* inuentum de perpetuitate dogmatis de transubstantiatione impugnauere, quam quod id multorum animos debilitasset, et ad Romanas partes inclinasset.

18. Sed in eo argumento non vna cautio est: prima, vt in eo non caput demonstrandi ponatur: nam id sibi vindicant Scripturarum s. testimonia et rei natura: sed demonstrationis firmamentum; quod nimirum antiquitatis, vltimae in primis et incorruptae, simplicitatemque primam retinentis, testimonium firmat interpretationis nostrae simplicitatem et veritatem. Nam cum videmus, rem tantam

Ernesti Opusc. Theol.

K

ita,

ita, ut ipsi iudicamus, intellectum, quo tempore adhuc prope sonabat oratio Apostolica per ipsorum auditores, et lingua adhuc viua erat ea, qua Apostoli in scribendo visi essent, mirifice confirmatur animus, iudicans de interpretationis, per legitimas artes quaesitae et repertae, veritate. Atque non aliam nisi hanc vim antiquitas erudita, et nostri illi principes doctrinae, testimonio Ecclesiae antiquae tribuerunt, *Facundus Hermianensis, Vincentius Lerinensis*, de nostris *Melanchthon*, cuius est de ea re disputatiuncula ad 1 Cor. 14. T. IV. Opp. p. 290. Tertia cautio est, in qua maxime et saepissime peccatur, peccatumque est semper in illa controuersia, quid antiquitas de Coena sacra qua partem eam statuerit, de qua disputamus, ut ne promiscue utamur locis librorum veterum, sed eorum primo, qui publicam auctoritatem habuerint, ut haud dubie insit doctrina publica Ecclesiae: post horum, qui proprie pertinent ad interpretationem Scripturarum; quales sunt Commentarii eorum, quos constet bene eruditos et interpretandi peritos fuisse, aut locis librorum iis, in quibus testimonia Scripturarum, ad causam pertinentia, proprie explicantur: denique in quibus de eo capite doctrinae ex instituto, explicandi causa, agitur. Nam e talibus solis doctrina cuiusque aetatis certo cognosci potest: cetera debent ad horum normam explicari. His tribus igitur obseruatis, recte hoc argumento utemur, nec mouebimur specie dissensus, quae *Claudio et Arnaldo* et aliis tam molesta fuit, cum neuter omnibus locis, ab altero pro sua sententia prolatis, satisfacere posset. Sic ergo agemus: quamquam hoc iam egimus in *Anti-Muratorio* p. 67. Sed, quia ibi id egimus aduersus Pontificios, nunc contra aliam rationem disputamus, breuiter hic, quae ibi dicta sunt, cum aliquo auctario repetemus.

19. Primus igitur ex iis, quae constituimus, generibus, locus est *Iustini* in *Apol. secunda*, quae habet vim scripti publici, quia scripta est ad auertendam ab Ecclesia persecutionem, et est Confessionis publicae instar. Nam et si

etsi non audeam pro certo dicere, eam missam esse ad Antoninum, ut habet index; tamen nec titulum hunc spurium iudicem, sed saltem hoc consilio adpositum ab *Iustino*, ut appareret, eam defensionem destinari iis, a quibus Christianis esset vel vexatio metuenda, vel auxilium innocentiae sperandum. Clarum autem est, *Iustinum* hoc agere, ut ostendat, quid fiat in Eucharistia, et quid de Eucharistia credatur in Ecclesia: aliter innocentia rei doceri non poterat. Itaque quemadmodum omnes ex eo loco, latentur, plane cognosci, qui prima illa aetate ritus peragenda Coenae S. fuerint: sic pariter, quae de ea fuerit sententia Ecclesiae, ex eo loco debet intelligi ac doceri. Sed de hac parte *Iustinus* tradit haec: 1) panem et vinum consecratum esse *τὸ φῶν*, alimentum, et quidem tale, quo alantur corpora: 2) panem non esse *κοινὸν*, communem tantum et vulgarem, qualis sit, cum extra Eucharistiam sumatur, sed esse *Corpus Christi*: 3) hanc esse de ea re doctrinam Ecclesiae traditam, *ἡ δὲ ἐκκλησία εἶπεν ὅτι*. 4) corpus Christi adesse saluo pane, et esse substantiam: nam ita panem esse corpus Christi, ut homo Iesus idem sit Deus. Hoc si Sabellius aut Sabellianae opinionis assecla scripisset, intelligeremus praesentiam corporis Christi per efficaciam: sed ab illo errore alienum fuisse *Iustinum*, clarum est: et eadem ratione explicandi vsi sunt postea *Chrysostomus*, *Theodoretus* et alii, qui alienissimi ab Sabelliana perversitate fuere. Haec omnia perverti nulla ratione legitima possunt: et quae Reformati quidam Theologi contra moliti sunt, ea sunt ab ratione recte interpretandi alienissima, ut ostendimus l. c. ubi haec legent, qui volent.

20. *Iustino* addamus Interpretem N. T. principem *Chrysostomum*, qui locum Pauli 1. Cor. 10. explicans, et quare *κοινωνίαν* communionem dicat, non *μετοχήν*, perceptionem, quaerens, τί γὰρ ἐστὶν ἄρεος; σῶμα χεῖρ^ς cet. quid est panis? corpus Christi. Quid autem fiunt, qui scilicet, corpus Christi sumunt? Corpus Christi. Quomodo

autem panis et vinum sit corpus et sanguis Christi, sumaturque a Christianis, primum in illo ipso loco declarat, cum in poculo dicit esse, quod e latere Christi fluxerit, tum in loco notissimae ad *Caesarium* epistolae: nempe eo, quo nos dicimus: idque ita est clarum, ut etiam aduersae partis quidam in Chrysostomo nostram sententiam agnoscant. Et quomodo non agnoscant? cum diserte dicat, panem, amissa sua appellatione, dici corpus Domini, etsi natura panis permanserit, et non duo corpora (scil. panis et corporis Christi) sed unum filii Dei corpus praedicari. Ceterum in promptu est iudicare, eandem sententiam placuisse praeceptoribus Chrysostomi, a quibus rationem interpretandi et doctrinam omnem sacram didicerat, Diodoro Tarfensi, Theodoro Mopsuesteno, qui ab Origene fluxit, ut in Disputatione de Origene demonstrauiamus. Sed huic adiungamus e Graecis tertium, qui duobus seculis post fuit, Anastasium Sinaitam in *Hodego* c. XXIII. qui in Coena S. negat esse ἄγρον ψιλόν nudum panem, aut ἀντίτυπον, figuram Corporis Christi, sed ipsum verum corpus I. C. In quo argutatur primum Albertinus de Sacramentis Euchar. p. 904. reprehendens Anastasium, quod neget, panem esse figuram corporis Christi, cum id superiores Ecclesiae Doctores fateantur, non intelligens, Anastasium negare, meram figuram esse, quod sane nemo superiorum dixerat; nam figuram et signum sane dixere, id nos quoque fatemur: sed sunt etiam signa rerum praesentium, quae in oculos non incurrunt, cuiusmodi signa in Coena sacra facile agnoscimus. Nam quod nouatorem appellat et eius aetate coeptum esse doctrinam in hoc capite mutari, id falsum esse, superiora testimonia declarant. Quae cum ita sint, mirandum est, quomodo Heumannus, historiae Ecclesiasticae profecto non rudis, potuerit dicere, demonstratum esse ab Oecolampadio, prioribus octo seculis, omnes Zwinglianam sententiam tenuisse: quod falsum esse et res ipsa demonstrat, et non modo demonstratum est iam tum

a *Pirkheimero* et aliis, sed ab ipso agnitum, interdum in locis Patrum fatente: *hoc, apparet, contra nos esse*. Atque ita absoluius demonstrationem sententiae nostrae de praesentia veri corporis et sanguinis Christi in Coena sacra, per quam non panis solus ac vinum solum, sed etiam corpus et sanguis Christi ipse ore sumitur ab omnibus.

21. Non alienum videtur esse, hoc in loco adicere aliquid, etsi proprie non pertinens ad hanc demonstrationem, tamen et cautioni ei, quam tertio loco posuimus, §. 18. illustrandae seruiens, et non ingratum, ut speramus, futurum iis, qui acta eorum cognoscere cupiant, per quos sacrorum repurgatio contigit Ecclesiae. *C. Peucerus* in Epistola ea, quam e carcere Lipsico scripsit ad Augustum Electorem, ut esset pro Confessione, dixerat, *Philippum* profecturum a. 1541. cum *Luthero* ad Colloquium Ratisbonense, huic dedisse chartas, repletas sententiis Patrum Eccl. de Coena sacra, roganter, ut de iis quid sentiret, sibi ostenderet, ne in ipso actu discrepant. Eas cum *Lutherus* reddidisset, adscriptis glossis, vel scholiis, quibus eae sententiae cum suo de Coena sacra sensu in concordiam redigerentur, *Philippum*, iis lectis, dixisse, tales glossas semetipsum inuenire potuisse, sed eas in disputatione firmas non fore, idque ipsum intelligere. Tum *Lutherum* nihil aliud respondisse, nisi, se ipsi rem permittere bene sperantem de eius dexteritate. Hanc *Peuceri* narrationem pro commento impudentissimo proscripsere *Theologi Vitebergenses in Confutatione Testamenti Peuceriani*, et illius ipsius Epistolae cet. p. 127. Et nos non possumus scire aut affirmare, ea ita acta esse, ut *Peucerus* narrauit: hoc possumus dicere, in manibus nostris esse chartas conscriptas talibus sententiis a *Philippo*, adscriptis glossis et interpretationibus ipsa *Lutheri* manu; quae in *Peuceri* familia seruatae, et velut per manus traditae, peruenere ad *Bernauerum*, Scholae *Budissinensis* ante non ita multos annos Rectorem, inter cuius libros, in hac vrbe nostra venditos, venere tandem

in manus nostras: post huius quidem libelli nostri disceptationem reponentur in Bibliotheca Paullina, ubi volentibus inspicere licebit. Sunt autem sententiae maximam partem ex *Augustini* libris; ex *Ambrosio* (s. *Hilario* potius *Diac.*) ad Corinth. *Irenaeo*, *Origene* singulae; item a *Liturgia Graeca* et *Epiphanio*, omnes post in hac controversia saepe prolatae et excussae: sed non sunt ex eo genere, quod nos in cautione tertia definiuimus, propter quam causam *Lutherus* totam illam cohortem sententiarum repudiare poterat, cum sensus Ecclesiae, non cuiusvis doctoris, in disputatione aliena; ad causam suam accommodatio, quaeratur. Scholia autem *Lutheri* habent distinctionem ambiguum, explicationem verborum et conciliationem cum doctrina vera. Exempli causa duas commemorabimus. Prima ergo sententia est ex *Augustini* libro c. *Adimantum* c. 12. *Non enim Dominus dubitauit dicere; hoc est corpus meum, cum signum daret corporis sui.* *Lutherus* adscripsit verbo corporis rubricam, „*praesentis*: sic sanguis est etiam signum animae, scilicet inclusae et praesentis: nam hoc agit et rogitat. Tum crassius loquitur infra: *Petra erat Christus* cet.“ His bene responderi clarum est, nec abnuisse crediderim *Philippum*. Nam signa etiam praesentis rei esse, quis dubitet? Et ipse *Augustinus* aliis locis, ut in *Epist. ad Neophytos*, praesentiam docuerat, *hoc accipite in pane, quod pependit in cruce* cet. ubi tirones docebat. Et in illo loco aduersus *Adimantum* Manichaeum disputans, super verbis *Mosis*, animantis animam esse in sanguine eius, in omnes partes versans se, ad extremum inquit: *possum etiam interpretari, praeceptum illud esse in signo positum: nam nec Dominus* cet. Ex hac autem responsione pleraequa aliae pendent. Nam vel signi vel sacramenti verbum est in illis sententiis, quod dubiam reddere cuiusque opinionem de Coena sacra possit. Durior videtur locus e *Comm.* in Psalmum 98. *Non hoc corpus, quod videtis, manducaturi estis et bibaturi illum sanguinem, quem effusuri sunt, qui*
me

me crucifigent, sacramentum aliquod vobis commendauimus. Et, addit Philippus, hic verbo commendandi aliquoties utitur: commendauit nobis isto sacramento sanguinem suum et corpus suum. Glossae Lutheri hic rem referunt ad primam illam rationem: non hoc corpus, sc. visibile, et palpabile: sacramentum sc. rei vel praesentis vel mysticae. Item post crucifigent: non sequitur, non esse corpus, sed sacramento, i. e. velamine. Et licebat ibi simpliciter respondere, sine talibus glossis, sermonem esse Augustino non de Coena sacra, sed de interpretatione verborum apud Ioannem c. 6. quae non huc pertinent. Ibi sane sensus docuit homines, qui offendeabantur oratione eius, quae dixerat, corpus suum potius vt edant et sanguinem bibant, videndum esse, quam de cibo naturali laborandum, non se corpus hoc, quod viderent, ita comedi velle, vt panem ante comederint cet. Et sunt aliquot praeter hanc sententiae pariter ad verba Christi apud Ioannem pertinentes, quae erant ab hac causa alienae. Verba Ambrosii s. Hilarii e Comm. qui videatur de genere nostro, sic habent: quia enim morte Domini liberati sumus, huius rei memores, in edendo et potando carnem et sanguinem, quae pro nobis oblata sunt, significamus. Recte monet Lutherus, carnem et sanguinem referenda esse ad edendo et potando, quo et Philippica et librorum editorum interpunctio refert: significamus, interpretatur mundo cet. repraesentamus vel fateamur pro nobis oblata, quae edimus (carnem) et bibimus (sanguinem). Hoc etiam recte responderi consuevit: nam palam est, auctorem illius Commentarioli, quisquis fuit, in verbo significamus habuisse in animo praeceptum Pauli: καταγγέλλετε τὸν θάνατον τοῦ Κυρίου, significate pro annunciate; nam illud latinus est et elegantius, pro commemorate praesentibus cet. Sed ad rem ipsam redeamus, et, quae reliqua videantur, expediamus.

22. Nam et dubitationes, commotae e praesentiae
maxime notione, et recens interpretatio praesentiae

fecero, ut ad absolutionem, non modo firmandae, sed etiam intelligendae sententiae nostrae, sit illa praesentia, de qua loquimur, explicanda, ne vel perturbet animos, vel sub verbi ambiguitate error lateat. Nam Confessionis Augustanae probandae necessitas in Germania fecit, ut, cum antea praesentia ipsius corporis Christi in Coena sacra esset disorte negata, tandem de praesentia concederetur. Satis constat, *Bezam*, in Conuentu Possiacensi, de hac praesentia interrogatum, disorte respondisse, tantum abesse corpus et sanguinem Christi a pane in Coena sacra, quantum abesset coelum a terra *). Res paulatim eo deducta est, ut *praesentiam* etiam *substantias* concederent, nec de hac disputari dicerent, sed de modo, quo substantia corporis et sanguinis Christi praesens esset. (v. *Turretin. Theol. Elenct. T. III. p. 568.*) Item, quoniam illa praesentia corporis et sanguinis Christi verbo *exhibendi* a nostris exprimebatur, quod, ad praesentiam ipsius substantiae, qualem nos intelligimus, exprimentam

*) v. *Comm. de Statu Religionis et Reip. in Regno Galliae P. I. p. 115. ed. quartae*: cuius libri auctor historiam illius Colloquii omnium luculentissime tradit: qui si non est ipse *Beza*, quod orationis elegantia non improbabile facit, certe suppeditaui auctori materiam actorum in hac parte: et consentit narratio in *P. Martyris* epistolis ad *Calvinum* et *Balingerum* de actis conuentus scriptis ex vrbe Parisina. Etiam in hoc *Bezae* ingenium prodit narratio libri, quod multo pauciora de *Martyre* traduntur, quam debebant. Et patet ex illis epistolis, *Bezam* omni modo tentasse remouere ab actu rerum *Martyrem*, cui Regina plus tribuebat, quam *Bezae*. Exemplum, quo nos utimur, valde vitiosum est, sed e diuersis edd. mistum. Partes duae priores praeferunt annum 1577. tertia a. 1589. quarta 1575. quinta 1580. et praefert Lugdunum Batavorum, vbi et ceterae expressae videntur: adeo et charta et formae literarum consentiunt. Incipit opus elegantissimum et lectu dignissimum, vbi *Sleidanus* desinit, et desinit ipsum in rebus anni 1576. et edito quinto pacificatorio,

dam erat aptissimum *), hoc quoque verbo coeperunt uti. Sed ut in illo genere non veram substantiae praesentiam intelligebant, sic et exhibendi verbum aliter, quam nos, et quam verus sensus verbi fert; ut nuper diserte falsus est Cel. Beckius in *Synops. Theol.* p. 217. non exhibitionem rei ipsius, sed repraesentationem veluti pignoris, exhibitionem moralem. Nempe, ut Turretinus ait, praesentiam substantiae intelligunt, quae sit, non in *adhaerentia*; (quasi tu dicas, indistantia,) quae sola veram, et quae proprie dicitur, praesentiam facit, sed in efficacia et operatione: eamque ipsam talem, qualem supra descripsimus; quae sit non ipsius Christi, sed fidei per symbola panis et vini excitatae vel admonitae ad cogitandum, et per illam cogitationem se firmantis et roborantis.

23. Sed etiam e nostris quidam, cum in philosophia suscepissent praesentiae notionem, per quam poneretur in efficacia et operatione in rem quamcunque, talemque fingerent ipsius praesentiam Dei, hanc admiscentes Theologiae, praesentiam corporis et sanguinis Christi per efficientiam quandam in mentibus humanis explicare coeperunt, diserte exclusa praesentia substantiae propria, et quam vulgo intelligimus in eius verbi usu; cuius generis

K 3

ris

*) Est enim verbum iuris, quod est, praesentem sistere, nec aliud magis proprium et euidentius aut ius aut latinitas habet ad exprimendam veram praesentiam: eoque usus erat Philippus in *Apol. A. C. ars. X.* repetiturus sententiam illius articuli, ubi nunc quoque extat: idem verbum post nostri non tulere, cum in ipsa A. C. posuisset, ut ego arbitror, maioris euidentiae causa, pro *adesse*; ut illi tum interpretabantur, accommodandi articuli ad sensum Zwinglianum, certe emolliendum. Eodem porro, nemine improbante, usus est in *Confessione Saxonica* a. 1551. quae Tridentum mitteretur, *ars. de Coena sacra* p. 134 (T. I. *Oper.*) In hoc mihi vix persuadeo, inimicos Philippum non aut ignorantia aut invidia peccasse.

ris exemplum nuper in *Bibliotheca theol.* (T. IV. p. 59.) notauimus; quod profecto nihil aliud est, quam veram praesentiam tollere, et ab doctrina Ecclesiae nostrae deficere. Et illa quidem ratio explicandae praesentiae diuinæ semper ab Theologis recte sentientibus repudiata est, praesertim per occasionem controuersiarum Cartesianarum; nec villo modo admitti in Theologiam et ad interpretandas Scripturas adhiberi potest, quae Deum ipsum vbique esse, a nulla re spatio et intervallo seiunctum docet; quod simplici fide teneri debet reuerentia verbi diuini; etsi modum rei intelligere mens humana non potest: praesertim, cum manifeste praesentiam Dei, in qua est attributum naturae diuinæ, non actio, confundat cum prouidentia, et, ea probata, multa et magna incommoda sequantur. Sed in ea causa, de qua nunc agimus, non modo vniuersa illa et communis praesentia Christi, quam per conjunctionem diuinæ naturae cum humana habet, sed alia, quasi propior, et voluntaria, intelligenda est; quod genus praesentiae clare naturae diuinæ vindicant Scripturae. Atque nos non hic commemorabimus illam fidelibus propriam praesentiam Dei, inhabitantis mentes eorum; quam tulerim tropicam intelligi, vt fit a multis, et efficaciae amoris diuini, exferentis se in animis piorum, augendis eorum bonis spiritualibus; si modo non vtantur argumento eo, quod video iactari, cum dicant, non intelligi posse, quomodo natura diuina, quae sua sponte sit omnibus rebus praesens, possit fieri propior fidelibus, idque esse absurdum penitus. Nam si ita esset, profecto Sabelliana ratio in explicanda Christi natura pariter probanda, et nostra, siue Ecclesiae orthodoxae constans sententia, pro absurda repudianda foret: cum *Sabellius*, *Paulus Samos.* et similes haeretici, pariter dixerint, diuinam naturam Christo praesentem et coniunctam fuisse per efficaciam et operationem, non substantia, quae nulli rei propior esse posset, propter eam, quam nostri illi commemorant, causam,

aut

aut substantiae *ἀδιασώτεια*. Itaque, vel hoc exemplo admoniti, existimemus, praeter necessariam illam et naturalem Dei praesentiam, omnibus rebus communem, intelligi posse ac debere genus aliud praesentiae voluntarium, sed illi naturali simillimum, hoc est, pariter seiunctum ab humanae et corporeae praesentiae circumscriptione: et eius indolis esse id, quod corpori et sanguini Christi vindicamus in Coena sacra, freti verbis eius et promissis. Nec eius praesentiae facultatem negare Christo homini possumus, ut recte defenderunt nostri, cui omnia sunt cum diuina natura communia facta, per illam coniunctionem ipsius cum diuina talem, ut vna persona (vnum subiectum) effecta sit. Atque ex his intelligitur, etiam illud falsum esse ac temere iactari, quod dicunt etiam de nostris quidam, de modo praesentiae disputari; in quo nullum momentum sit ad summam rei. Non modum, sed genus praesentiae definimus; cum satis sciamus, ac fateamur, modum, non tantum huius generis, sed praesentiae diuinae vniuersae, ignorari, et, ut aliarum rerum diuinarum modos, v. c. creandi, atque etiam operandi voluntatis nutu in res quaslibet, corporeas et incorporeas cet. captum intelligentiae humanae longissime superare. Hoc autem modo explicata praesentia carnis et sanguinis Christi in Coena sacra, etiam dubitationes tolluntur, quae aduersus eam sunt commotae, quas mox attingemus.

24. Ac ne licet quidem iis, qui nostram sententiam se dicunt probare, aliter intelligere praesentiam corporis et sanguinis Christi, aut per meram efficaciam et operationem explicare. Eius vero rei facilis et euidentis demonstratio est. Nam nos praesentiam ita defendimus, ut eam communem faciamus omnibus vescentibus et bibentibus, etiam indigne sumentibus symbola. Enimvero, quam possumus intelligere operationem corporis et sanguinis Christi in iis, qui indigne vescuntur et bibunt? cum non modo fructum nullum capiant sumtionis, sed
etiam

etiam poenam improbitatis luant? Nam quod dicunt, illam ipsam perniciem, a Paulo denunciatam, esse *ἐνεργεῖαν*, efficientiam operantis praesentiae Christi; id totum est alienum. Nam efficacia corporis et sanguinis Christi nulla alia intelligi potest, nisi quae sit ad salutem: cuius caussa et corpus Christi morti oblatum et sanguis fusus est. Iudicium et poena, cuius metus indignis proponitur, non est Christi morientis et expiantis peccata nostra, sed iudicantis, et Dei vlciscentis profanationem filii sui. Nam et Euangelium ipsum, id est, promissio Euangelii, cum est *ὁσμή ζωῆς εἰς ζωὴν*, odor viuificans, res homini salutaris, eam vim habet a se et sua efficacia; cum dicitur *ὁσμή θανάτου εἰς θάνατον*, odor enecans, id non est ex Euangelio et eius efficientia, sed poenae, quam infligit iustitia Dei, vlciscens contemtum salutis, a se oblatae. Illud etiam in hac opinione, qua salutarem efficaciam, est vitiosum, quod in ea confunditur id, quod in ipso actu accipitur, cum fructu, qui ex eo, quod acceptum est, percipitur, qui est efficaciae et operationis. Quae res nos admonet, vt quae sit illa, quam laudamus, efficacia corporis et sanguinis Christi, cum a fidelibus pie et religiose sumuntur, breuiter explicemus: praesertim cum et hoc non satis diligenter et accurate ab omnibus explicetur, sintque, qui omnem efficaciam aut effectum ab sumentis cogitatione repetant, quos nominare non est necesse.

25. Est autem efficacia Sacramenti huius duplex: altera ex eo genere, quod *morale* vocamus, sed ita vt non sit tota cogitationis humanae, vt in sententia Zwingliana: altera tota ipsius corporis et sanguinis Christi, diuina et coelestis, in qua nullae hominis partes sint. Prima igitur illa est in eo, quod in accepto corpore et sanguine Christi est admirabile et amabile pignus expiatorum et condonatorum peccatorum nostrorum, gratiaeque diuinae, quod fideles pie cogitantes, et comparantes suam indignitatem cum benignitatis diuinae tanta magnitudine, tale

tales pignus salutis sibi destinantis et tradentis, intimo, et ad placandum animum certissimo, ad exhilarandum autem suauissimo sensu adficiuntur, adiuuante etiam hunc sensum et acuate Spiritu sancto, ut saepe lacrimae dulces manare incipiant: qua suauitate nihil potest esse optabilius. Nobis quidem ab hoc sensu tanta commendatio accessit sententiae nostrae, ut vel eius causa nobis carissima sit, et, si in ea error intercederet, quod scimus non esse, eum nobis errorem (condonent lectores nobis hoc verbum) eripi nollemus. Haec igitur vis sacramenti est talis, qualem supra diximus esse debere, si veram, et quam proprie dicimus, vim intelligere velimus. Inest enim in ipsa re Sacramenti, sed sentitur, patefacto, ut ita dicamus, animo ad accipiendum illius sensum per cogitationis, fidelis pietatem.

26. Altera autem vis et efficacia, etiam exferit se tantum in fidelibus, tamen, ut diximus, tota est corporis et sanguinis Christi ipsius; eaque se ita profert, ut in eo nullae partes sint hominis fidelis, omnia Christi ipsius; Neque enim sumimus corpus mortuum, nec cruorem, qui iam non sit Christi, sed utrumque viuum et diuinum filii Dei, operantis per utrumque, ut instrumentum suum, carum et sanctum, ubi cum fide et pietate sumuntur. In quo profecto nihil statuimus, quod absurdum et incredibile §. 23., ac non dignum sit Christi et benignitate et maiestate: etiam modum rei ignoramus, quem scire nihil refert. Atque haec sententia fuit, haec mens Ecclesiae veteris, quae deinde paulatim coepit corrumpi per ingenia Scholasticorum, vim physicam inducentium, et verba, quae facile in prauum sensum traherentur, ut *operis operati*, quod ab initio nullam aliam efficaciam expressit, quam quae a nobis descripta est, hoc est, quae sit ab ipso Christi corpore et sanguine, sed in iis solis, qui cum fide sumere, ut habet ipse Lombardus in *Sententiis*, L. IV. dist. 4. quae. 1. 2.

27. Sed age, etiam dubitationes attingamus, aduersus sententiam nostram inuentas ingeniis vel aduersantium palam, vel minus ei fauentium, quae quidem speciem habeant talem, per quam commoueri homines possint, vt vel labefactetur veritas, vel eripiat. Et erit haec ratio nobis expeditior, quod loci, vnde responsiones ducantur, fere positi sunt in superioribus. Ceterum quoniam eas dubitationes ita bene perscripsisse et explicasse putatur *S. Werenfelsius* in Diatribe de *Sensu Verborum* D. vt nuper Cel. *Beckius*, oppugnatorus sententiam nostram, optime se facturum existimaret, si eas inde ductas proponeret; nos quoque eas inde sumemus, sed ita, vt quasdam alias adiiciamus. Posthaec de toto genere harum dubitationum dicemus.

28. Ac prima in ore solet esse repugnantia rei totius, propter quam, vt *Werenfelsius* ait, pro lenitate sua, probabilis non sit sententia nostra, vt I. A. *Turretinus*, credi non possit, sed repudiari debeat. Ea repugnantia esset profecto in sententia nostra, eamque sola absurditatis convinceret, si praesentiam physicam statueremus, quae est necessario visibilis, et loci vnus terminis circumscripta, vt fuit Christi in his terris agentis. Sed talem praesentiam non agnoscimus nec defendimus; estque testatum omnium nostrorum de ea re libris, id genus praesentiae esse ab hac re alienum. Quale autem hoc praesentiae Eucharisticae faciamus, supra demonstratum est, nempe simile diuinae, quae exemplo diuinae praesentiae eius, quae fuit et est in Iesu homine, declarata est, quam nunquam negauere, qui contra nos disputant, sed aduersus Sabellianam et Socinianam haeresin pari nobiscum studio defenderunt: non quo sit plane eadem, vt personalis coniunctio existat, sed similis haecenus, vt ad sit symbolis corporis et sanguinis Christi substantia ita, vt non adest aliis rebus. Eam autem non defendimus potentiae diuinae argumento, vt fingunt, nec cum vniuersa omnipraesentia confundimus, sed ab ea distinguimus, et voluntariam

riam facimus, qualem illam superiorem filii Dei in homine Iesu fuisse scimus. Illius autem praesentiae facultatem corpori et sanguini Christi non aliter vindicamus, quam per coniunctionem humanae naturae cum diuina Natura filii Dei talem, per quam, ubi filius Dei sit, aut esse proprio quodam modo possit, ibi etiam sit et esse possit natura humana. In quo nihil repugnantiae esse, exemplo et facto docuimus, quod est argumentum possibilitatis vniuersae euidentissimum, et certissimum. Accedunt promissorum Christi de simili praesentiae genere exempla alia *Matth.* 28. *extr.* et *ibid.* 18. 20. quorum parum memor fuit, qui, Christum nunquam de praesentia sua in his terris promississe, scripsit.

29. Nec verum est, talem praesentiam esse alienam a consilio (scopo) instituti Sacramenti. Immo ei est aptissima, et sola facit Sacramentum dignum Christi sapientia et bonitate: sine qua nullam vim veram habeat, sine qua nihil accipiatur proprie, sine qua superuacuum sit, nihil nisi admonendi ritus, quo carere homines, cui pares nec minus efficaces vel inuenerint ipsi, vel inuenire possint.

30. At Sacramenta non pertinent ad corpus, sed ad animum. Ergo nihil attinet ore sumi corpus et sanguinem Christi, sed solo animo percipi debent. Vtique, si sumtio ea, quae fit ore, nihil valere ad animi vtilitatem potest, sed, quae ore percipiuntur, tantum corpori alendo prodesse possunt. Sed id secus est. Et intelligi potest, quomodo animo prodesse mirabiliter illa sumtio possit, vt supra est, §. 25. demonstratum. Nec humanae sapientiae est, definire, quomodo Christus debeat animis fidelium succurrere; nec fas est negare, Christi curam fidelium posse tali modo imbecillitati humanae opem ferre, aut eam ita circumscribere, vt non possit id facere etiam modo quodam proprio et peculiari. Non necessitatem absolutam talis rei defendimus, quae omnino

omnino abest ab hoc Sacramento, sed benignitatem Christi liberam et prouidam praedicamus et laudamus.

31. Sed ita nouum genus edendi ac bibendi constituitur, quod sit medium inter physicum et morale, quorum illud ad corpus, hoc ad animum pertineat, cum non nisi duo esse possint, quia totidem modo sunt partes hominis. Enimuero quid nouitatis commemoratio nobis oblit, non videmus, cum totum hoc institutum Christi nouum tum fuerit. Et tertium genus edendi nihil absurdi habet. Nam quid impedit, quo minus sit genus, quod sit, ut homo mixtus e corpore et animo, sic ipsum mixtum actu duplici, corporis primum in accipiendo, animi deinde in fruendo. Id autem genus Sacramento proprium facimus, etiam mysticum appellemus licet, quia primum religiosum est, deinde, quia quod editur ac bibitur ore, non incurrit in sensus: esset enim ea physica perceptio: sed fide modo, verbis et promissis Christi nitentis, cernitur.

32. At ita non sumitur corpus Christi mortui, sed viui et gloriosi. Bene. Sed quid id ad rem? Etiam tum vivebat, cum primum discipuli edebant ac bibebant, et dabatur corpus morituri post, ut nunc datur ante mortui. Nihil hic tempus mutat. Etiam Zwingliani iam per fidem, ut volunt, vescuntur corpore Christi viui et gloriosi, sed qui olim mortuus fuit, nec eo auertuntur cogitationes a morte Christi. Si absurdum est, proprie sumi corpus Christi viui, quia non viuum, sed mortuum corpus expiauit peccata, etiam absurdum est, corpus viui iam Christi cogitatione sumi, et omnino abstinendum erit ab Coena sacra, si mortui tantum aut morituri corpus sumendum est.

33. Illa porro de sensu verborum Christi eo, quem nos facimus, dubitatio, quod de eo discipulis in mentem venire non potuerit, cum facilis esset sensus tropicus, supra iam dissoluta est, ut speramus, per ea, quae §. 8. disputata sunt. Nec est consequens, si quis, totius rei impe-

imperitus, verba illa primum audiret, non assequeretur sensum eum, quem nos facimus: igitur nec Apostoli affecti sunt. Nam iste imperitus omnino nihil intelligeret, nec magis id, quod Zwingliani volunt. Nec totum hoc conuenit Apostolis, per ea, quae loco commemorato diximus.

34. Hoc quoque nostris interdum solet molestum esse, vel sua sponte, vel cum vrgetur ab iis, qui contra disputant, quod Christus, cum primum coenam illam praebebat suis, ipse adsedit mensae in oculis suorum, videturque abhorrens esse, si suum ipse corpus et sanguinem manu tenuerit et tradiderit. Quorum illud tollitur iis, quae de genere praesentiae disputata sunt §. 23. quam non physicam, adeoque non adspectabilem aut contrectabilem intelligi debere ostendimus, sed ex alio genere, quod etsi verum, tamen insensibile est. Alterum autem, etsi ab *Augustino* dictum scimus, tamen nobis plane repudiandum videtur, totumque ortum est ab re non bene intellecta, et perturbata ab iis, qui consecrationis Eucharisticae hanc vim esse existimauere, vt per eam praesens esset corpus Christi ante, quam panis et vinum acciperentur: in quo nobis secus videri, disputauimus in *Anti-Muratorio*, cum locum de Consecratione vel perpurigare vel illustrare tentabamus, existimantes praesentiam corporis et sanguinis Christi non ante intelligi debere, quam eum edamus ac bibamus, et inter edendum ac bibendum: neque enim ea est opus ante, nec ex verbis Christi aliter intelligi perspicue potest. Itaque non cum frangebatur ac praebebat edendum panem, corpus se frangere ac dare dixit, sed cum sumtum panem edebant, corpus esse suum, quod ederent, pronunciauit.

35. Obiicitur etiam dubitatio e *memoriae* verbo, quod Christus in Eucharistia sui nos meminisse velit: sed memoriam absentium esse, non praesentium. At primum memoriam Christi latius patere, quam latinum verbum sonet, ante demonstrauius: deinde, si maxime eius vim plane

Ernesti Opusc. Theol.

L

lati-

latinae consuetudinis modo aestimeamus; tamen nihil lucretur, qui per eam nobis aduerfetur. Nam in eo, qui sit ita praesens, ut oculis cernatur, memoriae usus utique alienus sit: quod secus est in eo, cuius praesentia adspectum oculorum fugiat: alias nec Dei memores esse possemus, quem nobis praesentem esse, non cogitatione modo et verbo, sed re vera, non negauerint.

36. Nec hoc difficile est ad refellendum, quod fuit qui diceret, praesentiam eam, quam nos faceremus, esse alienam a conditione ea, quae nunc sit Christi: quippe per eam reuocari Christum ad conditionem humilitatis terrenae, *κατανώσας*. Nam id ita esset, si ita sumeretur corpus eius, ut dentibus comminueretur, fieretque obnoxium hominibus, ut fuit in terris. At id praesentiae, quam nos facimus, genus, est potius extollendae quam deprimendae humanitatis Christi, cum sit, ut ostendimus, generis diuini, et sua magnificentia excedat captum rationis humanae.

37. Sunt et alia genera dubitandi, quae aut sunt similia his, quae a nobis sunt dissoluta, vel non habent difficilem explicationem, si teneantur ea, quae a nobis ad explicandam causam nostram sunt disputata. Itaque, iis praetermissis, in vniuersum aliquid de toto genere talium dubitationum dicendum videtur, per quod caueatur his, qui propter ingenii imbecillitatem, aut aliam quam causam, expedire se earum velut laqueis non possunt, et propterea aut animo anguntur, aut, si in iis sit aliquid leuitatis, vel ab aetate, vel a vitio quodam pravae consuetudinis, ad veritatem deferendam inclinant.

38. Intelligendum igitur est, dubitationum, quae contra veritatem mouentur, duo genera diligenter esse discernenda. Nam aliud est, quod ad interpretationem verborum Scripturae sacrae ipsam pertinet, e quibus proprie rei iudicium in capitibus fidei pendet: aliud, quod e rei natura, cum notionibus et principiis philosophicis et naturalibus comparata, oritur. Si ex illo sunt genere, debent

debent sane graues videri, et dignae, in quibus dissoluendis laboremus, considerandis verbis Scripturae et interpretationibus diligenter ad veras et certas interpretandi regulas exigendis. Sed huius profecto generis non esse dubitationes, quae in hac causa mouentur ab aduersariis nostris, vel infirmis oboriuntur, res ipsa demonstrat. Et habet profecto nostra interpretatio locorum omnium characterem facilitatis, altera difficultatis. Sed ἀπλῶν τὸ ὀρθόν, *veritas simplex et facilis est*, erroris defensio torquet se et argutatur. Nam si omnia percenseas, quae contra Ecclesiae nostrae sententiam prolata sunt in medium, non reperiās huiusmodi quid, quod nostram interpretationem ex usu linguae, contextu, parallelismo vitii arguat; sed omnia sunt huiusmodi, ut verba illum quoque suum figuratum sensum habere *posse* dicant, in eoque docendo se torqueant: *quid impedit, quo minus sic intelligantur? non video, quare non cet.* quod non est certa ratione interpretantis et docentis, sed fluctuantis, et haerentis, siue, ut *Cicero* ait, optantis. Itaque ab argumentis ac dubitationibus, pertinentibus ad interpretandi rationem, celeriter resiliunt, et ad alterum genus festinant: cuius sunt eae, quae a nobis allatae sunt.

39. Igitur primum et optimum remedium dubitationum est, demonstrationem ipsam dogmatis diligenter considerare, velut eam, quam nos proposuimus, et omnes eius partes accurate expensas diiudicare. Eam si et verba Scripturarum recte, simpliciter, ex usu linguae et contextu interpretari, e verbis recte explicatis, legitime ratiocinari, e principiis inde vel e natura communi Sacramentorum recte argumentari repereris, denique etiam consentaneam sensui antiquioris Ecclesiae, tum vero acquiescendum est: et tuto conquiescere animus potest, nihil curans dubitationes aliunde repetitas. Etenim eae nullo iure tollere debent aut possunt ἀσφαλείαν, et firmitatem assensionis e demonstratione; ne minuunt quidem: idque usus in rebus aliis demonstrat,

quas aut sensu, aut demonstratione legitima perceptas tenemus: in quibus saepe ingeniorum quorundam, ut Academicorum veterum, Scepticorumque solertia inutilis et luxurians, difficultates mouit, quas aut perpauci tollere de medio possint, aut fortasse omnino nullus. An tu vero, si dubitationibus, aduersus motus veritatem inuentis ab Eleatica schola, et repetitis a recentioribus Scepticis, *Berkeleio* et aliis, aut iis, quae sunt apud *Sextum Empiricum* contra theoremata geometrica, respondere non possis, de motu ipso dubitare, et sensus tuos mendaces existimare, et theoremata geometrica falsa iudicare sustineas? Vnde etiam fit, ut si cui dubitationes tales iniiciantur, in iis tollendis magis, veritatis aduersus alios defendendae causa, laborare debeat, quam fidei suae conseruandae, nec angi animo et sollicitari, si iis refellendis se imparem sentiat. Et quoniam dubitationes omnes a nouitate magnam speciem solent accipere, prudentiae est, tempus dare animo ad examinandum, dum vis nouitatis frangatur, interea cogitare subinde veritatis argumenta, ut altius descendant in animum, eumque aduersus dubitationum sollicitationes corroborarent.

40. In ipsis autem dubitationibus examinandis, oportet in primis habere in promptu notiones praesentiae, et efficaciae Sacramenti, quales a nobis e Scripturis et analogia doctrinae Christianae propositae sunt. Nam illa valebit ad frangendas dubitationes eas, quae maxime solent animos perturbare, cum praesentiam corporis et sanguinis Christi metiuntur communi corporum, adspectabili, et loci certi terminis circumscripta praesentia, quae tota est ab hoc capite aliena, nec a nobis defenditur: haec cauebit, ne verbis magnis decipiamur aduersariorum, cum, sua sententia probata, salua omnia manere Sacramento iactant, eaque re fiamus proniores ad sententiam probandam, quae blanditur ingenio humano specie facilitatis maioris et consensus cum notionibus communibus de corporeis rebus earumque praesentia.

41. His

41. His explicatis, facilius nobis erit respondere ad quaestiones propositas ab duobus ignotis, sed, vt confidimus, probis et religiosis doctoribus Ecclesiae, de quibus sententiam nostram cognoscere cupiant. Prima erat, an, si quis vir cognitae alias probitatis et reuerentiae erga religionem et Scripturas sacras, et integer ab vanitate ingenii in mysteriis religionis tractandis, fateatur sacerdoti, sibi non *prorsus* esse persuasum de praesentia corporis et sanguinis Iesu Christi in Coena sacra, qualem doctrina Ecclesiae nostrae publica defendat, in ceteris omnibus, quae de ipso Sacramento habeat, plane cum ea consentire: an igitur, salua officii religione, possit ad communionem Sacramenti a sacerdote admitti? Altera pertinebat ad sacerdotem ipsum, qui cum illo super ea re disputando labefactatus sit, factus etiam ad alteram sententiam pronior; quid ei per religionem, qua adstrictus est libris doctrinae publicis, fas sit facere: vtrum ei relinquendum sit sacerdotium, quo pie et religiose fungatur, an, salua fide et religione, manere in eo possit? De his rebus, quae sententia nostra sit, communicato etiam cum aliis Theologis doctis et piis consilio, breuiter exponemus.

42. Quod igitur ad eum attinet, qui nobis in prima quaestione descriptus est, tantum absumus, vt neganda Coenae sacrae communionem prodendum et molestiis exponendum censeamus, vt eum etiam misericordia dignum, consolandumque, et propter ingenuitatem in asperienda dubitatione, laudandum putemus. Nam quod ait, sibi non *prorsus* persuasum esse, id nullam vim aliam habere potest, si res recte expressa est, vt speramus, quam vel argumenta, quibus sententia nostra defendatur, quaeque ipse cognouerit, sibi non satis firma videri, vel contrariis argumentis et dubitationibus vtriusque generis dissoluendis se non parem esse, iisque animum esse labefactum. Enimuero, si ita res est, praesertim si de genere posteriori, non fides ei deest, sed *πληροφορία* et

firmitas fidei, quae, ut est magnum bonum, ita non necessarium, nec quod omnibus contingat; saltem non deest bona voluntas credendi penitus, si vel melius intelligat argumenta, vel meliora reperiat, denique si dubitandi causae tolli docendo possint. Ac docet usus et experientia, causam talis mali esse fore in genere posteriori. At quis est, qui non interdum tentetur in aliquo genere doctrinae dubitationibus, cum magni illi heroes, *Lutherus*, *Melanchthon*, et alii, id sibi accidere confessi sint, et quæsti? Assaphus etiam de providentia divina diu dubitavit, quod res secundas impiorum cum ea non posset conciliare, idque genus dubitationis frequens esse, ait *Apol. A. C. p. m. 153.* ob similes difficultates et causas. Et dubitationes tales sunt interdum fortuitis, sed latentibus et obscuris de causis, admodum pertinaces, nec statim cedunt certissimis argumentis. Igitur patientia opus est, dum aut dubitationibus vim demat dies, aut bonorum argumentorum vis se exserere possit, quod et ipsum non semper fit repente, vel alia, certe apud illud ingenium, efficaciora reperiantur, quae requirendi voluntas et studium tali viro non deerit. Neque vero dubitandum est, homini in ceteris necessariis capitibus doctrinae recte sentienti, et pio, Coenam sacram fructuosam fore. Nam etsi amittit Sacramentum apud eum efficaciam, quam §. 25. descripsimus; tamen relinquitur altera, eaque etiam maior, quod non minus ceteris percipit verum corpus et sanguinem Christi, cuius praesentia est e promisso Christi, non opinione nostra, nec infirmitate fidei et aliqua tali dubitatione tolli potest; et in ea fumenda tamen aliqua exercitatio fidei relinquitur, qualis est e solo verbo Dei extra Sacramentum, ab admonitione externa. Ceterum sua sponte intelligitur, si constantia dubitandi accedat, aliter iudicandum esse: quod nulla talis dubitatio est perpetua in animo vere pio et verbum Dei religiose tractanti; quem nunquam ita destituit vis divina, ut dubitationibus plane succumbat.

43. Altera quaestio est superiori non admodum dissimilis, quod et in ea non sententiae nostrae repudiatio diserta est, sed tantum dubitatio similis et ex iisdem causis exorta. Si igitur nihil amplius sit, resque in eo consistat, non latius procedat, denique in ceteris capitibus religionis omnia consentientia sint doctrinae publicae, nulla profecto necessitas est statim resignandi muneris legitime accepti et bene administrati: immo vero videatur sua sponte succumbere tentationi, si nimis festinet, et quasi renunciet vocationem legitimam. Ceterum sua sponte intelligitur, ei, modeste de se et ingenio suo sentienti, diligenter facienda esse, per quae liberari ab dubitatione possit, secundum ea, quae paullo ante suafimus iis, qui in eas molestias inciderint, ut primum discernat dubitationes philosophicas, quarum contra sententiam claram Scripturarum nulla vis esse potest, ab suspicione Scripturae sacrae non recte intellectae vel explicatae secundum veras et certas interpretandi leges, e qua sola dubitatio esse potest alicuius ponderis, in qua sit laborandum. Vbi vero suspicio haec, excussa diligenter, corroboretur potius, quam debilitetur ac minuatur, resque redierit eo, ut plane falsam putet sententiam publicam, sentiatque assensionis in contrariam partem inclinatae firmitatem, tum vero iam deteriori res est loco. Quamquam nec hic nimis festinandum arbitramur. Neque enim nobis persuademus, ita deferi a Deo pios et probos viros, quales illos fingimus animo; secundum ea, quae de se ipsi scripsere, ut ad veritatis agnitionem redire non possint, nec est credibile, tam repente tantam firmitatem in animo existere posse. Itaque sperare licet, illum sensum firmitatis et opinionem certitudinis in sententia nova, esse ab ipsius et argumentorum, per quae quis a priori sententia est deductus, novitate, qua vix aliquid est in eo genere fallacius. Itaque non est nimis credendum illi sensui, sed spatium dandum animo, dum novitatis vim demat dies, et re vtrunque saepe, diligenter et religioso cogitata, consultis-

sultisque Theologis doctis et moderatis, et qui, ad exemplum Christi, misericordia imbecillitatis humanae tangerentur, *Ebr.* 4, 15. iudicium facere constanter possit. Quodsi post haec omnia tamen opinata illa firmitas assensionis in alteram partem maneat, atque adeo augeatur, tum vero dubium esse non potest, quin decedendum sit a munere docendi in Ecclesia nostra. Neque enim iurisiurandi religio aliter fieri finit, et prorsus abhorret a viri boni et Christiani officio, aliis credendum proponere, ut consentaneum Scripturis, quod ipse falsum esse constanter iudicet.

Haec fere habuimus, quae hoc tempore, super argumento proposito, pro modo exercitationis Academicæ scriberemus. Quibus si quid profecissemus, vel ad doctrinam Ecclesiae nostrae illustrandam firmandamue, vel ad animos imbecillos corroborandos consolandosue, existimabamus, nos, quod valde optandum esset, consecutos, Oramus Deum, Patrem Domini nostri I. C. ut hunc carum filium suum illustret in mentibus omnium, et eas gubernet per veritatis suae doctrinam, ipsamque veritatem in animis nostris firmet, roboret, fundet: ei sit laus et gloria in secula omnia!

VINDI-

VINDICIAE
ARBITRII DIVINI
IN
RELIGIONE CONSTITVENDA

L 5

VINDICIAE
ARBITRII DIVINAE
IN
RELIGIONE CONSTITVENDA

P R A E F A T I O.

Vt non omnes corporis morbi per furorem, aut per vim atque impetum, praecipitant vitam humanam, sed quidam etiam est, ut *Plinius* appellat, *Sapientiae morbus*, non minus ille exitialis vitae hominum atque salutis: sic animorum perniciēs non modo a prauarum cupiditatum violentia, et ἀδωότητος atque εἰδωλολατρείας, quae ipsissima ἀδωότης est (Eph. II, 11.) furore venit, sed in nonnullis etiam ab ipsa sapientiae, quae felicitatis scientia esse debet, tranquillitate nascitur; quos verissime dicas cum *Plinio*, per sapientiam perire. In his vel maxime posuerim eos, qui de religione ita disputant, ut eam omnem omnino a naturae diuinae humanaeque necessitate repetendam contendant, neque ulli rei locum in ea concedant, quae non necessariis rationis conclusionibus intelligatur, sitque cum perfectione diuina et necessaria hominis natura necessario coniuncta. Etenim nullus alius facile error est, qui tanta veritatis specie commendet se humani ingenii vanitati, fallatque imprudentes sapientiae simulatione. Quantam enim probabilitatem habet, si quis hoc se dicat agere, ut nihil in religionem admittatur, quod non totum a perfectione diuina ducatur, sitque cum natura humana copulatum, dignum adeo maiestate Dei, dignum ratione hominis. Enimvero hi non modo per summam audaciam circumscribunt arbitrii

arbitrii diuini in religione hominibus constituenda libertatem, quod sine summa impietate fieri non potest, sed etiam repudiant eam, quae diuinitus oblata est, salutem, atque ita, dum sapientiae laudem quaerunt, perniciem inueniunt.

2. Atque ex eo numero sunt inprimis duo capitales, vnus *Tindalius*, qui Euangelium, quod nos vocamus, cum origine rerum omnium adaequando sustulit: alter ille religionis necessariae (*essentialem* ipse vocat) praeco et propugnator, qui religionem ad naturae diuinae humanaeque necessitatem reuocando, et vnus principii angustis coercendo, totum Christianismum e religione remouit: quorum noti omnibus sunt libri. Contra hos etsi multa sunt a multis scripta, neutiquam contemnenda illa: tamen nondum nobis videtur satis perpurgatus, ad liquidumque perductus in illa disputatione locus is, qui est de arbitrio diuino in religione hominibus praescribenda. Nam ille ipse, qui acutissime contra *Tindalium* disputasse existimatur, *Fosterus*, cuius etiam liber *Tindaliani* operis germanicae versionis, veluti antidoti loco, subiectus est, etsi attingit illam disputationem, tamen nullo modo accurate perfecteque tractat. Etenim ritus tantum amplectitur, dogmata prorsus relinquit, refertque omnia ad virtutem, nihil ad placationem Dei offensa atque fidem, satis habens ostendere, posse quaedam salubriter in religione constitui, quae virtutem commendent, ad eamque adducant, denique vitia coerceant: in quo erat rei summa, an in ratione salutis et felicitatis consequendae praescribenda aliquid liberum Deo esse possit et arbitrarium, liceatque Deo aliquid a naturali et necessaria religione diuersum constituere, id ne attingere quidem dignatur. Enimuero et loci illius vniuersi, et partis maxime huius tanta est in omni disputatione cum istis hominibus eorumque similibus vis, ut iis bene accurateque explicatis, omnis reliqua disputatio facilis sit atque expedita. Quam ob rem operae pretium nos sperauimus factu-

sacturos, si eam quaestionem diligentius explicaremus. Quod si quis ante nos eo labore iam rite functus est, quem nos quidem non cognouerimus, licebit tamen et nobis, locum illum nostro modo edisserere.

3. Negant ergo ii, quos diximus, aliique, esse consentaneum vel sapientiae diuinae vel iustitiae, vt aliquid additum credamus diuinitus iis religionis capitibus, quae ab ipsa perfectione diuina humanaque natura necessario ducta intelligantur, aut praeter ea, quae ratio humana intelligere possit, esse colendi numinis diuini, aliquid ab hominibus ad benevolentiam diuinam salutemque tenendam exigi. Nos contra dicimus, neque abhorreere a perfectione diuina, aliquid esse in religione arbitrarium, neque negari posse, talia esse cum hominum salute sapienter a Deo constituta. Erit igitur nobis *tripartita* huius quaestionis *disputatio*. Nam *primo* demonstrabimus, posse a Deo aliquid hominibus, in quocunque statu, religionis nomine praescribi, quod non sit per se necessarium, sed liberum; atque ita Deo ius suum vindicabimus: *deinde*, Deum inde a rerum humanarum initio talia quaedam sanxisse, docebimus, eaque huiusmodi, vt non nisi iis seruandis expedita esset hominibus ratio salutis: *denique*, Deum eo arbitrio cum summa sapientia hominumque commodo vsum esse, vincemus. *Potest Deus arbitrio libero in religione constituenda uti: usus est omni tempore: sapienter denique et salutariter usus est.* Haec tria cum demonstraerimus, caussa erit perorata.

PARS PRIMA

Posse religionem in quocunque hominum statu arbitraria quaedam habere.

4. Religionis, de qua nobis disputatio instituta est, duplex omnino ratio videtur. Nam non modo ad Deum refertur, et quidem inprimis, sed etiam ad homines.
Deum

Deum quidem amplectitur cultu, qui sit eius maiestati, voluntati ac beneficiis consentaneus ac dignus: hominem autem, salute ac felicitate praestanda. Atque nos non sumus ii, qui negemus, Deum sanctissime ex ipsius praescripto colendum fore hominibus, si cultus eius nihil ad ipsorum felicitatem valeret. Etenim non tam, quia prodest, Deum rite coluisse, propterea colendus est, quam, quia iustum est, coli Dominum et auctorem nostrum, dignum deinde maiestate eius, denique, qui ita de nobis est meritus. Sed quando felicitatis illa vehemens appetitio ab ipso Deo nobis est insita, ea autem, ut etiam Cicero vidit (*Off. II, 3.*) nisi Deum placatum nobis atque benignum habeamus, teneri non potest; non modo concessu, sed etiam iussu diuino, religione seruanda salus quoque nostra felicitasque spectatur. In quo fas est, etiam admirari atque amare benignitatem et φιλανθρωπίαν diuinam, quod, quae etiam sine vtilitatis nostrae respectu praestanda erant, ea ita exigit, ut prope saepius ad nostram salutem referat, quam ad maiestatem atque ad ius suum. Vnde fit, ut quaestionis propositae duae partes sint. Nam primo quaeri potest, *an in religione, quoad Dei maiestatem colit, aliquid arbitrarium esse possit ac voluntarium*, iusque sit Deo, libere sancire, quomodo et quibus rebus coli velit. Altera quaestio est, *an liberum sit Deo, praescribere hominibus, quibus rebus seruandis ad felicitatem debeant aspirare.*

5. Iam primum, si religio ad solum Dei cultum pertineret, humanam felicitatem non attingeret, aut si in colendo Deo maiestas modo eius spectaretur, nulla humanae indolis ac naturae ratio haberetur: non profecto dubitarem, quin ea contenta esse posset iis, quae ratio humana intelligere potest, officiis, hoc est, naturalibus, necessariis, et cum naturae diuinae perfectione necessario coniunctis, veluti, pietate, totiusque vitae ad naturales leges conformatione. Id intelligi potest ex eo, quod religio talis

talís futura est eorum, qui ad beatam illam immortalitatem peruenerint, auctore *Paullo*, 1 *Cor. XIII*, extr. *Neque* tamen vel sic *abhorreret*, naturalibus istis religionis officiis quaedam addi a Deo, quibus seruandis ac retinendis coli se ac placari velit: *nec*, id si faceret, in eo *non iure suo uteretur*, cui si refragari auderent homines, non rebelles ac *ῥεσμάχοι*, omnibus poenis coercendi, viderentur.

6. Nam vt ab *hoc* incipiamus, quomodo contra ius videri potest, si Deus aliquid exígat ab hominibus, quod non sua sponte intelligant esse faciendum: aut quomodo non debent homines praestare, in quo se gratum facturos Deo videant: cum toti sint et muneris beneficiique, et iuris ditionisque diuinæ, eiusque potestas in homines sit ea, qua maior cogitari intelligique non potest. Etenim omnis potestas legitima in alios, quæ quidem a natura ducatur, intelligitur ex harum causarum aliqua: si vitam debeas, velut parentibus: si te in potestatem quacunque de causa, siue alimenta petens, siue securitatem aliudue quid vtilitatis spectans, dederis, vt principibus ciues, dominis serui: si denique ob iniuriam illatam in ditionem victoris veneris. In his autem longe iustissimam et cum natura humana coniunctissimam existimare conuenit eam, quæ a vita data et accepta arcessitur, quippe valituram etiam tum, si primi homines integritatem naturæ innocentiamque vitæ conseruatam ad posteros transmisissent. Enimvero, quæ comparatio est Dei atque parentum in vita tribuenda, eadem esse debet in potestate ab illo beneficio nata: vt, quanto plus Deo quam parentibus debeamus, tanto maior eius in nos potestas putetur, hoc est, tanta, quantam quisque in opus suum debet habere: qua maior, immo cui par aut inueniri vspiam, aut cogitari nulla potest. Quare, si parentibus, si principibus, si dominis denique ius est, exigere a suis non modo ea, quæ proprie et necessario coniuncta sunt cum suo cuiusque genere potestatis, sed etiam alia, quibus
pieta-

pietatem et reuerentiam praestari sibi et declarari velint, nullo modo necessaria illa, sed arbitraria prorsus et libera: quomodo non idem iuris concedendum Deo putemus, cuius longe maiorem in homines esse potestatem fateamur? aut quomodo ille non possit, quibus rebus necessariam illam pietatem sibi praestari velit, praescribere?

7. Sed non veremur, ne difficilem in hoc concedendo quemquam habituri simus, vel ex iis ipsis, contra quos nobis est haec disputatio instituta. *Illud autem negant concedi posse, ut consentaneum putetur perfectioni diuinae, et non potius abhorrens ab eius sapientia, praeter necessaria et naturalia officia arbitrarium quid sanciri: quippe totum illud arbitrium in pietate praestanda et religione cogitari non posse, quin imbecillitatis humanae veniat in mentem, cuius labes omnis a perfectionis diuinae cogitatione debeat seiungi. In quo eos vehementer falli, paucis demonstrabimus.* Iam primum, quis hoc non intelligit cogitando, aut didicit experiendo, uti vires mentis nostrae acui, sic virtutes animi omnes, in quibus princeps est omnibus de causis pietas in Deum, conseruari, ali, augerique exercendo. Itaque quo crebrior exercitatio fuerit pietatis, hoc magis ea corroborabitur: quo rarior et remissior, hoc plus languoris trahet, hoc facilius obscurabitur sensus eius, atque adeo exstinguetur. Quid ergo facere dicemus Deum, cum necessariis officiis adiungit arbitraria? nihil profecto aliud, nisi ut largiorem exercendae pietatis materiem praebeat, ut ampliorem aperiat campum, in quo pietas possit decurrere, ut acuat eam, augendoque reddat maiestate et beneficiis suis digniorem? Etenim quoties Deo credere iubemur, quoties in quacunque re parere, toties latens in animo pietas excitatur, et ad vim suam exserendam provocatur: quoties quacunque in re ei credimus, toties ei suam veritatem sapientiamque reddimus: quoties, quod iussit, facimus, obedientiam ei praestamus, quae etiam in

in legibus naturalibus, et officiis a conuenientia et natura rerum ductis, religionem continet: nec religio est facere, quae naturae rerum sunt consentanea, sed quae Deus vult a nobis fieri, et quidem quoad vult fieri. In illo est honestas quaedam et deus dignum homine ratione praedito, et conuenientiam rerum intelligente, cum etiam bestiae, sed sine intelligentia, naturae suae conuenienter agant: in hoc vno pietas et religio. Magistrum eloquentiae laudamus, si frequenti et assidua exercitatione continet agitatque discipulorum ingenia, si propriis quibusdam institutis utitur, aptis ad efficiendum id, cuius causa quis eius disciplina utitur: et prudentiam interpretamur in parentibus, si quam plurimis suis institutis, et propriis quadam ac domestica disciplina excitant in liberis ingenii vim, honestatis ac religionis sensum et amorem, admiramurque Lycurgum, aliosque Graecorum et Romanorum legesatores, qui publica quadam disciplina, hoc est, ciuilibus officiis et institutis, idem efficere studuerunt. Deus igitur, si idem facit in re longe maxima, si voluntariis institutis et officiis exercet pietatem hominum, an reprehendi debet eo nomine, et rem alienam a sapientia sua facere dicetur? Nihil est, vere dicam, quod mihi magis stultum in istorum hominum opinione, magisque repugnans rationi videtur; cum ipsi nihil acutius putent, nulli argumento magis confidant.

8. Est porro ea natura primum verae pietatis, ut neque ita contineri possit animi finibus, quin venire gestiat in lucem, gaudeatque conspici, hominum deinde ipsorum, ut proferre debeant in adspicuum pietatem, vel exemplo aliis futuram, vel incitamento. Etenim, ut quisque est amantior alterius, eo magis cupit facere quam plurima, quibus testetur amorem, angiturque animo, si aut nullam aut exiguam sibi eius rei facultatem datam videt. Itaque etiam in beneficii et gratiae loco numerat, si eius rei sibi occasio quam saepissime suppeditetur.

Ernesti Opus. Theol.

M

Et

Et quando in omni genere plurimum valent exempla; officiique humani est, quam plurimum prodesse aliis, ut in rebus ad vitam humanam pertinentibus, ita, atque multo adeo magis, in iis, quibus mentis animique perfectio continetur: quis non videt esse consentaneum, ut quam plurima sint constituta, quibus agendis pietas in Deum declarari et velut adspectabilis reddi possit. Etenim hoc genus natura ipsa parum definitur, sed totum prope arbitrarium est ac voluntarium: habentque actiones externae pietatis illius significationem, non necessario ac natura sua, sed interpretatione atque opinione: quae existere non potest, nisi ab lege aliqua atque instituto. Eam legem autem a quo fas est sanciri, nisi a Deo ipso, qui gravissime sapientissimeque potest, et ad naturam suam humanamque quam maxime accommodare? Videmus in hominibus, velut Regibus, colendis honorandisque quanta varietas sit et inconstantia, aliis apud alios honoris habendi generibus more receptis, in iisque quam multa sint parum graviter atque adeo inepte ridiculeque constituta. An vero idem in diuino cultu euenturum non putamus, si honoris Deo actionibus externis habendi modus hominum arbitrio permittatur? Immo vero, ut opinor, multo magis. Ego quidem etsi saepe risi in Officiorum aulicorum formulis cognoscendis, quae apud gentem quamque vel more vel lege valere; tamen multo saepius risi in legendis ritibus, quos gentium profanarum dementia in deastris suis colendis, sacrisque faciendis usurpauit. Inter ipsos Christianos quam multa ridicule et inepte olim commenta sit superstitio, nemo ignorat. Huic igitur malo, in hac hominum natura prope necessario et inenitabili, occurrere nulla alia re, nisi diuina lege potest, quae doceat, quibus rebus occupari pietas debeat, coerceatque insitum illud hominibus inepta et ridicula in hoc genere comminiscendi studium, quo nullum clarius signum corruptelae naturalis scio. Quod si humani legislatores ciuitatumque conditores hoc ad curam suam retulerunt, ut

Deo.

Deorum externis actionibus colendorum formulas praefiberent ciuibus, ne incerta vagaretur religio, aut inepta et absorta comminisceretur vulgi stultitia, eoque nomine a prudentibus collaudati sunt, veluti *Romulus* et *Numa Pompilius* ab *Halicarnassio Diomysio* (*L. II. p. 90. f.*) et *Polybio* (*VI, 54.*): quomodo a diuina sapientia abhorere potest, ad hanc curam descendere, et pietatis exercendae quandam veluti disciplinam et formulam hominibus constituere? praesertim cum ea re sola consuli possit humani animi tranquillitati, efficique, vt cum fiducia quadam versari in exercenda pietate possit. Etenim etiam in honore hominibus habendo, videmus, quam saepe aberret opinio honorem habentis ab iudicio eius, cui honos habetur: quam saepe, quae ad honorem comparata ac suscepta erant, in alteram partem accipiuntur, certe fastidiantur ac repudientur: vnde fit, vt in aulis modus Principis colendi venerandique ab ipso definiatur, quo seruando sciant omnes, gratos se domino futuros.

9. Atque ego non ignoro, longe in hoc discrepare rationem diuinam ab humana: mentem magis animamque spectari a Deo, quam verborum actionumque formulas: neque tam quid quisque dicat faciatue colendi sui causa, quam quo consilio et animo. Sed tamen habet haec quoque ratio suum modum, eumque dupliciter. Nam primum, etsi dignum est benignitate et sapientia diuina, animi maxime rationem habere, in iis rebus, quarum pretium omne est ab animo, cuius declarandi causa suscipiuntur: tamen eadem sapientia diuina, multoque magis maiestas postulat, vt ipsae res, quae debeant esse expromendi illius animi, habeant aliquid dignitatis, et conuenientem quendam cum maiestati diuinae, tum ipsius officii sanctitati quasi ornatum ac decorem: idque adeo magis, quod ratio etiam in ceteris actionibus humanis tale quid flagitat. (*Cicero Off. I, 35.*) Artaxerxes quidem ille apud *Aelianum* (*V. H. I, 32.*) Mnemon, etsi pro

M 2

magni-

magnitudine animi sui magis delectabatur paucula aqua, ab rustico doni loco data, quam ceterorum quamvis magnis muneribus, enixum pietatis significandae studium intuens: tamen minime credo, aequo laturum animo fuisse, si quis in se adeundo illud *προσκυνέειν* omittere, et alio gestu vti, aut omnino genere aliquo non constituto legibus honorem habere voluisset. Omnino duo in hac re diligenter distinguere conuenit, *genus pietatis proferendae, et generis cuiusque modum*. Genus quidem ipsum debet esse idoneum proferendae exercendaeque pietati, et dignum eo, quem pietas amplectitur: in modo autem generis cuiusque praestandi, animi maxime integritatem conuenit spectari. In genere igitur ipso quaedam necessitas debet intelligi, siue a natura, siue a praecepto diuino orta; in modo autem eius aliquid liberi relinquitur, si animo constet pietas. Supplicare, vt hoc vtar, Deo, gratias agere pro beneficiis, necessarium est: vtrum meditato et diserto carmine nec ne, nihil refert, modo animus confidat potentia et bonitate Dei, sitque intimo benignitatis sensu percitus: nec necessarium est, si id palam fiat, quo tempore ac die, quoue loco fiat. Vnde fit primum, vt, etiamsi Deus animos maxime hominum spectat, internamque pietatem, tamen homini genera honoris extrinsecus habendi non sint libera, sed ea potius sint sequenda, quae grata Deo constet fore. Deinde, etiamsi in modo generis cuiusque natura aliquid est liberum: tamen nullo modo repugnat sapientiae diuinae, ea lege definire, et ita vel dignitati suae, vel hominum sollicitudini et imbecillitati succurrere.

10. Iam porro non est, quod quis dicat, illud ipsum, quid sit dignum Deo, adsequi humanum ingenium posse, neque lege diuina opus esse. Nam primum, id reuincit usus et experientia, vt ante dictum est, (§. 8.) et sapientissimi populi in eo fere se stultissimos praebuere. Aegyptiorum quidem sapientia, etiam sacris literis celebrata, religio-

religionem peperit refertam rebus infacissimis. Dvnde si id vel maxime possit contingere paucis, longius in sapientia progressis, non tamen propterea non necessaria et utilis, siua erit lex diuina. Omnes leges civiles repudiamus et inutiles dicamus: licet, si ista ratio valet. Quis enim dubitet, sua sponte homines intelligere posse, et in vnaquaque ciuitate esse, qui, quid publice sit utile et salutare, per se, nullaue lege humana adiecti, videant? Non perexiguo sapientissimorum hominum numero, quid necessarium sit generi humano, aestimandum est, sed infinita ceterorum multitudine. Denique, videant aliquid sapientes, laborentque docere alios: nunquam tamen neque eam auctoritatem habebit paucorum istorum oratio, vt in ea acquiescant omnes, nec eam vim, vt omnem dubitationem eximat animis, satisne gratum sint Deo facturi. Est enim insitum hoc animis, vt in honore habendo eius potius, cui habetur, quam habentis iudicium sit videndum, eaque inter se valde discrepare possint. Itaque nunquam animis satis certis et tranquillis pietatis externas illas partes obibunt; quo nihil miserius esse arbitror. Nullo modo igitur neque a sapientia, neque a benignitate diuina abhorret, occurrere huic dubitationi atque sollicitudini humanae, definiendo, sanciendo, quomodo et quibus rebus coli velit; in beneficioque adeo Dei maximo reponendum est, si certam colendi sui formulam hominibus praescribat.

II. Neque vero in eo fas est arbitrium diuinum ita adstringere ac coercere certis legibus, vt ei nihil in hoc genere liceat praescribere, nisi quod natura sua sit cum necessariis pietatis officiis sua sponte coniunctum: quod volunt hi, qui nonnulla huius generis diuinitus tradita hominibus concedere quidem videntur, ceterum nihil discrepare, contendunt, a naturalibus officiis, neque arbitrarie constituta, sed necessario sancita pugnant, atque ea ad religionem et legem naturae reuocare quouis modo

laborant. Etenim ante vicimus, primum salutare esse privatim ac publice, pietatem quamplurimis modis exerceri: deinde ea, quae per se vim exercendae, proferendae, augendaeque pietatis non habeant, hanc vim accipere posse constitutione aliqua: veluti verborum soni, cum sint indifferentes ad quamcunque rem significandam, more et consuetudine certae rei exprimendae accommodari possunt: constitutionem porro istam, consentaneum esse, proficisci a Deo ipso: quod is delectum talium rerum et optime facere possit, et cum maxima auctoritate: in beneficii denique loco esse numerandum, si Deus ita faciat. Quamobrem omnino liberum Deo iudicandum est, minimeque abhorrens ab eius perfectione, actionibus certis lege tribuere hanc vim, ut iis obeundis colâ atque honorari possit, si nihil insit, quod maiestati ipsius aduersetur: quod eum vel commissurum, vel committere posse, nefas est, vel suspicari.

12. Arbitror planum factum, quod propositum erat; intelligique, si religio vel maxime ad Deum solum referatur, nulla hominis ratio habeatur, tamen neque a iure diuino, neque ab sapientia et benignitate eius abhorreere superaddita necessariis arbitraria officia, eaque de causa haec quoque studiose diligenterque esse seruanda. Sed, ut ante diximus, religio non modo ad Dei cultum, sed etiam ad hominis felicitatem pertinet, debetque esse non modo digna maiestate diuina, verum etiam accommodata ad naturam humanam, ut colendo pariter apta sit et colenti. Quorum vtrumque est eiusmodi, ut magna argumenta praebeat, ex quibus intelligi possit, multa posse constitui diuinitus in religione praeter naturalia illa, quae saepe diximus, officia, quibus neglectis nullo modo felicitas teneri possit, in eoque Deum et iure suo, et sapienter facere, et maximo beneficio genus humanum afficere. Primum igitur fontem huius demonstrationis nostrae habemus *naturam felicitatis humanae, omninoque bono-*

bonorum, homini vel expetendorum, vel sperandorum: alterum autem humanae naturae indolem atque conditionem. Ex his duabus rebus quomodo argumenta asserendi diuini in causa religionis arbitrii ducantur, ago, videamus.

13. Iam, quod ad felicitatem et bona hominibus vel data vel destinata diuinitus, atque adeo expetenda, pertinet, hoc mihi primum velim concedi, vt, *si bona illa atque felicitas habeant hanc conditionem atque naturam, vt cum nullo genere actionum humanarum naturali ac necessario vinculo copulentur, sintque liberae benignitatis et quasi redundantis libera beneficia, vt igitur leges et conditiones eorum a Deo consequendorum, et officia fruuentium pariter arbitraria sint, et libera eorum auctori, neque vilo modo ex ipsa naturae diuinae humanaeque naturali cognitione intelligantur.* Ex quo consequetur, vt, si Deus naturalibus religionis officiis hoc tribuat, vt iis seruandis homines et satis grati pro talibus acceptis, et digni futuris habeantur, id totum non ipsis officiis, eorumque naturae, hoc est, naturali bonitati, sed liberae Dei benignitati debeatur, quae remittere de iure suo, et necessario officiorum genere contenta esse velit. Concedi ista mihi, de Mathematicorum more, postulauimus. Iure, vt opinor, meo. Sunt enim ita perspicua, vt, si quis rationibus subtiliter reddendis velit illustrare, ei magnopere verendum sit, ne fiat id, quod Cicero in Oratore dicit, vt illustrando fiant obscura. Nam et communes rerum notiones, et vsus vitae quotidianae, ita esse clamant, negantique vehementer repugnant. Quid enim repugnantius est, magisque absolum, quam, quae in promittendo atque largiendo libera sunt et arbitraria, ea non seruare libertatem in accipiendi conditione, neque liberum relinqui ei, a quo profiscantur, ad quos, quidque praestantes ea peruenire, et quid pro iis sibi praestari velit? Quae porro indignum est atque ingratum, liberalitatem, quae ipso nomine liberam se et sui iuris indicat, quam nemo iure postulare

a quoquam potest, his legibus atque huic necessitati subiici, ut nihil, quamvis aequum et facile, audeat postulare ab iis, quibus se largam praebeat; sed cogatur esse contenta iis, quae sponte ac per se, nullo extraordinario beneficio neque promisso neque dato, vel facturi erant, vel facere debebant? Dicat hoc filius parenti, strenam daturus, vel accepta iam strenam. Quamvis indulgens pater, quamvis facilis, nihil alioqui praeter ordinaria pietatis in se signa postulans, tamen commonebitur, tamen vel omittet liberalitatem minuetur, vel eum dati doni poenitebit. Dixisset hoc aliquis Alexandro, Caesari, Tito, liberalissimis et maximi animi hominibus, beneficia aut reuocassent data, aut negassent promissa. Qui heredem scribunt, praesertim non saum, aut legitimum, aut in legatariis ponunt aliquem; hoc semper iure usi sunt, ut iis liberum esset, conditionem, quam vellent, hereditatis cernendae, legatiae capiendi ponere, qua repudiata aut neglecta exciderent beneficio. Liberum est heredi legatariae dicere, conditione tua non utor: conditione non stanti, beneficio testamenti uti, ius non est. Atque adeo non iniqui putantur, qui aliquid cum conditione vel largiuntur, vel pollicentur, ut contra iniqui et stulti iudicentur ab omnibus, qui beneficium sine proposita conditione, velut hereditatem sine sacris, et spolia sine sudore ac sanguine, accipere velint. Non agonotheta iniustus est, qui palmam legitime vincenti ponat, sed qui non victor, ne certamine quidem inito, palmam petat.

14. Neque vero est, quod quis dicat: humana ista esse, a Dei perfectione autem aliena: magnanimum esse, multoque magis diuinum; beneficia simpliciter et sine conditione dare. Etenim non quaeritur: an liberalitas sine conditione esse possit: sed an esse debeat. De iure quaestio est. Liberum cuique esse debet, quem modum liberalitatis suae velit esse: idque ex ipsis rerum notionibus intelligitur sensuque communi. Liberale est, beneficium

solum dare sine conditione: at non minus liberale, cum conditionis adiunctione. Magnus et excellens animus in beneficii magnitudine cernitur, non in conditionis sublatione. Immo pusilli et ingrati est, accusare beneficii conditionem. Tum magnitudo animi est, in conditionibus non solum commodum ponere, in primis maius, quam dederis; non, omnem conditionem remouere. Atque etiam est, ubi conditione augetur beneficium, si est eiusmodi, ut in ea accipientis potius, quam tribuentis utilitas spectata esse videatur. Duplex beneficium est, quod talem conditionem adiunctam habet. Atque tales esse conditiones, quas Deus beneficiis suis adscribat, alia disputationis huius parte demonstrabitur. Ex quibus omnibus fit, ut non ipsa conditionis adiunctio, quae est dandi accipiendique lex et modus, humanae aliquid labis habeat, sed conditionis vel vanitas vel stultitia: quae omnis, id quod in tota hac disputatione intelligi debet, patetque per se, longissime abest ab iis, quibus beneficia sua Deus adstringit. Sit igitur firmum hoc, persuasumque omnibus, quod conuelli nulla ratione potest, ut, si beneficia diuina, quibus utimur, in primisque felicitas illa, quam a morte corporis speramus, non sint necessitate quadam naturali cum actionibus humanis, nominatimque cum naturalibus illis religionis officiis, tanquam effecta eum causis certis et necessariis, coniuncta, sed a libera benignitate Dei proficiantur, ius sit Deo, legem conditionemque fruendi accipiendique, quam velit, facere, neque in eo quicquam intelligi posse, quod eius vel benignitati, vel sapientiae, vel maiestati aduersetur.

15. Hoc igitur fundamento posito, sequitur, ut bonorum diuinorum rationem atque naturam consideremus. Dico igitur primum, in omni humani generis statu atque conditione plurima ei vniuerso, aut parti eius, a Deo vel tributa vel promissa esse, quae haberent hanc naturam, ut nullo vinculo cum naturalis ac necessariae pietatis

M 5

actio.

actionibus copulata intelligerentur: deinde, ea maxime esse eiusmodi, quae post hanc vitam sperare iubeamus. In priori genere duae sunt formae: quarum alteri subiecta sunt bona ea, quae quisque humani generis status propria habet; alteri autem communia utrique. Ut ab his incipiamus, quoquo veritas oculos aut cogitationem, quam plurima occurrunt et maxima: nisi quis hanc animo imbiberit opinionem, ut omnia, quae sunt, coeca quaedam fati necessitate extitisse opinetur: quod non magis, quia sine ratione est, brutum appellari conuenit, quam, quia brutis potius, quam hominibus, ratione praeditis, dignum est. Sed cum hoc hominum genere nulla nobis est disputatio; quippe quod Deum religionemque omnem, si non verbis, at re omnino tollit. Ne autem nimis late vagetur disputatio, coërceatur sensuum corporeorum finibus: qui tamen et ipsi non ita sunt anguste positi, ut non satis amplius ei campus pateat, in quem possit excurrere. Primum igitur, cum ad alendum hoc corpus nostrum vitamque sustentandam necessarius esset victus ac potus, naturae corporis aptus; tamen neque illa tanta suauitas, quae potu ciboque, etiam tenuiori, fumendo percipitur, neque exquisiti et suauissimi cibi copia et varietas necessaria fuit. Tanta innata est hominibus vitae dulcedo, ut alimenta fumerent, etiam si sola necessitate cogerentur, nulla suauitate allicerentur: quippe aegrotantes videmus, propter vitae cupiditatem ac spem, medicamenta deuorare, non modo nulla suauitate commendata, sed etiam amaritudine inuisa. Tum, ut animalibus brutis aqua et paucae definitaeque herbae, aut radices ac semina sufficiunt: sic nostra quoque natura aquae panisque simplicitate ac tenuitate contenta esse et poterat, et futura erat, si eadem cum ceteris animantibus conditione uti nos Deus voluisset. Est igitur omnis illa et suauitas et copia non necessitati naturae humanae necessario concessa, sed diuina quadam indulgentia hominum deliciis libere donata. Atque simillima est ratio ceterorum

rerum sensuum, quorum suauitati benignitate diuina copiosissime prouisum videmus. Illud porro constat inter Philosophos, qui diligentius naturam rerum corporearum ac sensibilibum, ipsorumque sensuum, indagauerunt, nullam esse necessitatem absolutam in sensibus: non, ut non necesse sit, sentire, ubi integris sentiendi instrumentis vis animi sentiens ad percipiendas res externas incumbat: sed ut non necessario ita adficiantur sensus animique rerum sensibilibum impulsu, ut nunc quidem, in hac rerum constitutione, mouentur. Totam illam coniunctionem (*συστοιχίαν* vocant Graeci, relationem Philosophi nostri) quae sensus et corporeas res intercedit, ita, uti nunc est, constituit, non necessitati obediens intelligentia diuina, sed consulens hominum suauitati arbitrium diuini numinis. Nam, ut de oculis modo dicam, haec tam pulchra species, cum vniuersi mundi, quam vere *Cicero* infatigabilem vocat, tum rerum singularum in hac terra, quarum exquisitum ornatum ac decus in coloribus figurisque nec satis admirari, nec sine magna suauitate intueri possumus, nobis quidem aut periret magna parte, aut plane alia fieret, mutata leuiter vel oculorum structura vel cerebri, omainoque ea, quam ante dixi, rerum corporearum ad oculos relatione, et luminis in oculos actione: quod fuisse in potestate Dei, nemo ambigat. Igitur ea, quae nunc est instituta diuinitus, in magna indulgentiae liberae parte numerari debet, volentis nobis hoc domicilium nostrum quam pulcherrimum atque suauissimum efficere. Sed haec et alia his similia, quae non inutiliter ad religionem et pietatem referuntur, qui est scientiae naturalis fructus pulcherrimus, fortasse nimis subtilia et philosophica sunt: ad ea, quae cum Theologia coniunctiora sunt, veniamus.

16. In prima igitur hominis recens creati conditione quam multa et magna fuere, quae nihil coniuncti haberent cum naturalibus hominis officiis? Nam primum immortalitas corporis ei data erat, (*Gen. II, 9. coll. III, 22.*)

vt

ut non modo animo, sed etiam corpore similitudinem immortalis parentis referret: quae si ab officiorum observatione et sanctitate nasceretur, nunc etiam posset homini vere Christiano contingere, ut Britannus quidam somniauit. Accessit imperium in bestias omnes, (*Gen. II, 26. 28.*) dissimile huic nostrae vel arti vel tyrannidi, quae in illius vitae rudae et inermis simplicitatem non cadebat. Domicilium autem, quod homini in amoenissimo et copioso fructuum omnium deliciis paradiso constitutum erat diuinitus, quam nihil habet simile necessitati alicui officiorum, omnia simillima beneficentiae libertati? Quicquid denique homo habuit boni in animo, cuius causa imagine Dei ornatus diceretur, id omne ei destinatum ac donatum fuit ante, quam vlllo officio demereri Deum posset. Amissa sunt bona illa, violata lege diuina. Redacti homines ad conditionem tristem, animo cupiditatibus inquinato, corpore cum aliis incommodis, tum morbis et morti obnoxio, tota denique vita referta laboribus, et calamitatibus atque molestiis proposita. In hac ipsa tamen conditione, non modo relicta sunt illa, de quibus ante dictum est (§. 15.) bona, communia omnibus, sed multa etiam promissa multis et tributa, in quibus facile apparet, nihil necessitati vlli officiorum, omnia liberalitatis diuinae arbitrio deberi: ut docet Paullus *Rom. IX, 11. 12. 13.* Quae primis hominibus, recenti delicto, (*Gen. III, 15.*) Noacho postea (*ibid. XI, 9 seqq.*) Abrahamo deinde et posteritati eius (*XII, 2. 3. 7. cet.*) promissa et data sunt, ea quis non videt, nullo vinculo coniuncta esse cum vlllo officio? omnia esse libera et arbitraria in tribuendo? Quicquid denique Christiana religio pollicetur propriae, ex iis nihil est, in quo officiorum naturalium ac necessariorum aliqua vis et efficientia agnosci debeat.

17. In iis autem bonis, quorum spes facta est generi humano communiter promissione diuina, principatum tenet felicitas ea, quae post hanc vitam terrenam contingit.

tingit. Eius spem primis statim hominibus, in principio vitae, cum integritatem adhuc retinerent, propositam a Deo fuisse, quis dubitet, qui eam redditam, integritate amissa, fateatur. Nam, qui promissa, v. c. Abrahamo posterisque eius bona rerum caducarum possessione cohibent, immortalitatis illius beatæ et scientia et spe exclusa, omninoque veteri testamento nihil, nisi mortaliū bonorum spem relinquunt, ii profecto nimis humiliter de religione diuinitus tradita sentiunt, nec vim promissorum diuinorum vllō modo adsequuntur. Paulus. quidem (*Tit. I, 2.*) spem vitæ æternæ cum ipsis rerum humanarum initiis adæquat. Eam enim Deum fallere nescium, ait, *ἐπαγγέλασθαι πρὸ χρόνων αἰώνων*, *promisisse ante antiquissima tempora*, i. e. initio rerum humanarum. Nam *ἐπαγγέλατο* qui *destinauit* interpretantur, quod *χρόνος αἰώνιος* de ea, quæ proprie dicitur in subtilitate differendi, æternitate accipiunt, non vident, nec *ἐπαγγέλλεσθαι* sic dici, nec τὸ *ἀψευδές*, quod Deo *ἐπαγγελαμένω* tribuitur, de destinatione accipi posse, in qua non τὸ *ἀψευδές*, sed τὸ *ἀμεταμέλητον*, non *veracitas*, sed *constantia* intelligi potest. *Χρόνοι* autem *αἰώνιοι*, si non de infinita illa æternitate capiuntur, quid aliud, quam initia rerum humanarum, longe antiquissima tempora significare possunt? de quibus capiebat *Aquinas*, *æterna* interpretans *antiqua*: quod, miror, non cepisse *Erasmum* ad h. l. In quo clarum est, Apostolum in animo habuisse promissiones, quas Adamo, Abrahamo Deus ipse, aliis deinde per prophetas fecerat, de vitæ æternæ per Christum speranda. *Rom. I, 2.* Illa ipsa autem vitæ quam sapienter per imagines adumbrata priscis mortaliū fuit, primum Paradisi, in statu integritatis humanæ, a quo post etiam nomen ei inter Iudæos mansit: quod profecto non temere, aut inuento humano, sed interpretatione vetere diuina et prophetica factum: deinde, ab Abrahami temporibus, terræ Cananæ, cuius nomen etiam nunc in beatorum coelestibus sedibus appel-

appellandis vsurpamus, ducta consuetudine a veterimis Ecclesiae temporibus, quae id ipsum ex incorrupta veteris Iudaicae Ecclesiae disciplina hausit. Nam etiam sic vel docebantur, vel admonebantur, *δωρον* esse beatam illam vitam, beneficium gratuitum, in quo sola benignitas diuina cerneretur, nulla veluti mercedis necessitas valeret, aut coniunctio quaedam naturalis ac necessaria cum officiorum conseruatione intelligeretur.

18. Sed de illa ipsa felicitate, quae et a morte corporis, et ab reuocato in vitam corpore speratur, etsi non ita nobis vel literis diuinis traditum est, vel perspectum ratione, vt, qualis ea futura sit, plane perfecteque sciamus: hætenus tamen eius natura nobis patefacta est, vt intelligi possit, eam non esse cum virtute naturali ita, vt effecta cum causis suis solent, copulatam. Rationem primum audiamus. Ea vero etsi, in animo seiuncto a corpore sensibusque corporeis, vix aliquid intelligit felicitatis, nisi quod a conscientia recte factorum, et scientia rerum bonarum, maxime diuinarum, ducatur: negat tamen, ea contentum esse ad iustam felicitatem posse animum humanum, aut expleri aeternitatis immensitatem, aut cadere eam posse in mentes eorum, qui diem suum ante obierunt, quam, quod rectum esset, vel scire, vel facere possent, atque ita felicitatis istius praesidia comparare. Quae sunt planius edisserenda. Animi humani e corpore egressi vitam ratio, sua perspicientia nixa, et suarum conclusionum finibus se continens, non aliam intelligere potest, quam qualis est in mortali corpore, cum nullis sensuum et rerum externarum impulsionebus mouetur, vt in magna tenebrarum obscuritate, et alto noctis silentio, cum nihil animo relinquitur, praeter memoriam rerum perceptarum, et conscientiam eorum, quae egimus, quae ipsa memoriae vis est, denique agitationem quandam mentis et cogitationum, quae suo modo tractet res sensu aut scientia ante comprehensas. E tali autem vita felicitas nasci sola haec potest, quae insit

insit in quadam et tranquillitate et oblectatione, qualis esse in memoria et cogitatione rerum bonarum solet, sed quam illa ipsa ratio, ut dixi, non concedat, satis dignam esse altera illa vita, in qua natura longe maius quid, et plenius, atque, ut ita dicam, diuinius cogitamus, atque etiam requirimus: sicut miseriam improborum non solis naturalibus conscientiae poenis circumscribimus, sed aliis maioribus malis augemus. Nulla unquam, quod ego quidem sciam, gens fuit, quin aliqua spe ac metu vitae alterius teneretur: siue ductam ab antiquissimis et incorruptis temporibus, et relictam a maioribus opinionem eam haberent, siue, id quod doctissimi homines existimauere, ipsa natura homines in hanc suspicionem atque opinionem deduceret. Enimuero nulla felicitatem alterius vitae tranquillitate illa et oblectatione cogitandi terminauit: omnes aliorum bonorum accessione cumulare. In quo etsi suum quaeque ingenium moresque secuta, compleuit omnia opinionum temeritate et stultitia, ut sit necessario, cum, in rebus non necessariis et voluntariis cognoscendis ac definiendis, coniecturas sequimur: illud tamen boni existit ex ista opinionum varietate et vanitate, ut intelligatur id, quod volumus, felicitatem futurae vitae latius patere illo naturali ac necessario virtutis et sapientiae fructu, atque multa et magna arbitrariorum bonorum veluti auxilia habere.

19. Ac profecto, si in vita altera nihil ad felicitatem detur animo, praeter ea, quae diximus, naturaliter illa cum hac vita et officiorum naturalium conseruatione coniuncta, nullo modo plena, et perfecta, et aeternitati sufficiens felicitas intelligi potest. Ea enim possessionem fructumque bonorum desiderat eorum, quae non modo puram ab omni mortalitatis humanae labe voluptatem praebeant, sed etiam nunquam, per infinita secula, satietatem allaturam, semper, ut ita dicam, nouitatis gratiam conseruaturam, semper crescentem, et noua quadam accessione se commendantem. Talis igitur esse potest felici-

felicitas animi humani, si nihil in altera vita inuenerit, quam quod ex hac deportarit? si contentus esse debet partis in priore vita bonis suis? Primum illi ipsi, qui virtutem et sapientiam, quamuis magnam, in nouam illam vitam detulerint, non similes erunt istis commentitiis Epicuri Diis, qui in intermundiis collocati, conscientia tranquillitatis suae et cogitatione hac se per omnem aeternitatem sustentant: *belle mihi est?* cuius, meo sensu atque animo, celeriter satietas venerit. Enimuero, quid futurum est iis, qui honeste quidem vitam transegerunt, ceterum implicati vitae humanae negotiis, non poterunt sapientiae copiam comparare eam, qua frui in altera vita possent? Quid iis, qui acerbo fato in principio vitae functi, nihil eorum ex hac vita deportarunt, quibus fruendis oblectare se possent? An in altera vita nihil aliud, quam dormire, dicemus? quales eos fingit in limbo infantum Romanae Ecclesiae opinio. Incredibile dictu est, in quot difficultates se induant, qui hoc defendere audeant, nihil esse in altera vita, quod non ab hac mortali, necessitate quadam naturali ducatur. Enimuero hoc defendant necesse est omnes, qui negare Deo hoc ius sustineant, ut possit in religione aliquid praeter naturalia ac necessaria officia constituere.

20. Ac nos ita disputamus, ut nullam rationem habeamus corporis, suo tempore instaurandi. Quod etsi ratio humana ignorat: tamen, si auctoritati diuinae, ut debet, concedens crediderit, ut quidam volunt videri ex iis, contra quos disputamus, statim videat necesse est, in illius nouae vitae felicitate esse debere bona, quae nullam necessariam copulationem habeant, cum vita superiore, et officiis humanis, sed indulgentia diuina praeparata et destinata sint immortalitati. Nam si felicitas coelestis cum corpore communicari debet, habeat oportet bona etiam eiusmodi, quorum suauitas per corpus ad animum perueniat: in quibus sua sponte intelligitur, libera Deo relinqui omnia. Sed haec plenius et efficacius demon-

demonstrant literae diuinæ: quæ primum clare docent, reditura in vitam corpora nostra, et in communionem felicitatis coelestis ventura, 1 *Cor. XV.* quod totum beneficium est arbitrio, et libera benignitate Dei constitutum: deinde, summam istius felicitatis inesse in adspectu sensuque maiestatis diuinæ, ea animum corpusque expleturo voluptate, quæ purissima sit, et cum satietate quadam infatiabilis, semper recens, semper crescens: *Psal. XVI. 11. XVII, 15.* quorum altero David sibi in vitam reuocato pollicetur satietatem ab adspectu Dei; (*Eusebius ad Ps. XVII, 15.* interpretatur bene: πληρωθήσομαι καὶ χορτασθήσομαι πάσης ἡδονῆς, *Collect. PP. Montefalc. T. I. p. 59.*) in altero Messias docet fideles, ab adspectu Dei esse תִּשְׂבֹּעַ, תִּשְׂבֹּעַ satietatem gaudiorum, gaudium satians et penitus explens immensa humani animi desideria, et רִנָּה, רִנָּה suauitates sine fine. Verissime. Quid enim illo suauitatis fonte limpidius, aut copiosius, et magis inexhaustum esse potest? Neque alia vlla res esse, aut cogitari potest, a qua talis felicitas, talis voluptas, sperari possit, præter illum adspectum qualemcunque maiestatis diuinæ, quæ sola purissima, sola efficiens æternæ et nunquam fastidiendæ suauitatis in animis et corporibus humanis putari potest: qualis describitur a *S. Petro I, 1, 4.* qui coelestem illam felicitatem appellat πληρομίαν ἀφθαρτον, ἀμίαντον καὶ ἀμάραντον, hereditatem perpetuam, sine labe mortalis et vitiosæ humanitatis, et viriditatis conservantem. Sed eandem hereditatem coelestem *Paulus* appellat hereditatem Dei, *Rom. VIII, 17.* Quæ est autem hereditas Dei, nisi bonorum diuinorum, quæ Deus ipse possedit ab æterno, quibus fruendis ipse μόνος μακάριος, solus beatus est, 1 *Tim. VI, 15.* Bonorum porro quorum possessione αὐτάρετης Deus, quorum fructu beatus dicitur, nisi maiestatis suæ et perfectionum maximarum? Ad has igitur animo et corpore contuendas fruendasque aditus patefieri homini debuit, si illa, quam descripsimus, felicitas ei destinata ac promissa fuit. Quis autem negare aut

Ernesti Opusc. Theol. N dubi-

dubitare audeat, hunc aditum dari beneficio diuino, non ob promeritum quoddam virtutis naturalis, officiorumque necessariorum; quibus conseruandis Deo, quod debemus, reddimus, non hoc consequimur, vt se conspiciendum nobis praebere, vt se suaque bona nobis quodam modo possidenda ac fruenda ad infinitum tempus concedere cogatur. Libera haec sunt, et in voluntatis diuinae benignitate posita, nequē vllō modo cum officiis naturalibus cohaerent. Sed a natura felicitatis humanae, bonorumque homini vel sperandorum vel expetendorum, quomodo argumenta asserendi in religione constituenda arbitrii diuini ducantur, satis diximus.

21. Locus alter, vnde peterentur argumenta vindicando illi arbitrii diuino, erat in conditione naturae humanae: qui nunc aperiendus videtur. Eum autem multiplicem facit varia generis humani conditio. Nam alia hominum conditio fuit tum, cum integri essent ab omni culpae ac vitii labe: alia post contractam culpam, et susceptam naturae corruptionem. Variant etiam indolem hominum ac naturam res externae, nec sinunt eandem in omnibus vel hominibus vel gentibus esse. Ex his autem generibus omnibus existit id, quod defendimus, arbitrium diuinum religionis naturalis ac necessariae nouis decretis officiisque augendae. Nam, vt ab ea, quae nobis coniunctior est, conditione generis humani incipiamus, non veremur, ne quis magnopere nobis repugnet in eo, quod fundamenti loco ponimus: *si ea est hominum conditio atque natura, vt non possint religioni naturali ac necessariae, omninoque voluntati diuinae satisfacere, si velint; aut ita sint vel erroribus coacti, vel vitiis deprauati, vt ne possint quidem satis velle: Deus potest, misericordia commotus, aliam rationem sui placandi, et felicitatis eius, de qua diximus, consequendae praescribere, si nihil in ea inest, quod aeternae iustitiae et sapientiae suae legi repugnet, et, conseruata sapientia et sanctitate sua, praecipere, quae faciliora sint et imbecillitati eorum accommodata, quibusque*
adeo

adeo adducantur ad illius aeternae ac necessariae religionis observationem. Quid enim est in his, quod non per illas ipsas necessarias notiones Dei perfectionisque diuinae sumere liceat?

22. Neminem esse arbitror, qui quidem de Deo recte, et rationi atque naturae conuenienter sentiat, quin Deo dignum existimet esse, salutis ac felicitati hominum quovis modo consulere, qui nihil habeat inimicum ipsius iustitiae et sanctitati. De bonitate quidem diuina ita magnifice sentiunt homines natura, ut citius ab Deo expectent, quae conseruata sanctitate sua tribuere non potest, quam ei detrahant curam salutis humanae, tam necessariam hominibus, tam conuenientem generis humani auctori ac Parenti. Ego autem ita mihi persuasum habeo, ut credam, si, posteaquam homo in hanc tam miseram conditionem, quam paullo ante descripsimus, deuenisset, nulla alia salutis ratio reliqua futura erat, aut Deo non ius erat, nec licebat per naturae suae sanctitatem, ipsamque rerum naturam, aliam rationem ac viam salutis proponere, Deum, quem non potuit fugere, homines in id miserrime venturos, eos omnino creaturum non fuisse. Quid enim erat aliud, in talem conditionem homines creare, quam in certam et nullo modo effugiendam perniciem creare? Quod si ille apud Poetam, probante Socrate, optimum homini fore iudicat, omnino non nasci, ob miseras huius vitae, quae tamen aut tolerabiles sunt, aut morte saltem finiuntur: quidni clementiam diuinam et iustitiam decuerit, non dare vitam iis, qui haud dubie omnes in infinitum tempus miserrimi essent futuri? Non igitur vlllo modo dubitari potest, quin illa generis humani conditio hoc ferat, ut non modo non alienum a Deo, sed etiam dignum eo et gloriosum sit eius bonitati et sapientiae, primum in vniuersum, novam viam ad felicitatem hominibus patefacere; deinde talem, quae sit planior et expeditior humanae imbecillitati, nec minus denique conueniens sanctitati suae. Id quale sit, tertia disputationis.

parte docebitur. Nunc vnum hoc praelibare ex illa disputatione placet, accommodatam illam rationem humanae imbecillitati fore, si in ea redeant omnia, in accipiendo quidem, ad beneficium, in agendo autem ad efficientiam et auxilium diuinum; consentaneam autem sanctitati diuinæ futuram, si etiam ad illa ipsa naturalia et necessaria officia adducat, eorumque obseruationem faciliorem et iucundiores reddat. Quis autem non talis rationis instituendae non modo ius et potestatem Deo concedat, sed, si oblata sit, summum et Deo dignissimum beneficium homini tributum fateatur?

23. Enimuero, hac conditione omnes homines natos esse, vt a se nec velint serio, nec possint vere satisfacere pietati in Deum, officiisque ceteris necessariis et naturalibus, lege diuina sancitis, id quidem et suo quisque sensu discere potest, nisi sibi velit admodum assentari, et sapientissimi quique, hoc est, qui semetipsi optime cognitos haberent, iudicarunt. Sed clarissime demonstrat *Paulus* et vberime, nec naturalem, nec per *Mosen* traditam legem, quæ est e naturali expressa, homines a vitiis auocasse, et ad veram perfectamque virtutem adduxisse, *Rom. I, 18. sqq. II, 1. sqq. III, 9-20.* propterea, quod ita homines vitiis et cupiditatibus sint natura sua addicti et obnoxii, vt ab iis sua, aut legis cuiuscunque vi abstrahi atque liberari, et legi diuinæ, qua naturalia illa et necessaria officia sanciantur, obedire ac satisfacere non possint. *VII, 7. sqq. et VIII, 3.* In quo ille nullo argumento vitur, quod non quiuisset, etiam non agnoscens diuinitatem *Paulini* scripti, agnoscere ac concedere debere videatur. Sunt enim omnia ducta ab experientia et vsu omnium sine exceptione temporum, et sensu cuiusque interno; firman-
turque consensu ac testimoniis hominum, quorum sapientiam et virtutem libenter ostentant, atque Christianæ religioni opponunt ii, contra quos disputamus. Id quale sit, paucis, pro instituti ratione, dicere non alienum putamus.

24. Pri-

24. Primum igitur, vt ante diximus, legem naturalem, ait non cauere potuisse hominibus neque ab sententiis absurdissimis monstruosisque de natura diuina eiusque cultu, neque ab omni genere vitiorum, nefandisque facinoribus. (*I, 18. sqq.*) Vnde igitur hoc habet? Ex ipsa re scilicet. Quam foeda enim εἰδωλατεχνία et superstitio omnes, praeter Iudaicam, gentes oppressas tenuerit inde ab antiquissimis temporibus, maximeque temporibus *Paulli*, omnium temporum monumenta loquuntur, nec de eo vlla potest esse dubitatio. Nec minor morum et vitae corruptela fuit apud omnes gentes; quod et libri graeci latinique omnes loquuntur, et sapientes homines conquestos reperimus. Illa ipsa ciuitas, quae sapientissima semper iudicata est, (*Cicer. Rosc. Am. 25.*) Atheniensis, quam foedis vitiis tota obruta et corrupta fuerit, quam foedis libidinibus et flagitiis dedita, ipsi Athenienses scriptores, *Aristophanes* alique, loquuntur. *Socrates* quidem apud *Platonem*, in nobili librorum *de rep.* loco, disputat, ita corruptas esse omnes, etiam cultissimas, gentes, vt humanis remediis sisti malum non possit. Videant plura studiosi in *H. Grotii* ad locum *Paulli* commentario. Iudaici Doctores illis temporibus, corrupta de fide doctrina, vt altera parte demonstrabimus, existimabant, omnem illam gentium corruptelam esse ab ignoratione legis diuinae per *Mosen* traditae, cuius scientiam habere hanc vim natura sua, vt sanctos redderet homines, et cupiditates vincere ratio posset: quod clare patet e multis *Philonis* Iudaei locis, et *Iosephi* (si tamen *Iosephi*) in *Maccabaeos* libello. Itaque et ipsos Iudaeos, *Paullus* docet, sub imperium vitiorum venisse (*III, 9.*) eaque corruptela morum et vitae, repudiata medicina per Christum et Apostolos oblata, ita indies creuit, vt *Iosephus* suis temporibus summam, et Iudaicae nationis hac etiam parte miserrimam conditionem fuisse fateatur. Iam, si omnium gentium in aliqua re consensus recte putatur esse vox naturae, h. e. eam in notitiis insitis numerandam esse,

eiusque scientiam ab ipsa natura proficisci docet: intelligitur, ut opinor, pariter, istam tam perpetuam et vniuersam generis humani corruptionem ab ipsa natura originem duxisse. Nam, si quis nobis paucos quosdam virtutis magna gloria insignes opponat: primum multa seuerus virtutis iudex, et ad perfectam legis diuinæ regulam exigens omnia, reperiatur, quæ in iis, et eorum virtute, iure requirat; deinde illos ipsos, si verum de se dicere voluissent, idem quod *Paullum*, (Rom. VII.) de se credibile est confessuros fuisse. Socrates quidem, quem in illo numero primum omnes ponunt, cum multa vitia collegisset in eum Zopyrus physiognomon, essetque derisus a ceteris, qui illa in Socrate vitia non agnoscerent. Zopyrum subleuauit ipse, cum illa sibi innata fuisse fateretur, sed ratione a se deiecta diceretur (*Cic. Tuscul. IV, 37.*) Quod si quis ex eo quaesiuisset, an non ab iis etiamnum sollicitaretur interdum, non dubitem, eum hoc quoque confessorum fuisse. Ex quibus recte utique colligimus id, quod proposuimus, ut, quia tanta est generis humani, et natura et vero etiam consuetudine praua corruptio, ut hominibus nec voluntas seria et constans recte faciendi suppetat, nec vis, ea, quæ vtcunque iudicio mentis, lege diuina vel naturali vel scripta collustratae, probauerint, sequendi integre et constanter, ac perficiendi, ut, inquam, illi sine alia noua ope nec salui esse, et ad felicitatem si legi seruatae esset proposita, adspirare, nec ad veram sanctitatem peruenire possint.

25. Videant igitur etiam atque etiam, quid agant, et in quas se difficultates impediant, qui Deum negant posse alia ad felicitatem via homines adducere, quam quæ per naturalem et necessariam religionem ducat, nec ullam Deo in religione libertatem arbitrii concedunt! Etenim, si Deus nec per naturam suam potuit talem salutis rationem, qualem ante diximus, instituere, nec instituit; et ipsi adempta est facultas hominum seruandorum, et hominibus spes salutis et felicitatis coelestis. Nam cum planum sit ex iis, quæ diximus, legi naturali atque diuinæ non

non satisfieri ab vlllo homine, nec quemquam fuisse vnquam, qui hoc de se ausus sit, aut iure potuerit praedicare, nec per vitiosam naturam satisfieri posse; quomodo poterit aut Deus eos salua sanctitate sua ad felicitatem admittere, aut homo eam cum aliqua fiducia sperare? Quod si dicant, Deum, pro sua in homines lenitate et indulgentia, contentum esse posse qualicumque virtute: primum hoc ipsum arbitrarium esse fateantur necesse est: deinde, in eo nihil esse praeter incertam coniecturam, qua, in re tanta, niti alienissimum atque stultissimum est. Etenim cum ex iis, quae supra (§. 18. f.) disputata sunt de felicitatis coelestis natura, appareat, etiam perfectam legis divinae obseruationem, si sit consequendae illius felicitatis, eam vim habere, non per se, sed benigna voluntate diuina, ab ipso hominibus diserte declarata; quod, quae liberae voluntatis et benignitatis sunt, intelligi aliter non possunt: quanto magis id dicendum erit de qualicumque eius obseruatione? Vbi autem est ista voluntatis diuinae significatio? et vnde acceptum didicerunt, Deum illa tali inchoata et adumbrata virtute contentum fore, etiam si nihil intercesserit, quo eius imperfectio velut expleatur? Tum illa qualiscunque pietas et virtus, quam est ambigua et parum definita! Nam illud profecto non audebunt dicere, omnem, quamuis paruam ac tenuem; et heri aut nudius tertius inchoatam virtutem, et quo certo virtutem hanc vim habere posse, vt es Deus sibi satisfieri patiatur. Quomodo igitur definient illam qualemcunque virtutem, et quo certo argumento poterit hominibus esse persuasum, se ad eum virtutis gradum peruenisse, quo Deo satisfiat, quo ille contentus sit futurus? Ex quo angores animi et perturbationes horribiles consequantur necesse est in omnibus, qui immortales animos esse, et aliam post hanc vitam expectandam didicerunt.

26. Sed prior illa et melior hominum fors et conditio, etsi nulla tali op^e indigebat, tamen arbitrium diuinum in religione non modo non repudiabat, sed etiam idoneis de causis expetebat. Etenim quomodo repudiaret id, quod

non modo iustum et aequum esset, praesertim Deo postulante, cuius summus et verissimus tum amor erat, sed etiam vtilissimum sibi, h. e. ad alendam proferendamque pietatem accommodatum, ut supra demonstraui-
 mus. (§§. 4. 5. sqq.) Etsi autem ea tum hominis natura erat, ut ei nec voluntas nec facultas recte faciendi deesset, et haecenus carere poterat institutis, quibus imbecillitati humanae posthaec subueniendum, et inuectam in eius naturam corruptelam sanandam fuisse ostendimus: tamen ab aliis causis talium institutorum necessitas quaedam nasci potuit. Quodsi nobis non liceret causas istas perspicere: tamen idoneas fuisse, dubitandum nullo modo foret homini, de Deo eiusque sapientia recte sentienti, si constaret, ei conditioni aliquid praeceptum fuisse, quod naturalium ac necessariorum officiorum numero haberi non posset: constat autem omnibus, qui veritatem ac diuinitatem librorum Moisaicorum in dubitationem non vocant. Sed fortasse licet nonnihil assequi, quod non absurde in causis istis numeretur: quale illud est, quod, cum homines primi iidem soli hanc terram obtinerent, nondum facultas dabatur eorum officiorum, quae postea multitudo generis humani et societas necessario attulit. Igitur non modo consentaneum, sed prope necessarium erat, eorum locum interea obtinere alia, arbitrio diuino constituta. Id sic intelligi arbitror. In omni lege diuina, id quod supra monuimus, (§. 7.) veluti duplex est causa eius seruandae, et veluti duplex officium: quorum alterum ad naturam et conuenientiam rerum pertinet, nec habet proprie aliquam coniunctionem cum religione; unde existit iustitia et aequitas, quae homines ceteros amplectitur; alterum, idque maius ac nobilius, ad Deum refertur, et obedientiam aduersus eius praecepta, in quo pietas et religio cernitur. Vbi igitur illa prior causa legis locum non habet, per ipsam rerum temporisque conditionem atque naturam, haec tamen retinenda est: et, quoniam naturalia illa ac necessaria iustitiae officia nondum existere possunt, arbitrariis et voluntariis legibus obedientiae aduersus

aduersus Deum officia sunt constituenda. Etenim assidua obedientiae in Deum exercendae occasione carere homines nec debent, nec possunt, propterea, quod nil magis est necessarium, quam homini hoc plane persuasum esse, ut Deo obediendum credat, huiusque obligationis et officii sensu moveatur animus, cum summa Dei reuerentia; nec sine tali sensu ac persuasione vera pietas esse potest. Enimvero, eam, quam ante descripsimus, rerum ac temporum rationem fuisse in principio rerum humanarum, facile omnes vident, cum propter paucitatem hominum nulla societas aut societatis iura et officia essent, et omnes prope hominis actiones externae in ipso verterentur, nec iustitia aut aequitas, aut benignitas intelligi posset.

27. Quamquam nobis non est opus illa disputatione necessitatis, nec quicquam cogit nos, tum demum agnoscere ac probare arbitrariorum officiorum leges, cum aliqua talis perspicua necessitas subest. Omnino mihi videntur parum subtiliter accomodateque ad naturam intelligentia et libertate praeditarum substantiarum disputare, qui in religione omnia ad necessitatem aliquam reuocant, nec quicquam probant, quod non a necessariis causis ducatur. Animalium eorum ista conditio est, in quibus nulla intelligendi vis, nulla libertas inest, ut, sicut ipsi necessitati cuidam in rebus omnibus subiecta sunt, quod ipsa se regere non possunt, sic in iis tuendis, alendis, tractandis fingendisque ad certam ac necessariam legem, ab ipsorum natura ductam, omnia referantur, ultra quam progredi non liceat. Eas angustias repudiant intelligentia et libertas, nec iis vlllo modo se quasi in ordinem cogi patiuntur. Ipsa natura et sensus communis reclamant tali necessitati, non solum propter Deum, cuius infinita est intelligentia, libertas autem maxima, eademque sanctissima, sed etiam propter hominem, ad quem istius intelligentiae et libertatis aliqua pars pervenit. Intelligentiae omnis, etiam humanae, nedum diuinae, haec vis est, ut non modo necessaria intelligat, eaque ratiocinando

nando tractet, sed etiam multa vel videat, vel excoget, cum magna generis humani vtilitate, atque sua laude, quae omnis talis necessitatis sunt expertia: cuius generis rebus plena est vita humana. Libertatis autem natura hoc fert, ut in agendo nulla necessitate cogatur, non modo haecenus, ut non agat inuita, sed etiam, ne in agendo ita constringatur, ut non possit ultra necessitatem progredi, et facere, instituere, quae nulla necessitas perspicua rerum postulet. Non vult cogi libertas, ut agat, cum non placet: sed nec impediri se sustinet, quo minus agat, cum lubet, etsi nulla necessaria causa prouocata. Quid ergo? Summam illam Dei libertatem, eamque sanctissimam, et sapientissimam, et beneficentissimam, an fas putamus, ita angustis finibus circumscribi, ut ei non liceat aliquid constituere, quod nulla naturalis rerum necessitas imperet sancire? nec ea re. ut hominum commodis consulere, vel suae maiestati, suae laudi, suae gloriae? In rebus corporeis, et quae ad alendum hoc mortale corpusculum pertinent, Deo concedimus hoc iuris ac libertatis, ut possit hominem lautius et liberalius tractare brutis, et multis non necessariis bonis vitam exhilarare, ut supra ostendimus, (§. 15.) et ita se quouis modo conspicuum et amabilem reddere. Quae igitur ratio est, in animo quare non patiamur, Deum neque alia tradere de se cognoscenda, quam quae a necessitate rerum ac notionum ipsa doceantur, nec alia officia praescribere, quam quae natura ac necessitas videatur sanxisse, et sic alia quadam ratione mentibus humanis conspicuum se et verendum efficere? Non mihi hoc dignum Deo, non ipso homine dignum videtur, praesertim incorrupto, et hanc ob causam cupido, quam plurimis rebus et modis Deo obsequium praestare.

28. Etenim, etsi illi integro et a vitiis adhuc puro homini ea vis ingenii fuit, ut sua sponte posset ex ipsa rerum natura iustam Dei cognitionem capere: tamen, cum vis illa non esset infinita, sed et ipsa finibus suis circumscrip-
pta,

pta, non videtur sua sponte potuisse diuinam naturam ita perspicere, vt non multa relinquerentur, vel quae cuperet cognoscere, vel quibus cognitis mirifice laetaretur, et ad Deum admirandum amandumque incenderetur. Sicut in mente humana insunt permulta, quae nulla perspicua necessitate ex ipsius definitione colliguntur, quorumque adeo rationem ex ea reddere non possumus: sic multo magis, etiamsi nesciremus literis diuinis edocti, tamen existimare deberemus, in infinita diuinitate inesse permulta et maxima, quae ex illa Dei notione, quam primam concipit mens humana, a qua cognoscendi Dei initium facit, intelligi per necessariam aliquam consecutionem, quamquam vniuersa rerum natura diligentissime comparata, nullo modo queant. Quis igitur audeat, hoc abhorrens, ac non potius conueniens et probabile iudicare, si Deum dicamus, multa de se tradidisse primis illis hominibus, et, si integritatem conseruassent, porro traditurum fuisse de natura consiliisque suis, quae suapte vi adsequi non possent, atque ita effecisse, vt iam tum non mera philosophia esset, quam tenerent homines, notitia Dei, sed, quod nunc est, Theologia de coelo delapsa, et hac ipsa origine sua carior et amabilior. Atque simillima est ratio officiorum. Si nulla necessitas arbitrariorum officiorum nascebatur ex hominum natura et conditione, quod tamen ipsum vix concedi potest per ea, quae ante dicta sunt, (§. 25.) at vtilitas eorum ostendebatur permagna, (§. 7.) praesertim in illa vita tranquilla et otiosa, quae tota religioni et pietati exercendae vacaret: at Deo quaecunque de causa placere poterat, necessariis officiis libera adiungere: at homini ipsi iucundum futurum erat, quam plurimis rebus Deo pietatem probare posse.

29. Non eandem esse gentium omnium indolem, eamque coelo ac regionibus terrarum, temporibusque vehementer variari, nemo rerum humanarum non rudis ignorat. Vnde fit, vt, sicut corpora humana aliis locis, tempo-

temporibus, aetatibus denique, alium victum, sic animi aliam disciplinam desiderent. Itaque legislatores sapientissimi hoc spectarunt, ut ea sancirent atque instituerent in ciuitate quisque sua, quae essent ingenio gentis proprio accommodata, utque propriis quibusdam institutis, solerter excogitatis, homines vel ad officium adducerent, vel in officio continerent: et ut quisque hoc facere potuit maxime, ita maxime prudens legislator est existimatus. Quodsi in humanis legislatoribus hoc non modo conceditur, sed etiam expectatur ac postulatur, ut talibus institutis ac legibus consulant vel securitati vel vtilitati communi: intelligitur, multo magis hoc dignum esse summo et communi generis humani legislatore, eiusque et sapientia et aduersus homines benignitate, ut in religione constituenda non modo communis naturae conditionisque humanae rationem ducat, sed etiam propriae, vel genti ei, quam vere religione tradenda beare, vel temporibus ac locis, in quibus constituere religionem velit. In praeceptoribus laudari solet et permagna et salutaris iuuentuti prudentia haberi, si, praeter commynem omnibus disciplinam, adhibent quaedam peculiaria et sua instituta, hoc est, artificia, quibus vel celeritas felicitum ingeniorum coerceatur, et velut fatigetur salubriter, ne in vanitatem quandam et inutilem leuitatem degeneret, aut tarditas tenuiorum incitetur, memoriae imbecillitas roboretur et angustiae dilatentur cet. Atque etiam hoc expectatur a bono magistro, ut se accommodet singulis, et aptis ad cuiusque ingenium atque naturam institutis utatur. Quanto magis diuinam sapientiam agnoscere fas erit, si hominibus, aliquo vitio ad religionem virtutemque pernicioso, vndecunque orto, debilitatis consulat institutis talibus, quae vel scientiam fidemque rerum diuinarum, quibus religio maxime continetur, adiuuent alantque, vel rerum agendarum expetendarumque admoneant efficaciter, et ad seruandum officium quascunque ratione adfuefaciant. Morborum quaedam genera ita, v. c. victu,

viſtu, aëre, exacerbantur, vt ordinaria, et ante efficacia remedia ſuam aduerſus eos vim amittant, coganturque medici noua et efficacia circumſpicere, et pluribus volut armis eorum pertinaciam oppugnare. Et ſunt, in hac communi totius generis humani naturali deprauatione, errorum vitiorumque morbi haud pauci, qui mentes animosque hominum infeſtant: ſed quidam apud quasdam gentes, et quibusdam temporibus, variis cauſis ita, primum late ſerpunt, deinde ingraueſcunt, vt viſtatis rationibus, argumentis, inſtitutisque ab iis liberari aut homines oppido pauci, aut nemo poſſe videatur. Vnde exiſtit ſane quaedam neceſſitas inducendarum rerum, quae hanc vim habeant, vt ab iis vel abſtrahere homines impeditos, vel cauere integris poſſint. Alia his ſimilia incidere poſſunt in genere humano, quae locum faciant nouis et arbitrariis in religione inſtitutis, iisque adeo non modo non improbandis aut contemnendis ſine iniuria in Deum, ſed etiam in documentis ſapientiae et in numero beneficiorum diuinorum reponendis.

30. Haec ſero habuimus, quae ad aſſerendum diuinum in religione conſtituenda arbitrium hoc tempore diſputaremus. In quibus hanc a nobis rationem habitam, diligens lector intelliget, vt non modo eos reſelleremus, qui vel omnino religionem diuinitus traditam in libris ſacris tollere cuperent, illo tali arbitrio a diuina perfectione remouendo; vel, cum agnoſcere diuinitatem librorum ſacrorum viderentur, tamen interpretando reuocare pleraque ad naturalem religionem conarentur, quod Socinianos eorumque aemulos facere animaduerſum eſt, ſed vt eos etiam confirmaremus, qui recte de religione Chriſtiana ſentirent, et aduerſus illorum male ſanam ſapientiam muniremus. Etenim, vt noſtra fert opinio, quicquid viri docti aduerſus errores eorum, qui Chriſtianae religionis veritatem atque diuinitatem oppugnauere, multis eruditiffimis libris diſputauerunt, id non tam prodeſſe illi voluerunt, aut certe profuit ad illos ſanar-

sanandos, qui plerumque non veritatis amore ac studio, sed cupiditatibus suis obsecuti, eam disputationem susceperunt, quam ad eos confirmandos, qui de veritate religionis Christianae minime dubitarent, cauendumque, ne istorum vel libris legendis, vel sermonibus audiendis, corrumperentur, si, quod eorum rationibus opponerent, ipsi non haberent aut reperire possent. Itaque nos quoque idem et in hac disputationis parte maxime secuti sumus, et in reliquis duabus sequemur.

PARS SECVNDA

In omni generis humani statu veram religionem arbitria habuisse.

31. Superior disputatio, quae Deo arbitrium religionis asseruit, si verum velimus dicere, superuacua erat per eos, qui in rebus cognoscendis ac iudicandis recta via et ratione vterentur: sed facta est necessaria per argutationes eorum, qui, relicta vera differendi et iudicandi via, totum rerum ordinem peruerterunt, et, de quo quaerere non attinebat, id in disputationem adduxerunt. Semper hac ratione vsi sunt, qui legitimos differendi modos tenerent, vt primum, quid esset, quaererent; deinde demum, si luberet, de causis viderent: quas si assequi non possent, non propterea rem ipsam tollerent, aut fieri posse negarent: foret enim ridiculum: sed vel obscuritatem rei, vel ingenii sui imbecillitatem agnoscerent. Hanc rationem si tenuissent ii, contra quos a nobis disputatum est, otium nobis fecissent in hac causa agenda. Etenim quaesissent potius de diuinitate sacrorum librorum, eorumque interpretatione: vt, si primum illa esset ita perspicuis signis manifesta, vt dubitari de ea iure non posset; haec autem clare doceret, in iis libris statui ac praecipi, quae naturalem necessitatem nullam haberent, intelligerent sua sponte arbitrium illud diuinum, nec dubitarent, quin

quid id posset cum sapientia, et reliqua perfectione diuina; optime consistere: neque enim vilo modo credi potest, Deum, quod locus sit, facturum fuisse. Sed cum et diuinitas librorum sacrorum ita perspicua esset, ita euidenter ab doctissimis viris demonstrata ac defensa, ut nihil probabiliter contra dici posset, et in iis ipsis nimis diserte ac perspicue arbitraria religionis decreta traderentur, maluerunt viam rectam deserere, et arbitrium totum religionis in dubitationem adducendo atque impugnando, religionem Christianam vel totam ad naturalem redigere; vel omnino tollere, existimantes, quod ea ratio haberet speciem sapientiae, et subtilitatem aliquam, facilius se causam obtinere posse. Igitur nobis quoque via illa eundem putauimus, et prius asserto vniuerso diuino in religione arbitrio, ad illa ipsa progrediendum, quae non essent ab naturali et necessaria religione ducta, sed diuino arbitrio: sed cum summa sapientia et vtilitate generis humani, constituta.

32. Ac fortasse vel sic existimet aliquis, nos hac altera disputationis parte, quam proposuimus, plane supersedere potuisse: propterea, quod nemo, qui diuinitatem librorum sacrorum agnoscat, dubitare possit, aut dubitet, fuisse omni tempore in religione a Deo tradita et praecepta hominibus, quae essent a naturali religione diuersa, nec e necessaria Dei hominisque natura, rationis humanae vi intelligi possent. Id etsi ita esse libenter concedimus: tamen causas satis idoneas nobis videmur habuisse, propter quas hanc disputationis partem non praetermittendam putaremus. Nam primum, cum nobis statutum esset, locum hunc, de arbitrio diuino in religione constituenda, plene absoluteque tractare, ea pars vix videbatur praetermitti posse, praesertim cum, ea recte explicata et constituta, partis tertiae explicationem faciliorem fore videremus. Sed maxime nos mouebat hoc, quod videbamus, omni tempore fuisse, qui in istis ipsis rebus, quae arbitrio diuino constitutae essent in religione, et
illa,

illa, quae fuit primorum hominum, cum integritatem primam retinerent, et ea, quae post fuit usque ad Christi tempora, et Christiana adeo ipsa, argutarentur, et res clarissimas argutationibus suis obscurare ac pervertere conarentur. Cuius rei causa, ut mihi videtur, nulla alia fuit, quam quod homines illo ipso arbitrio diuino offenderentur, nec satis concoquere possent libertatem diuinam in istis rebus constituendis, mallentque rationis solius, quam Dei vocem audire. Nam alii fuerunt, qui talia instituta in allegorias conuerterent, ut ea, (ita putabant) molliora et rationi humanae aptiora efficerent: alii, qui ea ad legem naturalem diuinamque reuocarent, ut Iudaei quondam, et nunc Sociniani, Arminiani, et permulti alii, qui se Christianos profiteantur. Sunt etiam fortasse quaedam, in quibus explicandis etiam casti religionis diuinae interpretes non consentiant. Itaque videbamus, etiam hac parte explicanda, a nobis quaedam disputari et admoneri posse, quae non inutilia forent studiosis.

33. Iam, in *prima vitas humanae institutionis*, quae a Mose duobus primis Geneseos capitibus traditur, duo sunt, in quibus arbitrium diuinum appareat: alterum, de quo inter recte sentientes Christianos ac Theologos nulla dubitatio est; alterum, quod aliquam dubitationem habere, dissensus doctorum arguit: *abstinentia ab fructu arboris religiosae, et per septimum quemque diem feriatio*. De utroque breuiter videamus, pro instituti nostri ratione. Ac primum obiter studiosorum causa monebimus, eam arborem, quae מֵיץ עֵץ הָאֵל מִן הַגֵּן Mofi appellatur, a graecis interpretibus vno loco (II, 9.) graeco dici ξύλον τῆς εἰδέναι γνωστὸν καλὸν καὶ ποιητὴ, pro quo est omnibus aliis locis ξ. τ. κ. καλὸν καὶ κακόν. Inde apparet ita γνωστὸν καλὸν κ. τ. esse periphrasin, (quod genus est frequens apud Graecos, sed saepe parum peritis linguae molestum fuit) cum pleonasmō, ut in γνωστὸν κ. nihilo plus sit intelligendum, quam in καλόν. hinc adeo ductam esse

esse Pauli illam formam orationis, *Rom. I, 19.* διότι τὸ γνωστὸν τῷ Θεῷ πάντες ἔτι ἐν αὐτοῖς: quo loco frustra, inficta sermonis, argutati sunt interpretes, non *Deum* simpliciter agnoscetes, sed τὸ *cognoscibile Dei* exprimentes. In hac igitur arbore ita perspicuum est praecepti diuini (*II, 16.*) arbitrium, nihil habens coniuncti cum lege naturali, et necessitate naturae vel diuinæ vel humanae, nec sanciens, quod per se iustum sit, sed, quod per se plane indifferens erat, efficiens, ut iustum et iure debitum esset, ut dubitationem nullam res habere possit. Acquiescendum igitur erat in illa perspicuitate narrantis rem tantam historici diuini. Sed, ut ante dixi, illud *ἡθελογίον*, illud arbitrarium et voluntarium, quod est in illo praecepto, atque etiam, ut opinor, simplicitas rei offendit homines, nolentes, ut in tota vita, ita in rebus diuinis simplicitate acquiescere, cupientesque in rebus omnibus rationibus e natura rerum ductis uti, effectique, ut id tollere cuperet ingenium humanum. Atque hic non diguer commemorare ac refellere eorum insaniam, qui rem ad obsequenitatem traxere: quod non est *Beuerlandi* inuentum, sed multo antiquiorum nebulonum: primum exorti sunt, qui abstinentiam fructus illius sancitam contenderent, quod esset venenatus, et vitae hominis perniciosus, a qua sententia non est alienus *Clericus*: atque ita totum hoc praeceptum, liberae Dei voluntati ereptum, ad naturae necessitatem transferrant. In quo non viderunt, se statuere, quod esset iniuriam in Deum, et hominem, imagine diuina praeditum, denique contrarium narrationi et verbis Moysi, qui, quod omnibus aliis arboribus communiter tribuerat, ut earum fructus essent et ad adspectum pulcri, et ad esum suaves (*II, 9.*) idem tribuit huic arbori, et in illo ipso loco: *עץ חַי* in his arborem vitalem: sic enim τὸ *χ* accipiendum: et alibi (*III, 6.*) Nam in ista pulcritudine et suauitate fructuum inesse significationem salubritatis, et excellentis fructus, et res indicat, et vsus bene graece

Ernesti Opusc. Theol.

O

loquen-

loquentium. *Diodorus* quidem *Siculus II*, p. 136. edit. *Rhod.* palmas laudans Arabiae, et ceteris omnibus praeferens, eius dactylos esse, ait, eiusmodi, ut ὡς αὐτῶν ἄμπε καὶ τὴν ὄψιν τέλειται, καὶ τὴν γεῶν ψυχαγωγῶται, una et oculi delectentur, et gustus delinatur: quem locum cum Mosaico conferre non neglexit *Wesselingius* V. C. Iudaei autem veteres, historiam Mosaicam etiam per allegorias conferre conantes ad usum piorum, commiserunt, ut quidam totam rem, sublata historica veritate, in allegoriam conuerterent. *Philo* quidem, (*de Opific. mundi* p. 35.) dixerat, arborem illam esse symbolum prudentiae, αἰνίσσασθαι φρόνησιν τὴν μέσην, διαχέ-
vasan τὰναντία φύσει, prudentiam quandam mediam, quae res contrarias distinguat, atque discernat. Hunc secuti sunt Christiani, auctores inprimis *Origens*: non, ut historiam tollerent, sed, ut allegoriam adderent. *Ambrosius* quidem, quem, *Hieronymus* (*Ep.* 65.) docet, compilasse *Origenem* in *Hexaëmero*, haud dubie eundem compilavit in libro de *Paradiso*. Enimvero, qui utrumque librum cum *Philone* contulerit, reperiet statim, eum in summa operis cum *Philone* consentire: additis tamen quibusdam, velut interdum de *Symmachi* et *Aquilae* lectionibus, ut de *Parad.* c. 5. quae sunt fortasse et ipsa ex *Origene* sumpta. At ille saluam relinquit historiam, et negat aliquid reprehendi debere, quia rationem non intelligamus, c. 2. sed eo praecepto neglecto, longius progressi alii, totam rem in allegoriae figuram conuerterunt, ut diximus, et ita legem Dei voluntariam sustulerunt. In quo illi decepti sunt imitatione gentilium, qui illis temporibus, cum sustinere non possent Christianos, demonstrantes dementiam religionis gentilis, ad allegorias confugerant, et totam Theologiam suam in physica decreta et moralia praecepta conuerterant. At hi tamen habebant aliquid, quo suae rationi speciem aliquam veritatis conciliarent, cum dicerent, poetarum hoc esse, ut res quasque figuris et fictionibus ad delectationem aptis inuoluerent.

rent. Cuiusmodi nihil habebant Christiani, quo allegorias suas tuerentur. Quis enim non intelligit, quam sit alienum a sensu communi, eum, qui historici munus sustineat, res narrandas per figuras tradere, et poeticis fabulis obscurare. Est igitur certum ac nullo modo dubitandum, abstinentiam ab arboris fructu sancitam esse a Deo, in eaque legem esse Dei voluntariam, quae nullam habeat cum natura diuina humanaque necessariam coniunctionem.

34. Sed in iis, qui legis illius arbitrium agnoscunt, non pauci dubitant *de Sabbathi lege*, an ea in principio rerum humanarum sancita fuerit, nec ne. Nobis quidem minime dubium est, quin haec altera lex voluntaria primo homini fuerit imposita. Cuius sententiae nobis ratio reddenda est. Maxime autem moueor, non ἀγλαΐσως duritie, quae offendeat *Lud. Capellum* Disp. de Sabb. Iud. I. §. 30. (*Thef. Salm. T. III. p. 578.*) et altera in *Opp. p. 264.* et alios, me nequaquam, qui nihil in ea duri sentio: sed verbo Mosis, non hoc, quod *F. Spanhemius H. E. p. 275. a.*) aliique vrgent, admonitu interpretis graeci, qui עֲשֵׂה יוֹם כְּיוֹם vertit τῇ ἡμέρᾳ ταύτῃ: in quibus nihil emphaseos, aptae ad vincendum id, quod quaeritur, video; sed עֲשֵׂה יוֹם כְּיוֹם, quod qui integer, et nullo dam occupatus opinionis praeiudicio, legit, non potest aliter accipere, quam *tum consecrauit*: cum in totius superioris capitis narratione, hebraica copula ita constanter hanc vim obtineat, vt credibile sit, Mosen, si dicere voluisset id, quod *B. Lutherus* expressit, intelliguntque, qui eius sententiam sequuntur, consulturum lectori, et, exclusa ambiguitate, dicturum fuisse עֲשֵׂה *propterea*, vt dixit II, 24. *) item de hac ipsa re *Exod. XX, 11.* Atque hoc

O 2

*) Obiter notanda videtur Clerici ad illum locum inicitia, LXX. verbum כְּיוֹם verterunt ἡμέρας ποιῆσαι. Hic iure castigat *L. Capellam*, qui graecos interpretes aliud habuisse in codice suo putabat, inicitia verborum graecorum: ipse casti-

hoc potius argumento, quam legis suae extollendae causa, veterimos Iudaeos idem existimasse censet, ut e *Philone* (*Opif. M. p. 20. et aliis locis*) et *Iosepho* (*Ant. I, 1. 1.*) patet: quorum auctoritas in tali re non videtur contemnenda. Nam recentiores Iudaeos, eiusdem sententiae auctores, facile concesserim, parum auctoritatis habere. Atque etiam inde patet, sabbatum non primum lege Mosaica institutum fuisse, quod eius celebrati et servati mentio sit ante legis Mosaicae promulgationem *Exod. XVI.* nec credibile est, Mosen primam eius originem tradere noluisse. Atque hic disputant Theologi eruditissimi, haec lex utrum prorsus arbitraria sit, et positiva, ut in scholis loquuntur, quod late defendit *Spencerus*, in eruditissimo de *Legg. Hebr.* sed in summa rei a veritate alienissimo opere (*I, 5.*) an e natura rerum ducta, an denique ex utroque genere mixta: quae est maxime probabilis sententia. Sed habet tamen haec sententia quasdam cautiones: de quibus paucis dicemus.

35. In ipso rerum principio, hominibus adhuc integritatem retinentibus, vita eorum profecto tota erat sabbatum: cum terra benefica ipsis sua sponte suppeditaret omnia, nec expectaret, dum eorum labore ad largiendum victum vel sollicitaretur, vel cogeretur. Itaque nihil agere homo magnopere poterat, quam opera diuina contemplari, cum admiratione potentiae, sapientiae, et benignitatis diuinae, et Deum laudibus offerre: fuitque illa vita imago coelestis vitae, quae et ipsa perpetuum sabbatum est habitura. Vnde fit, ut tum quidem in lege de sabbato nihil fuerit, nisi arbitrium Dei, volentis homi-

castigator pari inscitia, non legisse eos in hebraico exemplo, ait, quod esset *ἡξάτο ποιῆσαι*, sed verbum hebraicum ita intellexisse. Immo *ἡξάτο ποιῆσαι*, est nihil aliud quam *ἐποίησε*, et illud *ἡξάτο* centies sic redundat, ut apud Latinos *coepit*. Ita parvae observationis ignoratio tenebras doctissimis viris affundit.

hominēs hac die vel maxime colere creati mundi memoriam, et sui in se dominii e creatione meminisse: in quo plane et ad verbum locum habebat illud *Ezechielis* (XX, 20.) *Conseruate Sabbata mea, quae sunt signa inter nos, positi, vt intelligatur, me esse Iouem Dominum vestrum.* Sed quod ab initio fuerat mere voluntarium, id mox accepit aliquam e natura hominis conuenientiam, et prope necessitatem, aucto genere humano, et per Adami atque Euae culpam aditu corruptelae vitiorum in genus humanum dato: quae prospiciens Deus, tanto magis de sabbato cauendum putauit, ne tanto celerius memoria dominii sui aboleretur: et ad impietatem homines prolaberentur: quod vel sic plus satis cito factum esse constat. Iam etsi, religione Christiana constituta, videri potest sabbatum perpetuum inductum esse, debentque adeo vari Christiani semper animis *σαββατίζεν*, etiam inter medios labores honestos, quod est vnum verissimum, et Deo gratissimum, et coelesti illi simillimum sabbati agendi genus: tamen, quia conueniens est pietati, etiam publice coli Deum laudibus, et memoria beneficiorum eius celebranda, et deprecationibus placari, nulloque modo sperari potest, scientiam rerum diuinarum conseruatuos homines, nisi, conuentibus publicis habendis, vel eorum, quae didicissent puerili institutione, admoneantur, vel plura doceantur; propterea, quamquam abolitis institutis veteribus voluntariis omnibus, tamen diem constituerunt Apostoli, vt credere fas est, *1 Cor. XVI, 2.* qui sanctus esset Christianis, et creati a Deo, et recreati, per Christi mortem et *ἀναβίωσιν*, mundi, h. e. omnium beneficiorum diuinorum memoriae laudibus celebrandae. Quae solent a Theologis hunc locum tractantibus latius disputari: a multis tamen, quod non probem, ita, vt necessitatem naturalem intelligi velint, et fontem morales rationis in die Dominica repetant ab ipsarum natura necessaria. Quanto melius erat, manere in eo, quod nos credere, ac defensuros iurauimus: *Aug.*

*Conf. art. ult. p. 68. qui putant pro Sabbato institutam esse diem Dominici observationem, tamquam necessariam, longe errant. Scriptura abrogavit Sabbatum - - et tamen, quia opus erat, constituere certum diem, ut sciret populus, quando conveniret, apparet, Ecclesiam ei rei destinasse diem Dominicum etc. quod pariter planiusque docet B. Lutherus in Catech. Mai. ad Praec. III. vbi et reliqua, et illud, quia opus erat, bene explicat. In quo ii, quibus ab hac professione desciscere placuit, mirabiliter faciunt, cum dicunt, esse *δυσωστόν*: cum nihil planius ac magis perspicuum dici possit: et si in tanta perspicuitate per *δυσωστόν* praetextum licet plane contrarium statuere, atque etiam pro *ἐξουδοζία* venditare, quidlibet licebit facere e quolibet: nec quisquam dubitabit in libros symbolicos torrare, quamvis in multis diversa ab iis sententiae, cum remedium tam lene in promptu sit, ut ea ad *δυσωστόν* referat. Sed non est huius disputationis, hunc locum absolute tractare, et est ille ab aliis in hanc partem explicatus, ut Io. Fecktio in *Exerc. de Sabbato* inter *Schediasm. SS. p. 553. sqq.**

36. *A corrupti generis humani tempore, cum Deus, consultum iturus miseris hominibus, spem salutis proposuisset per eum, quem tum semen mulieris, post Abraham, denique Davidis appellavit, (in quo attentus Christianus vestigia sapientiae divinae facile agnoscet) lex salutis consequendae fuit fides, huic promissioni divinae tributa, et spes nixa in illo ipso, per quem salus esset futura. In quo nemo erit, quin liberam Dei benignitatem agnoscat. Nam profecto illi ipsi, qui hanc fidei legem, ut Paullus appellat, creptum eunt Veteri Testamento, nulla alia re magis moventur, quam quod id ad legis necessitatem redigere cupiunt, nec arbitrio diuino volunt cedere. Sed nihil vetat, illam ipsam fidem V. T. quamquam ab aliis dudum factum scimus, nostro modo vindicare, cum id summa disputationis nostrae requirat. Atque Apostolos quidem existimasse, sanctos in V. T. homines per fidem*

fidem Deo placuisse, et salutem reperisse, dubitare non sinit ea, quas *Paulus* de Abrahamo *Rom. IV.* et *Gal. III.* §. disputat, et *Hebr. XI.* Quo in loco etiam quaedam exempla sunt eiusmodi, ut non proprie ad fidem iustificantem pertinere videantur, sed ad fidem, cuiusque vel dicto vel promisso diuino tributam: quod etiam patiebatur definitio fidei, in principio proposita, quae est ita generalis, ut cuiusque fidei conueniat: tamen finis disputationis, pertinens ad iustificantem fidem (X. extr.) arguit, hanc alteram fidem gratam Deo iudicari ex eo, quod ab illa esset profecta: existitque argumentatio haec, ut, si omnis fides Deo grata fuerit, et maxima sit praemia, multo magis ea gratos Deo reddat dominos, quae ad nobilissimam eius promissionem pertineat, de vita aeterna propter Christum speranda: quo genere argumentandi in contrario utitur *Paulus* in eadem epistola *II.* 2. In Vetere autem Testamento, cum adhuc incorrupta esset summa doctrinae diuinae, idem credidisse Ecclesiam Iudaicam, cum alia arguunt, tum vel illud argumento est, quod Iudaici scriptores longe magnificentius de fide loquuntur, quam de vlla alia virtute, eamque reginam faciunt omnium virtutum, et summum religionis caput, veluti *Philo de Abrahamo* p. 387. et aliis locis, quae, cum aliis Iosephi et Doctorum Iudaicorum, collegit *Grotius* ad *Hebr. XI.* 1. et *Rom. IV.* 3. Cuius rei ratio nulla idonea reddi potest, nisi eas reliquias statuamus veteris et incorruptae sententiae, quam non plane sublatam fuisse ex Ecclesia Iudaica, docent exempla piorum, qui Christi tempore fuerunt. Natura homines procliuas sunt, ut ante dictum est, in hanc partem, ut res religionis ad rationem et ad legis necessitatem reuocare conentur, atque eam ob causam etiam fidem sub legem redigere ausi, ex ea virtutem moralem effecerunt. Quod tanto minus est mirandum in Iudaeis, quibus minus clara lux, quam nobis affulserat (2 Petr. I, 19.) cum etiam inter Christianos, in tanta sacrarum litterarum N. T.

luce, extiterint permixti, ut Pelagiani olim, recitationibus temporibus Sociniani, Arminiani, etque etiam alii, qui eodem modo offenderent: in his etiam, qui contra *Andalium*, et religionis essentialis Auctorem scripserit. Praecipue, ut mihi quidem videtur, causa erroris fuit haec, quod scriptores veteris Testamenti, quia tum erat *εισφορμὰ τῷ νόμῳ*, referre solent summam vitae pie ad legis observationem, nec ita discrete fidem in Messiam commemorant, sed fere effectus eius ponunt, et fructus certos ac necessarios, pro causa, quod e disciplina religionis uniuersa constaret, cum virtutum, et praeceptorum diuinorum vel seruandorum vel seruatum mentio fieret, in eo fidem de salute per Messiam speranda sua sponte intelligi. Cuius generis exempla plurima etiam in N. T. libris occurrunt, ut in loco insigni Gal. VI, 13. coll. V, 6. Nam etiam Christus ipse interrogantibus, quid agendo felicitatis coelestis spem certam haberent, legem seruare iussit, intelligens id, sine quo lex seruari non potest, h. e. fidem. Ita saltem intelligendus est locus de miserando iuvene illo *Matth. XIX. 16 sq.* (neque enim placet ironia, quae et hic et alio loco inesse in Christi verbis vulgo putatur) qui cum se respondet legem seruasse a puero (sicut Iobus, nullius sibi se culpae inde a pueris conscium, dixerat) in eo ipso fidem supponit, quia vere respondet. Neque enim mihi persuadere possum, in interrogatione hominis: *τί ποιῶν, quid faciendum mihi est*, necessario inesse superbam opinionem salutis per legem consequendae, cum et ipse ad genua Christi prostratus *Marc. X, 17.* modestum animum ostendat, et similiter interrogat magister carceris *Act. XVI, 30.* et utatur verbo *κατανοεῖν*, in quo, dicunt vulgo, esse gratuiti beneficii significationem: aut in responso isctationem inanem, cuius vulgo accusatur, cum Christus eum amasse eius rei causa dicatur *Marc. X, 21.* in quo misere se torquent interpretes, tenaces opinionis vulgaris, de superbia inani hominis; cum longe aliud sit, in quo miser ille pecca-

peccarit; de quo alius erit commodior disputandi locus. Non inutiliter hic, h. e. de fide in Y. T. comparabuntur bene disputata a *Le Capello* in egregia *Distributio de praerogativis Eccles. Christ. supra Iudaeam* §. 3. 4. in *Opp. Capellorum* p. 2 16. 399.

36. Enimvero fidem illam, cui spes certa salutis est proposita, per se nullam habere coniunctionem cum natura rerum, et lege divina, quae eam trahi a nonnullis dicit, sed meri arbitrii divini decreto, sapientiae illo et benignitatis, ut tertia parte docebimus, plenissimo, factam esse legem modumque salutis consequendae, id quidem etsi prope sua sponte intelligitur, tamen non vno argumento intelligi potest: quae ponemus breuiter, ut ea facilius intelligantur, quae tertia parte disputabuntur: earum quo etiam alia locis profectura studiosis speramus. Ac primum, si etiam legis ipsius moralis quamvis perfecta et omnibus numeris absoluta conservatio, qualis esse poterat in homine ab omni vitio integro, tamen ad felicitatem coelestem aditum dedit, non sua natura, ac naturali aliqua necessitate, sed arbitrio divino propter eas causas, quas parte superiori exposuimus: clarum est, id multo magis esse dicendum de fide, quae in illius locum successit, propterea, quod omnia ea argumenta, quibus illud vicimus, multo magis cadunt in fidem: nec quicquam in ea, quoad est in mente animoque hominis, intelligi potest, quod possit hanc vim habere per se et suapte natura, ut ei Deus tantam illam felicitatem debeat concedere, aut quod habeat naturalem aliquam ac necessariam cum ea copulationem. Res igitur sic habet. Deus cum vellet supromere et in conspectum intelligentium naturarum proferre vim suam, et sapientiam, et vero maxime benignitatem, iis destinavit vitam beatissimam, cuius initia quaedam essent in his terris, perfectio et consummatio in coelo. Id erat benignitatis merae ac liberae, ut omnes intelligant. Quae enim vis ac necessitas cum poterat ad

eam rem adigere? Sed eosdem volebat esse sanctos, a vitiis puros, et omnibus virtutibus ornatos: non, ut propter sanctitatem ad eam felicitatem venirent, illaque esset huius efficiens: quomodo enim? sed quod non deceret Deum, sanctitatemque eius summam, non sanctis atque improbis dare velut praemium impietatis. Homo igitur peccando, quantum in ipso fuit, irrita reddidit benignitatis diuinæ destinata: non, quo benignitatem diuinam sustulerit, quæ mutari ac diminui non potest, sed quod sanctitatem diuinam aduersariam sibi facit. Ecce Deus rationem iniit, qua benignitatem et sanctitatem suam velut in concordiam redigeret, expiandis per Christum peccatis humanis omnibus, atque ita reddidit hominibus salutis spem. Sed quando ei ius est, modum accipiendorum beneficiorum statuere, ut supra vicimus, placuit ei modum statuere hunc, ut fides in Christum esset in iis, qui ad eam salutem adspirarent. Ea quamquam est effectrix verae sanctitatis, idque in statuendo modo illo aliqua ex parte spectauit Deus pro sanctitate sua: tamen non ob hanc vim, eum Deus voluit esse modum consequendae salutis, ut clare patet e multis Christi dictis, et diserta Paulli in epistola ad Romanos disputatione, idque ipsum sapientissimis et benignitatis in homines plenissimis de causis, sed per se: idque diligenter et arte tenendum, nisi totam rationem Christianae religionis (*αὐτοῦ ἑκείνου* Paulus appellat) conturbare velimus; quod faciunt hi, qui fidem ita definiunt, ut non tam ad benignitatis diuinæ arbitrium, sed vel maxime ad sanctitatis rationem referant: unde et in doctrina ipsa incommoda atque erroneae, et in animis hominum dubitationes et sollicitudines oriuntur. Nam, qui summam fidei esse dicunt in eo, ut statuamus firmiter, fieri non posse, ut aliter quam per I. C. et alia quam per ipsum praescripta ratione (ita scilicet interpretari videntur per I. C.) aeternam mortem euadamus, et contra vitam aeternam consequamur (*Remoustrantes in Confess. c. XI. §. 2. ¶. 35.*) unde volunt existere obedientiam

tiam Christo debitam: hi profecto rem omnem in salute consequenda, atque ipsam adeo fidem, reuocant ad sanctitatem, et ad noua argumenta sanctitatis persequenda; quae a Christi auctoritate et praeceptis ducantur; in quo iis prolusit Socinus cum gregalibus. Etenim fides si est ipsa illa ratio, quam Christus e libero Dei decreto praescripsit, consequendae salutis: quomodo ea demum potest statuere, salutem esse petendam ea ratione, quam Christus ostenderit? Quae enim est illa ratio? Certe a fide diuersa: quia fides modo statuit, eam sequendam esse. Hanc igitur si volent dicere nominatim, et non abdere se in vagis et generalibus formulis, necesse habebunt confiteri, eam se ponere in sanctitate, quod tamen ipsi a se amoliri conantur (in *Apol. c. Censuram Theol. Leid. p. 110. b.* et alibi.) Quod si ista fides est, cum statuimus, salutem esse quaerendam, praescripta diuinitus via: etiam Adamo per fidem salutem petendam fuisse dicemus, etiam per fidem peteretur salus, si Deus solam legis naturalis obseruationem requireret. Quae quam sint aliena, omnes vident. Atque etiam, si fidei notionem fecerimus hanc, vt eam non nisi haecenus, quoad virtutis magistra est atque opifex, salutem dare dicamus, efficietur; vt salus non sit a fide sola, et per se, (cui tamen hoc diserte attribuit Paullus) quoad est scilicet via salutis per Christum reparatae, a Deo nobis praescripta, sed a certo quodam eius gradu ac robore, quod sufficiat ad subigendas cupiditates, vt volunt, et seruandam legem diuinam: ex quo non modo consequetur, vt non liceat *incipientes ac proficientes* (p. 37.) statuere, nec *fidem imbecillam ac firmam et robustam*, cum sacris literis, sed vt magna etiam sollicitudo iniiciatur animis, an ad illam *firmitatem statuendi* peruenerint: cum Deus vel maxime hoc spectarit in fide, vt omnibus angoribus liberaret, ac plane tranquilaret animos hominum salutis cupidorum, omnia ad Christum, et in eius morte *ἀνάστασις* referendo. Sed haec pro vsu partis tertiae satis disputata sunt.

38. Primis statim a corrupto genere humano temporibus *Sacrificia* commemorantur, *Gen. IV, 3*. In iis esse nullam naturalem rationem Dei colendi, in eo consentiunt omnes, praeter quosdam veteris Ecclesiae, itemque Romanae doctores, qui sacrificia legis naturalis esse contendunt, propterea, ut Missae sacrificio praesidium parent, velut *Bellarminus de Sacr. II, 31*. adstipulante *Socino Prael. Theol. t. 22*. sed alia de causa, h. e. ut illa sacrificia nihil pertinuisse vincat ad Messiae sacrificium expiatorium: utrum a Deo hominibus discrete praescripta fuerit ista sui honorandi ratio, an humano ingenio pie reperta, et a Deo probata, in eo controuersiae esse aliquid potest. Et *Bellarmini* quidem *Socini*que opinio saepe refutata est a doctissimis Theologis, qui in Romanae Ecclesiae *Socini*que erroribus profligandis elaborarunt, et nostris a *Scherzero Calowie*que, etiam a *Buddeo* copiose in *H. E. V. T. I. p. 143*. et *Theol. Dogm. I, 1, 23*. quos adeant, qui hanc disputationem cognoscere cupiant. Quamquam vix est opus accurata eius opinionis refutatione, cuius vanitas in ipsos oculos incurrat. Religio, quam naturae lex necessaria sancit, tota est in animi pietate, nihil coniuncti habet cum corporeis externisque rebus, in quibus nulla naturalis ac necessaria vis inest ad Deum colendum, sed, si quam habent cum pietate coniunctionem, eam nae sunt arbitrio vel diuino vel humano, nec ea intelligitur per se, quod esse debet in naturalibus religionis partibus, sed interpretatione. Quod autem ad alteram quaestionem attinet, fatemur, saepe nobis idem visum, rem diligenter considerantibus, quod *f. Henr. Hottingerus, V. C. in Exercitt. de Origine sacrif. Patriarch. I, 4. *)* iudicabat, nondum eam ad liquidum perductam, et satis idoneis argumentis firmatam sententiam

*) Primum editae sunt *Marpurgi* 1706. curia posterioribus emendatae et auctae prodire in *Museo Helu. T. I P. II. et III.*

etiam alteram, quae ad arbitrium diuinum refert sacrificiorum vitima initia, neque illius ipsius *Hottingeri* confectus nobis satisfecisse. Etenim primum, ipsa disputationis ratio non satis subtilis et accurata est in eo, quod ad vniuersum sacrificiorum genus refertur, et, quae de vna parte valent, ea transfert ad genus totum. Noachum quidem et Abrahamum iussos esse a Deo victimas caedere, totamque sacrificiorum disciplinam Mosaicam diuinitus institutam fuisse, de eo nulla dubitatio potest esse iis, qui literarum sacrarum diuinitatem agnoscunt: sed ex eo non necessario sequitur, prima sacrificia Adami et filiorum eius iussu diuino facta esse: nec evidens absurditas est, si quis dicat, Deum sacrificandi morem, ab Adamo pietatis et fidei testandae et proferendae causa pie institutum, probasse, et auctoritate sua corroborasse, et ad usum latiore contulisse. Verissimum profecto est, hominibus piis et prudentibus nullo modo in mentem venire potuisse, ut crederent, per victimas expiari posse peccata, Deumque sibi iratum placari: quod ne *Spencerus* quidem ausus est affirmare: unde ei argumento inprimis confidit *Hottingerus*: sed id de vna parte sacrificiorum, expiatoria, valet: parum subtiliter transfertur ad genus totum, aut ad prima illa, de quibus traditur, sacrificia; quae non ἱλαστικά, sed εὐχαριστικά fuerunt, nec ad expianda peccata, sed gratum animum testandum comparata: quippe in Cainis sacrificio, nullus sanguis, nulla αἰμαρροχυσία fuit, sine qua nullum peccatum expiatur, *Rbr. IX, 22*. Abolis autem sacrificium e primogenitis pecorum foetibus fuit: quod genus eucharisticum esse satis constat.

39. Iam quod ad ipsa argumenta attinet, quibus vinci posse existimant, homines instituisse primum sacrificare iussu diuino, ea non sunt eiusmodi, ut apud subtiliter eorum pondera aestimantem multum valere possint. In quibus maxime solenne est hoc, quod in sacrificiis, humano ingenio inuentis, ἱεροθεσμίαν, hoc est, ut vulgo

vulgo illud vocabulum interpretantur, quamquam inuita linguae graecae ratione, commentitiam religionem, esse aiunt, quam, Adamus ignorare non potuerit, Deo minime probari. In quo mihi videntur viri docti religionem commentitiam confundere cum institutis et ceremoniis ad exercendam atque in lucem proferendam fidem et pietatem aduersus Deum inuentis; in quibus si est *θελοθρησκεία*, omnes etiam nostrae Ecclesiae ritus, non diuinitus institutos, et ad *θελοθρησκείαν* referre et abrogare necesse habebimus; quos tamen recte contendimus seruari, et vtilis esse, si ii non per se probentur et suscipiantur, sed, quod habeant vtilem admonitionem, et quandam fidei pietatisque exercitationem, vt praeclare docet *August. Confess. art. XX.* *Εθελοθρησκεία* est in omnibus ritibus externis, fuitque etiam in sacrificiis Iudaicis, quamuis a Deo institutis, si per se crederentur Deo placere, sine fide et pietate, eaque tum Deus, vt a se non praecepta, repudiat, *Pf. L, 9-14.* non autem in institutis piorum hominum, apte excogitatis ad proferendam exercendamque pietatem: in quibus inest quaedam disciplina religionis, non ipsa religio. Sane melius est, hanc quoque disciplinam externam a Deo constitui, vt prima Parte ostendimus: sed Ecclesiae prudentiae etiam in ea aliquid iuris et libertatis concessum esse; verissime defendit eadem illa *Augustana Confessio.* Quodsi Deus non ipse Sabbati ceremoniam instituisset, sed Adamus sua sponte eundem diem memoriae creati et perfecti a Deo mundi, precibus et hymnis celebrandae, consecrasset, an in eo commentitiam religionem, non potius institutum pium et vtile pietati alendae et exercendae fuisse diceremus? At sacrificia, aiunt, nil habent in se, quod Deo placeat. Nemo dubitat. Quid amplius? Ergo hominibus piis et sapientibus non potuit de iis venire in mentem. Hoc quidem nimium est. Nam pari ratione liceret colligere, Deo sapientissimo de iis in mentem venire non potuisse. Sane non potuit hominibus piis
et

et prudentibus in mentem venire, in sacrificiis esse gratum Deo cultum per se: id nec Deo venit in mentem: sed potuerunt credere, hunc esse aptum modum externe aliquo signo testandae atque adeo exercendae fidei et pietatis, quod fuit ipsius Dei consilium. Quo loco miror *Hottingerum* usum esse verbis *Davidis* e *Pj. L.* ut ostenderet, in sacrificiis humanis nihil esse, quod Deo placere possit, cum ibi sermo sit de sacrificiis ab ipso Deo institutis. At *Abelis* sacrificium Deo placuit propter fidem *Ebr. XI.* (v. *Hottingerus* §. 15.) Sane. Nam nihil omnium, quae religionis causa vel de praecepto diuino, vel de instituto Ecclesiae, facimus, Deo aliter placet. Sed si inde sequitur, sacrificium *Abelis* de Dei praecepto factum esse, pari ratione sequatur necesse est, *Cainis* sacrificium, quod Deo displicuit, non de praecepto diuino factum. Quod si hoc non est consequens: cogitur, ut ne illud quidem. Quid autem? animalium in pura et impura distributio (*Gen. VII, 2.*) non ad sacrificia pertinet, et diuini ea instituti iam tum fuisse arguit? Hoc quidem speciosius est. Sed tamen nihil est admodum, quod respondeamus iis, qui id discrimen vel ad rationem cibi humani pertinere dicant, cum ipsae literae sacrae eo quoque referant (*Luc. XI. Act. X.*) vel ab hominibus, in sacrificandi more, constitutum esse: cum dubitari non possit, quin homines nulla alia animalia in victimarum numero habuerint, quam quibus ipsi vescerentur. Plurimum tribuerim rationi eorum, qui dicunt, intelligi vix posse, quomodo *Adamus* in id consilium inciderit, ut sacrificia institueret, iisque fidem pietatemque exerceret. Sed tamen et illud fatendum arbitror, nullam in eo repugnantiam intelligi posse, et vix pro certo dici posse, quid hominibus in tali re in mentem venire possit nec ne: cum sint in moribus et institutis humanis multa alia, quae quomodo hominibus in mentem venerint, intelligi et demonstrari vix possit.

40. Placet igitur, originem primam sacrificiorum esse humanam? Sane non video, quid habeat aut absurdum, aut ad religionem incommodum, si dicamus, Adamum sua sponte instituisse sacrificia, non omnia, sed eucharistica, et eam rationem Dei deinde iussu ad alias partes religionis translatam, et nouis generibus, inprimis expiatorio, uictam esse: sed tamen malim uniuersum genus a Dei praecepto et instituto deriuari. Primum, quia Deus de die ipse constituit, quam vacare a negotiis curisque vitae humanae, et sacram ac solennem cultui sui vellet, cum tale quid hominibus piis ipsis venire in mentem, perspecta aequitate et utilitate, et vero etiam necessitate rei (§ 34) posset: valde credibile est, eum etiam de modo sui publice colendi, nominatim per sacrificia, sanxisse: praesertim cum videamus, postea, Sabbatis Iudaeorum, festisque diebus, maxime solennem cerimoniam fuisse in sacrificiis. In quo porro Deus consulere homini potuit, ut certus esset, eam rationem Deo probari, seque sacrificiis si fides et pietas non desit, gratum ei facturum: in quo magnam partem animi tranquilli esse supra ostendimus (§ 8.) Atque etiam Adamus, cum tristi experientia didicisset, quam periculosum esset, in rebus ad Deum pertinentibus, iudicium suum potius, quam ipsius Dei sequi, vix videtur in religione aliquid sua sponte instituerere ausus esse, sed omnia ad voluntatem et praeceptum diuinum retulisse: quod ei licebat tanto maiori cum fiducia facere, atque expectare, dum Deus aliquid praeciperet, cum sibi alia iam a Deo praescripta et tradita sciret.

41. Praeter Sabbatum et sacrificia nihil est, quod ante diluuium Noachicum a Deo religionis causa constitutum sciamus. Sed Noacho lex data est *de abstinentia sanguinis*, Gen. IX, 4, quam non esse iuris naturalis ac necessarii, sed voluntarii, quiuis intelligit. Ea lex quamquam civilis potius est, quam sacra, civilisque magis securitatis, quam

quam religionis causa sancita est: tamen hactenus referri ad religionem posse videatur, quod quicquid Deus praecipit ac vetat, in eo vel faciendo vel vitando religio est. Atque a Iudaeis quidem omni tempore, ut ceteras de ciborum discrimine leges, ad religionem relatas, et super ea ab Apostolis, hanc ipsam ob causam, decretum factum esse, (*Act. XV.*) satis constat. Sed quoniam tamen proprie non pertinet ad religionem, et Dei colendi modum, nec in ea aliquid est aut obscuritatis aut difficultatis, plura de ea dicere nihil attinet.

42. Sequuntur duo V. T. *Sacramenta*, *Circumcisio* Abrahamo sic praecepta, ut ad omnem eius posteritatem propagaretur, et *Agni Paschalis* epulum, per Moysen a Deo, sub exitum Israelitarum ex Aegypto, institutum, hac lege, ut ea cerimonia esset perpetua et anniuersaria. In utroque esse partem religionis magnae, nec sine salutis dispendio negligendae: sed a parte Dei voluntariae, de eo neminem arbitror dubitare: neque est, quod hanc in partem disputemus: et dicetur aliquid infra, §. 55. sed ne hunc de Sacramentis V. T. locum sine aliqua utili studiofis observatione dimittamus, age, per hanc occasionem videamus, an aliquid lucis afferre possimus loco in Theologia non ignobili, et disputationibus ac dissensionibus Theologorum nostrorum agitato, *de re coelesti* (*materiam* vulgo vocant, latinitate scholastica, non Romana: cuius inscitia et ipsa conturbavit Theologos multos) *Sacramentorum V. T.* Ienenfes quidem Theologos, video, non agnoscere in V. T. rem coelestem, ut *Himmelum*, *Gerhardum*, *Musaeum*, *Baierum*; quam opinionem, non video, quomodo satis conciliare possim cum vera Sacramenti notione, in qua requiritur profecto aliqua coniunctio rei visibilis cum beneficiis coelestibus et cum religione, nec sine ea Sacramentum, quod propria dicimus in arte ac schola, intelligi, ut opinor, potest. Sed viros doctissimos in dubitationem adduxit non satis intellecta

Ernesti Opus. Theol.

P

Sacra-

Sacramentorum V. T. natura, quoad ea vim habet ad hanc quaestionem illustrandam, et ab iis, quae contra eos disputarent, non satis explicata. Videamus igitur, an eximere possimus hanc dubitationem his, qui cum illis sentiunt, explicata breuiter natura Sacramentorum V. T. quoad quidem sunt ab Sacramentis nostris diuersa.

43. Ac fundamenti loco ponimus obseruationes quasdam, a quibus bene perceptis omnis rei diiudicatio pendet. Dico igitur primum: - Sacramenta V. T. habere *σχέσιν* duplicem, quarum altera ad legem, altera ad Euangelium referatur. Causae hae sunt. Primum V. T. et si ipsum salutem per Christum promittit, vt supra diximus: tamen est et dicitur *οικονομία νόμου*, vt N. T. *τῆς πίστεως*. Itaque in omnibus institutis debuit esse aliquid, quod sit coniunctum cum lege, vel habeat rationem legis. Deinde in promissione, quae a Deo facta est Abrahamo *Gen. XVII.* cuiusque sigillum fuit circumcisionis cerimonia, semina insunt legis et Euangelii. Nam secretio posteritatis naturalis Abrahami ab omnibus ceteris gentibus, et promissio terrae Cananaeae, poena corporis constituta aduersus eos, qui circumcisionem neglexissent, legis profecto sunt, non Euangelii: at iustificatio per fidem, *Rom. IV, 11.* cuius *σφραγίς* esset circumcisio, cuiusque omnes per totum terrarum orbem compotes fierent, in quibus esset talis fides, qualis in Abrahamo fuisset, ad Euangelium pertinet. Itaque consentaneum fuit, vt Sacramento circumcisionis esset aliquid, quod ad vtramque illam rationem aliquam *σχέσιν* haberet. Similisque est ratio alterius Sacramenti. Nam securitas a perniciē primogenitorum erat legalis, quae contingeret omnibus, etiam non fidelibus, qui praeceptum Agni Paschalis seruassent: altera securitas a perniciē peccati, et morte aeterna, quae contingeret propter Christi mortem, quam agni paschalis significabat, erat Euangelica. Denique cum totius *λατρείας* in V. T. esset ratio typica, haberetque

que duas partes, alteram, quae esset in typo, siue re sensibili, quae adumbraret bona futura, alteram antitypica, h. e. bona ipsa, quae in sensibilibus rebus intelligerentur: efficitur, vt etiam in Sacramentis fuerit vtrumque, sensibilis et intelligibilis res. His constitutis, sequitur, vt in Sacramentis V. T. tria insint: primum aliquid praesens et sensibus subiectum, in quo insit ea, quam *terrenam rem* vocant: alterum, res typica, quam terrena illa significet proxime, et sine interiectu alterius, eaque inuisibilis, non per se, sed qua est in promisso: tertium, res antitypica, plane illa insensibilis atque coelestis. Haec iam ad vtrumque V. T. Sacramentum transferemus, quae remusque aliquid, cuius signum fuerit circumcisio et agnus Paschalis, quodque idem intelligibilis alicuius et coelestis boni significationem habuerit.

44. De *Circumcisione* igitur sic reperietur, *Genes. XV*, 18. post saepe repetitas promissiones, Deus Abrahamo proponit promissionem terrae, posteris eius habitandae, quod est hebraice *foedus*: eaque repetitur distinctius *c. XVII.* ita, vt ponatur primo ipsa, deinde conditio feratur Abrahamo circumcisionis. Vnde manifestum est, rem proxime significatam circumcisione esse possessionem terrae Cananaeae, posteritati Abrahami promissae. Et enim in formula quasi foederis instituti, necessario debet exprimi res significata symbolis, vt in S. Coena et Baptismo. Sed quia, vt ante demonstrauius, in V. T. omnia sunt typica, siue symbolica, haec quoque res talis esse debet, estque adeo symbolum coelestis patriae, Canaanis, quietis, per Christi sanguinem partae. Quae mirifice confirmantur disputationibus Pauli, quibus per Cananaeam terram coelestem felicitatem adumbratam ostendit, *Ebr. III*, 18. *IV*, 3. *sqq. XI*, 10. *sqq.* Quodsi Christus ipse, aut bona eius, sine typicae rei interuentu significata fuerunt in hoc Sacramento, quaeri potest, cur abolitum sit, idque et de Agno paschali valet. Enimuero est abolitum,

tum, ut cetera omnia, in quibus tantum esset adumbratio Christi et bonorum N. T. Vnde necessario sequitur, ut typicum fuerit. Non autem erat typicum, quia res terrenam, et visibilem: quod alioqui etiam N. T. sacramenta typica forent, in quibus et ipsis est res talis, quae incurrit in sensus: sed qua rem, proxime re terrena significatam. Quid? quod Paullus circumcisionem appellat *στοιχείον τοῦ κόσμου*, *Gal. III, 3*. Id nomen quomodo cadere in eam posset, si Christum proxime signaret cum bonis suis? Denique etiam circumcisionis neglectae poena corporea fuit constituta *Gen. XVII, 14. Exod. IV, 24*. quae profecto cum typo poenae, post mortem euenturae his, qui fide, qualis in Abrahamo fuisset, carerent, intelligi debet. In quo est perspicuum argumentum, in circumcisione etiam duplex bonum intelligendum esse, alterum, quod in hac vita contingeret, alterum, quod post hanc vitam speraretur. E quibus omnibus efficitur hoc, ut res coelestis in circumcisione sit vita coelestis, per terrae Cananaeae possessionem adumbrata.

45. Quod porro ad Sacramentum *Agni Paschalis* attinet, in verbis, quibus ea cerimonia sancitur, *Exod. XII*. diserte commemorantur duo, quorum alterum est Israelitarum, agnum illum rite assatum, cum pane non fermentato et amaris comedentium: alterum Dei, promittentis *transitum angeli percussoris*, h. e. securitatem a plaga ea, qua Deus, per ministerium Angeli, perniciem omnibus primogenitis per Aegyptum intulit; a quo transitu etiam nomen ritus ille accepit. Ex quo fit, ut res inuisibilis, quae proxime significaretur re Sacramenti huius terrena, fuerit ille transitus angeli interfectoris. Sed, ut ipse Agnus fuit typus Christi, olim occidendi: sic transitus ille fuit typus securitatis nostrae et liberationis a morte et perniciem aeterna, per mortem et sanguinem Christi, cuius etiam carne et sanguine, tum proprie in S. Coenae Sacramento, tum assidue *πνευματικῶς*, per fidem,

fidem, recreamur, et aduersus omnes irae diuinae terrores munimur.

46. Atque ex his etiam patet, qualis Israelitarum fides fuerit in istis Sacramentis, h. e. duplex obiectum habens, alterum terrenum, sed symbolicum, alterum intelligibile modo ac coeleste. Credere debebant promissionibus diuinis ad vtilitatem aliquam, aut securitatem huius vitae, pertinentibus, quae proxime Sacramenti ritu significarentur, sed multo magis, quoad pertinerent ad res inuisibiles, et vitam futuram. Id intelligitur etiam ex eo, quod vtrumque Sacramentum mansit pars possessionis terrae Cananaeae, et post transitum interfectoris Angeli: vt nos celebamus S. Coenam post mortem Christi, et sanguinem ab eo profusum. In quo si quis quaerat, vnde constiterit Israelitis de re, per typum illum significata? responderim, e disciplina Prophetarum, qui Israelitis initia religionis vniuersae tradebant, et interpretabantur instituta, leges, et promissa diuina: quod multis hic demonstrare non est necesse.

47. Sacramenta autem illa fuere posthaec partes duae primariae *Legis Cerimonialis*, in qua vtriusque sanctio repetita est. Tota haec lex fuit voluntaria, sanxitque res nihil coniuncti habentes per se cum natura diuina atque humana, sed, quae sanctitatem acciperent partim ab diuino arbitrio, partim ab viu humano, qui esset voluntati et consilio Dei consentaneus, hoc est, a fide vsurpantium, et obedientia erga Deum, et vniuersa animi in Deum pietate. Nam, qui secus in iis vsurpandis versarentur, eos nihil agere, quod a se iustum esset aut sibi placeret, saepe Deus professus est ipse. Ex quo intelligitur, legem illam nihil aliud habuisse, quam exercitationem fidei ac pietatis per res eas, quas Deus voluisset, et disciplinam quandam Israelitis aptam. Quae res est obseruatione inprimis digna. Etenim, qui hoc teneat, neque mirabitur, si Deum legat istas ceremonias non probasse, ne iussisse quidem, *Pf. L. et Ier. VII, 21. 22.* nec

cum *Spencero* descendet eo, ut eas Deum-inuitum, et per quandam *συγκατάβασις*, instituisse opinetur: quod eum, non malo forte consilio, operose demonstratum iuisse constat: ceterum arma ministravit religionis per diuinis libros traditae aduersariis nouitiis, quibus ad oppugnandam veritatem diuinam abuterentur: nec denique cum his offendetur illa lege, eamque ad contemptum religionis Iudaicae et librorum Mosaicorum trahet. Sed in hac lege sancienda nihil fecisse Deum, quod esset ab eius iure in homines alienum, e superiori parte disputationis intelligitur: nihil inesse, quod non consentiat sapientiae eius et benignitati, et ex eadem illa disputatione intelligi potest ab iis, qui vniuersa dicta ad res singulas transferre didicere, et distinctius tertia parte demonstrabitur.

48. Sed haec lex quamquam tota est per mortem Christi abolita *Coloss. II, 14.* idque ipsum sapientissimis de causis, ut docebimus: tamen placuit Deo, etiam in *N. T. religione* instituere quaedam voluntaria, quibus seruandis adstricta esset salutis consequendae ratio. In iis primus occurrit *Baptismus Ioannis*, deinde *Christi*. Nam Ioannem non imitatione quadam ceremoniae, dudum institutae in Proselytis initiandis, instituisse baptismo uti, dubitare nos non sinunt literae sacrae, quae rem omnem a Dei iussu repetunt, *Ioann. I, 33.* In eius autem baptismo suscipiendo veniam peccatorum atque spem salutis propositam fuisse, id ipsum intelligi potest et e professione Ioannis ac disciplina, et ex eo, quod hanc spem negat pertinere ad hypocritas, h. e. eos, in quibus non essent vera *μετάνοια* et fides, *Matth. III, 7. coll. 2. 6.* Quae res nobis dant locum disputandi quaedam, vel admonendi de *baptismi Proselytici origine et loco Apostolicorum Actorum XIX, 4.* ad Ioannis baptismum pertinente, valde illo interpretum dissensionibus exagitato.

49. De *Proselytorum baptismo* quae disputata sunt a doctissimis viris in utramque partem, ea non necesse est
hoc

hoc loco commemorari: et possunt e libellis plurimis, vulgo obuiis, cognosci. De origine eius aliquid admonere satis habemus: quod aliis cogitandi, et rem accuratius copiosiusque explicandi occasionem praebeat. Et enim, quae de ea re vel Iudaei, omnibus institutis suis antiquitatem maximam adserere cupientes, tradiderunt, vel *Danzius* (*de Antiq. baptismi Initiationis Israel.*) statuit, ea mihi semper contortissima visa sunt, nixa *lauandi* verbo, similibusque, e quibus tale quid deriuare non est interpretis, quod in verbis inest, agnoscantis, sed, quod inesse velit, exprimere per vim conantis: cuiusmodi est etiam de latino verbo eiusdem *Danzii* oppido ridicula (§. 58.) sententia, cum in verbis *Taciti* de Iudaeorum profelytis, (*H. V.*, 5.) *nec quicquam prius imbuuntur, quam contemnere Deos cet. euidens* esse, cum magna fiducia affirmat, (*nisi me omnia fallunt*, inquit,) *baptismi Iudaici testimonium*, fretus verbo *imbuendi*: in quo nullam talem vel leuissimam suspicionem locum habere, vel tiro latinitalis intelligat. Mihi autem de ea re sic videtur. Etsi Deus Abrahami genus delegerat ex omni genere humano, vt id veram religionem teneret, eamque ob causam etiam circumcisione secreuerat ab omnibus populis; tamen non modo non prohibuerat gentiles ab aditu ad vera sacra, sed etiam obscure ab initio (*Gen. IX*, 27.) clarius deinde et ipse praedixerat (*Gen. XVII*, 7. *coll. Gal. III*, 8.) et per Prophetas, Dauidem maxime et Esaiam, tempus fore, quo gentiles omnes promiscue ad communionem bonorum per Messiam sperandorum, vocarentur et adducerentur, idque fore tum, cum Messias venisset. Neque id ignorabant Iudaei, inprimis doctiores, agnoscuntque etiam recentiores. v. *Schoettgenii Hor. Talmud. T. II. p. 621.* Veteris Testamenti temporibus, quorum monimenta literis diuinis consignata habemus, aditum gentilibus patuisse ad Iudaica sacra per solam circumcisionem, ipsis libris sacris docemur: vt mirum sit, in illis temporibus origines baptismi profelytici quaeri.

Reliquo porro ante Christum natum tempore, in sacris Iudaicis suscipiendis nihil praeter circumcisionem commemorari ab auctoribus rerum Iudaicarum videmus. *Io- sephus* quidem (*Ant. XIII*, 9. 11.) in Idumaeis ab Hyrcano ad sacra Iudaica adactis eam solam commemorat. Nam Hyrcanum, ait, iis optionem hanc dedisse, ut vel relinquerent patriam, vel περιτέμνειν τε τὰ αἰδῶα, καὶ τοῖς Ἰυδ. νόμοις χεῖνθαι instituerent, in hasque duas conditiones itum ab iis esse. Sed loca sunt Prophetarum, ut *Joelis* et *Zachariae*, a Theologis Christianis dudum notata, in quibus haud obscure praedicatur baptismus Christianorum. Ex his necesse est cognitum habuisse Iudaeos, inprimis doctiores, siue sua sponte, siue interpretatione, et doctrina ipsorum prophetarum, regno Messiae initiandos homines fore baptismo. Eius autem regni initia prima recte ponebant in aduentu Eliae, a *Malachia* denunciato. Atque hinc commode intelligi possunt multa, quae vel non recte a multis capiuntur, vel ad opinionem de profelytorum baptismo trahuntur. Primum, quod, peruulgata de Ioannis baptismo fama, innumerabilis multitudo effunditur ad eum suscipiendum, id non factum propterea, patet, quod baptismo iam essent aduerti: etenim ille, si erat, ad solos gentiles pertinebat: sed quod regnum Messiae adesse audiebant, eique initiandos per baptismum homines fore, didicerant. Deinde, quod legati Consilii Iudaeorum publici Ioannem interrogant, an sit Elias, vel Christus, quia baptismos exercent; itemque, quod mirantur, quid sit, quare hoc faciat, cum se nec Eliam, nec Messiam, nec prophetam, ei rei a Deo missum, profiteatur, id clare arguit, ita esse, ut diximus, h. e. venisse iis in mentem de vaticiniis illis. Nam, si de profelytorum baptismo cogitabant, quid id ad Ioannem, qui Iudaeos baptismo impertiebat: deinde, quid opus mirari institutum Ioannis, de eo publicum consilium habere, publice mittere legatos? sed illos ipsos Patres non minus ac plebem, audita re, percussos esse cogitatione hac,

hac, an adesset regnum Messiae, tanto probabilius fit, quod satis constat, illis temporibus inter Iudaeos hanc opinionem, nixam illam vaticiniis prophetarum, fuisse, non procul abesse Messiae regnum, cum etiam esset propheta, (*Luc. II.*) cui promissum esset diuinitus, non moriturum ante, quam vidisset Messiam: quem id clam habuisse, nullo modo credi potest. Quodsi ante Ioannem fuit aliquid baptismi, quod in profelytis vsurparetur, quod nec pro certo affirmauerim, nec praeefracte negauerim, quamquam id non diu ante institutum esse potuit: id, non improbable mihi videtur, ortum esse ab illa re, quam diximus, quod scirent, ad Messiae regnum, ad quod gentiles quoque vocandi essent, aditum fore per baptismum; eamque rem iam tum adumbrare vellent. Sed hanc suspicionem aliis diligentius examinandam relinquo.

50. Enimuero illi ipsi baptismi, quos Ioannes diuino de praecepto vsurpauit, an et quomodo a baptismo Christi diuersi fuerint, disputari in scholis Theologorum solet: neque necesse est, hic eam rem explicari. Et est nimis clarum, in vtroque spem condonandorum peccatorum, et salutis per poenitentiam et fidem in Messiam fuisse propositam, atque haecenus neutrum aliquid ab altero diuersum habuisse: idque aduersus Romanae Ecclesiae Theologos abunde demonstratum a multis est. Sed quoniam quidam ad tollendam baptismi Ioannei vim abusi sunt loco *Lucae, Act. XIX, 4 sqq.* quod ii, qui Ioanneum baptismum iam susceperant, vsi esse dicantur baptismo altero Christi, propterea coeptum est in eo loco explicando laborari, et verba *ἀνέσταντες δι' ἰσπανί-ζοντο cet.* relata sunt ad illos ipsos, qui ante a Ioanne initiati essent, et ad Ioanneum baptismum ipsius suasu susceptum: h. e. non propter rationes exegeticas, quae in tali re solae sunt audiendae, nec, quae per eas clare insunt in verbis librorum diuinorum, vilo modo obesse possunt, aut repugnare summae veritatis Christianae.

Sed per illas rationes nullo modo alius sensus ex illis verbis exprimi potest, quam hic, vt, cum Paullus demonstrasset, Ioannem quidem baptismum instituisse, qui aboleret peccata, v. 4. sed per fidem in *Messiam* mox venturum; enimvero opus esse nunc fide in *Messiam*, qui venerit, et baptismo cum tali fide suscepto, post quem etiam dona Sp. S. darentur, quae solus Christi baptismus daret, tum vero, his auditis, susceperint baptismum Christi, impositisque manibus acceperint dona Sp. S. Hoc ita esse, quicumque primum hunc locum legerit, nondum imbutus aliqua opinione, existimabit, et existimavit omnis Ecclesia vetus, cuius doctores eum locum summo consensu sic interpretantur. Eam autem interpretationem non eo valere, quo quidam etiam SS. Patrum trahunt, vt Ioannis baptismus ἀτελής fuerit, sed bene consentire cum sententia Ecclesiae nostrae, de perfectione et vi baptismi Ioannei, non alienum est demonstrare paucis. Pertinet enim ad accurate cognoscendam primi in N. T. instituti arbitrarii rationem.

51. Primum, hoc negari vix sine impudentia aut magna inscitia sermonis potest, verba ἀκούσαντες δὲ semper indicare rem, orationemue praegressam, ad quam referantur, qua audita dicantur homines aliquid cogitasse, decreuisse, fecisse cet. referrique ad orationem primariam, non verba a dicente relata. In ipsis libris sacris sic ea forma est omnibus locis, vt *Act. II*, 37. nec exemplum in contrarium afferri potest. Deinde, Ioannes non ἐβάπτισε εἰς τὸ ὄνομα Ἰησοῦ, *professor fidei in Iesum*: etenim id nomen Messiae fore, tum nondum constabat: sed Apostoli demum sic fecere. Paullus porro ipse tantum *per interpretationem* docet, Ioannem initialle homines in nomen Iesu, non diserte, ac nominatim: per ἐρχόμενον, intellexisse hunc ipsum Iesum, qui suis dona Spiritus daret, non ipsum nominasse. Denique necesse est, vt ii, qui ἐβαπτίσθησαν, sint ii, ad quos pertinet mox sequens αὐτοῖς: καὶ ἐπιθέντος αὐτοῖς Παύλος τὰς χεῖρας: sed

sed hi alii, quam ἀκούσαντες illi, esse non possunt. Enimvero demonstrare me posse, confido, non propterea consequi, aut timendum esse, ne Ioannis baptismus vi sua priuetur. Ac vel illud argumento est, hunc timorem inanem esse, quod, si susceptio baptismi Apostolici post Ioannem huius vim aboleret, consequens esset, ut etiam baptismus tolleretur vim circumcisionis, quae et ipsa veniam peccatorum et salutem dabat per fidem in Messiam: quod nemini venit in mentem suspicari. Sed res erit, ut ego arbitror, planissima, si sic eam intelligamus, ut profecto intelligi debet.

52. Circumcisio, id quod satis constat, dabat salutem et bona promissa a Deo, *per fidem in semen Abraham venturum*. Ioannis baptismus dabat eadem, sed *per fidem in τὸν ἐρχόμενον*: non bene interpretantur simpliciter *venturum*: quod, si nihil aliud requirebatur, non opus erat baptismo, cum omnes antecredidissent, venturum Messiam, inde ab Euae temporibus, in eamque fidem facta erat circumcisio. Messias in V. T. omni dictus est ἐρχόμενος, *venturus*, κατ' ἐξοχήν, e Gen. XLIX, 10. ut innuit Cyrillus Hierosol. *Catech. XII. p. 261. ed. Preuotii*: ἄλλ' ἄτος ὁ ἐρχόμενος προςδοκία ἐθνῶν. Sed in Ioanne doctrina intelligendus est *mox venturus, statim a Ioanne venturus*: μετ' ἐμῆ, ὀπίσω μου, inquit ipse: ut patet etiam e summa eius: ἡγγικεν ἡ βασιλεία τῶν ἁγανῶν, *Matth. III, 2.* non, *futurum est*, sed *imminet, adest, instat*. Iudaei igitur, cum antecredidissent, Messiam venturum, eiusque adeo desiderio tenerentur, si non pio, atque a cupiditate bonorum coelestium nato, at eo, quod opinione de potentia Messiae in rebus humanis ortum esset, non mirum est, si libenter baptismum Ioannis susceperunt, *Matth. III, 5.* praesertim cum, ut ante diximus, aliunde iam concepissent spem aduentantis regni noui. Sed, posteaquam Messias et venerat in hanc vitam, et ex ea in coelum abierat, constituto iam et praesente regno Christi, isque iusserat baptismum suscipi in nouam formulam, suum;

suumque nomen, non sufficebat baptismus in Messiam
 mox venturum, vt non suffecerat paullo ante circumcisio
 in futurum, sed debebat fieri in Messiam, qui venisset,
 credique et professione declarari, eum esse Iesum Naza-
 renum, in cruce pro nobis mortuum, et in coelos subla-
 tum. Itaque, vt Ioannis tempore non sufficebat circum-
 cisio, quae suscepta erat in Messiam quocunque tempore
 venturum, sed baptismus suscipi debebat etiam a circum-
 cisis, qui institutus erat diuinitus ad homines mox ven-
 turo Messiae regno praeparandos, sic tum ii, qui Ioan-
 neo baptismo vsi fuerant, debebant regno praesenti
 Christi per nouum baptismum initiari. Neque enim suf-
 ficebat ad salutem, credere Messiam mox venturum.
Matthaeus (III, 5.) tradit, non modo *urbem Hierosa-*
lymitanam effusam esse ad illum baptismum obeundum,
 sed etiam *Iudaeam uniuersam, et omnem Iordanicam oram.*
 In his quam multos fuisse, credibile est, qui Iesum non
 agnoscerent eum, quem mox venturum credidissent, sed
 repudiarent, et supplicio elus cum Saulo fauerent? His
 igitur non magis proderat posthaec ille baptismus, etiamsi
 vero animo susceptus antea, quam circumcisio. Vnde
 fit, vt necessario ab iisdem omnibus Christi baptismus
 susciperetur, salua pristina et circumcisionis, et Ioannei
 baptismi vi. Quod etiam colligi potest ex eo, quod Pe-
 trus, cum graui illa concione, cuius summa refertur a
 Luca *Act. 11.* commouisset omnium animos, interroga-
 tusque esset, quid se facere vellet, simpliciter respondet:
βαπτισθήτω ἕκαστος ἐν τῷ ὀνόματι I. X. Non excipit
 eos, qui Ioanneo baptismo vsi essent, qui esse poterant
 in tanta multitudine, sed omnes sine exceptione suscipere
 baptismum iubet in nomen I. C. Atque ita vsi sunt Christi
 baptismo hi, de quibus est in illo controuerso Lucae loco
 sermo. Nam, cum audissent, Ioanneum baptismum qui-
 dem et ipsum ad Christum pertinuisse, sed mox affutu-
 rum, nunc autem e praecepto Christi baptismum esse
 suscipiendum in nomen Iesu Nazareni, atque ita se etiam
 ventu-

venturos in communionem donorum Spiritus S. cognovissentque et praeceptum diuinum, et promissum, obierunt baptismum, eoque suscepto, cum ipsis imposuisset manus Apostolus, etiam accipere coelestia dona.

53. Hic solet obiici locus ex iisdem *Actis XVIII* extr. de Apollonio, quem accuratius quidem edoctum fuisse, aiunt, Christi doctrinam, quam ante e Ioannis disciplina acceperat, sed sine repetitione baptismi. Enimuero auspam dicitur eum non rursus usum esse baptismum: res, ut nota et solennis, praetermittitur. Ecce enim nec illud traditur, eum acceperat impositionis Apostoli manibus τὸ πνεῦμα τὸ ἅγιον, h. e. dona Spiritus sancti extraordinaria. An propterea negabimus, ea acceperat? Immo, quia id fiebat semper, eam ob causam praeteriri silentio solet. Multo autem minus aliquid in contrariam partem valet locus alter *Act. VIII*, 14. quod ibi ne sermo quidem est de discipulis Ioannis. Nam λόγος Θεοῦ, quem Apostoli audierant, receptum fuisse Samariae, Euangelium fuit, quod a Philippo ibi traditum fuerat, et baptismus ab iis susceptus fuerat e manibus eiusdem Philippi, non Ioannis. Itaque non repetitionis baptismi opus erat, sed impositione manuum Apostolica, ut donis Sp. S. bearentur.

54. Sed, ut *Sacramenta uniuersa* ad disputationis nostrae consilium accommodemus: in omnibus institutum religionis voluntarium, quod nulla ratio humana sua sponte potuit assequi, nec habet ullam necessariam copulationem cum natura vel diuina vel humana. Neque alia facile res est, in uniuersa religione Christiana, in qua magis arbitrium illud diuinum religionis constituendae appareat, quam baptismus. Est enim clarum, eum nihil habere, quoad aqua perfundit hominis corpus, quod habet per se aliquam efficientiam, pertinentem ad animos humanos atque salutem. Et tamen Deo placuit, huic tali, tam tenui rei, praecepto ac promisso suo, adstringere rationem salutis vel expetendae vel sperandae, *Marc. XVI*,

XVI, 16. *Act. XXII*, 16. *etc.* 38. et ita, vt alia taceam, ius suum in religione ostendere ac firmare. Neque enim in illa aquae affusione est mera cerimonia, aliquam utilem ad monendos homines tantum significationem habens, vt quidam existimant, quamquam hanc quoque: quod si esset, tamen vt institutum, pertinens ad fidei et pietatis exercitationem, probaretur: sed quaedam pars religionis Christianae, ad salutem necessaria: quam necessitatem ille omnem habet a voluntate ac decreto diuino. Itaque diserte refertur ad βελὴν Θεῷ, *Luc. VII*, 29. siue, vt Paulus loquitur, quamquam in alia re, *Eph. I*, 11. βελὴν τῷ Θελήματος αὐτοῦ, ad liberrimum decretum diuinum. Est omnino locus ille perspicuus pro caussa nostra: in quo plebs, et improbissimum genus hominum, τελῶνας, cognita Ioannis disciplina, suscepisse dicuntur baptismum, in eoque δικαιῶσαι τὸν Θεόν, Deo ius suum reddidisse: βαπτισθέντες, ait, ἐδικαίωσαν τὸν Θεόν, suscipiendo baptismo ius suum Deo reddidere. Quomodo ius Deo reddidere? Nempe agnoscendo eius in salutis sperandae et petendae ratione arbitrium, eius βελῆ, voluntati ac decreto, se submitiendo, et beneficium diuinum, quod in ea re tribueretur, videndo. Theologi autem Iudaeorum quid fecere? Reiecerunt baptismum. In eo quid commiserunt? μὴ βαπτισθέντες τὴν βελὴν τῷ Θεῷ ἡθέτησαν, repudiando baptismo repudiarunt decretum Dei, sanctionem diuinam de salute humana, et, quantum in ipsis fuit, Deo ius sanctiendi religionem eripuerunt. Nam βελὴ τῷ Θεῷ in caussa religionis, non est consilium Dei, ne quis erret, quale nostra vernacula sonat: sed ratio a Deo praescripta salutis petendae ac sperandae, voluntarium Dei decretum de modo quaerendae salutis, ἡ εὐδοκία αὐτοῦ, θέλημα: quomodo βελὴν Θεῷ dixit apud eundem *Lucam* Paullus, *Act. XX*, 27. cum se, ait, Ephesi tradidisse, summa cum fide, πᾶσαν τὴν βελὴν τῷ Θεῷ, h. e. omnes religionis a Christo institutae partes ad salutem necessarias, μετάνοιαν maxime εἰς Θεὸν καὶ πίσιν εἰς τὸν Κύριον ἡμῶν I. X. v. 21.

Verbum

Verbum autem *ἁγισμὸν*, quo vsus est *Lucas*, propriam sedem habet in legibus, et in iis, qui auctoritatem legislatoriam obtinent, quorum decretis parere fas est, vt *Hebr. X, 28. Iud. 8*. Enimuero, quae de baptismo diximus, ea, in promptu est, communia esse Sacramento Veteris Testamenti primo, cuius visibilis ratio fuit in pudendorum virilium circumcisione. In Sacramento autem corporis et sanguinis I. C. quod est N. T. alterum, etsi non est par baptismo necessitas; propterea, quod in eo est potius exercitatio et alimentum diuinum fidei amorisque in Deum hominesque, et pignus spei salutisque nostrae amabile, quam partae per Christum salutis consequendae lex et modus: tamen necessitatem habet hanc, vt, qui sit in facultate huius cerimoniae rite obeundae, neque tamen ea facultate vtatur, in eo vera fides esse atque spes adeo salutis nulla possit. In quo simillimum est Sacramento V. T. in cuius locum successit.

55. Sed omnium talium institutorum communis haec est ratio, vt nullam habeant naturalem necessitatem, sed necessitatem suam ducant ab auctoris voluntate, sintque in numero rerum voluntariarum. Eaque ipsa necessitas non est in instituendo, sed in obeundo. Necesse est homini, institutis istis vti diligenter et praescripto diuino: sed neque diuina neque humana natura habet aliquid, propter quod necesse fuerit Deo, eas partes religionis constituere. Coniunctionem igitur habent ex institutione diuina necessariam cum religione, sed non cum natura diuina et humana: quae si esset, ratio humana intelligere sua sponte eas res vel potuisset, vel posset. Quod non esse, quis non intelligat? Neque vero est, quod quis nobis obiiciat, omnes eas partes religionis, vel Iudaicae, vel Christianae, quas voluntarias dicamus, primum non esse alienas ab diuinis perfectionibus, sed cum iis praeclare consentire; deinde accommodatas naturae humanae: quae esse ab natura arbitrii aliena. Etenim nos non sumus ii, qui dubitemus, quin omnes illae arbitrariae religionis

ligionis partes nihil habeant abhorrens a natura vel diuina vel humana: quippe id in omni hac disputatione intelligi volumus; cum nihil tale possit a Deo proficisci. Sed in eo est mera conuenientia, quae hanc vim habet, vt Deus tales res possit, salua maiestate sua, instituere, non autem necessitas talis, vt repugnet, Deum eas non instituere, vt intelligi et plane demonstrari possit, Deum eas res praescribere, et in parte religionis ponere debuisset, si conseruare suam bonitatem, suam sanctitatem vellet, et has denique potius, quam alias: qualis necessitas est in partibus religionis eius, quam naturalem vocamus, quae est tota prorsus necessaria: vnde fit, vt omnes eius partes rationis humanae vis assequi possit, et assecuta sit: quod, omnes vident, secus esse in iis, de quibus nos disputamus, religionis Christianae partibus. Illud etiam fatemur, ista instituta non modo non abhorrere a perfectione diuina, sed eius etiam magnitudinem, vim diuinae benignitatis, sanctitatis, sapientiaeque, praeclare demonstrare, id quod omnibus paginis clamant Epistolae Paullinae, nosque propria Disputationis parte demonstraturos professi sumus. Sed ne hoc quidem talem efficit necessitatem, qualem esse in naturalibus religionis partibus diximus. Sapientiam arbitrii diuini ea res demonstrat, non arbitrium ipsum tollit. Neque enim arbitrium sua natura repudiat bonitatem, iustitiam, sapientiam, sed ab ea in homine regi debet, in Deo semper regitur, non, vt, quicquid ab iis non abhorret, id statim decernat, sed vt, quod decernat, id iis semper consentiat, id iis illustrandis profit. Quae duo, video, a nouitiis disputatoribus parum subtiliter confundi, cum sint longe diuersa: eaque res nos admonet, vt contra eorum rationem aliquid de vniuersa religionis *οἰκονομία* dicamus. Sed ante absoluamus id, quod nunc agimus. Videamus igitur, quicquid est institutorum humanorum, in republica, in artibus, in disciplina publica et priuata: omnibus hoc reperiemus esse commune, vt habeant coniunctionem aliquam

aliquam et convenientiam cum ea re, cuius causa comparata sunt, ob eamque probentur et laudentur, sed ut ea nemo propterea necessaria putet, ac non agnoscat arbitrium eius, a quo sunt profecta. Itaque alii legislatores humani, alii magistratus imperatoresque, alii artifices, alii doctrinae professores, alii denique patres familias aliis institutis, alia disciplina utuntur: in eoque fit saepe, ut in diuersitate institutorum idem consequantur, sitque interdum perdifficile ad iudicandum, vter plus ac citius profecerit. *Aditur non una via*, *Plinius* ait de altera villa sua, *Ep. II, 17*. Laurentina et Ostiensis. Sed Laurentina a quartodecimo lapide, Ostiensis ab undecimo relinquenda erat. Vtrinque excipiebat deinde iter simillimum solo ac regionibus. Quid igitur? Vtraque via XVII. passuum millia habebat. Vtra iret *Plinius*, nihil referebat, eodem tempore in villam veniebat. Poterat igitur Deus istis Sacramentorum institutis non uti: etenim salutem hominibus dedit ante illa instituta: poterat etiam aliis uti: quis enim audeat sapientiae diuinae hos tam angustos limites circumdare, ut praeter haec ei in mentem nihil tale venire potuerit, quod parem vim haberet, eamque infra ingenii humilitatem deprimere, quod multas sibi ad eandem rem vias munire ac patefacere potest? Quod ea induxit in religionem, quod haec potius, quam alia: in eo vero arbitrii diuini libertas est agnoscenda, sapiens illa quidem, et benigna, et sancta, sed libertas tamen, quae ei, salua natura ipsius, eripi nullo modo possit.

56. Atque haec facile etiam poterunt accommodari ad alteram religionis Christianae voluntariam partem, h. e. *ad fidem*: de cuius vera natura supra (§. 36.) dictum est. Nam et ipsa refertur ad *βελὴν Θεῶν*, *Act. XX, 21*. in qua decretum diuinum de modo salutis expetendae et accipiendae intelligi, vidimus. Ea vero etsi ita accommodata est naturae humanae imbecillitati, ut nihil sit ad intelligendam benignitatem diuinam erga genus humanum, et sapientiam illustrius, quod me, duce et auctore *Paullo*,

Ernesti Opusc. Theol.

Q

tertia

tertia parte claris et non refellendis argumentis demonstraturum confido: tamen nullo modo in ea intelligi potest necessitas aliqua, propter quam Deus hunc sperandae accipiendaeque salutis modum statuerit. Nam primum non decet homines, his vinculis constringere arbitrium diuinum, ut ei licuisse negent, sine tali conditione, partam a Christo salutem dare hominibus. Impium est, et a recta ratione alienum, si quis Deum cogat beneficia sua sine conditione tribuere, nullam accipiendi legem ponere, ut prima disputatione vicimus: sed nec illud satis consentit reuerentiae, quam Deo debemus, ei non hoc iuris concedere, ut simpliciter et sine tali conditione possit beneficia sua largiri. Nec magis conuenit existimare, cum Deo placuisset, certum accipiendae salutis modum hominibus praescribere, qui esset se dignus et homini aptus, nullum alium ipsi occurrisset, in quo talis et dignitas et conuenientia esset, Deique adeo arbitrium huic vni, qui nunc est, adstrictum fuisse. Nimis profecto angustos fines poneremus infinitae intelligentiae diuinae, nimis in ordinem cogeremus libertatem Dei. Εὐδόκησεν ὁ Θεός, ait *Paulus* (1 Cor. I, 21.) διὰ μωρίας τῆς κυνήγιατος σώσαι τὴς πησύνοντας, libuit Deo per disciplinam stultam salutem dare credentibus. Εὐδονία Θεῷ igitur, arbitrium diuinum, est in tota illa ratione salutis dandae et accipiendae, sed eiusmodi, quod inani quidem sapientia elatis hominibus, qui omnia suis opinionibus metiantur, stultum minimeque probandum videatur, ceterum recte et modeste iudicantibus, et arcana sapientiae diuinae pio scrutantibus, plenum sapientiae reperiatur.

57. Nihil habet Christi disciplina voluntarium, praeter fidem et Sacramenta, quoad hominibus modum salutis accipiendae quaerendaeque tradit; in quo ipso perspicua sapientiae diuinae vestigia impressa sunt, quae persequemur alio loco: sed habet, quoad modum salutis humano generi redditae explicat ac demonstrat. Ea res quamquam ita euidentis est iis, qui in doctrina Christiana nihil,

nihil, nisi diuinam auctoritatem vident, literis sacris proditam, vt disputatione minime egere videatur: tamen inani subtilitate, siue potius argutatione eorum, qui scabiem aliquam demonstratiuam, quam celerrime arripiunt ingenia non bene subacta humaniorum literarum disciplina, e scholis Philosophorum ad Theologiae disciplinam attulerant, ita est obscurata, vt saltem illam demonstrationum metaphysicarum caliginem dispellere, et solis lucem reterege necesse sit. Summa autem earum demonstrationum, quas cum suis auctoribus commemorare nihil attinet: nam rem, non homines, notamus, quos etiam non malo consilio peccare confidimus: ea igitur summa redit fere huc, vt docere conentur, ea, quae Deus decreuerit, fecerit, vt a pernicië seruatus homo ad felicitatem veram aeternamque adspirare posset, habuisse eam coniunctionem cum eius bonitate et sapientia, vt aliter facere vix, immo nullo modo potuerit. In quo illi specie aliqua artis ac subtilitatis conturbati, totam rationem differendi de talibus rebus perturbanunt. Nam primo, non viderunt, toto, vt aiunt, coelo diuersa esse haec duo: primum, hoc Deus fecit, decreuit, voluit: bonum igitur, et sapiens, et diuina maiestate dignum, et praedicandum est: alterum, hoc mihi videtur esse non alienum a bonitate et sapientia diuina, hoc si Deus fecerit, decreuerit, bene et sapienter vel fecerit, vel mihi, hominive alii, facere videatur, nec aliud, quod magis bonum, salutare, sapiens sit, scio, aut intelligo, aut quisquam intelligit: fecit igitur, facietue; nihil igitur aliud facere potuit, fecit facietue, vt qui optimum sequitur per naturae suae perfectionem necessario. Prima illa ratio est verissima, et constanter tenenda; in qua si quis indaget etiam, aliisque demonstret argumenta bonitatis, et sapientiae diuinae, ad eum modum, quo Physici quidam in rebus naturalibus, hoc nostro maxime seculo, inuestigarunt, rem fecerit, quae laudetur merito, et omnium studiis commendetur. Etenim Deus voluit in ratione seruandi ge-

neris humani, quam οἰκονομίαν Paulus vocare solet, πλῆ-
 ταν χάριτος, πολυποίκιλον σοφίαν, diuitias benignitatis, et
 multiplicem sapientiam (Eph. 1, 7. II, 7. III, 10. etc.) de-
 monstrare hominibus; quas adeo conuenit scrutari et
 agnoscere. Sed altera ratio tota est fallax et nugatoria,
 vt paucis docebimus.

58. Primum igitur, qui tu es homo, quae ingenii
 tui vis, qui audeas, ratiunculis quibusdam tuis fretus, de-
 cernere, quid in quaque, siue in tali, tam graui caussa,
 bonitas et sapientia diuina desideret, vt tam confidenter
 pronuncies, quid et quare Deus fecerit, facere debuerit?
 cum ne angeli quidem id videre se putent, et in illa salu-
 tis humanae caussa viderint? Sed sit aliquid non abhorrens
 a benignitatis diuinae magnitudine. An propterea con-
 sequens est, vt id faciat Deus feceritque. Nec abhorre-
 bat ab ea, te subtilem disputatorem efficere. Immo alia
 ei non minus atque adeo magis consentanea esse possunt.
 Qui tu assequi rationem speres, propter quam Deus hoc
 potius, quam cetera, quae tu etiam ignoras, omnia fa-
 cturus sit feceritque? Deceuerit porro aliquid Deus, in-
 stituerit, fecerit. Bene est, benigne et sapienter fecisse
 fatemur. Sed an propterea necessario primum fecit, de-
 creuit? deinde hoc fecit, hoc decreuit? An aliquis au-
 deat dicere, nihil aliud vidisse Deum, in quo posset non
 minus benigne et sapienter facere? cum homines pos-
 sint videre, videant, diuersisque saepe viis, quo velint,
 pari opportunitate et celeritate perueniant, diuersis arti-
 bus idem efficiant? Quanto modestius, et ad pietatem
 reuerentiamque, quam Deo debemus, aptius, denique
 aduersus benignitatem Dei gratius est, agnoscere diuinum
 in tota ratione et oeconomia reparaetae salutis humanae
 arbitrium, omnibus illis vinculis liberum, quae ei ratio
 humana argutiis suis iniicere conatur, et ita beneficii di-
 uini magnitudinem augere. Est enim hoc insitum in
 animis nostris, vt, quanto quis liberior fuerit in tribuen-
 do beneficio, praesertim magno, tanto maius beneficium
 putemus,

putemus, tanto plus ei nos debere iudicemus, a quo nobis est tributum.

59. Ac profecto ipsa rei natura, et multo magis disertæ sacrarum literarum auctoritas ita nos iubet statuere, ut, quaecunque Deus salutis nostræ causâ decreuerit atque fecerit, ea omnia arbitrii eius, ab omni necessitate liberi, fuisse dicamus. Primum, cum homines culpa sua perdidissent salutem, in tanta facultate retinendæ integritatis, quam facta ad similitudinem sanctitatis diuinæ natura dederat; nihil homini, præter spem fortasse aliquam, sed plane incertam, et hinc preces, relinquebatur, quibus benignitatem diuinam adiret. An rationes sapientiæ sanctitatisque diuinæ ferrent, ut venia sibi daretur, an Deus daturus esset, nullo modo ratiocinando assequi poterat. Itaque videmus, Deum non expectasse preces supplicis hominis, sed ei veniam et spem salutis obtulisse. In quo est magnum eius rei perspicuumque argumentum. Etenim, quid causæ esse dicamus, quare Deus non preces humanas expectarit in re tanta, qui eas in aliis rebus omnibus, quarum potiundarum spes est homini, pietatis officiisque nomine exigit? nisi quod, cuius rei sperandæ nulla idonea subest causâ, in ea preces locum non habent, in ea nec fiunt ab homine non stulto nec expectantur aut requiruntur ab æquo et sapiente. Vnde fit, ut res omnis de salute homini reddenda, plane redierit ad arbitrium diuinum: quod non minuebatur benignitatis diuinæ magnitudine. Benignitas enim, quamvis magna, tantum vniuersæ valet eo, ut quis a beneficiis tribuendis non alienus putetur: non huc, ut ex ea singulis in causis, quid quis facere vel debeat, vel facturus sit, certa ratione definiri possit, intercedente iam voluntatis arbitrio, quod non modo benignitate, sed aliis etiam virtutibus, iustitia, sanctitate regitur: quibus omnibus in consilium adhibitis, quid velit fieri, decernit. Fuit igitur totum hoc decretum diuinum, de hominibus ad salutem reuocandis, plane voluntarium ac liberi arbitrii.

Q 3

60. At-

60. Atque id claris sacrarum literarum dictis confirmari potest: primum omnibus iis, quibus tota haec generis humani quasi in integrum restitutio, χάρις, φιλανθρωπία, ἔλεος, χρηστότης appellatur, et tota ad beneficium refertur. Enimuero beneficium, quod vere et proprie dicatur, totum esse debet positum in arbitrio eius, a quo venit. Quod est planius edisserendum. In omni beneficio humano concurrunt duo, beneficium ipsum et officium. In illo est libertas plena, in officio necessitas aliqua, quae illam ipsam beneficii libertatem aliqua ex parte minuit, propterea, quod homo debet benefacere ei, cui beneficium dat. Sed hae res duae diuersam habent σχίσιν. Nam quoad beneficientis actio refertur ad Deum, a quo officium ducitur, haecenus non est omnino libera, aut arbitrii humani, quod officii necessitate, ut diximus, quodammodo coercetur: sed, quoad pertinet ad hominem, qui beneficium accipit, est merum beneficium, hoc est, omni ex parte libera et arbitraria: neque vlllo modo licet homini, vel dignissimo beneficiis, dicere ei, a quo beneficium petit, vel sperat; debes mihi beneficium dare, bene mihi facias necesse est. Igitur humana beneficia Deo necessaria, homini accipienti libera sunt. In diuinis autem beneficiis, praesertim iis, quae nulla promissio praecessit, nec debemus, nec possumus quicquam necessitatis talis intelligere, propterea, quod vnam tantum ac simplicem habent relationem ad eum, cui tribuuntur, nec vllam habent copulationem cum officio, quod nullum in Deum cadit. Vnde clarum est, primum, nihil esse in illo, de quo loquimur, beneficio diuino, quod habeat aliquam vmbra necessitatis, e qua homo ratiocinando intelligere possit, id Deum vel tributurum, vel non potuisse non tribuere: deinde, qui hoc ratiunculis velit efficere, ut Deus non potuerit non salutem hominibus reddere, eum beneficium diuinum conuvertere in officium, quod in Deo locum non habet, et minuer beneficium ac tollere. Itaque, sicut Paulus χάριν negat

negat esse χάριν, sed μισθὸν et ὀφείλημα, si ea tribuatur recte factis et legi, *Rom. IV, 4.* eosque iudicat ἀθετεῖν τὴν χάριν, tollere beneficium, qui eam a legis et seruati officii necessitate repetant: sic profecto eos quoque tollere beneficium diuinum dicemus, qui id non potuisse non Deum tribuere hominibus demonstrent, et arbitrii diuini in eo tribuendo libertatem limitibus vllis circumscribant.

61. Sed, vindicato arbitrio diuino in beneficio restituti generis humani vniuerso, restat, vt pari arbitrio vsum esse Deum vincamus in οἰκονομία χάριτος, in modo constituendae salutis per filium ἰνανδρωπήσαντα, peccatorum expiandorum causa foede interfectum, et inter summos animi corporisque cruciatus mortuum. In quo quaeri potest: an hic vnus modus fuerit positus in facultate et potestate diuina, quo succurreret homini? Quod si est, nihil in eo fuit Deo liberum, cum placuisset opem ferre hominibus. Atque nos non sumus ii, qui nobis arrogemus, confidentes in alterutram partem pronunciare. Accipere ita oportet beneficia diuina, vt eorum magnitudinem ponderemus potius et laudemus, quam vt quaeramus, aliudne beneficium, alioque modo tribui potuerit. Sed vidi tamen praeclaros Theologos, qui statuerent, nihil impedire, quominus credamus, Deum, pro infinita sapientia, pluribus modis reuocare quasi in concordiam potuisse benignitatem et sanctitatem suam, et sic hominum saluti consulere. Quod si probamus, efficitur, vt ea ratio, qua Deum fuisse vsum videmus, praestantissima illa quidem sit omnium, quarum Deo facultas fuit: quid enim maius filio Dei cogitari potest, per quem nobis salutem dedit: ceterum in ea quoque arbitrium Dei amabile intelligatur. Atque eam sententiam hoc facilius sequor, quod est valde consentanea literis sacris, nititurque diuina auctoritate. Nam in epistola ad Ephesios *Paullus (I, 5.)* cum ait, Deum nobis destinasse ius adoptionis per Iesum Christum, κατὰ τὴν εὐδο-

κίαν, addit, τῷ θελήματος αὐτοῦ, εἰς ἕκαστον δόξης τῆς χάριτος, *liberrimo voluntatis suae decreto, ut admirabilis benignitas sua illustraretur.* In quo ne putemus, decretum referri ad beneficium vniuersum, h. e. ad destinationem illam adoptionis, non ad modum beneficii tradendi, ad Iesum Christum, cauit *Paulus* ipse, eadem re repetenda, et clarius exprimenda. Nam mox (u. 9 *sqq.*) ἀπολύτῳσιν διὰ τῷ αἵματος τῷ Χριστῷ, *reparationem salutis per mortem Christi* appellat *μυστήριον τῷ θελήματος αὐτοῦ, κατὰ τὴν εὐδοκίαν αὐτοῦ, ἣν προέθετο ἐν αὐτῷ, arcanum voluntatis benignae decretum.* Quale illud decretum tam liberum fuit? εἰς οἰκονομίαν τῷ πνεύματος τῶν κειμένων ἀνακαταλείψασθαι τὰ πάντα ἐν Χριστῷ. *tempore, quod consilio suo destinasset, omnia per Christum reuocare ad unum caput, ad communemque salutem: per quem et sibi hanc salutem destinatam ac datam esse dicit, κατὰ προέθετον τῷ τὰ πάντα ἐνεργῶντος κατὰ τὴν βουλὴν τῷ θελήματος αὐτοῦ, benefico decreto Dei, omnia arbitrio suo agentis:* quibus similia sunt in eadem epistola pluribus locis. Atque ego non ignoro, ea omnia maxime a *Paulo* referri ad bonorum per Christum partorum communicationem cum gentilibus, horumque cum Iudaeis in Ecclesia Christiana coniunctionem: clara enim res est e c. III. sed manet tamen id, quod caput rei est, hanc salutem, hanc ἀπολύτῳσιν διὰ τῷ αἵματος τῷ Χριστῷ, hanc ἀνακαταλείψιν per Christum, esse ab εὐδοκίᾳ τῷ θελήματος Θεοῦ, κατὰ βουλὴν τῷ θελήματος αὐτοῦ. Vnde licet colligere, non, quod alia ratio nulla Deo in promptu esset, propterea hanc fuisse probatam, sed quod ea maxime ipsi placeret, quia vellet hominibus τὸν ὑπερέχοντα πλῆτον τῆς χάριτος αὐτοῦ ἐν χρηστότητι ἐφ' ἡμᾶς ἐν Χριστῷ ἰσοῦ, *immensas diuitias benignitatis suae, beneficio suo nobis per Christum tribuendo, demonstrare II, 7. quod luculentius, immo aequè luculenter, fieri alio modo nullo posset.*

62. Neque vero est, quod quis nobis illa philosophorum oracula occinat, sapientem, multoque magis Deum nihil

nihil frustra facere: ire via breuissima: quod per minora fieri et pauciora possit, non facere per maxima et plurima: aut illam (quam acumen Francogallicum, lepide scilicet, *legem parsimoniae*, *la loi d'Épargne* appellauit) naturae corporeae legem de minimo: de quo minimo maxima nuper nata erat controuersia. Nam ea oracula omnia pertinent ad res corporeas, et regni naturalis dispensationem, quoad rebus constat intelligentia carentibus, non autem ad regnum Dei in genus humanum, vel naturale illud ac sensibile, vel inuisibile, quod est per Christum institutum. In regno quidem naturali et adspicibili, Deum non necessitati modo hominum consuluisse, aut vllam *parsimoniae legem* secutum esse, sed copius etiam nostris, ac deliciis prospexisse scimus, estque a nobis parte prima paucis demonstratum. Quo loco etiam docuimus, illas angustias, quae excludant, quicquid necessarium non sit, quae certam in vnoquoque genere, eamque valde modicam mensuram definiant, legemque constituent, plane abhorrere ab intelligentium et liberarum naturarum indole, easque ipsum sensum communem repudiare. Quo minus absunt ab impietate aduersus Dei maiestatem, qui eius arbitrium etiam in religione, et modo salutis humanae reparandae, suis ratiunculis in ordinem redigere, et Deo demonstrare audent, quid per suae, hominum, sapientiae leges probare, quid sequi debuerit, vbi plus minusue facere, vbi hoc, non aliud, cur denique quidlibet deligere ac probare, si bonitatem ac sapientiam retinere voluerit. Nos vero credamus, Deum in omnibus rebus, quae etiam salutis nostrae causa ac religionis nomine decreuit, constituit, sanxit, summam sapientiam et benignitatem demonstrasse, sed eundem in iis omnibus digno maiestate sua arbitrio esse usum, tantoque magis esse amandum ac praedicandum, quo magis cum salute et vtilitate nostra eo arbitrio usus sit: quod tertia disputationis nostrae parte demonstrabimus.

PARS TERTIA

Deum arbitrio suo in religione constituenda magna cum gloria sua et hominum utilitate usum esse.

63. Iucundissimam institutae disputationis partem agredimur explicare, demonstrationem gloriae diuinae, quae, cum hominum salute et vtilitate maxima, illustratur per ea ipsa, quae arbitrium diuinum in religione sanxit. Quid enim iucundius animo Christiani hominis aut debet esse, aut potest, quam videre ac sentire effulgentem ex operibus institutisque diuinis perfectionem auctoris summam; quae non modo sua sponte, quia perfectio est, admirabilis est et suavis, sed etiam quia res ipsae, in quibus eam perspicimus, ad felicitatem nostram sunt comparatae. Neque vero in eo superuacaneam rem suscepisse videri debemus, quod quaecunque a Deo instituta constat, ea praeclara esse, et sapientia eius, ceteraque perfectione dignissima, dubitari non potest. Nam qui ita scit ac credit sapientiae consentanea esse, quae a Deo facta aut constituta sunt, pie ille quidem et reuerenter iudicat, ceterum nihil admodum ultra verbum ipsum intelligit: nec ea scientia vel animum admiratione Dei et laetitia explere, vel ad refellendos veritatis aduersarios valere potest. Paullus quidem Apostolus, vt supra §. 57. 61. dictum est, a Deo in constituenda οἰκονομία salutis nostrae per Iesum Christum demonstratum esse ait ὑπερβάλλοντα πλῆτον τῆς χάριτος αὐτοῦ, καὶ πολυποίκilon σοφίαν, (Eph. II, 7. III, 10. cet.) Sed illas tantas diuitias benignitatis et sapientiae, vt non verbis, sed rebus demonstrauit; ita non verbotenus, sed rebus ipsis intuendis, et vestigiis earum persequendis, cognoscere debemus; praesertim cum ea cognitio confirmet veritatem, eamque reddat animo cariorum et iucundiorem. Nam vt magis quisque perspicit magnitudinem benignitatis et sapientiae diuinae in iis, quae arbitrio diuino constituta sunt

sunt in religione, ita magis et credit et gaudet, ea esse a Deo instituta.

64. Atque nos non sumus ii, qui ignoremus, sapientiam hanc diuinam a multis ante nos esse demonstratam, qui eam aduersus *Tindalium*, similesque religionis Iudaeae et Christianae, qua arbitrariis Dei institutis continentur, aduersarios defenderent. Sed ea defensio minus late, quam debebat, patuit. Nam, quod nos quidem cognouerimus, tota occupata fuit in cerimoniis ac ritibus sensibilibus, quos hactenus vtiliter, atque hanc ob causam sapienter institutos esse defenderent viri doctissimi, quod in iis esset materia exercendae alendaeque pietatis in Deum atque virtutis. In quo etsi plane cum iis sentimus; tamen non satisfactum esse summae causae existimamus, propterea, quod ea disputatione nihil aliud efficitur, nisi vt in iis, quae Deus adiunxerit religioni naturali, insit quaedam eius exercitatio vtilis et disciplina, non pars religionis eiusmodi, quae ad summam (essentiam) ipsius religionis diuinitus nobis traditae pertineat, et per se habeat hanc vim ac necessitatem, vt nos gratos Deo reddat, habeatque spem certam salutis consequendae *). Itaque nulla mentio fit fidei, quae propter Christi meritum et satisfactionem spem habeat aeternae felicitatis, exclusa etiam bonorum operum vi et necessitate, in quo summam esse religionis, litteris diuinis traditae, ab ipsis litteris diuinis edocemur. Quo magis hoc nobis agendum summus, vt hanc maxime partem ad gloriam diuinam illustrandam plurimum valere, in eaque religionis Christianae summum decus esse et gloriam ostenderemus; cetera, quae ab aliis bene tractata sciremus, leuiter attingeremus.

65. Sed nobis ante, quam de singulis partibus dicere incipiamus, vniuerse explicandum videtur, quibus quasi vestigiis persequi sapientiam et benignitatem diuinam in reli-

*) Vid. dicta a nobis in *Bibl. Theol.* P. I. p. 115 l.

religione, praefertim arbitrio eius constituta, debeamus, quibusque signis ea se cognoscendam et conspiciendam praebat mentibus nostris: ita facilius erit singularum partium explicatio. Ac nobis quidem videtur perfectio diuina ita maxime in religione declarari atque intelligi, *si in ea referantur omnia ad diuinæ maiestatis et sanctitatis conseruationem, spes autem omnis et ratio salutis consequendae ad beneficium diuinum.* Quae sunt diligentius nobis et explicanda e religionis natura, et confirmanda.

66. Religio vera etsi Deum hominemque attingit, ut supra dictum est, (§ 4.) tamen ad vltimum redeunt omnia, et necessario redeunt ad Deum, ad quem proprie religio pertinet. Nam Deum ipsius causa amplectitur, hominem propter Deum, h. e. ut ipsa hominis felicitate illustretur benignitas diuina, et vniuersa eius maiestas. Ex quo fit, ut primum ipsa spei propositio, et lex eius spei tenendae debeat esse Deo digna, hoc est, nec ab sanctitate abhorrens, nec ab iustitia diuina, a quibus, dubitari non potest, quin modus benefaciendi et delectus dirigi debeat. Neque enim pugnam inter perfectionis diuinæ partes inducere debent beneficia diuina, quae in Deo ne intelligi quidem potest, sed cum conseruatione consensus cuiusdam tribui debent. Atque nos non dubitamus, esse quaedam genera beneficiorum diuinorum, in quibus bonitas diuina nullis iustitiae aut sanctitatis vinculis teneatur, sitque plane libera, et velut arbitrii sui. Nam et experientia ita esse demonstrat, et scripturae doceant. Ac ne commemoremus id, quod maxime solet esse in promptu, cum vel accusant homines impii benignitatem Dei erga improbos prolixiorum quam in probos, vel pii in dubitationes coniiciuntur per res secundas illorum et aduersas suas: in eo quis non agnoscit arbitrium quoddam liberum bonitatis diuinæ, quod Israeliticam potissimum populum suum esse voluit, in quo conseruaretur vera religio, et nasceretur is, per quem salutem hominibus erat daturus. Neque enim quicquam est, propter quod
necessa-

necessarium Deo putemus fuisse, vt hoc beneficium huic potius, quam alii cuiunque populo, tribueret; vnde etiam *electio* in ea re commemoratur in scripturis, quae est libertati maxime propria. In quo quin sit aliqua pars maiestatis diuinae, nec res ipsa dubitare nos fiat, nec Apostoli Pauli praeclara demonstratio. Etenim satis intelligi maiestas diuina, et imperium summum in mundum hunc et res humanas, non potest sine libertate quadam agendi et arbitrio, in rebus iis, quae non habeant necessariam coniunctionem cum sanctitatis et iustitiae necessariis legibus: propterea, quod in summa maiestate et imperio infinito, necessario par inest potestas, quae *ἀντὶ αὐτεξουσίτης*, vt *Origenes* appellat, *ἀντιπυδνία*, sine arbitrio libero, consistere nullo modo potest. Itaque Deus nequaquam incuriosus illius iuris et potestatis fuit, sed illam non minus quam ceteras diuinitatis partes, agendo testatam fecit, et agnosci voluit ab hominibus. Paullus quidem *Rom. IX. 11.* hac de causa Esauo et Iacobo ante, quam nati essent, et quicquam recte fecusue fecissent, h. e. sine virtutis, et recte maleue factorum respectu, fortunam suam ita destinatum esse ait, vt minor felicius esset maiori, *ἵνα ἡ κατ' ἐκλογὴν πρόθεσις μὴ, vt libertas decreto diuino de ea re constaret*: eoque trahit Dei ad Moysen verba: *ἐλεῶσω ὃν ἂν ἐλεῶ, καὶ οἰκτερήσω, ὃν ἂν οἰκτείρω*: vnde rectissime colligit, id genus bonorum diuinorum e solo arbitrio diuino pendere v. 16. eumque adeo, *ὃν θέλει, ἐλεῶν, ὃν δὲ θέλει, σκληρύνων*: beneficiis largum se praebere, cui lubeat, parum atque duriorum, cui lubeat. Nam hunc esse sensum horum verborum, alibi a nobis demonstratum est.

67. Nec vero est, quod quis dicat, tale arbitrium esse reliqua perfectione diuina, quae sapientia, bonitate, et iustitia cernitur, indignum. Nam primum, id circumscribimus earum rerum finibus, quae nullam necessariam copulationem habent cum vera hominis beatitudine, sed vt iis aliquis vtitur, ita ad salutem et perniciem possunt con-

conuerti; ex quo genere sunt bona omnia, quae humana vulgo et terrena dicuntur, quibus neque tributis propriis beatus sit homo, neque detractis, vere, et vt Philosophi ac Theologi loquuntur, miser. Nec porro hoc arbitrium ita Deo tribuimus, vt ab cetera eius perfectione prorsus seiunctum velimus; sed ei adiungimus sapientiam, quae vel praecurset eius decreta, vel sequatur. Neque enim dubitari potest, quin vel in tribuendis maiora consilia, in rerum vniuersarum gubernatione proposita, spectet, vel tributa dirigat ad magnum aliquod bonum, id quod ei facillimum est. In quo tamen clarum est, nullam hominis, cui tribuantur, rationem hanc haberi, quae cum dignitate et merito eius coniungatur, vt iustitiae diuinae, et cuidam necessitati, res data videri possit.

68. In quo, vt hoc obiter addamus, magna argumenta insunt defendendae dispensationis diuinae in rebus ac bonis vitae humanae, non negligenda iis, qui in hac defensione recte velint versari, et satis occurrere vel criminationibus vel dubitationibus et querelis humanis. Nam quod in hac vel defensione vel consolatione maxime solet esse in promptu, vt futurae post mortem vitae commemoratione inuidiam detrahamus bonis, quibus improbi saepe in hac vita beneficio diuino fruuntur, et aegritudinem leniamus fidelium; id, quamquam est admodum graue, tamen rem non prorsus conficit; propterea, quod improborum indignitatem fruendorum talium bonorum non tollit, quae consentire cum iustitia et sanctitate diuina non videtur. Sed si hoc demonstretur piis, ad maiestatem Dei pertinere, vt eius imperium liberum agnoscatur, id autem in talibus rebus maxime, conseruata sanctitate diuina, doceri posse, quibus proprie felicitas non contineatur, in hac ipsa autem libertate vsurpanda referri omnia ad consilia eius, quae cum generis humani commodis vniuersis, cum vtilitate ecclesiae coniunctionem habeant: cedant vtique libenter Deo, et suam commoditatem, et suauitates vitae condonent eius voluntati et confi-

consiliis maioribus, praesertim si intelligant, sibi in vitae humanae incommodis et molestiis esse materiam pernecessariam virtutum maximarum et Christiano dignissimarum, patientiae, fortitudinis, fidei denique vniuersae, exercendarum paratam, quibus virtutibus carere quomodo vel optet vere Christianus homo? careat autem necesse est, si expers malorum humanorum viuat.

69. Sed nobis in hac disputatione non est oratio de tali genere beneficiorum diuinorum, sed de eo, quod habet coniunctionem cum natura hominis morali, in quibus tribuendis sapientia diuina etiam reliquae morali perfectioni suae, iustitiae et sanctitati consulere debet, nec ab iis discrepare: quod sane nihil aliud esset, nisi semet ipsum et naturam suam abnegare, quod nullo modo fieri potest. 2 *Tim. II*, 13. Nam iustitia et sanctitas non minus necessaria Dei sunt attributa, h. e. quibus contraria in Deo cogitari non possunt, quam bonitas, quae etiam ab eo cum hac, in describenda maiestate sua, coniungitur *Exod. XXXIV*, 14. *Psal. XLV*. Eas autem etiam puniendo exerceri et conseruari, declarat ipse Deus, cum se puniendo sanctificari pronunciat *Leuit. X*, 3. agnoscante ipso *Crellio de Ver. relig. l. 28*. in iisque etiam puniendo demonstrandis non minus se laetari, ait, quam bonitatis largitate *Deut. XXVIII*, 63. Sed haec saepe luculenter demonstrata sunt; nec ea repetere necesse est in hac disputatione: tantum locus attingendus fuit, propterea, vt clarum fieret id, quod volebamus, hoc est, religionem, quae arbitrio diuino constituta dicatur, si digna Deo esse debeat, nec spem salutis proponere posset aut debere eam, quae abhorreat ab iustitia et sanctitate diuina, cum consentiat cum bonitate, nec legem ac modum illius spei consequendae, in quo iustitia diuina idoneam conquerendi causam habere videtur. Id autem fieri duobus modis, existimandum est; primum, si iustitia teneat ius suum, nec cogatur ita in ordinem, vt sine idonea, et certis legibus suis apta causa, puniendi facultas,

tas, siue potius necessitas, adimatur; deinde si sanctitati quoque suum tribuatur, h. e. si in utroque, imprimis in modo spei tenendae, nihil sit, quod hominibus vel necessitatem sanctitatis colendae demat, aut minuat: vel voluntatem, denique facultatem: sed omnia ad arctius adstringendum obligationis vinculum, ad studium eius incendendum, et ad facultatem eius consequendae ingenerandam augendamque valentia. Nam ita rebus constitutis, etiam, ut ita dicamus, lucratur maiestas diuina, h. e. non modo salua ipsa relinquitur iustitia et sanctitas, sed etiam illustratur, et bonitatis et sapientiae operibus gaudendi causas accipit; in quo ipso inest omnium inter se conspiratio et concordia.

70. Sed quoniam non minus bonitas Dei sapiens illustrari debet, quam cetera eius maiestas, huius quoque ratio habetur in religionis perfectione iudicanda. Itaque tum maxime consentaneam perfectioni diuinae et dignam maiestate eius dicemus, si spes salutis consequendae tota conferatur ad beneficium diuinum, in eaque nulla homini pars relinquatur: non, quo ita ei tribuatur, ut iustitia et sanctitas diuina laedatur, quod ante repudiauimus; sed ut in spei firmitate, non suo merito aut sua dignitate, sed sola Dei bonitate nitatur. Quae ratio hanc vim habet, ut in salute hominis omnia sint diuina, nihil humani; quod plurimum valere ad magnitudinem beneficii, et bonitatis adeo diuinae intelligendam, omnes vident. Sed habet ea res etiam hoc commodum, in hac quidem tali causa, in qua salus hominis et tranquillitas vera mentis agitur, longe maximum, quod ita spes salutis accipit summam veritatem, et ἀσφάλειαν, ut bene docet etiam D. Paulus, qui propterea κατὰ χάριν salutis spem propositam ait Rom. IV, 16. εἰς τὸ εἶναι βεβαίαν τὴν ἐπαγγελίαν, ut firma et certa sit promissio.

71. Etenim etsi omnis spes, quae promissione diuina proponitur, habet firmitatem tantam, quantam intelligere mens humana potest, ab necessitate absoluta, quae est

est in veritate ac fide diuina, quod est *πράγμα ἀμεί-
διον, ἐν ᾧ ἀδύνατον ψεύσασθαι θεόν*. *Hebr. VI, 18.*
locus tamen fit dubitationi humanae, cum promissio
habet adiunctam conditionem talem, quae aut sit supra
vires humanas, aut in cuius iudicio aliquid ambiguitatis
incidere possit, per quam incertus fiat animus humanus,
an ei fecerit satis. Quae dubitatio et ambiguitas exclu-
ditur penitus, cum spes est tota beneficii diuini, nec
suspenditur e conditionis talis lege, quae in spei facien-
dae societatem veniat. His igitur ita explicatis ac con-
stitutis, age ad rem propositam veniamus, demonstre-
musque, religionem Christianam, quoad arbitrio diuino
constituta sit hominibus, talem esse, in eaque adeo re
Deum ita, vti dignum esset vniuersa maiestate sua, versa-
tum esse.

72. Ac primum hic liceat sumere, aut postulare, vt
nobis concedatur id, quod est abunde demonstratum a
multis, religionem, quae in Testamento Vetere prae-
scripta fuerit populo Israelitico, summa rei nihil differre
ab ea, quam Deus in Nouo per Iesum Christum sanxerit:
hoc est, vtrique commune esse hoc, vt salutis spes pro-
posita sit fidei, quae promissionem diuinam salutis, pro-
pter Messiam factam, vero animo amplectatur. Nec
habet profecto res demonstrationem difficilem, vno loco
Pauli 2 *Tim. III, 15.* item plane dirimente, in quo libris
Test. Vet. hoc clare tribuitur, vt erudire possint homines
de salute per fidem in Iesum Christum, totoque Cap. XI.
Epistolae ad *Hebraeos*, inprimisque versiculo 25. 26. pro
ea re clamante; vt alia taceamus. Hanc igitur summam,
hoc caput religionis, arbitrio diuino hominibus consti-
tutae, ante omnia docebimus, habere omnia, per quae
talem religionem esse demonstrauimus conseruandae et
illustrandae maiestatis et gloriae diuinae. In eoque nobis
erit hoc magis laborandum, quod caput hoc paene totam
causam continet.

73. Sed hanc ipsam rationem, de salutis spe per fidem I. C. quae res contineant, cum in elementis doctrinae tradatur, ea repeti hoc loco non est necesse. Inter eam porro rationem, i. e. fidem I. C. et salutem ac felicitatem ei propositam, nullam esse naturalem ac necessariam copulationem, id ipsum quoque in superiori Parte disputationis demonstratum est. Quamquam res demonstratione non eget, cum propter illam ipsam causam, et, quia in hac ratione salutis sperandae manifeste omnia Deo libera sunt, et arbitrio diuino constituta, fides ipsa repudietur ab male sapientibus, qui nihil in religione ferre, nisi necessaria, volunt. Relinquitur igitur, ut ostendamus, hanc rationem habere primum hoc, ut omnia faciat beneficii diuini, eaque re illustret gloriam bonitatis diuinae, et spem salutis reddat omnino certam; deinde alterum quoque, ut ad diuinæ iustitiae et sanctitatis conseruationem, eo, quo ante definitum est, modo valeat.

74. Iam primum, quod spes salutis e sola promissione diuina pendet, et fide, quae promissionem amplectitur, ea re salutem omnem fieri beneficii diuini, id res ipsa declarat, et Paullus cum omnibus Prophetis et Apostolis clare docet, cum spem salutis datam docet, *Rom. IV, 16. 24. διὰ τῆς πίστεως, ἵνα κατὰ χάριν*, ut sit beneficium bonitatis diuinae, simus *δικαιούμενοι δωρεὰν τῇ Θεῷ χάριτι*, gratuitam remissionem peccatorum beneficio diuino habeamus, in eoque demonstretur magnitudo benignitatis diuinae *Ephes. II, 7. 8.* et ita omnia referantur ad Deum. Atque haec est causa, quare Deus salutem hanc, quae per fidem solam destinata est hominibus, appellet salutem et iustitiam suam, *Ef. LVI, 1.* itemque Paullus *Rom. I, 17. δικαιοσύνη Θεῷ*, ex *Esaiæ I. c.* In quo sua sponte intelligitur, quanta sit vis ad officium amoris aduersus Deum commendandum animis hominum, tantum beneficium accipientium sine vlllo suo labore ac merito, e quo etiam in humanis beneficiis commendatio maxima

maxima petitur. Nec difficile est, hic intelligere sapientiam diuinam. Nam cum magna et efficacissima pars religionis et cultus diuini sit in amore eius, cuius nomine Deus subinde omnia religionis officia complectitur, a cuius fonte etiam integritas et veritas obedientiae legum diuinarum ducitur, apparet, sapienter sic esse rationem salutis consequendae constitutam, vt in ea ipsa esset adiuumentum et incitamentum omnis pietatis et officii.

75. Nec minus clarum est, ea ratione certam et ab omni dubitatione liberam fieri spem salutis. Nam quod Paullus dicit, sic institutum esse a Deo, vt salus contingeret *κατὰ χάριν*, beneficio ac dono, quo *βεβαία ἡ ἐπαγγελία*, firma promissio efficeretur, id res etiam ipsa declarat. Nam quia promissio Dei ipsa necessario vera et certa est, sequitur, si ei nihil adiunctum sit conditionis, quod euentum eius dubium reddere possit, omnem dubitationem e mentibus humanis excludi; quod secus foret, si contra esset. Etenim si fingamus ei promissioni adiunctum esse, non hoc, quod erat in promissione legis, vt omnibus numeris perfecta obedientia legi diuinae praestaretur, sed illud modo, quod ad salutis spem certam sufficere volunt necessariae religionis defensores, vt, quantum quisque posset, essetque positum in his viribus humanis, tantum in obediendo fieret: clarum sit, nihil certi esse posse in spe salutis; propterea, quod nunquam confidere quisquam potest ac certo scire, se tantum fecisse, quantum posset. Est enim totum hoc iudicium per se incertum, et nihil est, quod det facultatem cum fiducia iudicandi: nec quisquam, etsi optimae voluntatis sibi vere conscius, nisi valde sibi assentetur, aut temere iudicare velit, vel singulis diebus possit certo scire, se fecisse quantum potuerit, nec commisisse aliquid, cuius vitandi facultas fuerit, aut neglexisse, quod facere debuerit ac potuerit. Itaque si ex hoc iudicio suspensa esset spes salutis, et euentus promissionis diuinae; videmus, qui locus fieret sollicitudinum et angorum in re ea, in qua habere

animum humanum aliquid certi, quò plane acquiescere possit, maxime interest. Idque adeo fatentur Pontificii, salutem e sanctitate suspendentes, cum dicunt, quia nemo scire possit, quando satis operum bonorum habeat, semper debere dubitare, an sit in gratia: quae est horribilis et desperationis plena opinio. Quo magis agnoscitur benigna sapientia Dei, quae spe salutis ad solam bonitatem et promissionem suam conferenda, omnem dubitationem amouit, et animis piorum veram tranquillitatem reddidit; quam talem spem, ut vere ait Paullus, *Ebr. VI, 19. ὡς ἀγκύραν ἔχομεν τῆς ψυχῆς ἀσφαλῆ τε καὶ βαβαίαν*, ut ancoram animi certam et firmam tenemus, quae firmiter niti, et omnes dubitationum ventos et fluctus contemnere securi possimus.

76. Sed hic occurrat nobis aliquis sic, ut dicat, in ipsa fide adiunctam esse promissioni diuinæ conditionem aliquam, homini praeftandam: eam autem ipsam esse eiusmodi, ut dubium reddere animum in euentu sperando possit; cum satis constet, incidere animis posse dubitationes de fide, cum metuant, ut habeant fidem veram, cui promissio facta sit. Haec non sine specie veri dici scimus: nec tamen, quid certi responderi possit, non habemus. Primum enim, verissimum profecto est id, quod Theologi nostri, qui accuratioris loquendi formae curiosi fuere, defenderunt, cum negarent, in fide agnoscendam esse conditionem salutis, idque verbum ex hac causa plane excludi vellent. Nam profecto in fide, si rem recte reputare velimus, nihil aliud reperiamus, quam modum beneficii accipiendi, siue ipsam acceptionem, quae sit contraria repudiationi. Qui ad beneficium dandum paratus est, idque offert indigenti, non profecto dat cum conditione accipiendi, quia vult accipi; et cum reuocat beneficium, quod spernitur nec accipitur, non quia conditio in dando proposita non praeftatur, reuocat, sed quia beneficium, accipere recusanti, dari non potest. In fide igitur nihil aliud est, nisi beneficii a Deo oblatis receptio,

receptio, sine qua contingere id homini posse, absurdum sit existimare.

77. Atque etiam hoc considerandum est in hac dubitatione, quod illa ipsa fides, si maxime in conditionis loco haberi posset, tamen non debilitaret spem beneficii, propterea quod secus se res habet in fide, ab Evangelio sancta, quam in iustitia, ab lege spei salutis adiuncta. Nam lex iubet illa quidem facere et non facere, sed vim faciendi et non faciendi non dat, nec dare potest per naturam suam: demonstrat illa quidem viam ad salutem, et eam inire, spem et metum proponendo hortatur; sed facultatem ingrediendi constanter et tenendi non adfert. In quo grauis error intercessit olim Pharisaicae doctrinae, quae legi non modo vim illuminandae mentis ad videndum officium, sed etiam roborandi animi ad faciendum tribuebat, vt e *Iosephi de Maccabaeis* libello clarum est. Quam contra coortus Paullus, τὸ ἀδύνατον τῆ νόμου, imbecillitatem legis, in ea re asserit, et caussam eius demonstrat *Rom. VII, 3.* Sed Evangelium non modo hortatur salutem Dei accipere per fidem, sed etiam vi sua ingenerat, et inspirat fidem. Itaque Paullus hanc primam et summam Evangelii commendationem ponit *Rom. I, 16. 17.* quod sit δύναμις Θεοῦ ἐν σὼτηρίᾳ, efficax et certissimum salutis humanae medium, idque intelligi vult ex eo ipso, quod in eo proponatur δμασθῆναι Θεοῦ ἐκ πίστεως, iustitia et salus, quae tribuatur a Deo, veniat ab Deo vno, eiusque beneficio, sine opera humana, propter fidem. Sed talis δύναμις esse ac dici nullo modo posset, si modo praeciperet fidem, non etiam vi sua mentibus humanis ingenerare posset. Hoc discrimen legis et Evangelii idem Paullus etiam demonstrat in eiusdem Epistolae cap. X. v. 5 sqq. cum legem nihil aliud, nisi praecipere obedientiam, ait, salutem petentibus; at Evangelium longe aliter et loqui et facere. Nam in proponenda spe iustitiae et salutis non praecipere remita supra vires humanas positam, vt obedientiam legis; sed nihil nisi fidem

exigere, quam ex ipso Euangelio venire; ἀγαπή τις ἐξ αἰσῶς, ἡ δὲ αἰσὼς διὰ ἐνθυμίας Θεοῦ, quod esse Euangelium, v. 17. docet. Atque id etiam rei ipsius, i. e. fidei et Euangelii natura facile declarat. Nam fides est hominis, in sensu peccati, et metu irae ac poenarum diuinarum, et desiderio salutis, credentis, et acquiescentis promissioni veniae et salutis propter Christum. Euangelium autem eam promissionem ita proponit, vt eius veritatem et firmitatem omni modo stabiliat, et animo attente et cupide audientis, et suis momentis ponderantis, admoqueat, agente etiam in ipso, vi diuina, quae iis rebus inclinet animum ad credendum.

78. Ex alia autem parte difficultatem habere res videatur hanc, quod in ipsa fide oriuntur dubitationes, quae sollicitos et anxios habeant animos, cum dubitant, an in se sit fides ea, quae vere accipiat promissionem; vade et spem salutis dubiam reddunt, quam nos, per rationem a nobis descriptam, ab omni ambiguitate liberari diximus. Enimuero longe diuersum est hoc genus dubitationis ab eo, quod ante §. 75. tetigimus, nec est proprie dubitatio talis, quae fidei veritatem ipsam minuat aut tollat, ac propterea periculum salutis habeat. Nam in legis iustitia, spes proprie nititur actionibus nostris, quibus propter dignitatem salus datur. Itaque iusta de iis dubitatio conquiescere animum non sinit: tollit enim spem salutis. At in iustitia Euangelii, nititur sola promissionis diuinæ veritate, quae vbi salua est in animo hominis pii, etiam salutis spes, et salus hominis ipsa salua maneat et certa necesse est. Sed homines pii, cum de fide sua se dicunt dubitare, non de promissionis veritate dubitant, quam etiam fateri solent, esse sibi ratam et minime dubiam. Ergo non proprie de fide sua, quam in se esse illa professione declarant, sed vel propter modestiam, de dignitate dubitant, quae e sanctitatis magnitudine veniat, quod etiam salubre est, vel opinionibus quibusdam suis perturbantur. In quo genere maxime frequentem cognouimus hanc,

hanc, quae sensus quosdam mirificos, ad consolandum; pacandum, et exhilarandum animum ita adiungit fidei, ut sine iis, eorumque constantia et assiduitate, fidem nullam esse putet, nec credat literis diuinis, quae fidei iudicium non e talium sensuum inconstantia et varietate suspendunt, sed ad infallibilem et constantem regulam verbi diuini dirigunt, quod illos sensus, eorumque inprimis constantiam et vigorem, ἐν τοῖς συμβεβηκόσι, in contingentibus fidei, numerat, necessariumque facit vnum hoc, ut vero et integro animo benigne promittenti propter Iesum Christum Deo reddatur sua veritas ac bonitas; quod tribuitur Abrahamo omnium fidelium principi et verae fidei exemplari, qui εἰς τὴν ἐπαγγελίαν τῆς Θεῷ ὃ διακρίθη τῇ ἀπιστίᾳ, ἀλλ' ἐδυναμώθη τῇ πίστει, διὲς δόξαν τῷ Θεῷ — — διόπερ καὶ ἐλογίσθη αὐτῷ εἰς δικαιοσύνην — non promissionem Dei in dubitationem vocans, fidem ei detraxit, sed promissionem fide ratam habendo, Deo gloriam suam reddidit — et hanc adeo ob causam id ei imputatum est pro iustitia. Est sane locus hic magnus, et diligenter tractandus, propterea quod in eo est aliquid lubrici, quod fallere vestigium non firmo gradu incedentis possit: suntque multi hodie, qui illos sensus incaute et immodice iactando, vel sanctitatis speciem colligere tentant, vel simplices et incautos animos in errorem inducunt, et grauibus animi terroribus obnoxios faciunt. Sed hic tantum attingi potuit.

79. Sequitur, ut, quemadmodum propositum est, doceamus, hanc rationem salutis sperandae esse accommodatissimam conseruandae iustitiae, et sanctitati diuinae, et illustrandae, ad eum modum, quem supra descripsimus §. 69. Atque, ut ab iustitia initium faciamus, clarum et testatum est litteris sacris, bonitatem diuinam, in concedenda et promittenda salute, non ita sibi indulxisse, ut iustitiam negligeret aut obscuraret. Non enim simpliciter voluit salutem dari poena dignis, sed intercedente peccatorum ἱλασμῷ, expiatione iusta, et ἀπολυτρώσει, redem-

redemptione, per I. C. ut intelligeretur non minus iustitia quam bonitas diuina, εἰς τὸ εἶναι αὐτὸν δίκαιον καὶ δικαιοῦντα τὸν ἐν πίστεως Ἰησοῦ ut esset iustus pariter et iustificans credentem: ut in eadem re iustum se et benignum probaret, reuerendum et amabilem hominibus redderet, ipse autem praeclaris iustitiae pariter suae et bonitatis operibus gauderet §. 68. Quo in loco, ut aliis, in quibus Christus nos ἐξαγοράσαι, redemisse, dicitur, 1 Cor. VI, 7. ἀνταποδόντες redemptionis pretium dedisse 1 Tim. II, 6. soluisse quod non debuerit Ps. LXIX, 5. inprimisque capitali illo Ef. LIII, 4 sqq. tanta euidencia est verborum et sententiae talis, ut nulla ratione obicurari possit. Itaque Sociniani, eorumque asseclae, se in omnes partes versare coguntur, ut aliud quid in iis reperiant, dissentiantque ipsi in sensu eorum locorum definiende; sed omnes ita interpretantur, ut interpretationis nullum fundamentum sit in verbis et usu loquendi, a quo discedere in sententia constituenda, non iam est interpretari, sed, quod lubeat, fingere. Quae res certo argumento est, non modo omnes illas interpretationes esse falsas, sed etiam nostram, quae iustitiae diuinae et sanctitati per Christum satisfactum defendit patiundo et agendo, et in qua nihil demonstrari potest abhorrens a verbis, immo non optime consentiens verbis et vsui loquendi, veram et certam esse. Nobis autem in hac nostra disputatione nihil aliud demonstrare necesse est, quam per rationem hanc salutis, quae arbitrio diuino constituta sit hominibus, ita bonitatem se exserere, ut iustitia et sanctitas in peccatis condonandis conseruetur. Nam necessitatem rei et modi talis, et ea satis arguunt, quae de iustitia et sanctitate Dei ante diximus §. 68. nec eam philosophando demonstrare attinet. Ac nescimus, an omnino super-
vacuum et inane sit, longis et subtilibus disputationibus super hac necessitate uti. Nam cum nobis hic pugnandum sit cum iis, qui se Christianos profiteantur, agnoscantque auctoritatem sacrarum litterarum, satis esse debet demon-

demonstrasse euidencia testimoniorum scripturae sacrae, talem satisfactionem iustitiae et sanctitati diuinae per I. C. intercessisse in causa salutis nostrae. Etenim ubi res ipsa clara est, intelligi debet sua sponte necessitas eius: quippe absurdum est existimare, Deum huc descensurum fuisse, ut sibi ita satis fieri vellet, si nulla necessitas digna sua maiestate id postulare. Itaque nobis optimum factu videtur, in hac cum Socinianis disputatione, niti sola hac euidencia auctoritatis Scripturarum, per eam vrgere ipsos, nec alii disputationi se immittere, donec ostenderint, nostram sententiam non inesse in verbis diuinis, nec inesse posse; quod nunquam poterunt efficere. Ita nulla iis elabendi rima dabitur, quam facilius inueniunt in philosophando super necessitate et possibilitate talis satisfactionis, praesertim cum incidunt in disputatores non satis instructos subtilitate differendi, quorum est maximus numerus: nec potest negari, in libris vulgaribus multa parum subtiliter in hanc partem disputata reperiri.

80. Sed *sanctitati* diuinae in hac nostra ratione salutis non modo communiter cautum est cum iustitia, quae in puniendo cernitur, sed etiam proprie multis modis, et plane ad eam legem, quam supra proposuimus §. 69. h. e. ita, ut *necessitas* sanctitatis non modo non sublata et minuta, sed etiam aucta sit; *voluntas* porro iniecta, et *facultas* sanctitatis persequendae data. Quae sunt breuiter nobis demonstranda. Ac *necessitas* illa quidem officiorum omnium seruandorum, et sanctitatis vniuersae, quam scholastica consuetudo obligationem appellat, siue ab ipsa officiorum natura, siue ab lege, et legislatoris ac Domini iussu, siue ab utroque venit, de quo nihil hic attinet disputare; ea igitur necessitas conseruatur in illo arbitrio diuino; quod eo nec natura rerum humanarum ac diuinarum peruertitur, nec lex diuina aut voluntas, quae illam legem sanxit, mutatur aut tollitur: fieri enim nullo modo potest, *Matth. V, 17.* quod secus est in necessitate caerimoniarum seruandarum, quam lex Moysis attulerat ad

certum modo tempus, et e consilio Dei, ut ita dicamus, temporario. *Ebr. VII, 12. 13 cet.* Nec modo salua relinquitur illa necessitas, sed etiam dupliciter augetur: primum sic, ut magis intelligatur ac sentiat: deinde ut nouis causis firmetur et adstringatur. Nam cum ita existimatum esset ab hominibus expertibus Euangelicae sapientiae, ut sperarent, Deum remittere in hominibus de iure iustitiae, et peccatorum culpam et poenam deprecantibus, propter ipsam deprecationem, condonare, quod nunc quoque tantopere placet necessariae et naturalis religionis patronis; ex Euangelica illa, de spe salutis per fidem in Christum doctrina, intellectum est longe planius, quam grauiter irascatur peccatis iustitia diuina *Rom. I, 18 sqq.* et quanta sit legis conseruandae necessitas, quae ipsa bonitas illa infinita Dei superetur, ut non possit iis, qui legem violassent, se benignam praebere, si maxime cupiat, nisi satisfactum sit legis maiestati, et iustitiae, cuius est, maiestatem illam legis tueri, eamque ob causam necesse habuerit, si vellet seruare homines, et poenis eripere, idoneam victimam dare ad expiandam legem et iustitiam suam. Quae res habet tantam euentiam, ut ipsi aduersarii huius capitis agnoscere cogantur, si res ita sit, uti nos, credentes verbis Scripturae, statuamus, et legi diuinae necessitatem seruandi summam accedere, et iustitiam, quae irascatur peccatis, tantam fieri, quantam capere mens humana non possit. Nos igitur, quod dant, accipimus, et ad laudem Oeconomiae Euangelicae, tantopere illustrantis augentisque vim legis et iustitiae diuinae, conferimus: alterum hoc loco refellere non suscipimus. Nec tam quaeritur in diuinis, quid mens humana capere possit, quam quid credere Dei verbo debeat. Quamquam ea magnitudo non tam contra aut supra rationem est, quae iustitiam a Deo ne cogitando quidem seiungi posse (§. 68.) intelligit, quam contra cupiditates humanas, quarum interest, legis et iustitiae diuinae vim quouis modo minui, ut sibi, minori cum timore,

timore, indulgeri possit. Vere ergo Paulus: Νόμον ἔν καταργῶμεν διὰ τῆς πίστεως; μὴ γένοιτο· ἀλλὰ τὸν νόμον ἱσῶμεν. Num abolemus fide defendenda legem? immo legem stabilimus. Rom. III, 31.

81. Nec vero ratio illa salutis tenendae legem modo stabilit, necessitatem eius seruandae clarissime demonstrando, sed etiam afferendo *voluntatem* studiumque eius seruandae, et sanctitatis verae persequendae: quam quomodo non iniiciat, aliatque, et firmet? cum nihil sit, quod valere apud hominem in tali re, et vim habere ad voluntatem talem possit, quod non abunde adferat, et admoveat animis humanis. Atque in eo haud dubie longe vincit legem, quae metum et spem adhibet animis humanis; cum Evangelica ratio amoveat metum, benigne promittendo, et non modo spem adhibeat certam praemiorum maximorum, sed etiam amorem iubentis, in illa ratione clarissimis et maximis documentis demonstratum, Io. III, 16. Rom. V, 8 *et.* quo nihil in voluntate movenda, et ad obedientiam allicienda efficacius esse, consentiunt omnes. Accedit exemplum I. C. sanctissimum et pulcherrimum in omni genere officiorum, quod non potest non allicere hominis voluntatem ad imitandum, non modo communi illa exemplorum illustrium vi, de qua nemo dubitat, sed etiam propria quadam et longe potentiori, quam ei dat beneficiorum, ab ipso nobis maximarum aerumnarum et cruciatuum mercede partorum, magnitudo, et ipsius I. C. ad imitandum lenissima et amoris plenissima invitatio, Matth. XI, 29. qua non potest non moveri, qui illa beneficia et eorum conciliatorem agnoscat, et partem ab eo salutem per fidem teneat, et vero etiam sentiat.

82. Sed haec voluntas, non est imbecilla et ignava, atque inefficax in agendo, ut est plerumque in iis, qui, alicuius humani exempli aut virtutis pulcritudine cognita, suauiter mouentur ad voluntatem imitandi: quae magis voti imbecillitatem, quam verae, certae, et actiuae voluntatis

tatis firmitatem habet. Nec enim, quod optamus a nobis fieri, id semper facere serio volumus, obstantibus votis aliis cupiditatibus, aut, quae volumus, eadem possumus. Itaque Paullus rectissime distinguit *velle*, et *facere*, quae velis, *Rom. VII*, 15. 22. 23. *Phil. II*, 13. et non necessario coniuncta ostendit, secutus magistri, I. C. auctoritatem, qui voluntatem paratam saepe destitui docuit a virium imbecillitate, *Matth. XXVI*, 41. Evangelica autem ratio habet hanc vim, ut etiam promittat et facultatem obediendi, veraeque sanctitatis consequendae, et sic vere ac proprie legem stabilit ac sancit per fidem, quae diuinam salutis promissionem vero animo complexa est. Quam vim ei cum tota Euangelii doctrina asserit, eum Paullus inprimis. Nam *Rom. VIII*, 1. absoluta demonstratione, quam in ea epistola susceperat, et eius summa repetita, quae vni fidei in I. C. innocentiam et securitatem a culpa et poena peccatorum attribuit, eidem vim ad veram sanctitatem generandam, et facultatem obediendi legi diuinae vindicat. Hanc autem vim et facultatem ducit hinc, v. 2. quod cum fide detur πνεῦμα τῆς ζωῆς, i. e. ζωοποιόν, spiritus vitalis, per quem homo liberetur ἀπὸ τοῦ νόμου τῆς ἀμαρτίας, καὶ τοῦ θανάτου, a lege et potestate mortiferi peccati, de qua superiori capite egerat, h. e. ab illa non modo ἀδυναμία legis seruandae, sed etiam ab imperio inuictae peccandi libidinis, quae lege non tollitur, *VII*, 5. *) sed potius irritatur, *ibid.* 8 sqq. Etenim quod lex efficere non potuerit, fracta eius vi, et sublata per naturae humanae imbecillitatem, et vitiorum humanorum vim longe maiorem, id Deum, misertum generis humani, effecisse, per Iesum Christum, ita destructa

vi.

*) Ὅτε ἡμεῖς ἐν τῇ σαρκί, τὰ παθήματα τῶν ἀμαρτιῶν, τὰ διὰ τοῦ νόμου, ἐνηργεῖτο ἐν τοῖς μέλεσιν ἡμῶν, i. e. cum adhuc eramus alieni a fide Christi, adhaerentes soli legi, vis peccatrix cupiditatum, quae cum lege manebat (τὰ διὰ τοῦ νόμου, ut *Rom. II*, 27.) integra, efficacem se demonstrabat in omnibus partibus naturae nostrae.

vi peccati, (hec enim est, κατέκρευσεν τὴν ἁμαρτίαν ἐν τῇ σαρκί) quae nobis dominabatur, vt fideles vere obedire legi possent, v. 3. 4 *sqq.* Et idem Apostolus, cum in religione Christiana, et ratione salutis sperandae a Christo proposita, omnia fidei esse pronunciat, *Gal. V.* 6. eam fidem sic describit, vt ab ea vim obediendi Deo, et praeceptis eius, venire ostendat. Etenim fidem ἐνεργείᾳ δι' ἀγάπης, efficacem se praestare per amorem, qui est verae obedientiae optimus magister, et omnis officii fons: vnde legis summa, et πλῆρωμα dicitur, *Matth. XXII.* 40. *Rom. XIII.* 8. 10. Itaque recte notam verae fidei facit Iacobus hanc; si virtutes et bene facta efferat, *II.* 17. qui sunt fructus illi, quibus per *I. C.* homines repleti ait Paullus, *Phil. I.* 11., quod nihil aliud est, nisi per fidem. Sed haec latius multo edisseri possent, si laudes, fidei tributas in Scripturis, colligere et copiose tractare vellemus: quod non est instituti nostri; ex quo satis est, hoc totum leuiter attigisse. Quamquam compendium earum laudum quoddam habemus in Epistola ad Hebraeos *XI.* ybi docet Apostolus, a fide esse obedientiam, etiam iis in rebus, quae duram conditionem habeant, v. 8. contemptum rerum humanarum in vtramque partem, v. 24 *sq.* constantiam, fortitudinem, et patientiam in rebus aduersis, v. 23. 27. 36 *sqq.* Quae omnia pertinent ita ad laudem fidei, vt ei vim sanctificandorum hominum clarissime afferant.

83. Hanc autem vim quomodo habeat fides, etsi concedimus *Episcopo*, in *Apol. Confess. R.* non opus esse nobis, vt sciamus, aut quaeramus, propterea, quod nec, qui habet veram fidem, ea de causa recte faciendi facultatem non habet, quia modum ignorat, quo eam facultatem fides dat; nec, qui caret fide, modi illius sciertia fit sanctus: tamen, postquam iniecta est illa quaestio, propositis eius explicationibus variis, non videtur negligenda his, qui doctrinae publicae praesunt, ne a peruersis eius explicationibus vitium capiat fidei ipsius vis et notio,

notio, quae vel sic satis vexatur, vel impietate hominum, vel inscitia; omni modo laborantibus permultis, ut fidem nobis efficiant, quae sit legis non Euangelii, non Christi sed Philosophorum, non gratiae sed naturae. Atque, ut ne quis in hac quaestione vagetur incertis regionibus, unde declinatio fiat ad errores graues; illa prima et summa cautio est, ne, dum faciliorem nobis eam explicationem reddere cupimus, in fidem inferamus id ipsum, cuius causam quaerimus; quod faciunt cum Arminianis, qui in ipsa fide inesse dicunt voluntatem firmam obediendi, et amorem Dei, aut animum se suaeque omnia dicantem et consecrantem Deo, et alia his similia. In quibus sane admodum facile est, videre, quomodo e fide nascatur obedientia cum bonis operibus. Sed ita adiungitur fidei ipsi, quod a fide oriri, clare loquuntur scripturae, ut ante docuimus, et fides inter legem et Euangelium male diuiditur. Nam Euangelii est sola promissio, quam fides amplectitur, amor autem et voluntas Deo obediendi, et se Deo consecrandi, est legis, quae Deum super omnia, adeoque etiam supra nosmet ipsos, et nostra omnia, amare iubet. Itaque nec hi placent, qui in fide Christum non modo ut mediatorem et expiatorem, sed etiam ut doctorem et regem ac dominum teneri iudicant; ut sanctitatis origo ex fide declarari possit, ut *Witfius Oecon. Foed. din. p. 355.* et alii: nec, qui fidem eam, quae salutem dat, assensu, ad omnia doctrinae Christianae capita, ut de Deo, de summo bono, promissis omnibus, pertinente, capiunt; unde per naturam animi necessario amor Dei, et sanctitas, sequatur. In quo non modo fidei verae inscitia peccant, sed etiam veri et efficaciae amoris, qui non oritur e boni scientia, sed e boni potius accepti possessione, fructu, et sensu. Veteres nostri Theologi, quamquam de hac re plerumque ita loquuntur, ut potius rem ipsam, hoc est, coniunctionem sanctitatis cum fide, ut effectus cum sua causa, affirmant, et similitudinibus congerendis, ut ignis, ut magnetis, ut arbo-

arboris felicitis, illustrent, quam vt modum coniunctionis distincte explicent: tamen non obscura verae rationis vestigia impressa in scriptis suis reliquere, donatum fidelibus Spiritum S. et grati animi studium commemorando, inprimis *Melanthon* in *Comment. in Epist. ad Rom.* et in *Locis*. Recentiores autem, ab illius simplicitatis contentu, dum philosophorum more modum coniunctionis, accommodate ad intelligentiam nostram, explicare instituerunt, in varias sententias discessero, et magnis se difficultatibus impediuerunt.

84. Ac nobis videtur difficultas rei, et dissensus doctorum hinc maxime nasci, quod, formis loquendi popularibus, et similitudinibus iis, quas diximus, conturbati, illam coniunctionem talem imaginati sunt multi, vt tota sanctitas cum suis fructibus e fide statim sua sponte, et necessario ac physice, et ex ipsa fidei essentia, vt *Hulsemannus* loquitur, de *Auxil. Grat. p. 412.* consequeretur. Quae res profecto in deuia abegit multos, in his *Curcellacum Inst. Rel. Christ. VII, 7.* et in *Diatr. de Iustific. in fin.* qui non aliam magis ob causam negat, fidei iustificantis formam esse in accipiendo beneficio per Christum parto, quam quod, quomodo hinc caritas et vniuersa sanctitas nascatur, prorsus intelligi non possit. Sed id hoc modo intelligi non debebat. Nec ita intelligere ipsa sanctitas et virtutum ac bonorum operum natura, sacris literis tradita, sinit; per quam non possunt repente existere, ac velut in animos infundi. Quorsum autem opus esset praeceptis, de sanctitate ad fidem adiungenda, et cohortationibus? quae exercitationum porro necessitas esset, quarum assiduitatem et constantiam fidelibus commendamus, vt constantiam recte agendi consequantur? Vim Deo vere obediendi secum *adfert* fides, quae fouenda, alenda, et ad firmitatem exercitatione perducenda est, vt ad fidem vera sanctitas et virtus accedat. 2 *Petr. I, 3. 5.* vbi ἐν τῇ πίστει intelligendum est cum fide, vt in ceteris formis similibus, quae sequuntur. Animus,
vt

vt primum nata est fides, ad pietatem et officium leniter mouetur. At illis motibus, quibus noua vis se exserit, obediendum est exercendo, adiuuante Spiritu S. Nec aliud voluere Theologi nostri in hac disputatione, quorum similitudines, a magnete, igne et arboribus ductae, non ad viuum ressecandae, sed accommodate ad rei naturam explicandae sunt, vt omnes ceterae, quae a rebus corporeis ductae, ad res incorporeas et liberas transferuntur. Quomodo autem illa facultas et illa initia sanctitatis cum fide veniant, in eo nihil melius fuerit, quam Scripturam audire et naturam fidei consulere.

85. Primum igitur audiamus Scripturas: quae fundamenta huius nouae facultatis ponunt in fide, non ἀμείσως, qua est acceptio beneficii diuini, et actus animi humani, sed ἐμμέσως, per eius effectus et fructus proximos; quorum alter cernitur in remissione peccatorum, quae, de beneficio Dei et promissione, cum fide ita coniuncta est, vt non tempore, sed sola cogitatione, ab ea discerni possit: alter in tranquillitate conscientiae ex fide, per peccatorum condonationem, *Rom. V, 1.* Et ab remissione peccatorum quidem clare origines sanctitatis et obedientiae repetuntur apud *Ieremiam*, in vaticinio nobili de N. T. felicitate *XXXI, 33 sq.* repetito per *Paulum Hebr. VIII, 9 sq.* Nam cum dixisset, huius noui foederis rationem longe diuersam fore a pristino: propterea, quod vetus non seruatum, hoc autem sanctitatem veram et virtutem allaturum esset; rationem eius tanti boni subiicit hanc *Ierem. l. c. 35. Hebr. l. c. 12. etenim propitius ero malefactorum eorum, et peccata ac delicta eorum obliuioni traditurus sum.* In quo proprie inesse foederis illius beneficium, e quo alterum sequatur, idem Paullus declarat alio loco (*Rom. XI, 27.*) idem vaticinium repetens: αὕτη αὐτοῖς παρ' ἐμῆ διαθήκης, ὅταν ἀφέλωμαι τὰς ἀμαρτίας αὐτῶν. Res autem sic se habet. Cum Deus per fidem purgauit hominis animum, abstergendis condonatione peccatis, *Act. XXV, 9.* adoptauitque per fidem regene-

regeneratum, venit in eum Spiritus S. *Gal. IV, 5. 6.* suamque ibi vim explicat in opere sanctitatis per suum verbum, a quo ille, *Io. I, 12.*, vim recte agendi et omnia accipit; vnde noua illa sanctitas *ἀγιασμός πνεύματος* vocatur *2 Theff. II, 13.*, et omnia recte facta, omnesque nouae virtutes *καρποὶ πνεύματος* appellantur *Gal. V, 22.* Nam Deus Spiritu suo sanctificare homines decreuit, cum ratio et natura non posset: sed eum donare nisi purgatis non potest. At condonationem peccatorum statim sequitur Spiritus S. donatio, vt noster *Philippus* loqui solet. Hoc fere modo rem explicant etiam Auctores *Declar. F. C. art. 2. et 3.* Ex quo intelligitur, renouationem hominis credentis in I. C. et inde ortam sanctitatem cum bonis operibus coniunctam esse cum fide, non physice, vt ex ipsa acceptione beneficii per Christum parti, in qua est forma et essentia fidei, qua tali, necessario nascatur, vt *Hulsemanno* et aliis visum videtur; nam id intelligi nullo modo potest: sed beneficio libero Dei, qui Spiritum sanctificantem donare decreuit ei, qui beneficium Christi acceptasset, h. e. qui Spiritui S. fidem in animo generaturo per verbum, non repugnasset, sed eum absoluere hoc opus suum siuisset. *Placetta de Fide II, 24 extr.* *Il ne faut pas chercher dans la nature de choses mêmes la véritable cause de l'inséparabilité de la foi et de la piété. Il faut, si je ne me trompe, la chercher uniquement dans la volonté de Dieu. Il faut dire, que cet effet vient de ce, que ni la foi, ni la piété ne pouvant se former dans l'ame, que par une operation surnaturelle du S. Esprit, il plût à cet Esprit Saint, de ne produire jamais l'une de ces choses sans l'autre.* Bene facit et nobiscum sentit, cum illam coniunctionem a benefica Dei voluntate et dispensatione repetit: nec id nouum est eius inuentum, sed cum antiquioribus Theologis nostris commune. Sed id erat distinctius explicandum; et vltima sic intelligenda, vt necessitas remoueat, existimeturque Spiritus sanctificationis dari cuilibet, qui ei, fidem

Ernesti Opusc. Theol. S gene-

generaturo in animo, non restitisset. Omnis alia ratio, quantum nos iudicare possumus, aut parum subtilis, aut Scripturis non satis conueniens, et diuersa male permiscens reperietur.

86. Nec tamen sumus ii, qui in hac causa excludamus alterum fidei fructum, qui est in pacata per ipsam conscientia; a qua nonnulli ita sanctificationem repetunt, vt per eam naturali quodam vinculo cum fide coniungatur, cum dicant, fieri non posse, vt eum non amemus, atque ei adeo obediamus, a quo tantum beneficium acceperimus, vt *Witsus* in *Irenico* c. 15. §. 15. Sane non videtur fieri posse per naturam animi humani, vt ille sensus tranquillitatis et omnino beneficii diuini, per Christum dati et accepti, non alliciat animum ad amandum Deum, atque adeo aliquem amoris sensum commoueat. Sed tamen non vna hic difficultas exoritur, si rem diligentius consideremus, propter quam nec ab hoc fonte vno, nec proprie aut maxime, possumus *facultatem* Deum vere et constanter amandi et sancte viuendi, deriuare. Nam primo, si fidem ille sensus secutus erit, praesertim viuידior et constantior, habebit ille profecto vim pertinentem ad amorem Dei, atque inde ad obedientiam; sed et hic sensus et haec ipsa eius vis erit a Spiritu S. illapso per fidem animis, *Rom. XIV*, 17. eritque illa vis magis in alliciendo et incitando ad amorem et officii studium, vt supra diximus, quam ingenerando vero et constante amore, et pari obedientia, aut facultate obediendi legi diuinae conferenda. Omninoque ipse amor, qui proprie dicitur, non tam facultatem dat obediendi, praesertim si res praecepta est supra vires, quod accidere posse clarum est, quam voluntatem ingenuam et integram, quae tamen et ipsa multis rebus debilitari potest, et in se, per illecebras rerum humanarum, et in actione ipsa, opponentibus se multis intrinsecus et extrinsecus impeditis, quae vinci, nisi viribus a Spiritu S. acceptis, et adiuuante ipso, non possunt. Quid vero, si in ipsa fidei

fidei veritate, tamen ille talis sensus tranquillitatis et laetitiae, aut omnino non existit, aut obscurus est et hebes? quod saepe accidere, non dubitare nos sinunt exempla piorum, eo nomine querentium: quippe et Spiritus Sanctus hoc χάρισμα nec omnibus, nec eadem mensura tribuit: et obscuratur saepe sensus ille multis etiam humanis et naturalibus causis, vt bene admonetur in *Declar. F. C. art. 2. p. 672.* Nec ille sensus facile oritur nisi a πληροφoρiα πίστεως, in qua non est essentia, sed summus gradus fidei, ad quem forte pauci perueniunt. Atque etiam est inconstans et varius, quia non necessarius est ad salutem, vt supra diximus §. 78. Sed res tam varia et inconstans non potest esse vna aut propria ac necessaria causa rei certae et constantis, qualis est, aut esse debet sanctitas a fide profecta. Relinquitur ergo, vt effectus ille fidei, qui est in conscientiae pacatae sensu suauis, et laetitia e beneficio Dei, si contingat credenti, valeat ad bonam voluntatem, et haecenus etiam ad facultatem obediendi legi diuinae, quod ea esse non potest sine vera et integra voluntate, summa rei proprie tribuatur Spiritui Sancto propter fidem dato, per verbum operanti, et hominem ad sanctitatem contendentem in exercendo adiuuanti, vt supra demonstraui.

87. In hac ipsa autem Oeconomiae diuinae parte, i. e. modo facultatis huius vel tribuendae vel adiuuandae, multiplex bonitas et sapientia diuina cernitur. Primum bonitas, quod misertus imbecillitatis nostrae, hanc quoque partem religionis ac cultus, per quam salutis compotes, dignos se auctore salutis sanctissimo praestarent, sui beneficii esse voluit, largiendo Spiritu suo, nec eius beneficii aliam conditionem in conferendo tulit, quam salutis ipsius veram et cupidam acceptionem, in conseruando autem eius vsum talem, per quem appareret, non temere datum esse hoc sanctum beneficium, et abiectum, sed in loco positum, h. e. apud eum, qui id conseruare atque etiam augere amore, cura, labore, exercitatione

cuperet. Et erat illius bonitatis tanta necessitas, ut sine ea nunquam verae, integrae et constantis sanctitatis ac virtutis facultas contingere potuisset: quae nunc etiam ita oppugnatur undique a reliquiis vitiositatis naturalis, ut saepe post grauem demum et longam luctam vincat. Huic autem bonitati par est sapientia, quae cernitur in eo, quod Spiritum suum noluit vi infinita agere et absolute in sanctificandis fidelibus, et operibus sanctitatis efficiendis, in quo esset coactio et vis, cui resisti non posset, tollensque virtutis veritatem, quae, nisi libertate salua, ipsa salua esse non potest: sed *modo quodam*, apto ad conseruationem libertatis humanae, et *lege certa*.

88. Nam uti conuertendi hominis, ita sanctificandi rationem omnem sic adstrinxit verbo suo, ut per id solum opus vtrumque perageretur a Spiritu suo, non modo docendo, sed etiam efficiendo *Luc. XVI, 29. 31. Io. XVII, 17. 1 Petr. I, 22. 23.* Qua re fit primum, ut vis Spiritus Sancti agens, vel in intellectum hominis vel in voluntatem, cum per se sit infinita, ἀμαχος et ἀνυπέβλητος, (nam est in nutu voluntatis eius, cui simpliciter et nullius rei finitae interuentu [immediate] agenti, resistere nihil potest, *Rom. IX, 19.*) ut ea igitur accipiat in ipso actu aliquem modum, ab instrumenti [medii] natura, per quem illa sufficit quidem efficiendae fidei et sanctitati, sed ita, ut ei resisti possit. Est enim hoc commune omni generi instrumentorum, ut ab iis vis agentis in modo agendi determinetur, eaque se exserat in obiecto pro instrumenti ratione ac natura. Est autem verbi diuini eadem natura, quae est omnis veritatis ad actionem spectantis, ut eius actio sit primum in intellectum, deinde per hunc in voluntatem et animum vniuersum. Sed et illius in intellectum actionis, a veritate qualibet, effectus impediri potest multis modis, ut constat inter omnes, et omnis motus voluntatis et animi ex intellectu ortus, liber est, et repugnandi facultatem relinquit. Itaque quamquam vis diuina in verbo et veritate verbi agens in mentem

mentem hominis longe maior est cuiusvis alius veritatis vi: neque enim posset vincere vel tenebras mentis, vel duritiem animi: tamen a veritatis natura et ratione ita veluti temperatur, ut absit a coactione, retineatque animus, cum ei cedit, suam libertatem. Quae res primum est digna homine, cuius natura, qua non est vitiosa, sed similis diuinae, recte conseruatur: deinde Deo, Patre et Domino generis humani, eodemque sancto et iusto, cui primum vera obedientia debetur, quae esse non potest, nisi libera sit; qui deinde praemia tanta, quanta promissit liberaliter, virtuti necessariae et mechanicae imperitare nullo modo possit.

89. Illud ipsum, quod hanc vnam et ratam legem fidei et sanctitatis a se gignendae, et ab hominibus sperandae, quaerendae et parandae fecit, quantum beneficii et sapientiae habet? nec modo propterea, quod ea est omnium hominum ingeniis, fortunae, temporibus denique omnibus apta, sed etiam, et multo magis, quod ea non finit hominum spem, aut voluntatem incertam vagari, sed demonstrat, quo eundem sit, quid agendum, nec finit errare quemquam, aut fallit spem. Vis conuertere, ad fidem adduci, sanctificari? Ne longe quaere viam, aut incerta spe expecta, dum tu vi diuina conuertaris, credere, et sanctificari possis. Ut qui satiari vult, scit sibi cibum capiendum, et ad eum parandum sumendumque festinat; neque in eo dubitat, aut errare potest: sic tu scito, verbo diuino recte audito, lecto, et cogitato opus esse, nulla alia re. Audies ergo, leges et meditare serio verbum. Et ut ille satiatur, sic tu conuerteris, credes et sanctificabere. Quid potest esse salubrius hac tali certitudine, aut ad tranquillandum animum aptius? Est autem certitudo illa et securitas in agendo cum in omni re graui optabilis, tum maxime in causa salutis nostrae: nec quidquam magis cruciat et angit animum, quam cum in tali re incertus errare ac trepidare cogitur, nec certo scit, quo se conuvertere, quid et quo-

modo agere debeat. Quo magis etiam, ut hoc obiter addamus, repudiandi, et ultimae stultitiae accusandi sunt, qui vel malint per actionem diuinam sine verbo, h. e. per vim, quae proprie dicitur, ad fidem et sanctitatem duci, siue potius trahi; vel illuminationem, fidem et sanctitatem contingere sine verbo putant, et incerta spe expectare iubent. Etenim peruertunt et vituperant sapientiam diuinam, repudiantque summum beneficium, eruntque in illa sua expectatione simillimi rustico Horatiano, qui non eo, quem res et ratio et usus demonstrat, modo transire flumen obiectum tentat, sed expectat, dum defluit amnis.

90. Longi fuimus in fide ad arbitrii diuini laudem conferenda, si longi esse possumus in ea re, cuius praesentia nulla disputatione atque oratione exhauriri potest. Nos autem nulla in re libentius indagamus vestigia diuinae bonitatis et sapientiae, quam in fide et verbi Dei indole; et nobis hoc magis necessaria visa est diligentior huius capitis tractatio, quod maxime obnoxium est corruptelis humanis, et religionis reuelatae aduersus *Tindalium* defensores id plane praetermiserunt, vel parum digne et Scripturae S. conuenienter tractauere. Sed sit tamen modus rei, veniamusque ad cetera institutae disputationis. In quibus aptissimum fuerit, prima commemorare *Instituta* religionis ea, quae in scholis *Sacramentorum* nomine appellantur. Habent enim coniunctionem cum verbo diuino tantam, ut etiam genus quoddam verbi diuini videantur *Augustino Tr. in Io. 80. verbum visibile* appellanti, laudante iudicium et acumen viri *Melanchthone in Apol. A. Conf. art. 13.* vim autem ad fidem et sanctitatem vel generandam vel alendam verbo parem, certe similem, vel hanc ipsam ob causam, quia cum verbo Dei iuncta sunt, et vim suam a verbo Dei accipiunt, non modo iubente iis vti, sed etiam promissionibus eorum usum commendante. Atque hac ipsa de causa iis communia sunt, quae diximus de verbo Dei ipso

ipso §. 87 sqq. Sed habent etiam propria documenta bonitatis et sapientiae diuinae, in eo maxime, quod in iis est pignus fidei perspicuum et sensibile, et vis ad roborandam fidem promissorum diuinorum, amoremque aduersus Deum hominesque inflammandum. Cum enim sit ea hominum natura, vt sensibus valde ducantur, iisque res quaeque ita certior videatur, vt magis ad sensus pertinet, aut per sensus percipitur: non quo res sensibiles sua natura certiores sint intelligibilibus, et inadspetabilibus, sed quod sensus earum, et certitudinis, acrior est et viuidior in animis humanis: profecto magnum beneficium sapientiae diuinae putari debet, quod per Sacramentorum instituta quodam modo ad sensus ipsos admo-uit certitudinem promissorum suorum, atque ita eos vocauit in communionem fidei, vt per eorum vim adiuuaretur fidei certitudo et acueretur certitudinis sensus. Quemadmodum igitur quondam Deus iridem coelestem adiunxit promissioni, qua timorem diluuii talis, quale Noachicum fuerat, ex animis hominum tolleret, vt pignus visibile promissionis haberent, existimarentque tam certum illius promissionis euentum fore, quam certum esset, se illam iridis speciem oculis cernere: sic e. c. Eucharistiae sacramento instituto, hanc nobis facultatem dedit, vt in edendo ac bibendo cogitemus, quam certum sit, nos hunc panem, atque hoc vinum hoc tempore edere ac bibere, tam certam esse veniam peccatorum nostrorum propter I. C. tam certam spem salutis. Atque vt illa certitudo etiam sanctior et amabilior esset, eam non pane et vino promiscuo ac ψιλῶ sumendo fieri voluit, sed augustiori re adiuncta, sanguine et corpore Domini nostri Iesu Christi, per quem illa venia peccatorum et spes salutis aeternae parta est. Quibus cogitationibus ac sensibus plenus in accipiendo animus, salutis cupidus, mirifice confirmetur necesse est, et per hanc ipsam confirmationem expleatur consolatione et laetitia verissima ac dulcissima. Hac porro reflectitur animus ad cogita-

tionem benignitatis diuinæ et Domini I. C. tali modo consulentis sibi et imbecillitati suæ; vnde amor accipit alimentum dulcissimum, nec minus inflammatur animus ad studium vniuersæ pietatis et obedientiæ. Haec qualia et quanta sint, sentiunt pii, et intelligere etiam ceteri facile possunt, si ea recte considerare velint. Est enim in promptu, omnia hic esse plena bonitatis et sapientiæ diuinæ. Nondum dixi, quanta in iisdem institutis vis sit ad iungendos Christianorum animos et amoris concordiaeque vinculo adstringendos; in quo ipso est sapientiæ diuinæ magna commendatio. Sed illam tam salubrem et Deo dignam vim horum institutorum eius demonstrat Paullus non vno loco 1 *Cor. X*, 17. *Eph. IV*, 5 *et.* Addat, qui volet, *Stakhusum* in *Defens. Relig. Christ.* c. 23. §. 50 *sq.* et *Fosterum* in *Def. util. et verit. Rel. Christ.* c. 5. qui tamen omnia refert ad virtutis et officii commendationem, quo in genere multa bene disputat.

91. Atque ita absoluta est pars disputationis nostræ ea, quæ ad arbitraria religionis instituta vel communia vtrique Oeconomiae, vel propria nouæ pertinet. Transitus hinc datur ad ea, quæ antiquæ sunt: quem facere non possumus, nisi breuiter explicatis, aut saltem tactis causis diuersitatis, quæ eo in genere cernitur in vtraque Oeconomia, vt et hinc aliquid lucis accedat sapientiæ diuinæ in modo arbitrii illius, quod defendimus, regendi. Ea diuersitas est in numero talium institutorum, qui in prisca illa Oeconomia religionis est permagnus, in hac noua autem, per Christum et Apostolos sancita, parauis, vt vidimus; sublatis quippe omnibus præter fidem, et sacramenta, in quibus formæ priscae abolitæ sunt, genere ipso seruato, et nouis formis inductis. Cum autem dubitari non possit, quin Deo liberum fuerit, numerum hunc augere; quaeri libeat, quæ esse potuerint huius paucitatis causæ Deo dignæ. In qua quaestione explicanda non suffecerit, vt putamus, id, quod videmus afferri a multis, cum dicunt, in illo Leuitico cultu

cultu adumbrationem futuri Messiae, et rerum ab ipso peragendarum fuisse, *Hebr. X, 1.* quam locum non habuisse post euentum. Nam, vt mittamus id, quod statim occurrat cuique, id valere modo ad necessitatem abolendorum eorum, in quibus esset talis adumbratio et praesignificatio, quam non omnibus institutis Leuiticis, ne sacrificiis quidem, communem fuisse in promptu est, (cf. Disp. II. §. 38.) quid impendebat, quo minus iis, quae propter commutationem rerum, commutanda et ipsa erant, alia succederent, accommodata ad nouam temporum rationem; praesertim cum in iis esse posset, vt de Leuiticis demonstrabimus, vtilis disciplina fidei et officii? Nam illud quidem dici non potest, quod alicui in mentem veniat, ab illa Leuitici ritus abrogatione hominibus minus opus esse institutis bonae disciplinae. Nec ea instituta impeditura erant consilium diuinum conciliandae generis humani concordiae, et tollendae inimicitiae ex ritibus Mosaicis, *Eph. II, 15. Col. II, 14.* Nam noua et omnibus communia, et propterea libera erant ab omni tali inuidia futura, qualem Mosaica ratio, quamquam nullo vitio suo, incenderat.

92. Ac fortasse optimum fuerit, in hac re potius se referre ad illud: *quis mentem et consilium Dei assequitur? Rom. XI, 34.* quam incertas coniecturas tentare. Sed nescio quomodo animus noster semper inclinauit ad hanc partem, vt putaremus, hanc rationem fuisse ad illa tempora, et consilium diuinum communicandae cum omnibus gentibus salutis per Christum partae ac propositae accommodatissimam, atque hanc ob causam sapientia diuina dignissimam. In operibus sapientiae diuinae hoc est non paruum, quod regnum gratiae ita cum regno naturae copulatur, vt alterum sit aptum alteri. In quo sunt omnia digna Deo, vtriusque auctore. In regno naturae saepe ita res gubernat prouidentia diuina, vt aditus et propagatio regni alterius fiat faciliior, seruiatque natura gratiae. In regno vicissim gratiae ita Deus tem-

perat rem, ut non intercedat vis infinita, quae tollat rerum naturam et seriem ab ipso institutam, nec tamen instituta eius ita ipsa indole sua, temporibus ac locis, pugnent cum natura rerum, ut ab ea possint impediri, sed habeant successum faciliorem. Atque huius rei documentum videtur esse in eo ipso, de quo quaerimus. Cum ita praedictum esset a Prophetis instinctu diuino, Messiae regnum fines habiturum eosdem cum orbe terrarum, eiusque salutiferam doctrinam ad omnes gentes venturam, ut quae ad salutem omnium sine discrimine hominum pertineret; sapientia diuina rem ita moderata est, ut ea propagatio doctrinae Christi quam maxime cum natura rerum humanarum, h. e. ingeniis humanis, temporibus ac locis consentiret. Id effici duabus rebus poterat: primum, si ea incideret in tempora talia, quae sua sponte aditum in omnes terrae partes darent iis, per quos propagaretur, siue, si diuina sapientia ita praepararet in rebus humanis omnia, ut munita satis esset via progressurae quaquaersum doctrinae Christi: deinde, si ipsa doctrina, quoad salua summa (essentia) eius fieri posset, accommodaretur temporibus illis, hoc est, ingeniis populorum, sensibusque, ut inde nihil ei, aut quam minimum impediendi, obiceretur.

93. Iam quod ad primum attinet, est fane perspicuum, et a pluribus animaduersum, et a nobis in *Institutione Interpr. N. T. p. 211. 12.* admonitum, in notis illis migrationibus Israelitarum in Assyriam, Chaldaeam, regna Seleucidarum, Lagidarum, vicinasque regiones, denique, ab foedere cum Romanis inito, per omnes deinceps Imperii Romani partes, et, concessa a Romanis libertate religionis ritu patrio colendae, etiam per conuentus sacrorum eausa locis publicis ac solemnibus habendos, praemunionem quandam a prouidentia diuina factam ad facilem et celerem religionis Christianae propagationem, cum ea res Apostolis aditum facilem daret, non modo ad omnia oppida culti orbis terrarum, quorum

quorum nullum paene a Iudaeis tum vacuum erat, sed etiam facultatem daret exponendae palam multis audientibus doctrinae; quae multo minor ac rarior futura erat, si in peregrina et ignota omnia venissent. Accesserat etiam linguae graecae vsus, primum per Graecorum imperium latissime, etiam quodam tempore ad Iudaeos propagatum, deinde per coniunctionem rerum Romanarum cum Graecis inde ab Achaico foedere, et subiectos Romanorum imperio Graecos, ad omnes populos fusus, et in ipsa Iudaeorum sacra receptus; qui Apostolis hoc opportunitatis dabat, ut omnibus in locis publice priuatimque docere et populares suos et alienigenas possent. Quae ut nemo sine numine diuino accidisse putabit; ita valde pertinere ad sapientiam diuinam, et diuinarum humanarumque rerum quandam concordiam, gubernatore sapientissimo dignam, in promptu est. Atque ut hoc obiter addamus, ex his ipsis patet, quare sapientiae diuinae consentaneum visum, illo potius tempore, quam alio, aut maturius proferre hanc religionis formam, quae a Christo tradita est. Quae spero esse planiora iis, quae v. c. *Conybarius e. Tindalium cap. 8. p. 388.* differit.

94. Enimvero, ut in illo res humanae diuinis, sic in eo, de quo quaerimus, res diuinae attemperatae videntur humanis. Primum illis temporibus philosophia et omnium bonarum artium studia, longe lateque fusa, contemptum cerimoniarum religiosarum attulerant, quarum multitudinem homines illis dediti, in superstitionis ridendae parte ponebant. Omnino, siue hac, siue aliis de causis, homines multis locis erant ab cerimoniis alieniores. Id etiam ex hoc, ut opinamur, intelligi potest, quod, qui doctrina Iudaeorum capti, in societatem eius venire cuperent, quos fuisse, circa tempora Christi, permultos constat, cerimoniis uti Iudaicis ita recusabant, ut Iudaeis necesse esset, homines religionis suae appetentes a necessitate cerimoniarum seruandarum liberare. Erant porro ad regnum I. C. paulatim vocandi, tot populi e
Septen-

Septentrione Europæ, a quibus nunc omnis prope Europa tenetur. Hi aduëti religionibus vel nullius vel paucarum cerimoniarum, faciliores futuri erant ad Sacra Christiana suscipienda, si ipsorum moribus et simplicitati essent hac ex parte simillima. Et memoriae proditum est, quosdam etiam tam paucis Sacramentis offensos, et difficiliore ad assentiendum factos fuisse. Quid futurum erat, si religio Christi, pari cum vetere Iudaica comitatu rituum stipata, iis se obtulisset? Sed hæc, cum in coniectura sint, quam in partem accipiantur, non magnopere laboramus. Illud quidem sine dubitatione proque certa re, licet affirmare, in magno beneficio bonitatis diuinæ ponendum esse, quod nec prisca illa tam molesta rituum multitudo mansit, nec in eorum locum alii, pari aut maiori numero succedere, agente etiam hoc sapientia diuina, vt homines magis a sensibilibus abducti, in rerum intelligibilium et diuinarum cogitatione totos se collocarent. *Gal. IV, 1. Act. XV, 10. Io. IV, 23. 24.* Hunc locum miror a *Capello* inter *praerogatiuas Eccl. N. T. supra veterem Iudaicam*, esse praetermissum. Nam *Witfius Oecon. IV, 15.* quod caput est *de bonis N. T. leuiter*, vt alii, ab ea parte attigit, quæ ad Iudaicarum cerimoniarum abrogationem pertinet. Sed ad veterem illam Iudaicam veniamus.

95. In qua maxime offenduntur aduersarii nostri, propter illa arbitraria, quæ in ea insunt plurima. Sed eorum non modo ea est *innocentia*, vt sine iusta causa iis offendantur homines, sed etiam *salubritas*, vt honorifica sint et religioni, et auctori Deo. *Innocentia* quidem talium institutorum cernitur in hoc, si in iis, eorumque vsurpandorum modo, nihil est, quod pugnet cum pietate in Deum, et ad eam vel peruertendam falsis opinionibus, vel impediendam et debilitandam in animis humanis necessario valeat; si porro nihil, quod virtutis reliquæ veritatem obscuret, eiusque necessitatem tollat. *Salubritatem* porro habent, si in iis est disciplina veræ sapien-

sapientiae, pietatis, et virtutis, apta vsurpantium ingeniis, moribus, etiam temporibus. Quibus constitutis, non est difficile, vtramque ritibus V. T. asserere. Ac nos non ignoramus, hunc locum, praesertim quoad innocentiam attingit, tractatum esse a quibusdam Britannis, qui aduersus *Tindalium* sibi certamen sumserunt, in his a *Iac. Fostero*, cap. 4 et 5. sed eius disputatio, etsi innocentiam bene defendit, quod est facillimum, tamen salubritatem nimis arctis finibus constringit, totam ponens in perspicua et perpetua seiunctione iudaeorum ab gentibus ceteris, quae veritate religionis carerent, et remedio idololatriae; cuius vtriusque necessitatem ad conseruandam in illa gente religionem veram bene defendit. Itaque non alienum putauimus, hunc locum nostro modo explicare.

96. Et in *innocentia* quidem longam disputationem superuacuam facit et rei ipsius perspicuitas, et instituti nostri ratio, quod *salubritatem* magis attingit, quam innocentiam; quamquam illa in huius veluti fundamentis consistit. Nam totam illam cerimoniarum multitudinem, quoad iis acquieuerit Israëlita natio, nec ab iis se ad alios ritus traduci passa sit, inuiolatum reliquisse verum de Deo vno, inuisibili, mundi auctore, et rerum omnium conseruatore, sensum, eoque de praescripto ipsius, pietate, obedientia, et virtute colendo, res ipsa declarat: nec ea res vllam dubitationem potest habere. Nihil igitur hic vitii est, sed innoxia omnia. Cum autem haec sit indoles ingenii humani, praesertim plebei et indocti, vt adhaerescat rebus sensibilibus, oblitum intelligibilem et coelestium, in illisque totam religionem et sanctitatem ponat, et poni cupiat, propterea, quod facilius est, corpore agere, eique imperare, quam animo: cautum est his incommodis diligenter in illa ipsa religione, per praecepta eiusmodi, quae plane et seuerè docerent, in illis cerimoniis non esse maximum cultum Dei, aut totam, sed longe maiora esse interna, quae mente et animo perage-
rentur,

rentur, fidem, obedientiam, sine quibus illa, velut mente ac sensu cassa, etiam displicerent, 1 *Sam. XV*, 22. *Pf. L. Es. I*, 11 *et.* Itaque si quid in hoc genere ab Israëlitis peccatum est, quod factum esse plus, quam satis esset, docent querelae Prophetarum, eius culpam omnem sustinent homines, nihil inde ceremoniae ipsae vitii aut noxae trahunt.

97. Sed innocentia earum multis et magnis commodis cumulatur. In quibus primum facile agnoscimus ea, quae diximus a *Rostero* et aliis demonstrata, unde etiam sapientia diuina illustratur, quae conseruandae religioni verae, et cauendae superstitioni ita aptas res inuenit et sanxit. Quod si quis Spencerianam rationem probet, cuius vitia non ignoramus; adiuuerit et ipse causam nostram. Est enim benignitatis et misericordiae paternae, demittere se ad imbecillitatem suorum, quoad ipsius sanctitas et religionis dignitas patiatur. Sed nos aliis et maioribus rebus salubritatem istarum ceremoniarum aestimamus, vt diximus. Et quoniam in iis proprie non est ipsius religionis pars, nisi quoad obedientia Deo in iis seruandis praestatur, sed disciplina religionis virtutisque colendae; ea quomodo insit, breuiter demonstrandum videtur. Nos autem non sumus ii, qui disciplinam ponamus modo, aut maxime, in coercendis rebus malis; sed etiam, et multo magis, in adiuuandis bonis. Neque enim disciplina est propria improbis, quos coerceri seueritate institutorum idoneorum conuenit, sed communis etiam probis. Et est multo melior, quae bonis prodest, quam quae malos coercet. Nam haec modo abstrahit a delictis externis, et cogit facere externum virtutis et religionis opus: illa adiuuat pietatem et virtutem ipsam, per quam vera opera sanctitatis fiunt. Habuerunt ergo ceremoniae Mosaeicae disciplinam illius generis, quoad necessitatem attulere sacrorum certis temporibus obeundorum, et peccatorum quocunque modo expiandorum. Quorum alterum cauebat, ne homines improbi paullatim omnem

omnem religionis sensum exuerent, sed perpetuam peccati exprobrationem, et officii ac poenitentiae admonitionem haberent, per quam occasionem quin interdum homines ad meliorem mentem reuocati sint, dubitari vix potest: alterum autem homines saltem in peccando timidiore redderat, et metu a peccatis multis abstrahebat. Sed melior illa ad pios pertinens disciplina, vel ad scientiam et fidem refertur, vel ad animum eiusque sensus, vel ad actionem; contineturque institutis apte excogitatis ad scientiam religionis augendam et firmandam, fidem alendam et excitandam, sensus animi ad normam certam pietatis et virtutis fingendos et roborandos, actionem denique vitae adiuuandam per exercitationes idoneas. Talem vero disciplinam fuisse in cerimoniis Mosaicis, si per omnes partes eundo demonstrare institueremus, vix finem habitura esset disputatio. Itaque paucis exempli causa ponendis desungemur, e quibus de ceteris iudicare facile sit.

98. Atque ut a parte ea initium faciamus, quae ad scientiam verbi diuini pertinet. a quo omnis vera fides et sanctitas ducitur; de *Sabbati* instituto primum videbimus. In quo non docebimus, quam utilem disciplinam habuerit in eo, quod, feriandi necessitate imposita, pae-ne traheret homines ad sacra statim horis obeunda, aut quod imitatione Dei opera sua intuentis post sextum diem et probantis, vocaret homines ad acta superiorum dierum recolenda, et eorum rationes a se reposcendas, ut fierent post cautiore, si aberratum a lege viderent: (*Philo de Decal. p. 758.*) sed modo, quantum profuerit ad verbum Dei cognoscendum atque imbibendum. Etenim quod omnibus Sabbatis ita audiebatur necessario pars verbi diuini, ut certo Sabbatorum numero, olim lex tota, post libri etiam Prophetarum omnes absoluerentur, homines adulti, iisdem saepe audiendis, ita percepta tenebant omnia, ut nihil eos fugeret. Cuius rei auctorem ac testem habemus *Iosephum*, cuius egregius est et dignus lectu

lectu locus c. *Apionem II*, 16. 17. vbi ostendit, apud Iudaeos coniuncta fuisse, quae alii populi distracta haberent, *διδασκαλίαν* et *ἀσκησιν τῶν ἱθῶν*, *doctrinam* et *disciplinam institutorum*: horum autem pulcherrimum fuisse in ista assiduitate per dies Sabbatorum audiendae legis, per quam effectum sit, vt omnia legis capita *non minus* quisque *quam nomen suum* teneret. Quod ille quidem de legibus Mosis dicit, de quibus id eo loco praedicari satis erat, sed pariter de Prophetarum libris dici poterat. Nec in ea re ostentationis suspicio est, cum et muljerum in libris sacris, et eorum qui nunc sunt Iudaeorum exempla rem firment. Mariae quidem preces illae pulcherrimae totae ita nexae sunt verbis diuinis, vt appareat ei familiarissima fuisse ex illis crebris auditionibus verba et sententias sacrorum librorum. Et nunc, satis constat, Iudaeos permultos, etiam expertes eruditionis Iudaicae, ita tritos esse in libris V. T. vt plerosque Christianorum in eo genere longe superent. Atque illa tanta totius verbi diuini scientia, magnam hominibus, praesertim piis, facultatem dabat meditandi assidue verbum diuinum e descriptione Daudica, *Psf. I, 2*. Itaque non modo propterea inerat beneficium in hoc instituto, quod vacationem dabat corpori humano a laboribus, ipsum quoque magnum et amabile; sed etiam, et multo magis hac de causa, quod disciplinam verbi diuini exercitatione tali imbibendi efficacissimam habebat.

99. Atque hac ipsa de causa in eodem instituto erat *disciplina fidei*, quae assidue audiendo verbo venit et manet, nascitur et alitur. Sed huius disciplinae aliud, nec parum efficax genus fuit in genere sacrificiorum eo, quod animalium sanguine fundendo peccata expiaret. Nam cum in eo esset adumbratio futurae per Messiae mortem expiationis, ad omnes peccatorum poenas abolendas pertinentis, et veniae impetrandae spes tota referretur ad misericordiam et beneficium diuinum, non minus ad excitandam et alendam fidem viriū habebant, quam
nunc

nunc Eucharistia recte celebrata. Nec vero hio nobis explicanda est, vt opinor, disputatio longa, qua vincamus, hanc admonitionem in eo genere sacrificiorum ex instituto et consilio diuino fuisse, cum ea res claris Christi et Apostolorum testimoniis nitatur, sintque eius etiam in Iudaeorum libris vestigia, quae *Schoettgenii* diligentia collegit in *Horis Talmud. T. II. p. 483.* Quod si ea seris V. T. temporibus paullatim oblitterata fuit, et ignota plerisque, hominum id vitium fuit, qui in talibus rebus facile adhaerescunt in eo, quod in sensus incurrit; neglecta parte meliori, quae mente peragenda est. Nec quod in lege ipsa nullaeius rei mentio facta est, propter ea negari, aut ignota veteribus existimari debet. Nec enim legis illa doctrina fuit, sed Prophetarum, in quorum scholis ea tradebatur. Nam nec hoc in lege discrete scriptum est, in talibus sacrificiis obeundis cogitationem peccatorum cum dolore vero, et deprecatione venias, et voluntate seria peccatorum postea cauendorum, requiri, sine quibus inutilia esse sacrificia, et ad augendam culpam et poenam valere. Et tamen hoc non ignotum aut non traditum esse doctrina religionis Iudaicae, tum Prophetarum libri docent, tum Iudaeorum posteriorum scripta, vt *Philonis de Victimis*, item de *Sacrificantibus*, et *Targum ad Ecclesiast. IV. ult. cet.* Ex quo illud quoque intelligitur, quod praeteriri non debet, in sacrificiis istis fuisse *disciplinam poenitentiae* vtilem et salutarem: in quo ipso magna eorum est commendatio, et sapientiae diuinae laus.

100. In ceteris porro sacrificiis et oblationibus omnibus fuisse egregiam *disciplinam pietatis* aduersus Deum, omnia bona vitae humanae, omnes euentus secundos, referentis ad beneficium diuinum, res propemodum ipsa clamat. Necessario enim occurrebat in tali genere caeremoniae, Deo deberi, quidquid boni obtigisset: eius rei professionem solennem et gratam edi tali ritu obeundo: ab eodemque esse speranda secunda in posterum. Nec du-

Ernesti Opusc. Theol.

T

bitem,

bitem, in legibus de discrimine ciborum, fuisse de consilio diuino, disciplinam aliquam cupiditatum castigandarum et refrenandarum, per necessitatem abstinendi ab cibis iis, quibus alii populi delectarentur; idque innuit *Iosephus l. c.* Et sunt multa alia, quae dici in hanc sententiam possunt: sed modus adhibendus est; et via per haec ad indagandum est patefacta. Ceterum si non potest in omnibus talis aliqua vis indagari et explicari, non propterea nihil huiusmodi in iis fuisse iudicandum est, quod esset salubre homini, gloriosum Deo. Etenim non est mirum, si nos, tam longe ab iis temporibus remoti, quibus illius disciplinae vera ratio et verus usus et perspectus erat Prophetarum traditione, et frequentabatur vulgo, ea ignoramus, et nostra sponte indagare non possumus, cum etiam Christi temporibus perpauci essent, qui maiorum rerum veram rationem et legitimum, de consilio Dei, usum tenerent. Et sunt fortasse quaedam in his similia Parabolarum Euangelicarum περιόδοι et minutis partibus, quae non propriam causam aut significationem habent, sed explendo Parabola quasi corpori feruiunt; in quibus si quis proprium aliquod Dei consilium ad disciplinam talem pertinens indagare velit, argutias citius parum probabiles exprimat, quam veritatem reperiatur, quod *Philoni* et aliis allegoricae rationis amicis saepe accidit.

101. Illud autem praeteriri non debet, quod maxime pertinet ad disputationis nostrae consilium: disciplinae talis etsi non ea necessitas fuerit, ut sine ea ad religionem, fidem, poenitentiam cet., adduci homines non possent, aut ut alia esse non posset; tamen cum Deo salubre ad consilia sua visum esset, caerimonias tales ac mores sancire §. 96. summam salubritatem fuisse, eamque ob causam laudandam esse et sapientiam diuinam, quae eas summae religionis ita aptauerit, et bonitatem, quae per hanc disciplinam talem adiuuare homines in omni parte religionis, et consuetudine quadam ad fidem et pietatem addu-

adducere voluerit. Quanta autem vis sit talis disciplinae institutorumque exercendae cuiusque virtutis vel artis, sapientissimi quique omni tempore intellexerunt. Grauis enim error est eorum et perniciosissimus, qui in rebus ad actionem pertinentibus satis esse putant, si doceant, quid et quomodo agendum sit, et cohortatione, hoc est, commemorandis iis, quae motiua vocari solent in Scholis, vtantur. Quibus rebus nihil aliud effici potest, nisi vt sciat aliquis officium, et ad id vtcunque impellatur animus, i. e. ad optandum, vt officium ipse faciat: nisi vero etiam Rhetores praeceptis eloquentiae tradendis et laudibus eius, pulcritudine et vtilitate, commemorandis, disertos facere discipulos possunt. Enimuero vt facias, et constanter facias, quod est proprium verae virtutis, id sine exercitatione multa fieri non potest, quam teneri disciplina certa et apta, id est, institutis ad vitia paulatim coercenda et excludenda, et ad actionem rectam celeriter et facile suscipiendam valentibus, in promptu est. Haec est illa disciplina, qua lapsa, virtutem ipsam lapsam queruntur historici Romani. Pulcerimus est locus apud *Xenophontem* in *Cyropaedia tertia*, non longe a fine: vbi Cyrus inducitur Chrysantae monenti, vt et ipse cohortatione apud milites vteretur, quod id faceret rex Assyriorum, ita respondisse, vt diceret: μηδέν σε λυπώντων αἱ τῆ Ἀσσυρίᾳ παρακλήσεις. ἑδεμία γὰρ ὄτως ἔσαι καλὴ παραίνεσις, ἥτις τὴς μὴ ὄντας ἀγαθὸς αὐθιμὲρον ἀκύναντας ἀγαθὸς ποιήσει· ἢ κ' ἂν ὦν τοξότας γε, εἰ μὴ ἔμπροσθεν τῷτο μεμελετηκότες εἶεν, ἢ δ' ἀκοντιστὰς, ἢ δὲ μὴν ἰκπίας γε, ἢ δὲ μὴν τάγε σώματα ἱκανὸς ποιεῖν, ἢ μὴ ἔμπροσθεν ἡσκηκότες ὦσι. Ne tu timeas cohortationes Assyrii. Nulla enim esse potest tam pulcra cohortatio, quae eos, qui fortes non sint, statim audiendo fortes faciat: non certe bonos sagittarios, nisi ante eam artem exercuerint, nec iaculatores aut equites, aut qui corpore labores sustineant sine praegressa exercitatione. Et post demonstrat, non modo legis praeceptis opus esse, sed

etiam magistris et praefectis, qui *doceant et consuefaciant* facere ea, quae leges iubeant. Et his similia sunt in *Platonis de Republica* libris, quae alibi a nobis sunt indicata. Sed ut ad eundem locum pluribus saepe viis pervenitur, pari commoditate viatorum, saltem pro cuiusque rationibus et consilio, nec necesse est omnibus eadem via ire: ita illa disciplina, quamvis bona pro indole gentis et ratione temporum, aboleri a Deo potuit, inducta alia simpliciore et omnibus populis apta.

102. Non ignoramus, esse plura, de quibus in hanc partem dici possit, non modo in Iudaica religione, sed etiam in ea, quae primis generis humani parentibus in Paradiso fuit. Sed supergressi iam sumus modum Academicæ Exercitationis. Itaque hic finem facimus *Vindiciarum* nostrarum: quas ut optimo animo suscepimus, ita plurimis prodesse ad agnoscendam sapientiam et bonitatem institutorum diuinorum cupimus; quod nobis in tota huius causæ actione spectatum fuit. *Deo soli bono et sapienti sit laus et gloria in omnia secula!*



DE
DISCIPLINA
CHRISTIANA

T 3

DE
DISCIPLINA CHRISTIANA

P R A E F A T I O.

Quum omnes fere artes atque doctrinae paullatim incrementa maiora ceperint, et per ingeniorum multorum inuenta, curam et diligentiam, elaborationem maiorem acceperint: tum vero etiam Theologiae pars ea, quae de vita et moribus Christianorum praecipit, in eius felicitatis societatem venit. Eius rei causa haud soimus an praecipua fuerit institutum illius partis separatim ab altera tractandae, quae ad fidem proprie pertinet, et ad corpus proprium doctrinae redigendorum omnium, quae cum vita et moribus habent conjunctionem: cuius instituti auctorem *Georgium Calixtum* fuisse constat. Nam ab Apostolorum inde temporibus ea sic a doctoribus Ecclesiae tractabantur, ut, in interpretandis populo scripturis sacris, et quae ad fidem pertinerent, ad vitae conformandae usum conferrentur, et praecepta vitae atque morum per locos communes illustrarentur et inculcarentur: ut tum ab aliis, tum a *Chrysostomo* factum esse videmus, cuius vel solae Homiliae in Matthaenum prope omnes vitae Christianae partes complectuntur; vel ut separatim in concionando, aut per alias occasiones, pars aliqua officii christiani explicaretur. Posteaquam vero Corpora doctrinae Christianae fieri coepere ad scholarum usum, e scripturarum sacrarum et doctorum clariorum sententiis coagmentata, libri sententiarum appellati, in ea congesta sunt, non modo quibus fides Christianorum, sed etiam quibus animus, mores et

vita informarentur: Nostros quidem ab *Lutheri* tempore, qui talia corpora Doctrinae Christianae conficerent, vt sub Locorum theologicorum nomine, ea per varia capita, vt de peccato, lege, bonis operibus, aliaque, dispersisse, satis constat. In qua ratione haud facile erat videre, quid deesset, aut, quomodo cohaerent omnia inter se, perspicere. At posteaquam ea secerni coepere a ceteris, et ad formam doctrinae propriae reuocari, maior opportunitas data est, singula elaborandi diligentius, et ordine apto inter se coniungendi, et a certis principiis omnia repetendi.

2. Atque ea res etiam fecit, vt non modo doctores saepius ac copiosius de officiis pro concione dicerent, sed vt etiam homines magis appeterent ac requirerent de moribus homilias, quam quae de capitibus fidei exponerent. Nam si quis inde colligere velit, vitae sanctae appetentiores et studiosiores factos esse homines, quam ante fuissent, aut ea re sanctiores factos, aut id doctores maxime spectasse, valde erret. Alias res habet etiam illecebras. Atque vt a doctoribus incipiamus, prima illecebra est facilitas rei. Nam facilius doctrinae moralis caput, quam fidei, et recte accurateque intelligas atque explices, et, vt nunc sunt tempora, satisfacias in eo audientibus. Accedit, quod, qui comto ornatoque genere dicendi vti cupiant, in rebus moralibus rem expeditiorem habent. Nam eae facile a sententiis atque figuris ornatum quendam capiunt, et admouentur ad sensus humanos: at dogmata fidei pro concione recte explicare, et rationibus idoneis firmare, idque facere cum aliqua commendatione orationis, id est, ornatu talibus rebus apto, id quidem est magnae difficultatis. Nam res dogmaticas, propter communem tenuitatem rerum abstractarum, ad sensus humanos perdifficile est admouere, et longe maioris ingenii et artis, quam in rebus ad vitam pertinentibus, disertissimum esse atque yberrimum verbis, figuris et sententiis. Nec vero alia causa est, quare homines moralia libentius audiant, quam

quam dogmatica. Nempe et facilitate audiendi capiuntur, et multo magis ornatu verborum, sententiis acutis et bellis, et motibus animi mollibus. Itaque plerumque nullum alium iis audiendis fructum capiunt, quam e spectatis et auditis in scena tragoediiis.

3. Tantum vero abest, ut ab omnibus vniuersa consuetudo crebrius tractandi res morales in concionibus ad populum probata sit, ut potius multi fuerint, sintque et nunc, qui super ea re grauiter conquererentur. Atque nos facile largimur, sub iis querelis interdum aliquid vel iniquitatis, vel odii et inuidiae, fortasse etiam aliquid vanitatis latere: nec tamen, eas interdum iustas esse, negari potest, ut in iis, qui doctrinam quandam inducunt de officiis et moribus, specie illam quidem magnificam ad sensum populi illius, qui plus sapere didicit in disciplina scenae et libellorum vulgarium, fauorem hominum, per bellas sententias et verborum nouellorum condimenta quaerentium, reuera magis ostentatricem vanitatis cuiusdam, quam verae et Christianae virtutis magistratam et commendatricem: quo sane quidam hodie inclinauere.

4. Quid vero de iis dicamus, qui in officiis explicandis pro concione totam rem esse putant confectam, si virtutes et officia pariter ac contraria illis vitia atque peccata, ita tractent, ut primum eorum indole, fortasse etiam causis bene explicatis, incitamenta varia vel seruandi officii, vel cauendi peccati, vel e ratione et experientia, vel e scripturis sacris repetita proponant? quae ratio a pluribus retro annis ad nostra usque tempora fere dominata est in concionando. Enimuero non difficile est, eius rationis vitium animaduertere. Nam nulla in re, quae quidem pertinet ad actionem, satis est scire, quid aut quare sit faciendum, nisi si res sit eiusmodi, ut modus illius agenda statim sit in promptu, nihilque ad agendum requiratur, praeter solam voluntatem vndecunque ortam et commotam: nec in vlla arte humana, quae

homines ad actiones certas erudit, haec sufficere creduntur: ut mirari satis non possimus, quomodo quis in iis possit, acquiescere, quum homines ad officium faciendum adducere instituit, et sibi persuadere, quemquam par ea faturum talem, — qualem esse velit, aut acturum, quae facere iubeat. Immo vero intelligendum erat atque faciendum, quod magistri humanarum artium bene faciunt, ut etiam modus virtutis et officii consequendi explicaretur. Saepe etiam, ut agere possis, quod debeas aut velis, opus est exercitatione aliqua, cuius modus et ratio est cognoscenda. Nec in iis cognoscendis satis est generalia quaedam praecepta tradere, sed quae sint accommodata ad cuiusque actionis, officii, virtutisque indolem atque naturam. Sed haec post planius explicabuntur. Restat igitur, ut pars doctrinae moralis eo pertinens diligentius in populo docendo adhibeatur, et tractetur inprimis excolaturque in scholis diligentius. In ea est, quae proprie *Disciplina Christiana* dici debet, de cuius natura et modo exponere instituimus.

SECTIO I.

De disciplina uniuerſa.

5. Ante vero quam ipsam explicemus Disciplinae Christianae naturam, de vocabulo quaedam videntur praemonenda. Ac satis quidem frequens est consuetudo verbi huius de doctrina ipsa vsurpandi, siue de eo, quod per doctrinam cognoscitur vel cognosci debet; sed eam aberrare a propria verbi vi et vsu veteris latinitatis, haud difficile est intelligere. Nam ea disciplinam, in scholis quidem, refert ad methodum docendi atque discendi, intelligitque instituta, quibus magistri vtuntur, non modo ad bene intelligendum et cognoscendum, sed etiam ad faciendum, quod cognoueris: id quod vsu optimi cuiusque scriptoris latini potest confirmari. Quo pertinet quod

quod apud *Ciceronem* disciplinae de seſtis dicuntur, vt *Nat. Deorum* I, 7. Nam philoſophia vna eſt: at plures eius ſunt diſciplinæ propter varietatem philoſophiæ tradendæ. Eſt et diſciplina rhetorica, quæ et vniuerſe ad methodum reſertur, doctori cuique in tradendis præceptis propriam, et vero maxime ad modum exercendi tironis, non tam vt diſcat præcepta dicendi in arte, quam vt ea ad vſum conferre paulatim conſueſcat per exercitationes legendi, ſcribendi ac declamandi; accommodato ad præcepta dicendi tradita. Omnino diſciplinæ verbum propriam ſedem habet in actionibus, tum internis, tum externis regendis et confirmandis. Cuius quidem generis eſt *diſciplina domeſtica* ſæpe veteribus, inprimisque *Ciceroni* commemorata; tum *diſciplina ciuitatis* aut *reipublicæ*, quæ inſtitutis moribusque publice receptis continetur ad ciues legibus parentiores efficiendos, *Orat.* I, 1 et 34. *Brut.* 10. *Verr.* III, 69. Ex eodem genere eſt *naualis diſciplina* Rhodiorum, *Manil.* 18. tum *diſciplina militaris*, quæ proprie ineſt in inſtitutis, omnibusque exercitationibus, per quas boni milites fiunt, i. e. qui poſſint in bello gerendo operam bonam et vtilem nauare, non in ſcientia rei militaris, quæ ducibus propria eſt. E quibus intelligitur, eos valde errare atque abuti diſciplinæ verbo, qui in ea, cum ad vitam moresque reſertur, tantum caſtigations per vim poenasque intelligunt; vnde etiam de noſtris quidam, qui de diſciplina eccleſiaſtica tradere inſtituerunt, rem paene omnem eo retulerunt. Enimvero vetus latinitas Eccleſiaſtica, cum de diſciplina ea loquitur, omnia complectitur inſtituta publica, exercitationesque externas, quibus mores Chriſtianorum regi, formari, contineri, omninoque pietas et virtus adiuuari poſſit.

6. Apud Graecos diſciplinæ verbo reſpondet *παιδεία*. Quod conſcripſit opus egregium, ſub titulo *παιδείας κύρις*, *Xenophon*, eſt de *diſciplina Cyri*, i. e. inſtitutis Cyri, et vniuerſa, vt vulgo loquimur, methodo, i. e. artibus

bus imperandi bello ac pace. Sed ipsae scripturae sacrae utuntur hoc verbo de genere institutorum diuinorum pertinente ad Christianos exercendos, tum ad omnem pietatem atque virtutem, tum inprimis ad constantiam atque patientiam, quod genus crucem appellamus, *Hebr. XII, 5. 7. 8. 11.* Paullus autem, quum *Ephes. VI, 4.* coniungit παιδείαν cum ὑποταγή, non profecto tantum iubet elementa doctrinae Christianae tradi liberis, sed maxime ea intelligit, per quae a parentibus liberi adduci possunt ad amorem pietatis et virtutis, per quaeque ad-
 fuescitur vitae pie et honeste agenda. Nec multum ab-
 ludit ἡ παιδεία ἡ ἐν δικαιοσύνῃ, pro eis δικαιοσύνη. Hinc fit, ut παιδεύσθαι et παιδεία pro consuefactione per bona instituta et exercitationes idoneas dicantur. Itaque hoc verbo Hebraeorum וְיָדוּ veteris testamenti interpretes Graeci expresserunt, ut *Pf. L, 17.* quod verbum aptissime exprimit disciplinam, quae proprie dicitur, coercentem vitiosas cupiditates et adsuefacientem homines ad custo-
 diam legum et officii. A Graecis Ecclesiae scriptoribus etiam verbum ἀσκήσις in ea re adhiberi solet, quam-
 quam proprietatem tantum partem disciplinae exprimit, habet-
 que ea consuetudo et ipsa fundamentum in vfu scriptu-
 rarum. *Act. XXIII, 16.* coll. *1 Cor. VIII, 27.* Clementis quidem *Alexandrini (Strom. IV. p. m. 484.)* κυριακή ἀ-
 σκήσις, quam dicit ἀπάγειν τὴν ψυχὴν τὸ σῶματος ἐν-
 χαλσίως, tradita a Domino Iesu Christo ἀσκήσις, commo-
 de abducit animum a corpore: nihil aliud est, quam disci-
 plina vitae, a Christo tradita et instituta. Tum omnia
 instituta et Ecclesiae publica, et singulorum priuata, ad-
 iuvantia opus cauendorum deponendorumque vitiorum,
 tum pietatis assumendae et virtutis, ἀσκήσις nomine ap-
 pellantur. Paullatim proprie appellari verbo eo coepe-
 re instituta ea, quae ad cupiditates carnales refrenandas
 et extinguendas valere deberent, ut ieiunia, vigiliae, so-
 litudo et similia; vnde tota disciplinae ratio corrumpi;
 et ad exercitationes corporales siue castigationes referri
 coepit.

coepit. Sed de hoc verbo, et eius vniuerso ac vario in vetere Ecclesia vsu, adeant studiosi *Casaubonum* aduersus *Baronium Exerc. II. n. 13. et Antonellum*, in *Diss. de Ascetis*, inter *Iacobi Nisibeni* Homilias, cap. 2. Sed ad rem a verbis veniamus.

7. Omnis omnino disciplina, tum quae est Christianorum, tria habet. Primum est, vt sensus animis iniiciat, quibus verae pietatis atque virtutis amor excitetur, foveatur, magis magisque alatur et firmetur, denique etiam conseruatio officiorum faciliior et constantior reddatur. Alterum est in institutis, apte excogitatis, per quae primum sensus illipii et honesti in animum suscepti, confirmantur acuanturque, deinde actiones ipsae Christianae, et opera pietatis, tum externa, tum interna, faciliiora reddantur, detracta inprimis molestia, quam in agendo habent apud animos, eorum adhuc rudes: adde, per quae praeparantur homines ad actiones maiores, similitudine quadam actionum. Tandem omnis disciplina exercitationes quasdam desiderat, quibus vitiosas consuetudines debilitare, peccata cauere, tentationes, quae nobis obuenerint, superare possimus, denique, quod volumus facere, certo et constanter facere, adque omne bonum opus apti reddamur atque idonei.

8. Haec tria et intelligi in disciplina a veteribus, et in ea requiri, si facere debeat officium, quod ei proprie attribuitur, non difficile est demonstrare. Et illud quidem quoniam in disciplina Romanorum priuata iam demonstratum est in iis, quae de ea scripsimus, (*Opusculorum Philologicorum pag. 35. sqq.*) disciplinae publicae exemplo vtemur. In ea igitur veteres inprimis commemorant sensus, quibus Romani a pueris imbuere solebant, auctoribus iis, qui ciuitatem Romanam constituissent, Romulo inprimis, Numa Pompilio, Seruio Tullio, Bruto, eosque tradunt ad reuerentiam religionis, iurisiurandi, legum, magistratus, ad dignitatem rei militaris, rei rusticae, honestatem paupertatis, ad amorem libertatis, impe-

imperii et patriae pertinuisse cet. cf. *Rollin, Maniere d'étudier et enseigner les belles lettres T. III. p. 379. sqq.* His porro sensibus publicis ciuitatis Romanae adiungunt, in disciplina commemoranda et explicanda, maiorum instituta, vt *Cicero Verr. III, 69.* vbi *liberos erudire iubet ad maiorum instituta et disciplinam ciuitatis*, locisque aliis: nec quicquam frequentius est, apud Latinos quidem, mentione institutorum, quae saepe cum moribus coniunguntur, apud Graecos autem, laudibus institutorum Romanorum, vt apud *Polybium*, in libri sexti excerptis; in his eius, quo in funeribus nobilium utebantur, quod ille ait efficacissimum fuisse ad ingenerandum amorem virtutis et laudis, et iniiciendos stimulos rerum pro patria gerendarum. Vicissim Latini saepe instituta Lycurgi et Solonis laudant, vt solertissime excogitata, et efficacissima ad virtutem ciuium. Denique exercitationes sollemnes et publice praescriptas commemorant, quibus v. c. iuuentas vteretur necessario, vt consuesceret molestias laborum, paupertatis, dolores vulnerum ferre, omninoque facere, quod propter vtilitatem publicam bello ac pace faciendum esset.

9. Quodsi Philosophos consulimus super disciplina priuata virtutis, et ciuitatis publica, eadem omnia reperimus in partibus disciplinae poni. Admirabilis inprimis in hoc argumento tractando est *Plato*, cuius libri Politici nihil pulcrius habent disputationibus de disciplina priuata et publica, vt inprimis liber quartus de *Repubblica*, non vnus de *Legibus*, vt primus, secundus, septimus, et *Epinomis*. Sed ille disciplinae, per quam boni viri et ciues fiant, omnia ea tribuit, quae nos in eius partibus posuimus. *Episteti* Enchiridion profecto nihil habet aliud, quam disciplinam virtutis. Eam autem tradit sensibus, institutis, et exercitationibus, aptis ad virtutis amorem et consuetudinem suscipiendam, vt, qui legerit attente, facile reperiet: vnde Graeci Philosophi, qui id opusculum commentariis illustrauerunt, *Arrianus* et *Simplicius*, mul-
ti

ti sunt in his generibus rerum tractandis. Vide v. c. *Arrianum* I, 16. 18. III, 2. 8. 12. Nec alia est disciplina *Antonini* Imperatoris, cuius libri magnam habent cum *Epieteto* similitudinem. E Latinis Philosophis, ne *Senecam* attingamus e disciplina Stoica, *Ciceronis* liber *Tusculanarum Disputationum*, de vincendo dolore, etiam exemplum egregium talis disciplinae habet.

10. Sed instituta et exercitationes quid differant, dicendum videtur, ne propter similitudinem confundantur, et a nobis male distingui videantur. In illis igitur, in institutis, proprie actio est et consuetudo aliqua, in qua aliud fere spectatur, quam agitur, idque, quod agitur, non propter se, sed propter aliud suscipitur. Velut in illo quod *Sextius*, antequam obdormisceret, facere solebat, ut est apud *Senecam*, fuit institutum virtutis comparandae. *Faciebat hoc Sextius*, inquit ille de *Ira* III, 36. *ut, consummato die, quum se ad nocturnam quietem recepisset, interrogaret animum suum: quod hodie malum tuum sanasti? cui vitio obstitisti? qua parte melior es?* Nam in ea cogitatione vel actione animi non fuit officium ipsum, aut opus officii et virtutis, nec suscipiebatur propter se, sed propter aliud, h. e. ut fieret ad curam virtutis diligentior. Cuius generis est etiam provisio futurorum, et cogitatio, quid nobis possit accidere, quomodo res suscepta euenire cet. ut nihil quicquam inopinati nobis obveniat. Non illa ipsa cogitatio habet per se aliquid boni, nec adeo sua causa fit, sed propter aliud, ne malum, ubi euenierit, molestius nobis sit, ut ante, quid, ubi acciderit, faciendum sit, praeparare animo possimus. Ex eodem genere sunt ieiunia, vigiliae, statae precandi horae, et similia. In exercitatione vero actio est, quae propter se suscipitur in officii parte ac loco; atque exercitatio fit in ea re ipsa, quae quaeritur, quae ad officium pertinet: ut, cum exercemur in scribendo ac dicendo, in laborando, similibusque, id facimus consulto ac destinato, ut ea ipsa facere recte, et facile, et quolibet tempore possi-

possimus. Bene *Simplicius* in *Epieteti Enchir.* p. 10. *πᾶσα γυμνασία διὰ τῶν αὐτῶν ἐπιτελεῖται, δι' ἧ καὶ προηγουμένη ἐνέργεια, πρὸς ἣν γυμναζόμεθα. Ἡ γὰρ πρὸς πάλην γυμνασία διὰ τῆ συνεχῶς παλαίειν γίνεται.* cet. *'Omnis exercitatio per eadem fit, per quae principalis actio, cuius causa exercetur. Veluti exercitio ad lucram fit assidue lucrando.* Ac nos non ignoramus, esse, qui instituta et sensus in exercitationis partibus numerant, qui fere sunt, qui disciplinam omnem in exercitatione ponunt, veluti *Simplicius* in *Epietetum* p. 66. qui duas partes exercitationis commemorat, vnam, ut recte de rebus ad officia nostra pertinentibus sentiamus, alteram, ut ad ea simus praeparati: sed rectius distingui, facile arbitramur intelligi.

II. Sed huius talis disciplinae, singularumque partium necessitatem vtilitatemque videamus. Ac necessitas quidem intelligitur ex eo, quod scientia officii, quid et quare agendum sit, ut supra iam obiter monuimus, raro sufficit, neque sufficere potest ad faciendum officium, nisi in iis forte rebus, quae prorsus a nostro pendent arbitrio, quaeque ita in potestate nostra sita sunt, ut in efficiendo nihil desiderent praeter voluntatem bonam, veluti, decernere de re aliqua, adfirmare aut negare, probare et improbare, quaeque exsequendo nihil habent impedimenti a cupiditate aliqua nostra, aut prava consuetudine, aliaue qua causa, ut statim in leui aliquo animi motu possint fieri. Quare omnibus temporibus iudicare viri sapientes atque prudentes, in omni vitae ac rerum maiorum genere opus esse tali disciplina, per quam quis id, quod debet aut vult facere, recte constanterque facere consuescat. *Platonis* quidem praeclaros de *Repubblica* libros si quis legat, facile intelligat, magnam eorum partem consumi in constituenda disciplina, cum privata, tum publica, per quam homines singuli ad conservationem officiorum adducantur, ciues autem legibus, ad salutem reipublicae scriptis, obedientes efficiantur. *Cicero* illos e *vetere et seuera disciplina domestica patres fami-*

familias commemorat, disciplinamque ciuitatis, non, quae sit in legibus, sed in sensibus potius ciuium, in institutis atque exercitationibus: quam in libris de Legibus explicare, more Platonis instituerat. Horatius autem vanas iudicat sine moribus, i. e. sine disciplina, leges, quamquam bene ac seuerè scriptas Carm. III, 23, 35. et Liuius in praefatione, a lapsa disciplina vetere corruptionem totius reipublicae ducit, quamquam legibus saluis. Sed nihil pulcrius et clarius est loco Xenophontis in Cyrop. IV. p. 228. edit. Hutchins. Nam instante praelio, quum ad moneretur a Chryfanta Cyrus, vt oratione cohortaretur milites ad pugnandum fortiter, quod id factum apud hostes a Duce audierat: ὁδεμία ἔσται, respondet, ἄτως καλὴ παραίνεσις, ἥτις ἵππας μὴ ὄντας ἀγαθὸς αὐθήμερον ἀκῶσαντας ἀγαθὸς ποιήσει, ἢ κ' ἂν ἦν τοξότας γε, εἰ μὴ ἔμπροσθεν τῷτο μεμλησσηκότις εἴην — ὁδὲ μὴν τὰ γε σώματα ἱκανὸς πονεῖν, ἢ μὴ πρόσθεν ἡσσηκότις ὦσιν. cet. nulla erit tam bona cohortatio, quae homines non fortes eodem, quo eam audiuerint, die fortes reddat; non sagittarios quidem bonos, nisi eam artem prius exercuerint; — ne hoc quidem effecerit, vt corporibus perferre possint laborem pugnae, nisi se prius ad id exercuerint cet. Sed totus locus ille pulcherrimus est legendus. In Memorabilium autem Socratis sermonum II, 1, 28. Virtus inducitur rem apta similitudine demonstrans, cum eum, qui velit artium opera, vt picturae, vt statuariae, facere, eum igitur dicit debere primum artes ipsas discere, hoc est, praecepta magistrorum de arte, eiusque operibus, deinde vero exerceri ad modum earum vsurpandarum. Nec vero aliter Doctores Ecclesiae Christianae iudicauerunt. Vnum Clementem Alexandrinum commemorabimus; cuius clara sunt testimonia de necessitate exercitationis, in qua est pars disciplinae latissime patens. Nam Strom. II, p. 370 alios, dicit, velle rectè facere, et posse: alios, etsi nondum possint, tamen bonam voluntatem habere: sed τὸ δύνασθαι esse, ait, ἐκ συνασκήσεως, ab exercitatione: quam ille ita late ibi dicit,

V

cit,

Ernesti Opusc. Theol.

cit, vt omnem disciplinam ea complecti videatur. Contra inconstantiam in recte agendo ait esse in iis, qui exercitatione non vtantur: Lib. II. p. 386. τὸ πολλάκις μετανοεῖν, καὶ ἐπιτηδεύουσιν εἰς εὐτηρησίαν ἐστὶν ἐξ ἀνασκήσιας *saepe poenitere, et procliuitas ad inconstantiam, est e defectu exercitationis*; in quo dicit esse μελέτην αἰμαρτιῶν, *exercitationem peccandi*. Denique hanc necessitatem adstruit locus, cuius supra mentio facta est, Paulli *Eph. VI, 4*, vbi liberis educandis iubet Apostolus non modo *νυθισίαν* praecipiendo hortandoque adhiberi, vt quid et quibus de causis debeant facere, cognoscant, si esse velint Christiani, sed etiam *παιδείαν* i. e. disciplinam, per quam confuescant facere officium, et facilius atque libentius facere discant.

12. Vtilitas autem talis disciplinae multis ac luculentis exemplis et cunctarum gentium et singulorum hominum satis intelligi potest. Omnes omnino ciuitates, quae maxime floruerunt, disciplinam habuerunt propriam atque solerter a viris prudentibus excogitatam; inter quas Spartana Lycurgi inprimis celebratur, itemque Atheniensis et Romana: eique disciplinae ciuitatem quamque debuisse incrementa sua et felicitatem, prudentissimi ciuitatum gubernatores iudicauerunt. Et illa tot ac tanta exempla patientiae, constantiae, moderationis, abstinentiae, fortitudinis cet. quae nos stupemus et prope supra fidem esse putamus, quum ab hominibus a vera religione alienis edita reperimus, quia pudori nobis sunt, nec modo a Philosophis, vt Stoicis inprimis, sed etiam aliis multis, profecto non tam scientiae quam disciplinae fuerunt. Ac similia, atque etiam maiora sunt Christianorum veterum, a quibus pariter pudor iniiceretur nobis, si ea modo audiremus aut legeremus; quod nostris temporibus vulgo contemnitur, non sine Christianismi, vt opinamur, incommodo. Enimuero, quod nunc aut nulla, aut nimis rara sunt talia virtutis Christianae exempla, non Christianae religionis et verbi diuini culpa est, in

in quibus eadem nunc est semperque manebit ad virtutem vis: disciplina illa veteri homines vel carent omnino, vel non utuntur veterum exemplo ac more: scientiam officii et bonam voluntatem sufficere existimantes, sine disciplinae et exercitationis labore. Sed partibus disciplinae constitutis, et necessitate atque utilitate disciplinae demonstrata, ad disciplinam ipsam explicandam veniamus. Sic igitur nobis haec de Disciplina Christiana disputatio vel institutio tripartita. Primum dicemus de sensibus, tum de institutis, denique de exercitationibus.

SECTIO II

De sensibus vel imprimendis vel suscipiendis.

13. Sensus itaque, de quibus nobis primo loco est dicendum, in scripturis exprimuntur verbis *Φρονήματος* et *Φρονήσεως*. Nam Paullus *Rom. VIII, 6. 7. 27.* commemorat *Φρόνημα τῆς σαρκὸς* et *τῆς κτῆνῆς*, Lucas autem I, 17. in cantico Zachariae, *Φρόνησιν δικαίων*. Sed utrumque verbum eam vim habet a matre communi *Φρονεῖν*, quod eodem modo in scripturis dicitur. Etenim iubemur *τὰ ἄνω Φρονεῖν, μὴ τὰ ἐπὶ τῆς γῆς*, *Col. III, 2.* vel *τὰ ἐπὶ οὐρανόθεν* *Phillip. III, 19.* sensus coelestes, non terrenos habere. *Τὸτο Φρονείσθω ἐν ὑμῖν, ὃ καὶ ἐν Χριστῷ Ἰησοῦ*, inquit Paullus *Philip. II, 5.* hoc est: eos sensus habere debetis, quos habuit Iesus Christus. Quod si autem vocabuli huius usum in scripturis paullo curatius consideramus, duo in eo contineri deprehendimus. Est enim *Φρόνημα*, animi adfectio erga aliquid in utramque partem, vel ad amorem, vel ad odium, vel ad admirationem, vel ad contentum. Atque id intelligitur e verbo *Φρονεῖν*, unde *Φρόνημα* et *Φρόνησις* ducuntur. Nam id quum proprie sit cogitare, sensu atque animo aliquid concipere, tum vero per figuram orationis transfertur ad modum uniuersum, quo erga hominem aliquem aut rem quamque adfecti sumus. Itaque addere solent Graeci, per quae ge-

nus adfectionis, et pars, in quam adfecti sumus, determinetur atque intelligatur, vt *εὖ* vel *κακῶς φρονεῖν*, benevolum vel malevolum esse, *μεγάλα* vel *μικρά*, sensus celso, elatos vel demissos humilesque habere, et alia similia; quod multis exemplis aetatis antiquae scriptorum confirmari, non necesse est. Istius vero adfectionis causa est in iis opinionibus, quas de re ipsa suscepimus ac firmiter tenemus, erga quam in alterutram partem adfecti sumus. Atque ea opinio seu persuasio de rebus, quam commodius sensum hominis animiue dicimus, proprie est, quae per verbum Graecum *φρονεῖν* exprimitur. Ei primae atque propriae significationi adiunxit usus loquendi communis, id quod eius est consequens. Nam, vt de quaque re sentimus et opinamur, ita erga eam movemur atque afficimur. Sed haec breuiter sunt illustranda et confirmanda.

14. Ac verba quidem *sentire* ac *sensus*, apud Latinos ita dici, vix, vt opinamur, eget demonstratione longa. Ciceronis quidem illa sunt ex hoc genere: *de republica praeclare atque egregie sentire*, item, *male aut bene sentire, sensus de republica*, et alia plura, quae etiam Lexica indicant; in quibus semper exprimitur, tum quid quis de republica vniuersa statuatur, tum quomodo erga eam adfectus sit, amor et odium reipublicae ipsius et salutis publicae. *φρόνημα* porro, apud *Paullum*, est, primum in opinionibus de rebus bonis et malis expetendis et fugiendis, deinde in amore studioque inde orto rerum diuinarum et humanarum, vel odio et contemptu: neque ea res habet aut habere potest dubitationem. Apud Graecos quidem *φρόνημα* non usurpatur ad vtrumque exprimendum, sed tantum de adfectione aliqua animi, et magis in deteriore partem, vt fastu, superbia atque ferocia cet. vt saepissime etiam verbum *φρονεῖν* in Nouo autem Testamento, in locis scilicet ante allatis, epistolae Paullinae ad Romanos, vtrumque verbum vtrumque exprimit, et iudicium de rebus, et adfectionem ex eo ortam. Huc etiam

etiam illa pertinent: ἡ φρονεῖν τὰ τῷ Θεῷ, ἀλλὰ τὰ τῶν ἀνθρώπων, cuius Seruator noster Petrum arguit, *Matth. VIII, 33.* non sapere, i. e. probare, optare, amare, quae Deo, quaeque diuinae probantur sapientiae, sed quae hominum iudicio et sensu probantur, quae homines optent cet. tum illud *Pauli Rom. XIV, 6.* ὁ φρονῶν τὴν ἡμέραν, κυρίῳ φρονεῖ καὶ ὁ μὴ φρονῶν τὴν ἡμέραν, κυρίῳ ἡ φρονεῖ in quo verbum φρονεῖν nihil aliud est, quam iudicium et opinio de dierum discrimine, per quam alicui dies religiosus et sanctus videtur atque etiam habetur, quum alius aliter iudicet et faciat. Retulimus huc etiam φρονήσεως verbum e *Luca*, in quo vulgo prudentiam intelligunt. Sed id esse de sensu hominum sanctorum intelligendum, facile res docere potest, et in φρονήσεσσι, esse dictum pro εἰς φρόνησιν. His de verbi vsu dictis, definitio sensus, de quo dicimus, ponatur. Est ergo in persuasionem animi de rerum vel praesentia, pulchritudine, dignitate, bonitate, vel contra, propter quam eas in honore habemus, admiramur, amamus, studio, cura et labore persequendas putamus, vel contra. Secundum hanc definitionem res ipsa explicabitur.

15. Sensus igitur hominis Christiani duplicis sunt generis. Nam tot sunt genera rerum, quos sensus eius amplecti potest. Ac primum quidem genus ad religionem spectat, alterum vero ad res bonas malasque, quibus hominum felicitas vel teneri potest vel impediri. Religio prima est, quam sensus humani amplecti debent. Sed religio tum in se spectari potest, tum qua obiectum, quod amplecti debet. Religionis autem obiectum est Deus, eiusque vniuersa perfectio et maiestas, tum eius consilia omnia, instituta, leges; inprimisque eo referendum est salutare illud consilium, de toto humano genere e miserrima, in quam prolapsus est, conditione eripiendo, et salute atque felicitate, ab aeterno illi destinata, per filium suum restituenda. Nam id consilium Dei nosse, etiam in scripturis sacris κατ' ἐξοχὴν dicitur Deum nosse.

nosse. Religio autem ipsa est in scientia recta earum rerum omnium, et ad eam scientiam accommodato et composito Dei cultu, quae est pietas vniuersa, *εὐσέβεια*, fides in Dominum nostrum Iesum Christum, cum suis fructibus. Alterum genus, ad quod sensus hominis Christiani pertinent, est in rebus bonis et expetendis comparandisque ad veram felicitatem, et in malis, quibus cauendis miseria et perniciēs euitatur. Sed age, sensus cuiusque generis praecipuos commemoremus.

16. Et in primo quidem genere, quod ad Deum ipsum pertinet, sensus tales sunt in omnibus animi decretis, de perfectione et maiestate Dei, inprimis bonitate, sapientia et iustitia eius, et quaecunque aliquam habent coniunctionem cum animo nostro, ad ingenerandam ei reuerentiam et amorem, ut facere, quod abhorreat ab eius maiestate, nolis, ut dicto illi audiens esse cupias, ei que placere; veluti, quum nobis est persuasum, idque firmiter menti haeret infixum, a Deo nos plane pendere, omnia ab eo habere, quibus utimur, fruimur, itemque omnium rerum bonarum et felicitatis spem in ipso sitam esse: ab ipso vicissim amari nos, tum quia operis eius sumus, tum maxime propter filium eius Iesum Christum, cuius facti sumus peculium per redemptionem; ei salutem nostram caram esse atque curari: itaque, quicquid nobis accidat, ipso decernente ac dirigente accidere, nullumque aliud habere consilium, quam quod ad nostram felicitatem pertineat. Ex eodem genere est, quum ita induximus animum, ut statuamus, quicquid Deus faciat, quicquid instituat atque praecipiat, id necessario sapiens esse atque sanctum, et rectum, et iustum, et bonum; aliter eum facere, fecisse, instituisse, id non minus contra naturam esse, non minus repugnans atque absurdum, quam si ab igne esse frigus, et tenebras ab ipsa luce, existimes. Ille quoque huc pertinens sensus est, quum leges diuinas nihil aliud esse credimus, quam mera beneficia diuina, quibus securitati nostrae atque adeo vniuersae felici-

felicitati nostrae cautum sit; si eae nullae essent; aut si contra de singulis rebus sanxisset Deus, optandum fore, ut nati non essemus: itaque eas rebus omnibus, omnibus cupiditatibus nostris maiores ac potiores esse, eis cedere omnia debere: nihil melius esse officio, ei omnes utilitates nostras postponi debere: ne esse quidem utilitatem aliquam posse, quae cum officio pugnet cet.

17. Et hi quidem sensus ad religionis obiectum pertinent: ad ipsam spectant hi, qui de eius necessitate praestantiaque ita decernunt, ut inde reverentia eius, amor, cura nasci possit. Huius modi sunt, quum nobis habemus persuasum, religionem esse rerum humanarum longe primam, sanctissimam, et maxime inuiolabilem: sine religione nullam omnino tranquillitatem animi esse posse, neque veram felicitatem locum habere: itaque odio dignos esse, et communes generis humani hostes habendos, qui eam nobis eripere tentent: contra, quae ad eam pertineant aut aliquam cum ea habeant coniunctionem, ea sancta iudicari et in honore haberi debere, ut verbum diuinum, sacramenta, iusiurandum, preces, instituta publica ad verbi praedicationem atque intelligentiam comparata, verbi diuini interpretes ac doctores, et alia huius generis.

18. Nec minus praeclari et necessarii ad disciplinam Christianam sunt sensus de rebus expetendis aut fugiendis, quorum praecipuos, age, videamus. Quum omnes omnino homines in eo consentiant, ut felices esse fierique cupiant; in ipsa felicitate, eius natura, causis, et quaerendi modo, quantus est dissensus! quanta inscitia! Itaque nihil magis necessarium est, quam ut homines imbuti sint sensibus rectis de felicitate ipsa, tum de rerum omnium pretio, ex vi cuiusque ad felicitatem statuendo: in quo cernitur sapientia, quae maxime est in hoc, ut rei cuiusque pretium recte aestimes, et secundum id vel ames, appetas, vel contemnas, repudies cet. Oportet igitur animum hominis Christiani talibus sensibus imbu-

tum esse: veram felicitatem non contingere habendis, vtendis, fruendis rebus corporeis et fluxis, diuitiis, honoribus, voluptatibus, sed esse a rebus inuisibilibus, certis et aeternis, vera pietate in Deum, amore et fiducia, certa spe vitae aeternae, bona conscientia cet. miseriam contra non esse a paupertate, humilitate fortis, similibusque, sed in ignorantia rerum diuinarum verbique diuini, in erroribus, vitiis, cupiditatibus: item, veram libertatem esse, cum obedias legibus diuinis et obedire possis, cum in potestate habeas cupiditates, nec iis ab obedientia erga Deum, et ab officio, etiam contra voluntatem et propositum animi, detorqueare cet. maius malum esse in iniuria facienda, quam in patienda, longeque melioris conditionis esse, qui patiatur, quam qui fecerit: contumeliam non haerere in eo, cui per iniuriam fiat, sed in eo potius, qui intulerit. cet. Sed explicatis sensuum generibus, propositisque vnus cuiusque generis exemplis praecipuis, accedamus ad id, in quo caput rei videtur inesse, vt sensuum talium assumendorum ratio demonstraretur. In quo primum, vnde assumendi sint, deinde, quomodo assumi possint ac debeant, ostendemus.

19. Omnino fontes sunt duo, e quibus sensus isti hauriendi videantur; quorum alter in ipsa natura rerum communi latet, rationis opera patefaciendus: alter in scripturis diuinis patet, reiectus penitus per prophetas, Iesum Christum ipsum, et Apostolos eius. Ac primum sensus tales a rerum, ad quas pertinent, natura repeti debere, intelligi potest ex ipsa sensuum indole ac natura. Nam quum in iis sit proprie nihil aliud, quam de pretio rei cuiusque et dignitate naturali, tum per se, tum comparate cum felicitate nostra, iudicium, mouens animum in vtramque partem: fundamentum eorum aliud esse, quam in ipsa rerum natura, non potest. Sed ab natura rerum sensus rectos ducere, id proprie est intelligentiae opus, naturam illam cognoscentis, et eius cognitionem ad pretium earum ac vim ad felicitatem constituendum
et

et aestimandum conferentis. Atque etiam videmus, intelligentiam et rationem humanam scrutanda rerum natura reperisse, quid et quomodo iudicare deberet, sensusque inde honestos egregiosque suscepisse, iisque aliorum animos vel imbuisse, vel imbuere tentasse. Etenim nihil est propemodum in iis, quos exempli causa posuimus, quod non reperiatur in Philosophorum, Poetarum imprimis et Historicorum Graecorum Latinorumque libris. Nec aut ille fons naturalis sensuum, aut riui inde deducti in libros humanos, contemni atque ab usu vitae remoueri debent, aut alienum iudicari oportet ab homine Christiano, si inde quoque hauriat et ad suum et ad aliorum usum: quo videntur quidam inclinare, siue ab simplicitatis piae inscitia, siue hypocritica ostentatione, siue etiam, quod genus pessimum est, inuidiae faciendae cupiditate. Neque enim alienum sit ab homine Christiano, imitari Prophetas et Apostolos, qui, ut incitamenta recte agendi, ab natura rerum per rationis usum ducta admovent subinde animis, sic etiam sensuum rectorum, honestorum et piorum causas et principia in communi rerum natura demonstrant. Ecclesiae quidem veteris Latinae doctores egregii, ut de Graecis nihil dicamus, *Ambrosius*, *Augustinus*, *Leo Magnus*, *Bernhardus*, non dubitauere, sensibus inde ductis, etiam ab Philosophis, Poetisue latinis, homilias suas et scripta alia, ad officii doctrinam et commendationem pertinentia, referre.

20. Neque tamen negari debet aut potest, haud paulo meliorem esse fontem scripturarum diuinarum, ex eoque sensus, de quibus dicimus, et *rectius*, et *plenius*, et *efficacius* assumi. Nam primum, longe maxima hominum pars, propter imbecillitatem ingenii atque iudicii, ea, quae in natura rerum latent, videre, et inde sensus rectos suscipere non potest: praesertim, quum plerique prauis et carnalibus sensibus occupentur ante, quam animum instituere ad veros quaerendos possint. Itaque nec recti in plurimis maximisque rebus sensus forent, nec pu-

ri a contagione sensuum vitiosorum, nec denique, qui satis certae persuasionis velut radicibus haerent. Quae contraria sunt omnia, quum e scripturis diuinis repetuntur, in quibus omnia recta, pura atque certa sunt. Tum vero, quam longi temporis et operis res foret, si quisque suoapte ingenio quaerere sensus illos vellet? quando tandem omnes consequuturus esset? In ipsis scriptis antiquorum Philosophorum, Poetarum, Historicorum et Oratorum ita dispersi sunt, vt, si quis eos inde colligere vellet, tempus non breue consumi deberet: quum contra in scripturis, vel soli sermones Iesu Christi omnes suppeditent. Sed pleni sunt Psalmi, pleni Salomonis libri harum copiarum, vt nihil de libris historicis aut Apostolorum litteris dicam. Nam efficacius sumi e scripturis, id quidem facillime intelligitur: primum propter auctoritatem Dei, qui etsi per naturae vocem et ipsam, tamen praesentius et grauius docet per scripturarum sermonem: in quo est ad mouendum vis non parua et multo maior, quam vel in nostrae mentis et iudicii imbecillitate, vel in aliena auctoritate doctrinae humanae. Et licet animaduertere, quum in sensus quamuis graues, ab hominibus eruditissimis propositos, incidimus, in iis magis esse aliquam delectationem, liberalem illam quidem, sed celeriter transeuntem, quam vim ad animum ita mouendum, vt firma et constans animi adfectio oriatur. Et illud auctoritatis diuinæ pondus auget vis spiritus diuini, admouens etiam fortius animis sensus illos, ad imprimendos motus salutares, si ei se praebeant erudiendos atque formandos.

21. Sed quum, vnde sumantur sensus, demonstratum est, modum assumendi videamus. Sunt igitur primum sensus illi assumendi ad intelligentiam, deinde ad memoriam, denique ad animum. Et ad intelligentiam quidem assumuntur, quum ita cognoscuntur, vt plane nobis sit persuasum, veros et rectos esse: quod sit vel cognoscendis rationibus et causis, vt, quum e natura rerum

rum sumuntur, vel auctoritate verbi diuini præcipientis, commendantis, laudantis, denique exemplis Sanctorum, inprimisque Domini nostri Iesu Christi, demonstrantis; quæ est disciplina recte sentiendi de rebus diuinis et humanis optima atque certissima. Sed in hoc difficultas obiicitur sæpe non parua, tum ab temere susceptis antea prauis sensibus, quam sapientiam carnalem appellat scriptura sacra, tum ab exemplorum prauorum auctoritate, tum denique ab adfectionibus (παθήματα) animi et cupiditatibus, adueti vitiorum illecebris et suauitati rerum sensibilem; quarum rerum specie inani animus, nondum persanatus, fortius pulsatur, quam inuisibilem et diuinarum veritate. Itaque si quis se, vbi renuntiaverit per poenitentiam vitiis, tradidit in disciplinam Spiritus sancti per verbum, debet in his difficultatibus vincendis, sub illo nouo magistro, laborare, iis opinionibus, motibus ac sensibus, identidem opponendo auctoritatem diuinam, et dum per eam contra nititur, precibus aduocando auxilio diuino, per quod victor in illo certamine discedat. Facilius autem ad memoriam assumuntur sensus ab illa persuasionem; sed oportet eos, præsertim in recenti re, crebro vsurpare, repetere cum suis momentis et ponderare, donec ita familiares fiant, vt facile sua sponte redeant in mentem, præsertim, vbi eorum vsus venerit in agendo, vel quum sollicitatur animus in contrariam partem, vel quum occasio tempusque venit secundum illos nouos et sanctos sensus faciendi. Neque enim ad casum et quasi fortunam res est referenda, aut ea velut arbitrio memoriae relinquenda; sed in potestate habenda est memoria, et illa tali exercitatione adsuæfacienda, vt pareat necessitatibus nostris, præbendo in tempore atque bona fide, quæ ei ad vsus futuros mandauimus atque credidimus. Tertium autem et maximum est in sensibus, quum ita assumti sunt et ad intelligentiam et ad memoriam, etiam ad animum suscipiendia. Id fit, quum eos adamare incipimus, iis delectari,

vbi

vbi eos vel in scripturis diuinis expressos reperimus praecipiendo, vel in exemplis Christi et Sanctorum, in piorum sermonibus et actionibus: sensus vicissim contrarios, carnales sapientiae humanae, inprimis veteres nostros, quoties eorum meminerimus, tum alienos, quum se vel per sermones, vel per actiones exserunt, odisse, cum indignatione et dolore audire et videre. Nam tum demum illi sensus vere nostri facti sunt, proprieque nostri dicuntur: primum, quia iam nouam animo quasi formam induunt, in qua est, qui *homo nouus* dicitur in scripturis; deinde, quia tum demum se efficaces praestant in agendo, vt libenter et cum suauitate quadam animi faciamus officium; in quo obedientiae veritas et libertas cernitur. Sed ad id efficiendum ac consequendum eadem fere profunt, quae ante ad persuasionis et memoriae ἀσφάλεια praeepta sunt. Primum hoc habet et animi nostri natura vniuersa beneficio diuino, tum ipsa cogitationis vis, vt paulatim exuant acerbiteriam suam et molestiam, grataque fiant animo, quae ab eo assidue cogitando tractantur, praesertim quum id fit ab inductione quadam animi, statuentis ac decernentis agere, quod agit. Deinde res, praesertim inuisibiles et spirituales, bonitatem et pulchritudinem suam non ita in promptu et quasi in propatulo expositam habent, vt vno velut ac primo mentis contuitu perspicue cernatur et tota sentiatur. Consuetudo accedat oportet, et quasi familiaritas, per quam paulatim sese proferat conspiciendam clarius, et multo magis, cum suauitate aliqua sentiendam. Nec ea vnius naturae, vel nostrae, vel rerum ipsarum vis est: immo spiritus diuini vel maxime, qui dum ea, quae de libris a se ortis, h. e. verbo Dei, sumta sunt, obuersantur menti, per cogitationis pie diuturnitatem et frequentiam admouet efficacius animo, et ad persuasionis firmitatem, et ad perceptionis suauitatem. Haec consentanea esse Dauidis et praeceptis et exemplo, *Pf. I, 2.* et aliis locis pluribus, omnes vident.

22. Ita

22. Ita vniuerse descripto assumendorum sensuum modo, quaedam admonenda videntur, quae in ea re prodesse possint. Ac primum, quoniam e verbo diuino maxime repetendi sunt; quemadmodum eo vti ad id consilium debeamus, planius dicendum putamus. Etenim etsi commune est omnium praeceptum de sensibus illis piis e verbo Dei ducendis; tamen ita vniuerse propositum, vt fere in hac et aliis caussis faciunt, multum valere ad vsum non potest. Oportet igitur etiam scire, quomodo ad eam rem verbo diuino vti debeamus, vel legendo, vel meditando; idque in hac re praeceptum ad totum in vniuersa vita Christiana verbi diuini vsum valet. Neque enim vilo modo sufficere in vlla re potest, verbi diuini lectionem et cogitationem simpliciter commendasse; idque frustra feceris, nisi, quid in scripturis et quomodo legendum et cogitandum sit, demonstres. Est enim duplex genus lectionis: primum, quod vniuersum dicas; quum libros sacros, vel vniuersos, vel singulos, ex ordine legas, vel ad historiam cognoscendam, vel ad scientiam religionis vniuersae, ad fidem et pietatem comparandam, confirmandam, atque augendam; alterum est, quod ad certa tempora necessitatesque, et vsus temporis cuiusque, pertinet. Atque vt vniuersum illud genus non excludimus, sic alterum hoc proprie intelligimus, cum verbo diuino vti iubemus ad animum sensibus sanctis imbuendum, eosdemque firmandos et roborandos. Oportet igitur non expectare, dum casu inter legendum incidas in loca idonea; sed vel ex institutione ac demonstratione aliena, vel per lectionem suam notata habere loca scripturarum sacrarum, vbi tales sensus, vel per praecepta, vel per exempla, expressi et commendati sunt auctoritate diuina, vt sint in promptu; iisque tum vniuersis saepe legendis et ponderandis diligenter animo imprimere tales sensus; tum, quum aliquem sensum imbecilem aut languidum esse animaduertimus, loca ad eum pertinentia menti legendo cogitandoue ad mouere assidue inter

inter preces; donec eum descendisse in animum, aut confirmationem factum animaduertimus. In quo proderit etiam scire, qui sensus maxime nobis sint necessarii propter genus vitae et fortunae, aut propter aliquam consuetudinem prauam vitae superioris, reliquiasque sensus alicuius carnalis, ad resistendum oblati inde sollicitationibus ad peccandum, et ad promte faciendum officium. Illud etiam salubre fuerit institutum, cum aliquo sensu tali nos tactos atque motos animaduertimus, inter vel legendum, vel audiendum, vel etiam cogitandum verbum Dei, eius non modo motus, sed etiam, per quod ille nobis impressus est, meminisse, eiusque cogitationem renouare idoneis temporibus, praesertim in tranquillitate solitudinis, noctis, in cubili. *Pf. IV, 5.* Sed nihil prope magis profuerit ad acuendum sensum quemcunque et firmandum, quo nobis inprimis opus est confirmato, quam in precibus priuatis meminisse illius necessitatis, et auxilium ad eam rem diuinum exposcere. Illa ipsa religiosa necessitatis nostrae cogitatio, et sanctum in ea auxilii desiderium, ad eam rem valebit plurimum.

23. Caeterum hoc totum opus disciplinae Christianae, quod est in modo assumendorum sensuum sanctorum, ita est a nobis explicatum, ut id suscipi atque fieri a Christiano homine debet ipso, ad veram sanctitatem adspirante. Sed assumi sensus illi etiam possunt per disciplinam alienam, parentum, praeceptorum, et Ecclesiae doctorum. Itaque etiam in hanc partem aliquid videtur dicendum. Profecto haec pars disciplinae in nulla aetate facilius et efficacius adhibetur, quam in tenera pueritia, cum animi nondum imbuti sunt iis opinionibus et cupiditatibus, quae sunt aduersae sensibus piis atque honestis, hominesque impediunt in iis recipiendis et adamandis; nec vlla alia re difficilius redditur, quam receptis in illa aetate et corroboratis per multos annos sensibus prauis et carnalibus. Tanto magis dolendum est, eam valere rationem in educandis pueris plerisque inter Christianos,

VI

vt prope nulla bonae disciplinae vestigia appareant et vere Christianae, opportunitatemque aetatis ad recipiendos sensus Christianos sine fructu perire. Non hoc et pudori esse debet Christianis, et dedecori est religioni sanctissimae, quod, quos, tempore quodam, sensus, verbi causa de religione, iureiurando, legibus cet. per disciplinam parentum tenuerint tot homines ynus ciuitatis, vt Romanae, eos inter Christianos tam raros esse, per ignorantiam et negligentiam disciplinae verae! Sed querelas hic mittamus: disciplinae huius formam potius ad-
vmbremus.

24. Primum igitur, qui sensibus piis honestisque vo-
let imbuere teneros animos, quoties de rebus humanis ac terrenis sermo inciderit, de diuitiis, honoribus, rebus suauibus ad sensus corporeos, ceterisque, in quibus est aut aliquis splendor, qui capere oculos possit, vt magnificentia vestium ceteraeque supellectilis, nec minus de malis humanis, de paupertate, humilitate, dolore, dicet de iis vel contemtim, vel cum aliqua *ἀδιαφορία*, quae appareat etiam e sono vocis vultuque ipso: non commendabit oratione aut vultu pueris sua dona vestium et similium rerum, nec ea coget pulchra ducere, vt sibi in iis placeant: non in praemii loco proponet officiis seruandis oblectamenta sensuum; quae ad solam necessitatem referre et vsurpare docebit. De rebus contra diuinis, de religione, et rebus ad eam pertinentibus omnibus, de virtute et officio, de recte factis, ita loquetur semper, vt reuerentia animi, et admiratio, et amor eorum sentiri possit. Tum et per tales, et per omnes alias occasiones, sensus illos, quales supra proposuimus, similesque, proponet pro captu aetatis, inculcabit, commendabit oratione graui pariter atque blanda. Inprimisque laborabit, vt acuantur animi ad sensum sapientiae, quae in istis sensibus inest, in praeceptis eorum et exemplis, commemoranda illorum amabili salubritate, laudanda horum pulchritudine, maxime quidem quum le-
gent

gent scripturas diuinas, sed etiam, si qui legent libros humanos, vt historicos, poëticos cet. in quibus proderit non parum, si magistri demonstrent sensuum altitudinem, honestatem, pulchritudinem, nec modo quum a scriptoribus diserte proponuntur, vt fit saepe; sed etiam in exemplis virtutum et praeclare, h. e. cum contemptu rerum humanarum, vel admiratione et amore Dei, religionis, fidei, officii factorum.

25. Doctores autem Ecclesiae, quorum in aetate ad-
ulta maxime occupatur officium, ad hanc quidem rationem, i. e. quoad in hominibus ad pietatem et virtutem Christianam adducendis laborant, maxime et inprimis hoc agent in concionando, vt istis sensibus omnibus imbuant animos audientium, eos commemorando, laudando, et per idonea argumenta commendando, nec modo quum proprie de aliquo eorum genere aut officio aliquo dicere instituent, sed etiam per omnes alias occasiones; quum de capitibus fidei dicent, de Euangelio, de factis Christi et Sanctorum, quae in scripturis traduntur; vbi etiam facient efficacius. Itaque qui volet hac disciplinae parte tam necessaria eo modo vti, hanc sibi propriam constituat partem discendarum et scrutandarum scripturarum, vt illos sensus in scripturis, vel per praecepta, vel per exempla propositos, notet, ad certa capita redigat, eaque penitus percursa habeat, vt parata sit materiae copia, vnde sumere, quando et quantum opus sit, possit, et vero etiam in primis, vt ipse istis sensibus plenus et refertus sit, et ad memoriam, et ad animum. Ita facilius, atque etiam cum eo animi motu, eo vocis sono, eo vultu dicet, vt omnia, non tam a memoria suppeditata, quam ab ipso pectore nata videantur; quod hic maxime disertos facit. Nec vero ita, quum se ad discendum instituet, indigebit magnopere aliorum scriptorum, sapientiaeque et ingenii humani auxilio. Etenim pleni sunt libri sacri his sensibus omnibus, pleni inprimis Dauidici hymni, Salomonis sententiarum et concionum

tionum libri, Prophetarum porro oracula, Sermones Christi, et Epistolae Apostolicae, e quibus, si quis omnia congerere instituat, vix finem reperiat. Sed haec de parte disciplinae Christianae, quae ad sensus pertinet, dicta sunt: ad partem alteram, quae est de institutis, progrediamur, in qua nobis licebit esse brevioribus.

SECTIO III.

De Institutis Disciplinae Christianae.

26. Institutorum, tum omnium, tum disciplinae Christianae, quae natura et vis sit, supra demonstratum est. Sed ex iis arbitramur intelligi, primum, nulla instituta disciplinae esse probanda, quae praeter actionem, imprimis corporis, ipsam, nihil habeant, quod ad finem eum prodesse possit, cuius causa inuenta sint, et propter quem usurpentur; sed in iis esse inanem opinionem, quae sit vera superstitio. Etenim in hoc superstitio proprie cernitur, quum alicui rei tribuimus aliquam vim, praesertim in religione, et ad Deum colendum, eumque nobis placandum, quae vim eam nec per naturam suam habeat, nec vlla alia de causa habere possit. Alterum intelligi debet hoc, quod ea, etiam quum bene et apte excogitata sint, ut possint eum usum habere, qui iis debet esse propositus, tamen non sint in propria religionis, cultus diuini, pietatis, aut virtutis parte, nec per se laudari et usurpari debeant. Denique instituta optima, si mechanice peragantur, sintque in solo corporis motu et actu, non comparate ad finem fiant, nihili esse ducenda; non in parte verae disciplinae ponenda, sed in superstitionem conueriti. Nec id modo de institutis humanis valet, sed etiam suo modo de diuinis ipsis. Nam ita ex aequo omnia habent meram *σωμαστίαν*, vel ut Paullus ait, *γυμνασίαν σωματικήν*, quae disciplinae verae vim ac nomen habere non potest. Itaque videmus, Deum ne-

Ernesti Opusc. Theol.

X

gare,

gare, se instituisse, praecepisse, exegisse a Iudaeis, quae profecto instituerat atque praeceperat, cultus cerimoniarum et sacrificiorum, nec eorum institutorum vsurpationem probare. Sed Iudaei ea vel propter se praecepta esse, et Deo placere putabant, vel ita peragebant, ut corporis omnia essent, nulla vis ad animum talis, qualis in iis fuerat ab eo spectata *Pf. XL, 7. L, 8. LI, 18. Ies. I, 11. Ierem. VII, 28.* Hic est locus, qui de *traditionibus* dicitur a nostris, ut in Confessione Augustana eiusque Apologia Artic. XV. in quo loco de iis in partem eam, de qua iam diximus, luculenter disseritur. Nam verbum *traditionum* est e Graeco *παράδοσις*, ita interpretante versione vetere latina Noui Testamenti, ad intelligentiam vulgarem non bene in Theologiam traductum: suntque *traditiones*, quae proprie *Instituta* latine dicuntur, quoad quidem ad actiones religionis pertinent.

27. Institutorum autem dignitatem vniuersam demonstrat et vindicat auctoritas diuina, quae iis magno numero vsa est in disciplina genti Israëliticae constituta. Nam leges de cerimoniis et ritibus ei genti datae sunt propterea, ut per ea tum, praeter fidem in futurum Messiam et poenitentiam, etiam pietatis vniuersae exercendae vel alendae daretur occasio, et obedientiae aduersus Deum; habentque adeo institutorum disciplinalium characteres, ut demonstratum est in Disputatione tertia de *Arbitrio diuino in Religione constituenda* §. 97 *sqq.* Fuere igitur in his instituta diuina Veteris Testamenti. Sed eam disciplinae partem quum tollere et res iuberet, et sapientiae diuinae placeret, sustulit Iesus Christus, nouae, non doctrinae et religionis, sed disciplinae auctor. Eius habemus instituta tantum duo, Baptismum et Coenam sacram. Quamquam enim in iis est etiam aliquid amplius; tamen institutorum disciplinae Christianae rationem et nomen non amittunt. Nam neque in illo quod agitur, neque in hac quod fit, sua tantum causa fit: esset enim
in

in illo letio corporis ad purgandas sordes, quam spectari Petrus Ep. I, 3, 21. negat; in hae famis sitisque sedatio, quae profecto in ea non quaeritur. Spectari autem etiam hoc; ut sensus pii, grati, et sancti, obediendi Deo voluntas, puritatis omnis et officii studium, et benevolentia in ceteros homines acuatur, excitetur, corroboretur, clare demonstrat Apostolus Paullus, *Rom. VI, 3. 1 Corinth. X, 17. XI, 24-26.* Haec igitur instituta in disciplinae Christianae parte hac, de qua nunc dicimus, principatum dignitate et usu tenent, inprimisque alterum, quod est in Coena sacra; quod eo crebrius uti licet, nec modo edendo ac bibendo, sed etiam spectando. Unde fit, ut ea saepe uti oporteat Christianum, etiam ei adesse, quum ab aliis usurpetur, ut tamen in partem precum et laudum veniat et exercendae fidei, nec deferere eius celebritatem, quasi in ea multo minus sit, quam in concione. Et posset etiam Baptismi hic usus esse, nisi e conuentibus sacrorum causa habendis semotus esset plerisque in locis, contra praxin Ecclesiae antiquae, quae omnino in his Domini nostri Iesu Christi institutis, tam sanctis et salutaribus, reuerentior fuisse ac religiosior videtur.

28. Sed exorta sunt deinde alia instituta, vel publica, vel priuata, partim ab Apostolorum, partim aliorum postea doctorum auctoritate; in his quaedam etiam ad pietatis et sanctitatis rationem proprie pertinentia, ut ieiunia cum precibus, vigiliae, certa precandi tempora, in solitudinem secessiones, et alia; quae, quoad institutorum locum modumque tenere, et e consilio eorum sunt usurpata, a quibus erant inuenta, in utili parte disciplinae fuere: posteaquam per se in parte religionis et cultus diuini numerari coepere, et nihil praeter actionem corporis habuere, in superstitionem inanem degenerare: de quo ante diximus. Et est hoc magnum in hoc genere incommodum, quod ingenium humanum nimis in talibus institutis proclius est in hanc partem, praeser-

tim, si in iis sit aliqua species a feneritate, tristitia, labore et molestia actionis; utque malit eorum molestiam et laborem subire, quam internae pietatis et sanctitatis opus fuscipere ac facere. Nam in illis corporis vnius partes sunt, quod facilius in potestate habemus, et id molestiis tolerandis paullatim adsuefacimus; in hoc animus coercendus, et cupiditatibus vis facienda est, quarum suauitati adsuetus est animus: quo nihil aegrius homines perpetiuntur. Itaque existimamus, cautiore esse instituta ea, quae non habeant talem speciem, per quam fallere, etiam non malos, possint, et tamen inseruiant disciplinae vrbis et consiliis.

29. Sed eorum institutorum, quae huc pertineant, consilium fere duplex est; primum, ut habeant aliquam vim admonendi in rebus iis, quarum crebro meminisse profit, aut necesse sit; ut sensus alicuius pii, praecepti, officii cet. secundum, ut in iis insit aliqua praeparatio ad actiones magnas, et opera graua pietatis et officii, imprimis per quandam assuefactionem ad actiones, similitudinem aliquam cum illis habentes: tertium, ut ab iis quaedam nascatur commendatio rerum honestarum et sanctarum. Facile autem intelligitur, instituta omnia, quae talem aliquam vim habeant, esse vtilia studioso pietatis et sanctitatis, si ad eiusmodi consilia in vfu ipso et actu referantur. Et de primo quidem genere res est in promptu, etiam per praecepta diuina, iubentia meminisse earum, quas diximus, rerum, eamque ob causam etiam commendantia admonitiones ab institutis idoneis, qualia Deus nominatim commendauit Israelitis, ut *Deuter. VI, 7. 8. 9.* *Et haec praecepta in mente recondito, de iisque sermocinator, quum domi sedebis, aut per viam incedes, aut in lecto recubueris, aut de eodem surrexeris: tum vero ea deligabis manibus tuis, admonendi causa, et in fronte, scribesque et in foribus et in portis aedium.* Etenim facile nobis obliuio venit rerum sanctissimarum, consilii etiam nostri et

et voluntatis, praesertim inter humanarum cogitationum et curarum negotiorumque multitudinem, ut opprimamur a cupiditate aliqua, et peccemus etiam contra propositum. Et in hac naturae nostrae vitiositate, perquam officia maxima accipiunt aliquam, saepe permagnam, amaritudinem atque tristitiam, quomodo non proficit, quod eam aliquo modo minuere, aut eius opinionem ac sensum obscurare possit: suntque ad id inuenta instituta, simillima medicorum artificii, per quae medicamentorum saporem tetrum mitigant, et tolerabiliorem reddunt, vel speciem addunt ipsis, habentem aliquid commendationis ad minuendum sumendi fastidium:

— *pueris absinthia tetra medentes*

Quum dare conantur, prius oras pocula circum

Contingunt mellis dulci flauoque liquore,

Vt puerorum aetas improvida ludificetur

Labrorum tenuis: interea perpetet amarum

Absinthii laticeti —

LVCRET. I, 935 seqq.

30. Sed omnium maxime utilia, atque etiam necessaria sunt instituta illius generis, in quo praeparatio aliqua ad actiones graues et adsuessatio quaeritur. Nam si Cicero etiam in humanorum officiorum actionibus grauib; diligentem praeparationem necessariam et utilem esse iudicat, *Offic. I*, 21. et praeparationem ad futura mala, ad dolores ferendos, multum posse ad minuendum dolorem, *Tuscul. III*, 14. profecto etiam hanc vel necessitatem vel utilitatem habebit in longe grauissimis et sanctissimis religionis et pietatis officiis, et perferendis rebus aduersis, ne, sicut recentes milites in proelium ducti, ne adspectum quidem laboris, difficultatis et molestiae ferre possimus, fugaue capienda desertores officii fiamus. Philosophi quidem ii, quorum in scholis homines non modo doctos, sed etiam constantes, patientes,

temperantes, fortes factos tradunt, vt inprimis Stoici, tum legumlatores clarissimi, qui ciues legibus obedientes, fortes, bellicosos, efficere vellent, talibus institutis sunt vsi. Nam et illorum clarissimi, vel ipsi talia scholae suae instituta commemorant, vel instituta quaedam tum communia scholae, tum propria vsurpasse traduntur: Lycurgi autem, vt hoc vtamur, tota propemodum illa tam celebrata legislatio in talibus institutis fuit, praeparationem ad actiones graues habentibus: quorum quanta utilitas fuerit, veteres consensu tradunt. cf. *Polybii VI*, 46. Non ergo dubitari potest, talia instituta etiam nobis vtilia esse ac propemodum necessaria, si modo apte excogitata sint, et abusus caueatur, de quibus supra diximus, nec denique in officio tali faciendo, cuius causa ea comparata fuere, res ad solam adsuetudinem, per instituti alicuius vsum contractam, reuocetur, sed proprie ad officii necessitatem e lege diuina, et ad illos pios et religiosos sensus, de quibus ante exposuimus; per quae illis actionibus veluti anima corpori accedit.

31. Sed quoniam non omnium est, talia instituta excogitare: nam nec in humanis rebus hoc multis datum est: oportet doctorem morum virtutisque Christianae curiosum esse eorum cognoscendorum ac colligendorum, quae vel in scriptis doctorem Veteris Ecclesiae, in quibus de virtutis Christianae studio praecipunt, vt *Clementis*, *Basilii*, *Augustini*, aliorumque, aut de vita et institutis sanctorum hominum exponunt, vel etiam in similibus recentiorum Theologorum nostrorum, vt *Lutheri*, *Melanchthonis*, *Gerhardi*, *Speneri*, aliorumque, commemorantur, vel etiam commendantur, et inde legere, quibus vel ipsi vtantur, vel quae aliis vsurpanda proponant.

SECTIO

SECTIO IV.

De Exercitationibus, earumque modo.

32. Quae exercitationes sint disciplinae Christianae, earumque quanta sit necessitas, supra diximus. Illud nobis videtur hoc loco planius demonstrandum esse, quod exercitationem propriam sedem habere diximus in officio ipso, et in actionibus officii Christiani. In quo non vtemur aliis, quam ipsarum scripturarum sacrarum testimoniis. Enimuero planum est, etiam verbum exercendi, γυμνάζειν, sic dici a Paulo Apostolo, iubente Christianum γυμνάζειν πρὸς εὐσέβειαν, 1 *Timoth. IV*, 7. Nam quum exercitationes corporis, speciem sanctitatis inanem habentes, tollit; exercitationes animi ponit, in quibus vera sit pietas et sanctitas. Nam et αἰδοθηρία γυμνασμένα πρὸς διακρίσιν καλῆ τε καὶ κακῆ *Ebr. V*, 14. sunt; quae in discernendo honesto et turpi laborarunt, et assiduitate laborandi ipsam facultatem et habitum discernendi consequuta sunt. Denique γυμνασμένοι per disciplinam diuinam ad patientiam *Ebr. IV*, 11. sunt profecto, qui suppeditata Deo patientiae materia, patientiam conseruarunt, et, se patientes vt praeberent, laborarunt. Nam sicut magistri discipulis artis alicuius, vt eloquentiae, proponunt materiam, in qua exerceri possint, faciendo opere aliquo oratorio: sic Deus Christianis, vt in aliis generibus virtutis, ita in hoc, malis humanis immittendis suppeditat, in quo opus patientiae facere, et eam virtutem comparare sibi possint: quod et *Simplicius* in *Episthetum* p. 91. agnoscit. τὰς δυνάμεις, inquit, quas Deus dedit hominibus ad vincenda ea, quae terrent, γυμνάζων ὁ Θεὸς ἅθλως πολλάκις προτίθῃσι ταῖς ψυχαῖς. Haec igitur talis exercitatio, in qua profecto est caput disciplinae, ad quam etiam ceterae partes eius referuntur, qualis esse debeat, quomodo in ea versari Christianus, studiosus verae virtutis Christianae, demonstrandum est vniuerse, vt quisque, quid in quoque genere, vel

ipse facere debeat, vel aliis praecipere, intelligere possit. Etenim, etsi virtutes et officia in magna sunt varietate, tamen eandem regulam habent, ad quam efficiendi modus, adeoque exercitatio, dirigi debet.

33. Sed quia in omni exercitatione primum est in viribus ad efficiendum id idoneis, in quo volumus exerceri: ante omnia videndum est, unde vires contingant ad exercitationem sanctitatis Christianae, et quomodo; ne conantem exercere opus eius deficient nervi. In quo nobis sumere licet hoc loco, quod in elementis fidei Christianae docetur, eas vires esse a Deo spirituque divino, et contingere iis, qui metu ac dolore e peccatis commoti, serio renuntiaverint vitiis, et promissis Dei per filium Iesum Christum nixi, condonationem culpae omnis et petierint, et sibi contigisse confidant. Nam in his solis esse potest verus amor Dei, et vera voluntas obediendi praeceptis eius atque voluntati vniuersae, quae post factis demonstratur, adiuuante per verbum Dei Spiritu sancto.

34. Enimuero, quum ea homini contingere, tum vero res omnis redit ad eius voluntatis earumque virium usum per exercitationes, ut et corroborentur ipsae, fiantque ad agendum efficaciores, et vincere possint difficultates undecunque se ingerentes. Neque enim villo modo credi debet, in ista noua animi adfectione ac voluntate viribusque omnia esse, et omne inde genus virtutum sine labore nasci; quo nimis sunt procliues homines: immo vero in istis modo materia est et velut semen virtutum, nondum opus virtutis ipsum, nondum fruges operum magnorum, a Christiano in omnibus vitae partibus perficiendorum. Illa ipsa bona voluntas, quamuis vera, tamen magis voti vim habet, quam voluntatis, quae proprie dicatur: nam ea est in actu ipso, tumque proprie volumus facere, cum facimus. Quodsi quis, indutus vulgatis fidei laudibus, secus existimet, celeriter ad negligentiam et ignauiam venerit, per quam vires et
materia

materia tam bona paullatim ita consumantur, vt frustra datae esse videantur. 2 *Petr.* I, 3. 5. 9. 2 *Corinth.* VI, 1. 4. Ceterum in eo virium vsu ad faciendum opus vniuersae bonae voluntatis, siue ad obsequendum ei fortiter, et singulis agendi temporibus, in eo, inquam, proprie cernitur exercitatio. Vnde fit, vt in hac exercitationis Christianae explicatione, demonstranda maxime sit ratio vsurpandarum virium nouarum.

35. Sed in ea re perspicue explicanda, et ad vsum eorum accommodate, quibus hanc disciplinae Christianae partem tradere volumus, quod est faciendum per omnes officii Christiani partes diligenter et assidue, non satis est, vniuersa quaedam praecepta dare, qualia solemus audire ac legere; v. c. eam exercitationem fieri debere constanter, assidue, adiuuandam etiam precibus: nam haec quis nesciat, ac non sibi ipse praecipere queat? Sed modus actionis distincte, et per partes suas, debet explicari, vt, quid in tali exercitatione proprie fieri debeat, et qua ratione fieri possit, intelligatur; quo denique cognito, quisque, non carens bona voluntate, possit dirigere cogitationem et conuertere animi impetum, quo debet, aut auertere, vnde debet, vt actio suscipi, et ad finem perducı possit: quam nos rationem vtcumque adumbrare tentabimus.

36. Atque vt primum de ratione vniuersa aliquid dicamus: hominem in eam mentem et voluntatem impulsu diuinitus per fidem, vt ad hanc exercitationem dare se, eamque suscipere serio velit, oportet circumspicere partes officii omnes, ac videre, in quibus delinquere consueuerit ante, vel in eam partem, vt in iis peragendis nihil Deo et Christiano dignum sequeretur, sed suae modo vtilitatis speciem et vanitatem, vel in hanc, vt iisdem similibusque de causis officium negligeret, nec sustineret coërcere cupiditates suas ab officio violando. Nam in illo genere facilius res est; nec id indiget multo

ac difficili exercitationis labore: quod secus est in hoc, in quo multi, et longi saepe ac difficiles labores proponuntur: quippe in illo genere actionis, correctio modo consilii in suscipiendo et agendo inducenda est; in hoc vel actionis honestae ipsius suscipiendae facultas et consuetudo quaeritur, vel improbae cum illecebris suis repellendae.

37. Habet autem in his exercitatio quasdam praeparationes. Prima est in precibus ad exercitationis illius consilium dirigendis. Etenim quum in iis debeat esse necessitatum nostrarum, inprimis internarum et spirituum, Deo commendandarum cogitatio; cuius magis debet meminisse, qui exercere pietatis et virtutis opus velit, quam, quae ad hanc rationem pertinet, ut et vim recte agendi et successum a Deo petat; quo in genere frequens est Dauides in Psalmis. Ea res habebit in ipso vim duplicem: primam, ad bonam voluntatem confirmandam; alteram, ad animaduersionem excitandam et acuendam; in quibus rebus esse praeparationem admodum et necessariam et utilem, nemo dubitet. Altera praeparatio et quaedam adeo quasi prolusio est, non expectare, dum veniat necessitas officii, vel in agendo, quod rectum et honestum sit, vel non agendo, quod improbum sit, sed quaerere occasiones, ubi vel facias aliquid, in genere aliquo tali, de quo diximus, vel neges tibi. Etenim, ad quae agenda sic accedimus, in iis est destinatio animi praesens, et inductio, et alacritas maior; quae raro sine effectu operis est. Sed ita fiet initium recte agendi in facilioribus, per quod difficultas minuetur in grauioribus, hoc est, quum agendum erit officium, et obsequendum voluntati diuinae, ubi illecebrae peccandi, et difficultas obediendi erit e temporibus, locis, personisque, ubi etiam contra voluntatem agendum erit. Sic, opera, ut hoc utamur, eloquentiae facere volentes non expectant, dum dicendi tempus veniat, et tum demum sibi de dicendo cogitandum putant: nemo tam stultus unquam

vnquam fuit: et ea foret obmutescendi, non bene dicendi disciplina: sed ante sibi sumunt sponte, in quo commentando scribendoque experiantur vires, laborentque, vt dicendi consuetudinem aliquam paullatim capiant, aut partam facultatem qualemcunque firment atque augeant.

38. Sed vt et, quum venerit officii faciendi tempus et necessitas, facere possis officium, opus est inductione animi, nec modo illa vniuersa, quam bonam voluntatem diximus, pertinente ad omnia pariter officii genera, quam nec satis firmam esse, nec sufficere, supra diximus; sed proprie pertinente ad eam actionem, quae proposita et oblata est, siue in eam partem, vt faciendum sit, quod rectum est, siue in hanc, vt abstineamus nos ab eo, quod prauum est, quamquam allicimur et trahimur a reliquiis veteris vel cupiditatis, vel consuetudinis; quod fit in principiis nouae vitae nimis saepe, nec sine periculo. Eam inductionem animi, vt capere tempore quoque possimus, adhibenda est ante omnia cogitationis et animaduersionis diligentia, vt ne agamus quicquam ante, quam quid et quale sit, quod agatur, cogitauerimus, nec praecipitemus actionem per consuetudinis temeritatem; quod fit facile ac saepe, nisi illa animaduersio adhibeatur: vnde tam saepe poenitentiae repetendae necessitas oritur. Haec est illa animaduersio hominis Christiani, ad veram virtutem et obedientiam praeceptorum diuinorum adspirantis, qua se dicit vti Dauides, vir sanctissimus, vt *Pf. CXIX, 59. reputo, inquit, et considero vias meas, vt pedes conuertam ad praecepta tua.* Salomo autem in eo ponit sapientiae partem, *Prouerb. XIV, 8. Cauti hominis sapientia est, perpendere et considerare viam suam, i. e. actiones suscipiendas quasque perpendere et diiudicare, antequam suscipiat.* Ab hac autem animaduersione, et hoc iudicio actionis, vbi sollicitari nos quacunque causa sentimus, vel ad praetermittendum, quod faciendum esse intelligimus, vel faciendum, quod contra sit; tum vero

vero omni modo laborandum est, vt animum colligamus, inducamus in contrariam partem, statuamusque firmiter facere, quod faciendum est, omittere, quod prauum esse videmus ac sentimus.

39. Atque vt difficilius est, homini, adhuc rudi et nondum exercitato ad hanc firmitatem et fortitudinem animi, talem inductionem capessere ac retinere: ita magis eius necessitatibus in ea re a Deo est prouisum, supeditatis multis, per quae induci animus, et inducio illa retineri possit, et ad agendum efficax fieri. Sed illa omnia sunt in verbo Dei proposita, vt inde promta suis temporibus ad agendum accommodentur. Ex eo genere sunt sensus illi ad officium pertinentes, de quibus supra diximus, minarum atrocitas, promissorum amplitudo, praeipientis Dei auctoritas, praeceptorum ipsorum grauitas. Haec ergo reuocanda, non modo ad memoriam, sed vt animo admoueantur acri et pertinaci quasi contuitu mentis. In quo proderit, id, quod supra diximus, (22) in eoque est pars disciplinae Christianae non contemnenda; notatas habere sententias scripturarum grauiiores, ad quodque officii genus in vtramque partem pertinentes, imprimis, quarum grauitate nos aliquando sensimus tactos, easque habere in promptu, vt pro instrumentis et armis ad animum inducendum ac vincendum arripere et vsurpari possint. Ab Homero inducitur Vlysses *Odyss.* v. in principio, quum vehementer incitaretur animo ad vliscendum celestiter iniurias et insolentiam, *κράδι δὲ ἔνδον ὑλάκτει ἀγασμῆνα κακὰ ἔργα*, cor intus latrabat aegre ferenti malefacta; tandem pectus percutiens manu, et animum sic alloquens: *τέτλαθι δὴ, κράδι, κοῦβητε*, cohibe te, cor, et sustine ista; commemoratis etiam tolerandi causis, atque ita illum impetum comprimens, quamuis reluctante animo: *τῷ δὲ μάλ' ἐν πείσῃ κράδι μῆνε, τέτλην' ἰα νωλεμίας*. tum vero cor eius conquieuit firmiter ac tolerauit. Veteres Philosophi hoc exemplo libenter et crebro sunt vsi, ad modum vincendi

rituendi animi et cohibendae cupiditatis illustrandum: et a nobis, quamquam in haud paullo melioris disciplinae institutione versamur, non alienum sit, id vel hac de causa commemorasse, ut pudorem iniicere Christianis possit, qui coërcere sollicitationes tales animi et cupiditatum non sistent: vel stimulum addere, ut maiori cum spe et fiducia successus rem tam necessariam aggrediantur, existimantibus, nobis etiam facilius hoc esse debere in tanta copia adiumentorum, a Deo per filium et verbum suum nobis suppeditarum. Igitur, ut ad rem propositam redeamus, in tali motu animi, nondum per exercitationes firmati aut officiis adfuefacti, et adhuc recentis ad hanc disciplinam, oportebit illas verbi diuini sententias, in memoriam reuocatas ponderatasque animo vel refugienti tristitiam officii, actergiuersanti subire onus obedientiae, vel sollicitanti nos ad peccandum aliqua veterere cupiditate, opponere grauius et constanter, nec villo modo remittere, sed tamdiu vrgere, donec cedat animus, et se subiiciat voluntati diuinae.

40. Atque hoc est imperare sibi per illam inductionem animi, firmatam verbo Dei et adiutam, non sua, sed diuina auctoritate: per quam quum vincimus, non tam nos vincimus, quam Deus ipse, succurrens imbecillitati nostrae. In quo prorsus necessaria pars est exercitationis huius. Neque enim est alia ratio aliquid efficiendi in illo sanctitatis et virtutis tirocinio. Nec vero ignoramus, triste esse et multae seueritatis opus, quod saepe gemitus exprimat tironi, et cum lacrimis fiat, nec ignorabit quisquam, qui huic disciplinae se vere tradidit vquam: sed illam tristitiam non defugere debet homo Christianus, praesertim praedictam et praeuisam, nec dubitare, se, quoad erit *ὑπὸς ἐν Χριστῷ*, tiro Christi et disciplinae Christianae, tractare in sanandis pristinis vitiis, ut medici pueros, refugientes medicamento amaritudinem; quos non dimittunt de manibus, donec, quamuis inter multas tergiuersationes, oris vultusque contorsiones, etiam

iam lacrimas, ingesserint medicamentum. Et vero illa molestia magna et in praesens et in futurum commoda habet: in praesens, quod ille successus non aliter adficit animum eius, de cuius exercitatione loquimur, Christiani, quam si quis se magnum periculum euasisse sentit: in futurum, quod vel vna tali actione multum profligatum est, et ad demendam officio tristitiam pristinam, et ad obediendi facultatem. Sed eadem sunt agenda, quoties eadem res incidit, donec paullatim consuetudo in quoque genere contracta sit, ut etiam sine difficultatis et molestiae sensu pareamus, officiumque faciamus.

41. Sed haec de exercitatione Christiani ad comparandam facultatem recte agendi in singulis officii generibus, et ad capiendam paullatim consuetudinem officii seruandi, hoc est, virtutem, dicta sunt; in quibus putamus esse caput loci totius. Nam et exercitatio haec est princeps, et prima omnium suscipienda. Sunt vero etiam aliae exercitationes, homini Christiano et necessariae, et ad sanctitatis virtutisque negotium salubres; sed quae ad genus vniuersum pertineant, hoc est, ad conformationem animi totius, aptam ad vitae sanctitatem, exercentesque adeo vim suam etiam in singulis actionibus ac partibus officii. De his igitur, restat, ut dicamus. Huius loci sunt poenitentiae, fidei et pietatis exercitationes. Nec vero de iis scholas scribemus; non id foret talis disputationis: sed quaedam, si poterimus, admonebimus, quae ad ipsum earum usum prodesse videantur.

42. Poenitentiae autem exercendae genera duo sunt: alterum est, quod pertinet ad vitam conuersi ad Deum hominis consequentem; alterum, quod ad antecedentem. Atque in illo quidem est crebra et diligens cogitatio, primum peccatorum singulorum, quae vel opprimunt nos, ab animaduersionis remissione, praesertim in vita negotiosa, aut ab consuetudinis pravae ac diuturnae pertinacia, et reliquiis, vel ab imbecillitate nondum satis

tis confirmatae et exercitatae voluntatis bonae nascuntur; deinde vero vitiositatis totius internae, tum illius, quae contracta est culpa nostra, tum eius, quae est in ipsa natura nostra. Oportet igitur in illis praesertim initiis vitae ad sanctitatem et virtutem conformandae, crebro recensere acta nostra, eaque ad normam legis diuinæ exigere, nec in eo iudicio ac velut censu fauere sibi ac parcere, vel conniuendo, vel benigne interpretando, sed summam seueritatem adhibere. Nec ea res modo referenda est ad veniam petendam, sed etiam, et vel maxime ad bonam voluntatem et inductionem animi firmandam, et animaduertendi diligentiam in posterum excitandam: oportetque videre subinde, quid minus factum sit in eam partem, et vicissim, quid plus in partem meliorem, ut etiam fructu illius exercitationis et profectu laetemur, fiamusque ad eam, et omnino ad officii conseruandam curam, alacriores. Non est grata homini haec industriae exercitatio, tum quia omnis cogitationis seriae et diuturnioris labor est molestus, praesertim ei non adsuētis, qui sunt plerique: tum quod ea saepe cogit hominem sibi displicere. Sed illius tristitiae magnitudinem longe vincit necessitatis et vtilitatis magnitudo. Nam sine ea nullo modo emendari vitiosa possunt, et oritur paullatim securitas et ignauia in opere virtutis, in qua retro labuntur omnia, et res celeriter ad pristinam conditionem redit. Sed haud scio, an etiam plus valeat vitiositatis nostrae vniuersae cogitatio; quae etiam sua sponte ingeritur nobis et in oculos incurrit in superiori illa exercitatione. Nam siue illam vitiositatem et corruptelam animi ac vitae perpendas et contueare, quae culpa vitae superioris contracta est; foeditatem eius magis intelligas ac doleas, et ad eam frangendam ac vincendam exciteris; siue eam consideres, quae in natura ipsa haeret, facitque, ut facilius male facias, quam recte, in recte agendo autem tanta difficultate impedire ac retardare, ut etiam saepe contra facias, ac proposueras animo, *Rom. VII. 23.*
odium

odum peccati interdum augebitur, *ibid.* 13. et dolor incendetur, per quem vota fient pia et sancta, *ibid.* 24. in quibus gratum Deo est sacrificium.

43. Ad incendendum autem et peccati odium, et officii diligenter conseruandi studium, nihil arbitramur efficacius esse exercitatione poenitentiae eius, quae ad vitam pertinet ante conuersionem actam. Ea est in repetenda interdum et renouanda memoria, primum peccatorum, praesertim grauiorum, quae tum perpetrata sunt, totiusque illius seruitutis, per quam prauis cupiditatibus obnoxii fuimus, deinde sensuum illorum metus, terroris, dolorisque, quibus percitus animus ad misericordiam diuinam confugit, ut veniam peccatorum impetraret. Nam, ea memoria repetenda, repetetur etiam sensus peccatorum, non ille talis, qualis tum fuit, hoc est, qui sit terroris et metus, sed qui moerore quodam, mixto leni laetitia, suauiter adficiat animum, comparantem pericula illius temporis cum praesente securitate, indignitatem suam cum beneficii accepti magnitudine, denique etiam magis perspicentem foeditatem et magnitudinem peccatorum. Etenim in iudicii huius et velut aestimationis societatem venit amor Dei, incensus beneficii accepti in remissione peccatorum magnitudine. Sed in iniuriis et offensis iudicandis aestimandisque profecto acutius cernit amor beneficii memor, habetque plus verae indignationis, quam iustitia mixta metu et pudore; propter quem facile vel refugit seuerius iudicium, vel remittit aliquid ab seueritate. Cuius rei exempla profecto luculenta et sanctitatis verae studiosis vehementer commendanda habemus in scripturis, tum alia, ut Pauli, tum inprimis Dauidis, cuius Psalmi post poenitentiam, acceptamque remissionem peccatorum scripti, plus habent doloris et moeroris, quam in illo ipso poenitentiae actu fuerat 1 Sam. XII, 13. Sed hos tales sensus, ab tali exercitatione poenitentiae commotos, dubitari non potest, esse et ad frangendas prauarum consuetudinum

num vires, et ad excitandum studium, acuendamque curam officiorum conseruandorum, efficacissimos. Atque huius exercitationis vsurpandae etiam monitores habebimus multos, tum in rebus secundis, si in iis fruendis adsuafaciamus, vt debemus, animum meminisse indignitatis nostrae, et vniuersae, et ex pristinis peccatis, tum maxime in aduersis vitae casibus, et calamitatibus malisque grauioribus; per quas materiam Deus etiam huic exercitationi suppeditat. Haec de poenitentiae exercitationibus. Sequitur, vti propositum est, vt de fide exercenda dicamus, ad hanc rationem nostram accomodate.

44. Fidei autem exercitationem vniuersam esse in parte exercendae virtutis Christianae, vel ex eo intelligitur, quod virtus haec vniuersa pendet e fide, in eiusque velut fundamentis nititur: vnde fit, vt exercenda fide exerceatur virtus, confirmanda fide per exercitationes confirmetur virtus, saltem in hanc partem, vt eius studium accipiat incitamentum nouum. Nec vero placet hic de vniuersa illa fidei exercitatione, eiusque generibus ac modis, dicere: quamquam hic saepe nimis vaga est praeceptio, nec satis distincte definit modum eius, ad agendi facultatem, vt ad eam dirigere homines possint actiones animi: sed nos hic, et ad praesentis praeceptionis consilium, hoc modo genus requirimus, quod est simile ei poenitentiae exercitationi, de qua ante diximus. Dicimus igitur, in parte necessaria, et, supra quam dici potest, vtili et efficaci exercendae virtutis Christianae et obedientiae aduersus praecepta diuina, esse crebram repetitionem illius sensus, qui nobis, in poenitentiae actu, in illo salutis desiderio amplectentibus promissionem Euangelii, et cum fiducia petentibus veniam et sperantibus, impressus est, mixtus dolore et gaudio, tranquillans animum et reficiens. Nec illa modo memoria vsurpanda est, sed etiam eorum instauratio, a quorum praesente cogitatione tum ille sensus obortus est: vnde sen-

Ernesti Opusc. Theol.

Y

fus

sus idem exoriatur necesse est, si non semper eadem vi, at aliqua tamen. Huius autem talis exercitationis ad virtutem vis est ex eo, quod cum illo sensu necessario excitatur sensus amoris diuini, sensusque boni, quod est in Christi merito, cuius fiducia veniam et liberationem a periculo et petimus et impetrauimus; quae sunt ad libenter et constanter, hoc est, vere obediendum Deo, efficacissima. Auctor nobis sit Paulus; cuius etiam carmen epinicion, vincentis scilicet per sensus amoris et gaudii, ex illis cogitationibus obortos, omnia virtutis et obedientiae impedimenta, nobis in tali exercitatione in animo atque in ore sit. *Rom. VIII, 35-39.* Restat, ut de precibus ad institutae disputationis consilia dicamus.

45. Est autem communis haec praeceptio omnibus, qui de vita hominis Christiani conformanda tradunt, ut preces in necessariis eius negotii instrumentis ponant, sed fere hac de causa, ut auxilia diuina expetantur et impetrentur. Id longe absumus, ut improbemus: probamus potius, et necessarium, uti est, ita ducimus: sed hactenus non inest, quae proprie sit exercitatio hominis Christiani, proprieque ad negotium virtutis et officii, et consuetudinem eius capiendam, dirigatur: estque cauendum diligenter, ne preces in hac re commendentur, per negligentiam *αργισίας* in dicendo, ut ignauiae locus fiat, et omnia Deo relinquuntur; qui in hac re nos adiuuare, non omnia ipse, sine labore nostro, facere vult. Sunt enim omnino in partem hanc procliuēs homines, ut velint sibi contingere bona sine sudore et sanguine, ut ille ait, et virtutis habitum potius sibi infundi, quam labore suo parari. Itaque etiam propensi sunt in hanc opinionem, et ad eam trahunt, quae de vi diuina Spiritus Sancti in ea re promissa sunt. Totus quidem Fanaticismus hinc pendet, in quo est mera ignauiae talis, nec modo in agendo, sed etiam in intelligendo, disciplina, religionem omnem reuocans ad mechanisum, qualis est a natura in

in bestiis, sine vlla disciplina vel cognoscendi, vel exercendi, facientibus opera, quorum caussa natae sunt. Atque etiam ipsam exercitationem precandi vniuersam plerique verbo tenus modo commemorant, nec eius modum et viam distincte explicant ad vsus eorum, qui velint facere, quod praeceptum est; copiosi sunt in praeceptis de vniuerso precandi modo, hoc est, argumento precum, habitu animi et similibus, quae etiam in puerili institutione traduntur, itemque in commendando precandi officio per necessitatis et vtilitatis vniuersae demonstrationem, similibusque, profecto non inutilibus, sed vulgo notis, nec orationem desiderantibus; parci autem ac prope muti in praxeos proprie modo tradendo, de quo monitum est in *Bibl. Theologicae Parte IX. pag. 431. Arndius* quidem ipse, in laudatissimo Christianismi veri opere, hanc partem non attigit, Lib. II. cap. 34. ne tum quidem, (Sect. V.) quum promississet methodi demonstrationem, per quam quisque, etiam de populo, disceret precari suo modo: repente, statim in principio, a praecipiendo ratione relapsus ad precum commendationem. Sed eo vitio multis partibus illud opus laborat. Itaque hancce disputationem ita instituemus, vt primum modum huius exercitationis ad vsum vitae Christianae explicemus; deinde eius vim ad sanctitatem vniuersam et in exercendo officio breuiter demonstramus.

46. Sed est duplex vsitatum genus precandi, alterum quod alienis aut ratis formulis vtitur, alterum quod vere suum cuiusque dicere possis; quippe non, quae sibi alius praeiuit, siue intellecta siue non intellecta, repetit, sed de sensu et mente sua, quae ad Deum deferat, promit. Et in illo quidem genere per se non est exercitationis labor: sed fit tamen in solemnibus et communibus formulis, vitio humano, vt exercitatione in iis bene vsurpandis opus sit. Nam quum eae vel in prima infantia coeptae sunt vsurpari, quum vis verborum percipi non posset, aut, per assiduitatem vsurpandi, etiam sine cogitatione

recitari possunt, sit facile ac saepe, vt celeriter ac sine sensu profundantur. Nec id accidit modo iis, qui nulla religione ac reuerentia Dei tanguntur, et ad precandum consuetudinis modo causa veniunt, sed etiam his, qui cum bona voluntate. Saepe enim, etiam quum se ita comparant, vt cogitate omnia, et sensu verborum omnium contuendo, velint vel ipsi pronunciare, vel sequi pronunciantis verba, aberrat lubrica cogitatio inter pronunciantium vel audiendum, et ad finem quum venire, deum et ipsa redit, cum dolore amissae facultatis precandi. Vnde oritur magna difficultas bene precandi, tum in his, qui solis formulis talibus vtuntur, tum in ceteris, per precum communium necessitatem, quae non sine exercitatione accurata frangi ac tolli potest. Nec is est parvus labor, si quis expertus sit, aut experiri velit: sed est tamen minor in priuatis precibus, in quibus etiam initium fieri debet. Habet autem partes duas, quarum prima est in excutienda intelligentia nostra, vt videamus, an in promptu sit verborum omnium vis et potestas; idque inprimis necessarium est tum, quum formulae, quibus adfueuimus, multum figurati sermonis habent; in quo facillime ac saepissime decipitur simplicitas et stupor hominum; altera est, vt excitemus animaduersionem, et redigamus in ordinem cogitationem, vt in eo, quod propositum est, manere cogatur. Eam veluti vim ei adhibebimus, si, quoties elapsa est nobis, ad initium redeamus, donec fatigata reuocando, consistat, vbi debet. Sed ea disciplina locum non habet in precibus communibus; itaque tanto maior diligentia erit in iis adhibenda, vt praesentem animum habeamus. Atque nouimus, qui expertus illud incommodum, ad mensam, v. g. cum precum formulae vsitatae recitarentur, ipse secum tacita cogitatione preces faceret suo modo, nulla forma certa verborum vtens, ne praetermittendarum temere precum, h. e. non precandi periculum adiret.

47. Tale periculum non adeunt, qui de suo promunt preces cuiuslibet temporis, tantum cogitatione, verbis nullis pronunciandis, vtuntur: quod est exercendarum genus precum et optimum et facillimum. Etenim si quando vel casu aliquo, sine culpa nostra, interrompantur preces tales, vel elabatur non animaduertentibus cogitatio: tamen superiora illa bene se habent, et reuocato animo, continuari precandi pietas potest, etiam, si ita necesse sit, ad aliud tempus differri. Sed difficile est hominibus persuadere, cuiusque hominis captui accommodatam esse hanc rationem, multique disputant in contrarium, plerumque, vt opinamur, ignauiae suae defensionem vt parent. Nam in istis ratis aut alienis formulis celerius defungi possunt, nec molestiam cogitandi, quae quidem iis videtur, subire necesse habent. Enimuero turpe est, non modo doctori, sed homini Christiano, existimare, quod in veteri Testamento fecerint omnes, ac fecerint necessario, id, in haud paullo maiori luce Euangelii, homines facere non posse. Sed nihil ad illos refellendos efficacius, et ad hunc locum disciplinae Christianae, vsusque aliorum, aptius facere possumus, quam si modum exercendi animi pii ad bene precandi facultatem tradamus, secundum quae nemo sine impudentia possit dicere, eam exercitationem virium suarum modum excedere.

48. In precibus autem ipsis insunt duo, perspicuae definitione Paulli, *Philip. IV, 6.* primum gratiarum actio et laudes diuinæ, alterum, necessitatum, tum nostrarum, tum alienarum, quas videlicet nostras debemus ducere, commemoratio ad Deum delata: ἐν παντί τῇ προσευχῇ καὶ τῇ δέήσει μετὰ εὐχαριστίας τὰ αἰτήματα ὑμῶν γνωρίζετε πρὸς τὸν Θεόν. Et potest pars utraque coniungi, atque adeo debet, in precando, inprimis tum, quum breuitate vtemur necessario, temporis causa, aut cum vnus alicuius necessitatis nostrae sensu tacti, eam ad Deum deferre instituimus; quod fit interdum inter media negotia vitae et vocationis nostrae. Sed in hoc

genere inest officium ipsum, non ea, quam proprie dicimus exercitationem precandi, vel pietatis per preces, de qua hic loquimur; in qua est pars disciplinae ad pietatem et virtutem comparatae. In hac igitur exercitatione partiri operam, interdum solas laudes Dei et gratiarum actionem spectare et amplecti possumus, interdum necessitates nostras, interdum vero etiam alienas: idque saepe fit necessario temporis causa, quod nobis, propter opera vocationis nostrae, in quibus et ipsis suo tempore et curiose obeundis est pars Dei colendi, raro sufficit ad totum illud veluti curriculum cogitationis pietate emetiendum. In quo nobis exemplo praeluxit David; cuius in Psalmis ad hanc exercitationem pertinentibus, modo solae laudes operum diuinorum, beneficia Dei, priuata, publica populi Israëliti, modo solae necessitates, vel ipsius priuatae, vel piorum, vel populi publicae, commemorantur. De huius igitur *exercitationis* modo videbimus, ad propositum ante consilium.

49. Est autem omnibus generibus huius exercitationis, et consuetudinis in ea consequendae, commune hoc praeceptum, inprimis illud necessarium, diligenterque et inculcandum iis, quorum doctores esse volumus, et obseruandum in ipsa exercitatione: ne errare et vagari cogitationem sinamus incertis veluti finibus rerum, in quocunque precum genere commemorandarum, ut faciunt vulgo, non bene instituti vulgatis et vniuersis precandi praeceptis. Nam primum ita res ad casum et ad felicitatem memoriae reuocatur, quae quum non satis respondet, oritur facile illa vulgaris opinio et stulta, se de suo precari non posse: deinde in hoc velut errore cogitationis fluctuantis facile aberrat animus ab re instituta, et delabitur ad aliena per malam phantasiae sedulitatem; qua nihil est huic exercitationi inimicius. Est igitur animus sic instituendus, ut intra certos fines cogitando procedat, constituto certo ordine rerum cogitandarum, quarum veluti vestigiis persequendis decurrat exercitationis cuius-

eiusque stadium. Ita sciet, quo dirigere cogitationem, ad quod a quoque progredi debeat. Et non ignoramus, in eo esse aliquid difficultatis, praesertim in iis, qui cogitationis vim non subegerunt per disciplinam puerilis et iuuenilis aetatis, vel suae, vel doctorum culpa, ut eam intra tales terminos rerum continere, et recta via progredi possint: sed si modo genera rerum definita, eorumque ordo destinatus, illaque secundum hunc aliquoties trita et percursa sint; omnem illam difficultatem, neque ea magna est, sublatam sentiemus.

50. Sunt autem in primo genere laudes diuinae vel ad vniuersam eius maiestatem et perfectionem pertinentes, quae ex operibus eius, tum sensibilibus et adspectabilibus, tum inuisibilibus ad salutem generis humani per Christum, intelligitur, vel ad beneficia nobis priuatim tributa. Si quis igitur in illo genere exerceri velit, instituat animum ad repetenda ea, quae de quaque parte perfectionis diuinae, legendis libris, tum diuinis maxime, tum et humanis, vel per institutionem doctorum, audiendis eorum orationibus in templis, cognouit; quorum vtrumque videlicet non tantum ad oblectationem, aut leuem motum praesentis temporis fieri debet, sed ut recondantur animo, ad tales temporis futuri, imprimis precandi usus. Sed id faciet certo ac descripto ordine, ex praecepto ante proposito. (§. 49.) In qua re cauebit, ne acquiescat in nominibus partium perfectionis diuinae, ut omnipotentiae, sapientiae, bonitatis, iustitiae, ceterisque recensendis rem absolui putet: in quo plerumque fit, ut nihil praeter sonum verborum obuerfetur animo, praesertim hominibus non eruditis, et de populo, qui non ita in potestate habent notiones rerum, ut eas per nominum admonitionem totas instaurare in animo (si tamen eas tenent omnino) et ita res ipsas intueri cogitando possint. Deus quidem perfectionis suae vim, non modo verbis ac nominibus generalibus demonstrauit, sed rebus, operibus, actionibus. Haec igitur cogitare ac

mente spectare, non verba de memoria promere et tacite pronuntiare, oportet. Caeterum facile agnoscimus, hanc partem exercendarum precum habere aliquid difficultatis maioris apud indoctos: sed eos adiuuare ad hanc exercitationem doctores verbi diuini et debent, et possunt, planis et perspicuis, et ad retinendum accommodatis demonstrationibus omnis perfectionis diuinæ, per opera cuiusque partis, sæpe proponendis, et ipso actu ad eorum cogitationem sensumque adducendis. Et tum hi debent esse in hoc agendo diligentiores, et illi ad discendum promptiores; quod hoc genus est longe princeps omnium in precando: quippe solum Deum amplectitur, cum in ceteris nostra magis ratio ducatur, quæ etiam sunt faciliora.

51. Ac cum illo coniunctissimum est hoc, quod ad benignitatis erga quemque diuinæ opera pertinet; in quibus propriam sedem habet gratiarum actio. Huius ergo gratiarum agendarum exercitationis vis omnis est in recognoscendis bonis nostris omnibus, maxime iis, quæ vel tota Deum vnum habent auctorem, vel in quibus eius prouidentia et gubernatio rerum humanarum benigne et sapienter intercessit. In hoc autem genere non multum laboris proponitur, nihil difficultatis vincendum est: sola adfuefactione aliqua opus est, facile illa comparanda, cogitationis per partes vitæ nostræ ex ordine velut circumducendæ, initio factæ ab ipsa natura nostra, animi et corporis bonis, inde ad commoda e parentibus, patria in qua, tempore, quo nati sumus, magistris puerilis ætatis cetera. progrediendo; pericula ex inscitia et imprudentia nostra, e morbis aliisque casibus, opportunitates vitæ, vel oblatas nobis in variis generibus sæpe mirabiliter, vel partas, adspirante successum laboribus Deo: ad hæc igitur omnia memoriae diligentia ita obeundo, ut cogitatio subinde ad indignitatem nostram reflectatur: tum ad lenitatem diuinam et patientiam in vitiis nostris tolerandis, benignitatem in cauendo, ne res ad *παίσματα*, ad

ad contumaciam peccandi perditam, veniret adque perniciem, ad misericordiam in conuertenda mente nostra ad meliora, per poenitentiam et fidem, et omnia inde orta bona. Haec via, si ita demonstretur hominibus, in quibus bona voluntas sit, ut in eam deducantur, commitemque habeant semel doctorem bonum, praesertim cui via illa ipsi trita sit, sua sponte deinde eam decurrent, et decurrent libenter, propter amoenitatem regionum peragrandarum. Et huius viae demonstrandae et vna emetiendae indicium fecit *Lutherus* doctoribus populi puerilisque aetatis, si aduertere animum, et sequi indicium vellent. Nam in explicatione Symboli Apostolici, ut vocant, Deum creatorem coeli et terrae sic interpretatur, ut coelum et terram vno verbo attingat creaturarum, in homine haereat, enumeretque bona eius, et a natura, et a providentia; ut velut in rem praesentem deductus homo recognoscat bona sua, quibus, nihil tale meritis apud Deum, utatur ac fruatur, eaque cogitatione sensum amoris et gratiae excitet. Nec vero metuendum, ne aut materia hic cuiquam desit, aut ne illa recensio bonorum suorum et recognitio molesta cuiquam sit: immo vero horas totas libenter in ea cogitatione consumemus, cum suavi sensu benignitatis et misericordiae diuinae. Quod si quis in vno beneficio diuino proprie velit exercere pietatem agendarum gratiarum, adhibeat scientiam beneficiorum diuinorum aestimandorum, ad magnitudinem cuiusque recte et perspicue intelligendam. Nam ea ut magis intellecta erit, ita sensus gratiae erit et maior et salubrior.

52. Non dissimilis ratio est exercitandarum precum, quae maxime proprie preces vocantur, hoc est, quae ad necessitates nostras aut alienas pertinent. Nam tota est in commemoratione tacita i. e. cogitatione necessitatum illarum: quae videlicet quum sit, hoc consilio, ut earum remedia quaeramus apud Deum, aut eo animo, ut auxilia a Deo speremus, vere preces facimus. Etiam ipse
 Y 5 sensus

sensus necessitatum in piis est precum instar. Et necessitatum quidem, ad corporis tutelam vitamque communem pertinentium, et scientia et cogitatio non difficilis est, modo non ei cogitationi nimis indulgeremus, augeremusque necessitates, aut fingeremus, quae nullae sunt, dum vel obsequimur opinionibus, studiis, moribus communibus, vel ab iis decipimur: quod est cauendum Christiano in hac exercitatione precandi diligenter; caebiturque satis, si iis sensibus erit imbutus de rebus expendendis, quos supra proposuimus. Est autem in iis precandi exercitatio dirigenda maxime, primum ad imbecillitatis nostrae et humilitatis cognitionem, deinde ad voluntatem earum perferendarum, quoad Deo videatur, per quam omnes eas necessitates, quae quidem nobis videntur, Deo permittimus. Sed cognitio atque adeo cogitatio necessitatum earum, quae ad animum pertinent, difficultatem non vnam habet; in qua vincenda maxime exercitatio precandi laborare debet. Nam et multiplex ea necessitas est, et non nimis iucunda homini ad cogitandum. Sed inprimis ad eam exercitationem ita praeparati accedere debemus, ut partes omnes vitae vere Christianae, et bona omnia expetenda, vel ad animum, vel ad vitam, cognita habeamus. Tum vero cogitationem intendemus ad comparandum, quid ex iis nobis desit omnino, aut in quo aliquid admixtum sit vitii, vel ab imbecillitate, vel a negligentia nostra. Considerandum est etiam, quid quoque tempore habeamus in manibus, quid agere instituamus, quid instet nobis vel ad agendum vel ad ferendum; ut inde, quid ad quodque nobis opus sit, iudicare possimus. Quibus omnibus cogitandis ad expetendam opem diuinam compellemur: in eoque erit vera exercitatio precandi. Nec vero, quae cogitet quisque ad recte in hoc genere precandum, deesse possunt: si quis eam, quam ostendimus viam ingredi subinde velit, ut aliquam eius consuetudinem capere possit: praesertim in genere posteriori, in quo etiam breuior via est.

Oportet

Oportet autem huius exercitationis doctores praeceptis per exempla lucem adfundere, hoc est, modum faciendi, quod praeceptum est, tradere, et in conatu faciendi ipso homines adiuuare: in quo est caput rei. Ac res ipsa et successus docebit homines, posse se facere, quod se posse negarant, vel ignauiae praeconibus crediderant, et gaudebunt successu. Nam simpliciter praecipere, ut in ceteris, sic maxime in hoc genere parum profuerit. Sunt autem, ut in omni alia re, sic in hac tria videnda: quid, quare, et quomodo fieri debeat. Itaque si, ut hoc utamur, volet efficere, ut quis possit de suo preces facere, ubi in templum venerit, iubebit eum cogitare primum, quid ibi factururus sit? nempe laudare Deum, et preces facere communiter, et audire verbum Dei: deinde, quare communiter ea facere? videlicet iussu et promisso Christi impulsu: quomodo? cogitate ac bono animo: qua spe? nempe, ut gratum faciat Deo, et melior fiat. Haec ergo cogitet: et precabitur bona cum spe. Nec vero posthaec difficile ei erit, etiam dicere secum in hanc sententiam, si volet: Deus, pater benignissime, filii tui iussu et promisso huc venimus, ut te laudemus communiter, inuocemus, et verbum tuum audiamus: fac, ut ea recte et pie faciamus. Accipe benigne laudes, audi preces nostras, et verbo tuo nos fideles et sanctos reddere per Iesum Christum. Sic, et per tales exercitationes in viam deductus, et productus aliquantum, discet precari, et in hac exercitatione pietatis bene versari.

53. Iam, quod ad alienas necessitates pertinet, quae nostris similes aut pares sunt, hoc est, priuatas: res nec propriam habet difficultatem, nec indiget praecepto proprio. Nam quae pro nobis petimus, ea et pro omnibus petere oportet. Et si qua cuiusquam propria necessitas existit, pro ea quoque deprecari, laboris nihil habet. Sed publicae necessitates Ecclesiae Ciuitatisque partem sibi permagnam vindicant precum nostrarum. Itaque in hoc etiam genere exercendo laborare oportet. Sed est eius
ratio

ratio admodum similis superiori. Oportet bona et mala Ecclesiae, itemque Ciuitatum vniuerse nosse, quae in scripturis satis perspicue expressa sunt ad hunc usum Christianorum: tum videre, quibus bonis careant, quibus malis laborent, cuius boni amittendi periculum sit, cuius mali imminentis metus, ut earum rerum cogitatione ac sensu commoti, remedia, auxilia pie expetere possimus, omninoque, ut Deus in vtraque republica institutis et consiliis bonis successum annuat, mala ad nihilum redigat.

54. Atque ita descriptus est nobis exercitationis huius modus, quoad ea in rebus vel expetendis, vel deprecandis versatur. Sed est et alterum genus exercendi, quod proprium est pietatis; per quam preces accipiunt vim Dei colendi. Id pertinet ad fiduciam in Deo, et spem consequendorum, quae petimus, bonorum. Ea oritur, quum nobis est persuasum, Deum propter vim suam infinitam et sapientiam posse, propter bonitatem autem velle facere, quidquid ad felicitatem nostram pertinet, nec minus propter promissa, ad veracitatem et iustitiam conseruandam. Vnde fit, ut exercitatio pietatis haec insit in cogitandis causis illis, propter quas confidere possumus, ratas fore preces nostras. Sed oportet in omnibus generibus precum, non modo generatim, hoc est, nomine tenus, eas partes perfectionis diuinae cogitare: nec enim ea exercitatio proprie sit: sed etiam interdum proprie hanc materiam sumere, in qua cogitatio nostra versetur accurate, praesertim in maioribus necessitatibus, et quum animus magni alicuius vel boni desiderio, vel mali timore ac sensu praesenti tenetur. Itaque oportet sigillatim repetere inprimis documenta amoris et bonitatis diuinae, vel natura, vel multo magis e scripturis et euangelio cognita, ea ponderare animo, et argumentationibus ad nos causamque nostram traducere: *Matth. VI, 26-30. VII, 11. Rom. V, 8. 9. VIII, 31. 32.* tum promissiones diuinas, earum magnitudinem et immotam certitudinem, omni alia maiorem. *Hebr. VI, 18.*

At

Ad quem vsum ea vel ipsa notata ac trita habere debemus, vt redeant in memoriam in tali tempore, vel quibus legendis reuocari in animum, et ad moueri sensibus nostris possint, scire. Nec minus vim et sapientiam diuinam animo complecti debemus, non tam per subtilia philosophantium argumenta, quae nec apta sunt omnibus, nec ad sensus facile penetrant, quam reuocandis in mentem exemplis vtriusque, ad hanc rationem pertinentibus, quae multa et magna commemorantur in scripturis, atque etiam occurrunt in vita humana, si quis iis attende-rit, et ea in mente reposituerit.

55. Confidimus, quicumque haec legerint et pertractauerint, non dubitatu-ros, secundum ea quemque, primum ipsum, si modo cogitandi laborem non defugiat per ignauiam foedam, exercitationem hanc precandi suscipere posse, atque in ea ita versari, vt ei non opus sit alienis formulis, nisi aut communes preces faciendae sint, aut aliqua fortuita de causa ita animus vel distractus sit vel oppressus, vt ad tranquillam constantemque cogitationem colligi attolli-que non possit; deinde vero etiam alios precandi de suo, et exercendarum precum modum docere, atque huic exercitationi adsuefacere. Nec est alia ratio consequendi *χαρίσματος* precum; in quo vix dici potest, quantum sit Christiani hominis ad omnes vitae huius partes praesidium, quantum vitae totius bonum. Vehementer enim errant, qui id cuiquam per Spiritum sanctum, sine ipsius studio, labore, et exercitatione assidua, contingere putent. Adiuvantur vtique a Spiritu sancto pii in hoc charismate consequendo; sed inter exercendum eo, quo diximus, modo, dum animo tractant materiam sanctam, e verbo diuino promptam, Nec tam pulchra res condonatur ignaviae, et infunditur socordiae hianti et oscitanti; sed est praemium laboris, reuerentia Dei et amore suscepti, quod et *κατὰ μέτρον πίστεως*, et pro modo laboris datur: habetque et hic locum illud Pauli, *ἕκαστος δὲ τὸν ἴδιον μισθὸν λήψεται κατὰ*

τὰ τὸν ἴδιον κόπον. I *Corinth.* III, 8. Quò loco non alienum erit, aliquem errorem vel eximere deceptis, vel prohibere ab iis, qui adhuc sunt ab eo integri. Sunt enim, qui hoc χάρισμα in iis vel maxime, vel prope solis agnoscant, quorum preces plenae sunt verbis tropicis et figuratis, praesertim durius aut hebraico more translatis, aliisque e sermone Mysticorum: in quibus solent etiam eam, quam *Vnctionem* vocant, laudare. Quae est mera fraus hominum male institutorum, et plus phantasiae tribuentium, quam intelligentiae, ad quam sunt referenda omnia: et tanto preces quaeque sunt ad vsum, tum piorum omnium, tum inprimis populi, meliores, quanto verbis planiores sunt, faciliusque intelliguntur; et tanto quisque etiam verius et magis e pio corde precatur, quanto simplicioribus verbis utitur. Nam illa vnctio artem vel affectationem olet, quae non est hominis, deprimentis se coram Deo per sensum maiestatis diuinæ et necessitatum suarum; propiorque est hypocrisi, quam verae et integrae pietati. Reliquum est, vt, quanta in hac precandi exercitatione pars sit disciplinae Christianae, quae pietate et obedientia aduersus Deum, omnique virtute exercenda cernitur, demonstramus: quod faciemus tamen breuiter, per capita modo rerum eundo. Incipiemus ab vltimo genere.

56. Id autem erat in exercenda fiducia in Deum. Enimuero omnis pietas in Deum in ea inest vna, idque intelligitur ex ipso eius exercendae, vt a nobis descriptus est, modo: admiratio et reuerentia perfectionis diuinæ, quae in vi eius infinita, sapientia, veritate et iustitia cernitur, et amor benignitatis inexhaustae paratissimaeque ad bene faciendum. Nec est alia causa, quare tantae ei laudes in scripturis tribuantur, tanta praemia proponantur, tanta in ea sit gratia apud Deum et precum nostrarum commendatio. Ergo, quoties exercitatione hac per precandi occasionem utimur, totam pietatem exercemus, exercendaque excitamus et corroboramus:

et

et id fit etiam efficacius, quod necessitatis nostrae, et desideriorum nostrorum sensus intendit animi vim ad cogitandum et ad amplectendum. Quodsi igitur vera pietas, inprimis verus amor Dei, est fons vnus verae obedientiae aduersus praecepta diuina, et per hanc virtutis verae et Christianae, de quo dubitari non potest: intelligitur, nullam esse meliorem et efficaciorē exercendae, et exercendo consequendae virtutis, nullam nobiliorem disciplinae Christianae partem, quam quae in precandi exercitatione inest.

57. Omnino, quoniam et per se clarum est, et scripturae sacrae praeceptis, ad obedientiae et officii conseruationem tutissimum et efficacissimum esse, si quis Deum semper habeat ob oculos, i. e. perfectionem et maiestatem eius; id autem fieri aliter, quam per cogitationis pie affiduitatem et constantiam, non potest: vel sic intelligitur, affiduitatem exercendarum cogitate precum habere vim maximam ad homines a peccando arcendos, et ad officium leni efficacia compellendos. Nam in ea non obiter, vt inter alias vitae actiones, oculos in Deum coniicimus, vel eius leuiter admonemur, sed tota mente, animo, spe sumus in ipsum conuersi, semota omni rerum humanarum cogitatione, quae debilitare sensum perfectionis diuinæ et obscurare possit. Atque id maxime fit in parte precum ea, quae in laudibus et gratiarum actionibus versatur: quae tota est alendae admirationis, reuerentiae, amoris et fiducia, habetque adeo communem cum fiducia exercenda vim ad virtutem. Sed etiam aliis de causis, precandi illa exercitatio virtuti Christianae prodest.

58. Iam, quantum ad virtutis et officii studium intendendum prodest, nosse se, suas necessitates in rebus spiritualibus? Sed eius scientiae perpetua exercitatio est in precibus exercendis. Quanta porro virtus est in modestia animi, deprimentis se, tenuiter de se sentientis, nihil sibi, Deo omnia tribuentis? Ad eam animo induendam nihil aptius est precandi exercitatione tali, in qua est perpetua humilitatis, tenuitatis, imbecillitatis, indigē-

gentiae

gentiae admonitio et sensus. Summa legis atque adeo officii est amor erga alios. Non potest pro aliis se apud Deum deprecatorem interponere, qui non amet: saltem, ut non admoneatur illius officii efficaciter, haud paullo utique efficacius, quam per omnes laudes *amici hominum*, quae sunt nunc in ore multorum. Verus amor curat res alienas, id est, necessitates et mala aliorum, ut iis pro facultate medeatur, itemque bona, ut iis gaudeat pro suis. Est ergo huius amoris exercitatio, alimentum et instrumentum in precandi exercitatione, quae illa mala et bona requirit, indagat, contuetur animo ac sensu intimo, et pro bonis gratias agit, malis remedia Deum poscit, et hac ipsa de causa omnis officii erga proximum, benignitatis et iustitiae adiumentum. Quodsi in omni officio sponte, libenter, constanter faciendo, tum vero etiam in vincendis ad peccandum sollicitationibus, prima est vera et certa voluntas et inductio animi, sufficiens ad imperandum et parendum, §. 38. vix potest aliquid intelligi potius ad illam voluntatem firmandam et animum inducendum, ut officii faciendi necessitati sanctae vere se constanterque subiiciat. Vix enim cogitari potest tam in eodem homine, eoque pio, discors voluntas et sibi repugnans ipsa, ut eum non pudeat, aut ut sustineat, contra facere, quam teste Deo proposuerat, implorato etiam eius auxilio ad faciendum. Sed sunt huius generis alia, quae attento facile sua sponte occurrant.

59. Profecto nesciunt homines, quantum sit in precandi exercitatione boni, si qui eam contemunt aut negligunt. Quamquam, quomodo non plerique parui faciant, quum ea nunquam sint usi, adsuetae solis formulis precandi alienis, in quibus usurpandis nulla est precandi exercitatio, magisque alium audimus precantem, quam nosmet ipsi precamur, praesertim si ne intelliguntur quidem satis, ut fit saepe. Quodsi homines adsuescerent verae precandi exercitationi, eiusque laborem non desu-
gerent, longe aliter et iudicaret et facerent; nec alio
cogitan-

cogitandi genere libentius ac saepius vterentur. Si autem ad eam etiam a pueris, per parentum vel praeceptorum Ecclesiaeque doctorum institutionem et auxilia adducerentur; profecto credibile est, etiam numerum hominum sanctorum longe maiorem, quam nunc est, fore, et multas corruptelas vitae atque morum non tam faciles aditus ad animos iuuentutis habituras esse. Quo magis optandum est, ut et haec pars disciplinae Christianae cum ceteris cognoscatur rectius, et commendetur grauius, et vsurpetur crebrius.

60. Conclusionem habeat disputatio hanc, quae sit in commendatione cogitationis et meditationis vniuersae. Nam si, quicquid est non modo exercitationum, sed etiam omnino disciplinae, sicut a nobis explicata est, in vnum contulerimus, summam omnem esse reperiemus in cogitationis et meditationis diligentia et frequentia. Nec vero est vlla pars religionis, cuius utique propria sedes est in animo, quae non hanc cogitandi et considerandi assiduitatem et contentionem requirat, beneque *S. Bernardus* in principio operis *de Consideratione* (I, 7.) summam virtutis et religionis a consideratione pendere iudicat, *eique, qui non operam in vita det, eum vitam perdere.* Nec vero audiendi sunt, qui hanc mentis agitationem doctorum propriam faciunt, et ab eius societate excludunt ceteros; nisi vero beatitudo ea, quam Dauides meditantibus religionem tribuit *Psf. I, 1. 2.* in doctos modo cadit. Sed conturbati homines rerum similitudine confundunt, quae longe diuersa sunt. Etenim contemplationem rerum vniuersalium et abstractarum non cadere in popularem intelligentiam, id quidem facile conceditur; sed in istis exercitationibus cogitandi et meditandi, quae in partibus disciplinae Christianae proponuntur, suntque a nobis propositae, materia cogitatione complectenda, et consideratione tractanda, non est ex illo subtili et scholastico genere, sed sensibus vel externis vel internis subiecta: in quo genere nihil esse potest, quod captum popularis

Ernesti Opusc. Theol. Z intelli-

intelligentiae superet; quam videmus in rebus aliis, quae sunt e genere simili, hoc est, coniunctionem cum sensibus vel internis vel externis habent, pertinentque ad bene viuendum, satis esse in cogitando et considerando solertem. Nec vero videri debemus plus tribuere huius actioni animi, quam res et ratio reliqua veritatis patiat, et detrudere, quod Spiritus diuini est, ut addatur homini. Etenim primum, non est nobis sermo de homine, Spiritus sancti prorsus experte, cui haec disciplina, quoad quidem exercendae virtutis modum habet, nondum conuenit: nec eam vim, quam e cogitatione suspendimus, tam ipsius actioni naturali adscribimus, quam ei rei, quam actione sua comprehendit et tractat, hoc est, verbo Dei. Sed, sicut medicamentum, nisi sumatur, eo, quo iussit medicus, modo, sanare morbum non potest, nec cibus nutrire corpus, nisi sumtus et concoctus actione ventriculi; nec tamen actio sumendi ipsa sanat et nutrit, sed medicamenti et cibi vis: sic cogitandi actio est illa quidem necessaria, nec tamen ipsa sibi sanctificandi vim et laudem arrogat, sed eam omnem verbo Dei, et per id mouenti animum et flectenti Spiritui sancto relinquit: qui cum Deo Patre, et filio eius Iesu Christo, laudetur et celebretur in omne tempus!

DIGNI-

**DIGNITAS ET VERITAS
INCARNATIONIS
FILII DEI
ASSERTA**

21

THE JOURNAL OF THE
ROYAL ANTHROPOLOGICAL INSTITUTE
OF GREAT BRITAIN AND IRELAND

DIGNITAS ET VERITAS INCARNATIONIS FILII DEI A S S E R T A

Cum *Filius Dei factus homo* sit initium Euangelij, hoc est, salutis nostrae, quod ille naturae humanae velut instrumento Deum Patrem generi humano placuit, vnde spes omnis salutis pendebat: Ecclesia Christiana, praesertim admonitu et exemplo naturarum coelestium incitata, omni modo exhilarare voluit animabus piis dies, quibus rei tantae memoriam proprie celebrandam assignasset, adsumtis etiam institutis externis, per quorum suauitatem studiis nostris commendarentur. Enim vero haec gaudia nostra sunt inania et irridenda, si audimus eos, qui totum hoc commentitium putant; quod nec fieri possit, ut natura diuina cum humana ad unitatem personae coniungatur, nec illa humilitas humanitatis, tum vniuersae, tum eius, quae Iesu Christi fuit, digna sit altitudine diuinitatis; quam deformari atque inquinari miseriarum et aerumnarum humanarum vexationibus ac sordibus. Quae tanto facilius adhaerescunt in animis hominum, quanto maiorem habent speciem sapientiae, et suffragationem sensuum humanorum, quorum impetu magis in decernendo impelluntur homines, quam rationis recte et constanter iudicantis auctoritate ducuntur. Itaque non alienum putauimus, ab talis criminationis iniuria liberare rem sanctissimam, et, quantum in nobis esset, cauere, ne talibus cogitationibus animi ita perturbarentur, ut liquido gaudere bono tanto non possent, deinde vero efficere, ut etiam admiratione sapientiae et

bonitatis diuinae, sub illa specie, sensibus humanis tam contemptibili, latentis, suauiter perfunderentur, in quo maxima et praecipua huius temporis religiose et salubriter transigendi pars posita debet existimari.

Iam nos non sumimus nobis hoc, vt demonstrare ratione perspicua et subtili suscipiamus, quomodo diuinae naturae humana iungi ad personae vnitatem possit, quique sit illius coniunctionis, e naturis duabus intelligentibus vnā personam efficientis modus: quis enim hoc sibi sumere audeat? quando nec huius nostrae coniunctionis, quae animo cuiusque cum corpore suo intercedit, modum vel intelligere quisquam vel explicare ratione potest, quamquam sensibus nostris quodammodo subiectae. Immo vero cum *Gregorio Nysseno* ¹⁾ τὸ πῶς huius copulationis, ὡς μᾶλλον, ἢ κατὰ λογισμῶν ἔφθον, διερευνᾶν παρατρέμεθα modum eius, vt inaccessum rationationi humanae, scrutari non sustinemus. Sed illud tamen perspicere et declarari posse arbitramur, in illa coniunctione, quae clavis, et nulla probabili ratione in alium sensum torquendis, literarum sacrarum testimoniis nitatur, vt haec animi nostri cum corpore, testificatione sensuum nostrorum, nihil esse, quod naturae rerum diuinarum humanarumque repugnet.

Atque vt primum illam literarum sacrarum testificationem attingamus, cuius profecto non modo non minor, sed etiam maior, debet esse auctoritas, quam ipsius sensuum nostrorum testimonii: quis potest cum aliqua veri specie dubitare, eam, si omnia alia testimonia vel desint, vel debilitari aut eludi grammaticis aut criticis rationibus possint, eam igitur clare inesse in vno Iohannis verbo, (I, 14.) quod λόγον σάρα *factum* pronunciat. Nam illum λόγον esse aliquam ὑπόστασιν, naturam permanentem et personam, eamque diuinam, tum cetera superioris orationis arguunt attributa, quae nisi in personam diuinam non cadunt, tum maxime eius cum *ὡς τῷ πατρί*

1) *Cateches. c. II.*

τὸς μονογενεῖ, *filio Patris unigenito*, eodem in versu permutatio: *et nos spectamus illius λόγος*, qui homo factus esset, *maiestatem, qualis esse debebat in filio Patris unigenito*: quae appellatio *Filii*, ut non potest hic villo modo esse muneris, ita nec diuinitatis vel attributum, vel motum ac nutum significare. Sed cum ille λόγος, creator rerum omnium, *factus homo* dicitur: nam id esse σάρκα, *carnem*, dubitationem iustam nec habet, nec habere potest, agnoscitque nuperus Euangelii Iohannei Interpres Berolinensis, quamquam alienus ab Ecclesiae nostrae de λόγῳ sententia: id, quia nullam λόγος ipsius mutationem significare potest, quod, quemadmodum *Cyrillus Alexandrinus*²⁾ ait, cum de diuina natura τὸ ἐγένετο dicitur, ἀμαθὲς fuerit, καὶ ἀνόσιον κομιδῇ, τροπὴν οἰσθαι σημαίνει αὐτό: *et stultum, et valde profanum, mutationis in eo esse significationem, putare*; quid potest aliud intelligi, quam coniunctio λόγος cum homine, vel humanae naturae ad diuinam adiunctio: nec coniunctio talis, qualem idem Interpres fingit, quae sit ἐνεργείας et actionis modo diuinae in homine Iesu, qualis fuit in Mose et aliis Prophetis atque Apostolis: etenim his nascendis, vel ad Propheticum munus per inspirationem diuinam admouendis, quis λόγον, aut Deum hominem factum dicat? sed quae Filii Dei et hominis vnā personam faciat, ut iam Filius Dei idem fiat et sit filius hominis, humano corpore vestitus. Haec igitur cum perspicua sint, et saluis verbis, saluaque legitima interpretatione, peruerti, ne impugnari quidem, possint, nisi ab iis, qui σάφειαν οἰοῦνται, τὴν πρὸς Φανερὰ μάχην, *sapientiam putant, contra perspicua pugnare*, ut bene ait *Eunomius*³⁾, ipse non raro huius sapientiae, torquendis per metaphysicas nugas Scripturis, adfectator: ad alterum et ad caput reuēiamus.

Dicimus, nec in *uniuersa illa*, quam Ecclesia nostra defendit, *utriusque naturae coniunctione*, (ἐνώσει) nec in *modo adsciscendae humanitatis*, qualem et literae sacrae et

Z 4

res

 2) in *Dialog. T. V. Opp. p. 718.*

 3) in *Apolog. c. 8.*

res ipsa claris indiciis ac necessariis intelligere iubent, quid intelligi posse, quod ab naturae vel diuinæ vel humanae indole et ratione ita abhorreat, vt repugnant rerum vera oriatur.

Ac primum, sicut in coniunctione animi cum corpore intelligimus arctissimum mutuae praesentiae modum et gradum eum, propter quem adficere pars vtraque a teram possit, pro modo naturae suae, et animus corpori cum omnibus eius adfectionibus suum possit ac debet ducere: sic in illa Filii Dei cum homine copulatione praesentia intercedit vtrumque talis, per quam ex vtroque vnum fiat subiectum, cum adfectione mutua tali qualem vtriusque natura patiat, propter quam diuina natura omnia humanae sua ducere possit, et humana diuinæ. Sed haec coniunctio, qualem descripsimus, nihil habebit repugnantiae aut absurdi, si talis praesentiae gradus ac modus non repugnet neque naturae diuinæ, neque praesentiae diuinæ vniuersae. Intelligi autem debet, hunc praesentiae gradum ac modum non sic accipi, vt natura diuina Filii Dei loco propior fiat humanae; quod non est, cum sit a nulla re villo interuallo disiuncta: sed quod, cum ipse per communem essentiam diuinam omnibus rebus ita adsit, vt eas vi sua conseruet (*Hebr. I, 3.*) in humana natura, illa praesentia eius naturalis et necessaria accipit modum hunc, vt ea fiat ipsi instrumentum proprium, quale est corpus animi humani, in quo et cum quo agat omnia, quae per nullam aliam rem et in nulla alia agat; vnde proprio quodam modo sua illa natura dicatur, et sua omnia, quae ea agat ac patiat, vicissimque sua sint humanae communia; magisque, si subtiliter loqui velimus, humana ipsi propior facta sit; vnde Graeci *πρόσληψιν* et *ἀνάληψιν* vocant. Tentauit hoc discrimen et hos velut gradus praesentiae distinguere verbis *Gregorius Nyssenus* ⁴⁾ et cum vtramque praesentiam *ὑπόστασις*, *essentiae*, diceret, alteram illam communem personis omnibus

4) in *Catechetico* c. 25.

bus et necessariam κατ' ἔγκρασιν vocavit, hanc, quae est voluntaria et personae κατὰ κατάμειξιν, non bene, ut opinamur. Nam, ut mittamus incommoda metaphorarum, verbum utrumque praesentiae veritatem et gradum summum bene exprimit, nec abhorret a consuetudine ceterorum Graecorum, quam et Latini sunt imitati; sed non habent notam propriam, per quam discrimen utriusque generis constituatur et exprimat. Nam et ipse ⁵⁾ de incarnatione Filii Dei dicit, συνεκείσθαι πρὸς τὸ ἀνθρώπινον, alibi ⁶⁾ etiam καταμεινασθαι, et in eadem re vicissim ἐπιμειξίαν. Ceterum rem ipsam bene perspexit, ut alia, et acute distinxit.

Enimuero quid possumus in eo reperire, quod vel diuinae vel humanae repugnare dicamus naturae. Nam naturalis illa et necessaria diuinae naturae praesentia salua manet et immota, sed accipit extrinsecus accessionem quandam voluntariam naturae humanae, sicut anima humana, in conceptione, corporis: cuius possibilitatem quomodo absurdam putemus ac repudiemus, cum nitatur arbitrio diuino, cui quomodo negare possimus hanc facultatem, ut tale sibi instrumentum aut tale domicilium paret et assumat, in quo proprio quodam modo semper insit, semper operetur, quodque eam ob causam proprio quodam modo suum ducat.

Sed offendit etiam homines in hac coniunctione illud, quod vna persona dicatur fieri, demta naturae humanae vi, iure ac nomine personae; quod ne intelligi quidem, aiunt, posse, non modo difficile esse ad intelligendum, quod Theologi quoque fateantur. Enimuero in ea re, ut nobis videtur, negligentia quaedam, vel in cognoscendo vel in docendo officit veritati. Nam illud quidem Veteres praeclare viderunt, si humana Christi natura locum personae obtineat, induci personas duas, et coniunctionis veritatem tolli, propter quam Filius Dei homo

Z 5

factus

5) in *Antirrhetico* p. 144. (in *Zaccagnii Monum. Eccl.*)

6) *ibid.* p. 267.

factus dicatur, relicta relatione (*σχέση*) mera. Sed perturbari videmus homines verbo *subsistendi*, quod in eo solet Theologia latina vsurpare, habetque ambiguitatem, quae non est in Graeco. Intelligi igitur debet, cum natura Christi humana non per se subsistere dicitur, et eam ob causam non esse persona, sed subsistere in persona Filii Dei, id habere primum vim non physicam, sed moralem, cum totum personae nomen in humanis e morali genere sit, deinde significationem hanc, ut diuina natura, siue Filius Dei, sit subiecti ex vtriusque naturae copulatione orti pars ea, cui proprie et primario omnia attribuantur, quae in illud subiectum cadunt, propter ea, quod habet in ea persona dominatum omnem et principatum, humanam autem sibi tantum pro instrumento operis suscepti adsciuit. Itaque siue se de coelo venisse dicat, aut omnia scire, aut his similia, siue se moriturum, et eius generis alia, semper diuina natura, Filius Dei, loquitur proprie. Ille *Ego*, qui dicit, *meo arbitrio pono vitam et repeto*, est in utroque Filius Dei proprie, et persona diuina, nec excluditur in alterutra parte homo, sed assumitur in communionem rei vtriusque; at assumitur tantum, pro modo cuiusque rei. In Nestorianâ ratione, in qua homo Iesus est persona a Filio Dei distincta, est, ut ita dicamus, duplex *Ego*, alius, qui se dicat moriturum, alius, qui se Abrahamo priorem ferat; unde multa absurda consequuntur: quod scelus est per ea, quae diximus, in nostra et Ecclesiae probata, quae humanam per se negat subsistere, i. e. personae locum et vim tenere, sed cum persona Filii, quod nunquam ipsa sola de se dicat, sed modo particeps sit eorum, quae Filius Dei de se in illa conditione praedicet.

In quo rursus non intelligimus, quid iustae offensionis ea res habeat: quae, si illa coniunctio vera est, et ad eum, quem diximus, modum constituta, aliter esse non potest. Ac bene rem illustravit antiquitas similitudine hominis cuiusque. Nam et in hoc corpus non subsistere per

per se, quoad illa coniunctio naturalis daret, sed in persona animi. Itaque fit, ut de se loquens homo, non modo in rebus animo propriis, aut cum corpore communibus, ut in iis, quae per corpus aguntur, aut acta et percepta sunt, sed etiam in ceteris, quae proprie sunt corporis vnius, omnia ad naturam intelligentem referantur, quae semper intelligitur primario, corpus tantum per participationem ex coniunctione, quae ei cum animo intercedit. Ac video consentire philosophos⁷⁾, quod in sermonibus dicat *Ego*, quod est personae proprium verbum, referri proprie et primario ad incorpoream naturam, quae sibi, etiam quae corporis propria sunt natura, ut aegrotationes, ut ipsam mortem corporis, adscribat. Quae res si nihil habet absurdi in homine, immo aliter fieri nec debet nec potest, ipsa natura rerum eo nos ducente, ut consensus naturalis omnium linguarum docet: quare offendant nos in diuinis, et non potius recta et ita necessaria videatur, ut absurdum sit, aliter rem cogitare. Sed satis de his: ad minus subtilia et magis popularia veniamus.

Etenim negant, humanam naturam aptam esse diuinæ, cuius maiestatem violari illius humilitate. Quinam ista dicunt? Nempe ii, qui alias, de humana natura cum loquuntur, eam prope ad diuinitatem vsque extollunt; qui in ea esse imaginem expressam diuinitatis dicunt, et speculum intelligentiae diuinæ; qui, in mente humana sola esse dignum Deo templum praedicant, et his similia multa, non falso, in naturam humanam congerunt. Enimuero cum ad hunc, de quo agimus, locum ventum est, omnium illarum sententiarum magnarum repente obliti, omnia humilia loquuntur. Nos vero etsi non ignoramus, quanto interuallo perfectionis diremta sit humanitas ab diuinitate; tamen nihil indignitatis intelligere possumus in vtriusque coniunctione tali, qualem descripsimus. Magnitudinem bonitatis et indulgentiae diui-

7) v. *Hayer Spiritualist de l'ame cet. T. II. p. 1 sqq.*

diuinae intelligimus, diminutionem maiestatis nullam: nisi vero etiam nimis longe ex altitudine se demisit, et dignitatis suae parum memor fuit, ut ille apud Ciceronem (*Acad. IV*, 38.) existimabat, cum ad creandum, non homines modo, sed etiam formicas et minores ac sordidiores bestias descendit. Quod si nemo nunc audeat dicere, qui Deum credit esse auctorem rerum omnium; non potest intelligi, quare indignum eius maiestate credatur, si se proprio quodam et arctiori modo cum humana natura, in qua est imago ipsius, coniungat ad efficiendum opus dignum maiestate sua, quod sine ea coniunctione effici non potuisset; praesertim cum in ea nihil sit, nisi modus quidam praesentiae, quae et vniuersa cum rebus omnibus communicatur, sine diminutione aut obscuratione maiestatis diuinae. Nam si diuina natura praesens esse potest rebus omnibus, nec modo scientia et actione, ut nonnullis placet, sed etiam substantia, nec ab earum vel humilitate deprimitur, vel sordibus polluitur: quomodo tale quid cogitari potest in eo praesentiae modo, quem facimus naturae Filii Dei diuinae in humana? Nimis profecto anguste, et ad humanarum rerum modum, cogitant de diuinis, qui in hac coniunctione, ob talem causam, aliquid indignum Dei maiestate vident, immo videre se putant; quod quale sit, dicere perspicue, et remotis vanitatis humanae ludibriis, non queant. Quantum inter sit inter naturam illam nostram intelligentem et liberam, immortalem, et corpus hoc, siue, ut etiam deprimamus magis, hanc carunculam, hoc mox pabulum vermiculorum, videmus. An ergo ille sublimis, et Deum cum coelo et terra complectens cogitatione sua et contuens animus, deprimitur, secundum veteres nugatores quosdam, et polluitur indigne, cum huic corpusculo iungitur nascendo, ut in ipso, cum ipso sentiat, intelligat, moueatur, agat? Etsi haud paullo longius interuallum esse interiectum scimus inter Deum hominemque; similitudo tamen rerum demonstrat, ab illo interuallo, i. e. diuersitate perfectionis,

nis, in tali re nihil esse, quod ad minuendam alterius dignitatem valere possit.

Etenim tum demum hoc dici posset, si per eam rem diuinæ maiestatis, quæ inest in eius potentia, benignitate, sapientia et reliqua perfectione, si, inquam, maiestatis huius vel possessio labefacteretur, vel usus dignus Deo circumscriberetur, vel denique fructus, in quo est beatitudo diuina, imminueretur. Sed horum nihil nec ipsi excogitare vnquam, omni vi ingenii contendenda, potuimus, nec ab aliis demonstratum reperimus: tantum verba maiestatis diuinæ et humilitatis humanæ iactantur: fitque etiam hic, quod est in plerisque aliis opinionibus humanis, vt in solis verbis vim habeant, rei et veritatis, in magna specie verborum, inanissimæ sint.

Quid quod etiam diuina natura, in illa Filii Dei coniunctione cum humana, si ita dicere fas est, lucrata est plurimum; quod ea re perfectio eius, et, vt sacrae literæ appellant, gloria, manifestior hominibus, et amabiliior, et ad sapientiam veram virtutemque inter homines amplificandam efficacior facta est. Nam si consilium rei tantæ spectamus, quod totum pertinet, vt sacrae literæ demonstrant, ad salutem generis humani; quid potest esse dignius Deo, quam illa tanta huius salutis cura, et, vt ita dicamus, tantus in ea re sumtus? An potest esse quicquam Deo indignum, quod pro salute naturarum intelligentium, salua sanctitate et iustitia, facit: et non potius illustratur eius dignitas supra modum, cum eius caussa facit rem longe maximam, qua maior cogitari non potest, quæque hoc ipso offendit angustos animos, quod eius magnitudinem capere non possunt? Intelligitur enim tanto magis magnitudo benignitatis et amoris, quam virtutem in Deo longe maximam esse, quis non et scit, et libenter credit. Itaque Iesus Christus ipse cum omnibus Apostolis, quorum scripta tenemus, in hoc mysterio Filii Dei *ἐν σαρκὶ φανερωθέντος*, angelis hominibusque patefactam esse dicunt magnitudinem sapientis bonitatis

bonitatis diuinæ, quæ non modo in ipso consilio diuino intelligatur, sed etiam in modo, quo ad effectum consilii peruenire decreuerit, hoc est, in filii sui cum humana natura coniunctione ad redemptionem generis humani. Rom. V, 8. Eph. II, 7. III, 10.

In ea autem re nihil esse, quod pugnet cum sanctitate et iustitia diuina, aut sapientia, non est difficile demonstrare. Nam sanctitas quidem accipere detrimenti nihil potest, cum coniunctio facta sit cum eo, qui esset ipse purus ab omni vitio, *Hebr. VII, 26.* et per hanc ipsam coniunctionem cum diuina Filii Dei natura ita eximeretur e peccantium numero, ut peccandi locus (possibilitas) non relinqueretur. Sapientia autem diuina non minus conseruatur in hac causa, immo illustratur maxime. Nam si quis dicat id, quod solet esse in promptu his, qui libenter difficultates mouent in rebus diuinitus constitutis, longe ac nimis maiorem esse rem, quam pro consilio et fine, quem minori veluti impensa teneri potuisse: primum, qui sciunt, id aliter fieri potuisse? deinde, si sciant, atque ita sit, tamen nihil præter vulgares quassdam de sapientia sententias, ut de via breuissima, queant dicere, quare sapientiae diuinæ necesse fuerit minus facere, quam nos, auctoritate literarum sacrarum commoti, dicamus factum esse. Sed eam sapientiae legem non fert naturarum, ad naturas intelligentes earumque felicitatem pertinentium, nec hæc ipsa, in qua versamur, causa. Etenim, quando finis est a bonitate constitutus, et bonitatis demonstrandæ et illustrandæ causa, tum vero in delectationum, ad illum finem ducentium, quas demonstrat sapientia, fas est, arbitrium esse ipsius bonitatis: eam autem, in tali præsertim consilio, consentaneum est via ire ea, quæ et ipsa maxime sit apta bonitati illustrandæ. Quod consentit planissime cum iis, quæ Iesus Christus ipse de hac re docuit, ut *Io. III, 16.* quo ex loco clarum est, magnitudinem benignitatis diuinæ magis patefactam esse modo salutis humanæ reparandæ, quam ipsa salutis restituendæ

tuendae voluntate. Nec refert utique, vtra re magis pateat, sine an caussis; si modo illustratur luculentissime, quod agebatur, et semper a Deo actum est. Neque vero vlla, ut ita dicamus, impensa nimis magna est, quae fiat gloriae diuinæ causa: et si homo non erat dignus, propter quem et propter cuius salutem res tanta, tam superans expectationem et captum hominum, fieret, quod fateremur vltro, adde etiam, si lubet, necessitatem; at Deus ipse dignus erat, qui faceret, digna eius infinita bonitas, cui illustrandae res tanta condonaretur. Mittimus alia, quae sunt alio loco latius disputata, nec hic repetere necesse est.

Dicet aliquis, me non tam hoc offendit, quod diuinæ natura cum humana coniuncta est: at illud, quod cum homine infimae conditionis, in quo non modo nihil esset nec ab genere, nec ab honoribus, nec ab copiis, aliisque rebus, quod dignitatem haberet, aptam hospiti tanto, sed etiam aerumnae, contumeliae, mors ignominiosa et cruciatus plenissima: et vos ipsi ea commemoratis in partibus humilitatis vltimae. Haec est illa vetus offensio Iudaici stuporis, omninoque sensuum et vanitatis humanae, non verae sapientiae; quae hic nihil habet, quo offendatur, omnia, quae laudet ac probet, quae sibi met ipsi honesta et apta iudicet.

Nam quid, primum, habet humilitas fortis et conditionis, quod non conueniat dignitati incolentis humilem illum hominem Filii Dei? cum omnis humilitatis humanae nulla sit cum rebus diuinis coniunctio. Humillimi sunt serui: at hominibus humillimi sunt, non Deo: qui illa conditionis humanae discrimina necessitati societatis deuinciendae comparauit, non sibi. Nulla apud Deum ratio fortis humanae ducitur, nec eius diuersitas variat hominum dignitatem. Ergo ab illa humilitate nihil redundare ad diuinam naturam Filii Dei potest, quod ei sit dedecori.

Quid porro dici potest, propter quod opus fuerit Filio Dei, si nasci homo vellet, eiusmodi conditione, quae abundaret omni splendore generis, potestatis et fortunae reliquae? Humana quidem potentia, quam tantopere in Iesu deside-

desiderabant iudaei, et quicumque pari imbecillitate tenentur, dignitatem omnem et splendorem habet a facultate securitatis externae tuendae, et iuuandae felicitatis ciuilis: cui cum non seruit, mortua est, ubi aduersatur, etiam inuisa. Quid ergo, hac tali potentia detracta, amisit, qui non securitatis et felicitatis externae causa natus erat, sed internae, quae nullis potentiae et opum instrumentis neque paratur, neque conseruatur: Agebatur vera et aeterna salus hominum, quae a veritate, benignitate et sapientia diuina venit. Ea est vna et vera et digna Filio Dei potentia, hae dignae opes; quas, in ipsa illa humilitate sortis et tenuitate fortunae, abunde et habuit et demonstrauit. *Io. I, 14.* Ac non dubitamus, visibilem splendorem honorum, potentiae et copiarum fuisse obfuturum maiori maiestati ex internis et inadspectabilibus bonis, hominumque sensus ita excoecaturum, ut cernere non possent lumen maiorum bonorum, quod sola intelligentia percipit.

Profecto, quicumque veram sapientiam intelligunt et amant, agnoscent potius in eo verissimam, et amabilem, et dignam Deo sapientiam, quod Filium suum cum vellet hominem fieri, omni illa humanae vanitatis pompa inanem et liberum esse iussit, nihilque in illius hominis fortuna reliquit pulcrum sensibus, admirandum populo; ut homines ad inadspectabilia et cernenda, et amanda, et admiranda conuerterentur; in quo est vera, etsi parum speciosa vulgo, et difficilis sapientia. Nam splendorem potentiae humanae, magnificentiae, diuitiarum, admirari facile est, tanto cuique facilius, quanto est ipse stultior et vitiis plenior: at bona diuina et animi, quae non subiecta sunt oculis, nulla specie sensibus commendantur, ea vero videre, pro bonis probare, admirari, expetere, contemptis vulgariibus admirationis humanae ludibriis, hoc opus, hic labor est. Sed rectissime ita semper est iudicatum a doctissimis hominibus, tum esse sapientiam maximam et splendidissimam, cum ad hunc gradum peruenisset, cum rerum humanarum splendorem nihili ducere, rerum diuinarum et inuisibi-

inuisibilium solum admirari didicisset. Itaque in hac humilitate hominis Iesu, quam non modo non ut indignam se repudiavit, sed etiam certo iudicio et consilio delegit Filius Dei, existimemus Scholam nobis verae sapientiae patefactam esse, nec minus in cetero toto illo miseriarum externarum, afflictionumque ad mortem usque comitatu. Nam, si seponamus sustinendarum miseriarum, et cruciatuum, mortisque ipsius, ad expianda peccata necessitatem, an vere contumeliosum, ac non potius gloriosum est, si quis veritatis, virtutisque excellentis causa, contemnitur, vexatur, atque interficitur? Si vero etiam pro salute publica, generis humani, ea sustinentur, cum aliter teneri non potest; quis non diuinum hoc et admirandum beneficium putet? et quae sapientia audeat eum contemnere, qui haec sua sponte obierit, victus amore generis humani, aut aliis diuinis humanisque virtutibus incensus? Vera nempe dignitas et gloria non fortunae secundae praemium est, sed sapientiae, sed virtutis, sed magnorum aduersus genus humanum meritorum. Ita iudicat semperque iudicavit vera sapientia. Itaque si memor sui et suorum praeceptorum esse volet, admirabitur ea omnia, et digna Filio Dei, digna homine eo fatebitur, quem sibi Filius Dei propriam et aeternam sedem diuinitatis suae fecisset.

Nos vero, qui Discipuli Iesu Christi esse haberique volumus, bene illam sapientiam in Schola hac, quae ab ipso Filio Dei, adsciscenda humanitate, patefacta est, bene fideliterque discamus, quidque vere magnum, pulcrum, admirabile et studiis nostris expetendum sit, consuescamusque de rebus diuinis et humanis non ex opinionibus vulgaribus, et ad fallacem sensuum corporeorum regulam, sed ad Filii Dei diuinum sensum et facta iudicare. Sit haec, per hos inprimis natalium I. C. celebrandorum dies, in ore omnium cohortatio mutua: *Aude — contemnere opes, et te quoque dignum finge Deo.* Audeamus sapere cum Christo: nihil esto nobis, quicquid magnum est inter homines: summa sint, diuino iudicio probata. Inanis est splendor

Ernesti Opusc. Theol.

A a

dor

dor rerum humanarum: diuina, ut minus splendeant oculis, magis profunt mentibus: Τὸ μωρὸν τῆ Θεᾶς σοφώτερον τῶν ἀνθρώπων ἐστὶ, καὶ τὸ ἀσθενὲς τῆ Θεᾶς ἰσχυρότερον τῶν ἀνθρώπων ἐστὶ. *Diuina, etiam cum stulta videntur, plus habent sapientiae, quam res humanae quamuis speciosae: et cum humilia et imbecilla videntur, maiora et potentiora sunt humanis.* (1 Cor. I, 25.) Sola diuina pulcra sunt et aeterna: humana omnia nugae sunt et caduca. Ita dicamus: ita sentiamus: ita etiam viuamus.

In hac exercitatione sapientiae et pietatis Christianae, omninoque in tota illa, quam tractauimus, causa, quamquam nobis non parum difficultatis erit superandum, quod saepe obloquentur ipsi sensus nostri, opinionesque speciosae, impressae nobis alte a prima infantia: tamen, in ea certe parte, quae ad Christi humilitatem pertinet, facilius videtur superari posse a nobis, quam potuit ab iis, qui illius humilitatis ac tenuitatis Iesu Christi, aerumnarumque omnium, testes fuere, nec temeritate vacare, quamquam pium votum *Augustini*, qui inter tria, quae vidisse vellet, *Filium Dei in carne* primum fecisse traditur. Sed in illo fidei magnitudo votum illud fortasse ab temeritate liberauerit: nos tutius eum e longinquo videmus, et, liberis ab specie humili oculis, illius *σκάνδαλον* facilius tollimus sapientia diuina adiuti. Hoc argumentum, non indignum cogitatione nostra, et plurimum valens ad coercendam cuiusque fiduciam sui, Oratione sibi tractandum sumsit, *M. Io. Henr. Muckius, Vitebergensis*, Vir doctissimus, et ab artibus bene dicendi egregie instructus, quam inter Sacra in Aede Paulina, primo sacrorum Natalitiorum die, hora duodecima, recitabit. Ad haec igitur solemnia sacrorum celebranda cet.

DE
OFFICIO CHRISTI
TRIPLICI

Aa 2

THE UNIVERSITY OF CHICAGO
PRESS

1921

DE
OFFICIO CHRISTI TRIPLICI

Cum primum ac coeleste de Iesu nato praeconium habeat et laetitiae maximae, ad vniuersumque genus humanum pertinentis denunciationem, et causas tantopere laetandi expositionem; facile intelligitur, primum, quomodo affecti esse debeant animis, qui natalem Dominicum rite celebrare velint, deinde quid amplecti mente atque intelligentia, et ponderare cogitatione, ut laetitiam veram, et sanctam, et dignam rei magnitudine capere possint. Nam inanis est laetitia, nisi a causis veris et bonis nata sit: et causae ita sunt vnicuique veriores, ut magis ab eo intellectae sunt. Sed res diuinae et ad religionem pertinentes tum demum vere intelliguntur, cum eas mens ab sensuum corporeorum contagione et a phantasiae ludibriis libera contuetur. Nam et ipse Deus spiritus est, et consilia eius ad salutem humanam pertinentia, quorum scientiam et vsum tradit religio, ad mentem proprie pertinent, suntque tota intelligentiae, ab sensibus et phantasia semotae. Itaque ut primum mala sensuum et phantasiae sedulitas in eam actionem animi se ingerit, facile ei tenebrae offunduntur, et fraus offertur inanes imagines et umbras pro rebus tenenti, et dum illis mouetur, his se pie affici somnianti.

Quid est igitur, quod tantam laetandi causam atque materiam praebiturum generi humano praedicat praeco de coelo missus? Nempe natus *Seruator*. Et ne in ambiguo sit, quem *Seruatorem* oporteat intelligere, eum esse addit *Christum Dominum*, hoc est, Regem, priscis oraculis promissum ad salutem generis humani et digni-

tatem gentis Israëliticae, *Luc. II, 30. f.* Sed eum Regem recens natum iubentur pastores quaerere in stabulo, repositum in loco, vnde pecudes pabulum sumere soleant. In quo credibile est, risuros fuisse, nisi reuerentia, vocis angelicae cohiberentur, si cum popularium grege id verbum humana vanitate aestimarent, et non cum paucis melioribus, qualem Simeonem fuisse videmus, quid sub illius nominis terrena imagine lateret coelestis et inuisibilis veritatis, intelligerent, nec magis hic agnituros Regem Dominum, sibi promissum, quam postea popularium alia multitudo, etiam cum miraculorum spectatrix fuisset.

Alienum foret hoc tempore istum stuporem gentis Iudaicae commemorare: neque enim aduersus Iudaeos disputare attinet; nisi et inter Christianos semper fuissent, qui aliquid Iudaicae, vt leniter dicamus, hebetudinis et caliginis in nomine regio Seruatoris proderent, et dum aliis eandem caliginem offundere cuperent, turbarent Ecclesiam, viris autem eruditioribus, et non in figurarum ac verborum cortice haerentibus, sed rerum interiorem naturam mente perspicientibus, molestias facerent. Sed nos rem ita explicabimus, vt aliquid disputationis, si possimus, admisceamus, quae doctrinae sacrae aemulis prodesse ad accuratius et planius intelligendum et tractandum aliquod caput non paruum disciplinae theologicae possint.

Caput sine dubio totius doctrinae Christianae, in quo vertuntur omnia, est de Iesu, salutis et felicitatis humanae auctore, *1 Cor. III, 11.* Sed id cum ipsum copiosum sit rebus necessariis, tum ingenii humani primum praua subtilitate pariter et hebetudine tot inanibus verborum quaestionumque argutiis et nugis oneratum est; deinde peruersitate, multas partes, easque maximas torquendo, vt eas sibi aptas faceret, tot disputationibus oppletum, vt materia multorum et magnorum voluminum effecta sit, quae etiam acerrimam cogitandi solertiam

tiam et patientiam fatigaret. Ex hac tanta mole verborum et sententiarum materiam deligere bonam, h. e. quae in Scripturis nata sit, eam elaborare ingenio, ut et docti et discipuli apta fiat, denique ordine compingere et struere perite, ut pars quaeque ab altera luculentam firmitatem accipiat, id vero nec parui ingenii est, nec exiguae diligentiae. Enimuero ii, qui praesunt doctrinae publicae, exercentque scholas erudiendae iuventutis, Ecclesiae aliquando praefuturae, hoc primum et maximum munus sustinent, ut notiones rerum diuinarum claras et perspicuas, e Scripturis certa minimeque ambigua ratione per artes interpretandi ductas, tradant, quibus perceptis studiosi disciplinae suae et ipsi res quasque in clara luce positas contueantur, quantum finit humanae mentis natura, easque deinde aliis perspicue et ad cuiusque captum accommodate possint tradere. Nam per eas accipiunt quasi clauem quandam Scripturae, qua referre abdita troporum, figurarum, allegoriarum possint, ad reuelandam sensuum sub iis latentium simplicitatem, omninoque instrumentum ambigua et similia distinguendi, et tum propria, tum impropria ad commune quasi caput reuocandi, ne res eadem inani diuersitatis opinione distrahantur in diuersas. Ea autem qui clauem careant, profecto non possint in populo erudiendo accurate satis atque vtiliter versari. Etenim in ea re ac munere, nihil tam necessarium est, quam omnia verbis, quam maxime propriis in eo, quo utaris, sermone, planis et perspicuis posse exprimere, remotis, quantum potest, troporum et figurarum umbris; in quibus semper populus, non modo, quem vulgo appellamus, sed etiam alius, qui se illo loco censeret non vult, velut in visco quodam, sensibus et phantasia adhaerescit, et pro rebus inaccessibilibus, rerum corporearum et sensibilibus inanes imagines captando, deluditur. In quo si usus et experientia desit, Scripturae ipsae Apostolorum, inprimis Iohannis, exempla multa et luculenta praebeant. Neque enim alia res

Iudaeis caliginem tam saepe obiecit sermones Christi audientibus, quam figuratorum verborum imagines, in quibus eos videmus semper ita adhaesisse, ut ad sensus referrent, quod ad intelligentiam pertineret, sicuti antea in prophetis hoc velamen oculis offecerat, ut verum Dei Christum, et veram salutem Dei, videre non possent, sed aliquem Christum sibi proprium, phantasiae utique ludibrium, fingerent. Enimuero, ubi notiones perspicuas teneas, quas verbis propriis accurate exprimere possis, tum cum ista luce comparandae sunt imagines et figurae, ut error penitus excludatur, veluti si imaginem in tabula pictam cum ipso exemplari, unde imago ducta est, compares, ut, cuius sit ista species, arte simulata, plane perspicias.

Atque hoc ut in multis doctrinae Christianae capitibus, ita maxime in eo, de quo dicere coepimus, quod est de Iesu Servatore, necessarium est. Etenim satis constat eum ante, quam natus esset, populo Israëlítico multis variisque sub nominibus promissum, sub multis rerum humanarum terrenarumque figuris et imaginibus, sub hominum et caeremoniarum typis, adumbratum fuisse; non ut inde primum hauriret cognitionem eius perspicuam; quomodo enim? sed ut veterem eamque simplicem eius notitiam, quae Patriarcharum fuisset, qui nihil nisi salutis spiritualis et coelestis auctorem norant, per earum figurarum admonitionem, assidue instaurandi opportunitatem haberent, aptam ad sustentandam et augendam spem, reuerentiam et aliam pietatem. Ea autem res fecit, ut in illo tum velut transitu e veteris et Mosaicae disciplinae umbris in nouam disciplinae a Christo et Apostolis proponendae lucem, multa fieret earum figurarum mentio, partim ad intelligentiam earum tradendam his, qui antea in iis caligassent, partim ut in fundamentis doctrinae veteris nouae aedificium exstrueretur. Sed in iis tum Christianis, et his, qui Iudaicae originis essent, et qui e Graecis accessissent, nihil amplius obscurum

rum erat, aut esse debebat, cum legerent missas ad se Apostolorum scripturas, quibus earum figurarum nomina subinde essent adpersa; propterea, quod vtrisque ab Apostolis, id quod claris Epistolarum Paullinarum vestigiis tenetur, summa doctrinae Christianae, quae Paullus fundamenta appellat, verbis primum perspicuis, in quibus Graecus homo, expers librorum hebraicorum sermonis, haerere non posset, tradita esset, deinde demum per ea intelligentia figurarum Mosaicarum et propheticarum, pro cuiusque coetus captu, ut in iis nihil aliud esse intelligerent, quam quod ipsis antea simpliciter demonstratum esset; quam rem ad confirmandos Iudaeos maxime comparatam fuisse, Epistola ad Hebraeos docet. Hanc methodum Apostolicam oportebat ergo doctores imitari, qui digni eorum successores dici haberique velent, praesertim hos, qui sua disciplina Timotheos Titosque formare cuperent, quos deinde dimittere ad Ecclesias ordinandas possent. Nec defuere tales Ecclesiae doctores, temporibus praesertim melioribus, sed iis et aduersati sunt saepe multi, quorum mens lucem capere non posset, et quod ab iis bene constitutum erat, saepe destruxit, vel parum bene interpolauit posteriorum prava sedulitas aut inscitia; unde obscuritatis et confusionis plurimum existit. Velut in eo loco doctrinae, qui est de Iesu Seruatore, veterrima simplicitas, seruans perspicuitatem aptam ad docendum et ad intelligendum, id caput ita descriperat, ut, cum personae Iesu natura ex homine vero et Deo vero compolita, eiusque conditio, *status* vocat scholae consuetudo, in quam vel missa esset a Patre Deo, vel ipsa se redegisset, explicata esset ac demonstrata, tum exponeretur de opere salutari, cuius causa essent illa omnia decreta et instituta. Sed huius operis partes Scripturae sacrae faciunt duas, quarum alteram ponunt in ipsa salute et felicitate humana, cum summa Dei dignitate reparanda, alteram in ea hominibus demonstranda, et via patefacienda, quae ad eam deducat. In

parte porro prima, quae est sanctissima omnium, cum tamen locus vel quaereretur ambiguitatis, vel quaeri posse videretur, propter mirificam varietatem et copiam Scripturarum in ea re exprimenda, quaesitum est, quomodo tota illa varietas ad notionis et verbi unitatem revocari posset, in qua perspicuitas esset et proprietas sine omni troporum et figurarum umbris. Nam sub his facile vel inscitia vel interpretandi malignitas latebras reperit; illi bene repertae et constitutae ubi adsuevit animus, fit, ut eam in omni illa varietate solam et totam perspicue videat, nec rei tenebras aut umbras a phantasia offundi sinat, per quas veritatem integram et puram ex oculis amittat. Destinatum ei rei est multa ante secula *satisfaciendi* verbum, delectu rectissimo: quippe id verbum et perspicuitatem habet nullo modo obscurandam et diminuendam, et pariter exprimit tum actionum tum perpeffionum Iesu vim ad vnum illud salutis restituendae opus valentium. Huic ergo adsuefieri oportuit, et quomodo Scripturarum verbis inesset ostendi, ut cum ipsis ubique occurreret Scripturas legentibus. Et satis erat quod hic ageretur, nec opus in hunc locum congerere figuras verborum, ut regni et sacerdotii, et partitiones operis et muneris Christi ex illis, per quas ambages longae et inutiles inducerentur, atque multis quaestionibus, et per eas controuersis aditus daretur; quae si omnino agitandae essent, tractari alio loco debebant, ut in disputationibus exegeticis Scripturarum, aut in interpretatione nominum, quibus Scripturae Seruatorem futurum insignem hominibus fecerant, non in subtili dogmatis illius explicatione.

De regno Christi primum inter nostros in libello dogmatico locorum disseruit *Philippus*; verum non in loco de Iesu, sed in vicinia capitis de resurrectione mortuorum, ad refellenda somnia Iudaizantium, quae tum revocabantur, et regnum visibile Christi in his terris ante reditum ad iudicium generis humani vniuersi constituentium:

tium: aduersus quos praeclare demonstrat, regnum Christi, quod proprie dicatur, a quo Messias, Rex et Christus appelletur, esse totum in mente credentium per Spiritum Sanctum et Euangelium. Paulo post *Strigelius*, ex eius disciplina ortus, idem caput eodemque loco ac modo tractans, addidit ibidem de *Sacerdotio*, vt sententias Scripturae de Sacerdotio Iesu explicaret, de more veterum Sententiariorum. Denique res vtraque translata est in caput de Iesu ad illuminandam, an obscurandam partem, de opere Christi ad salutem generis humani pertinente; addito etiam tertio de *prophético* officio, quod *Strigelius* in sacerdotio intelligebat, eiusque partem faciebat. In quo eum secuti sunt alii, qui vim nominis prophetici, cum Seruatori generis humani in Scripturis tribuitur, non assequebantur, et sacerdotes Iudaicos nostris similes fingendo, docendi munus iis assignabant; quod iis non conuenit, nisi qua legem cerimoniarum, ex qua de peccatis eorumque per sacrificia expiandi modo, omninoque de cultibus Leuiticis, respondebant, iudices magis et consulti legis, quam doctores religionis vniuersae, quales nostros sacerdotes habemus. Sed in illis nominibus vniuersis, per quae munus Seruatoris nostri partiri placuit, vsus loquendi Scripturarum parum vel intellectus vel seruatus est, suntque adeo opinionis arbitrio diuulsa, quae in illis sunt coniunctissima. Id vt intelligatur planius, pauca super illis verbis ita differemus, vt primum de prophetico et regio nomine dicamus, deinde de sacerdotis appellatione differamus.

Iam primum satis constat, cum Seruator hominum *Propheta* dicitur, verbum id non eo modo esse accipiendum, quo id communicatur cum aliis multis, cum omnibus, qui voluntatis diuinæ ad homines interpretandæ causâ missi sunt. Maius aliquid intelligendum est, non tam propter personae supra ceteros omnes excellentiam, sed propter ipsius muneris ac dignitatis eo verbo designatae praestantiam. Primus Moyses in quinti libri duodeuicesimo

cesimo Seruatorem futurum Prophetæ nomine insignem fecit ad muneris naturam intelligendam et magnitudinem. Sed non appellauit Prophetam simpliciter, verum cum adiunctione: ad exemplum suum retulit vtramque: Prophetam eum sibi similem fore dixit. In quo non satis est, vagam magnitudinis ac dignitatis intelligentiam habere: definire oportet vtriusque modum. Qualem ergo Prophetam habuit Moſen populus Iſraëliticus? Nempe, qui diuina vi adiutus populum tantum e vi et potestate tyranni-improbi et potentis, e seruitute et periculo ultimo internecionis exemisset, qui diuinis colloquiis institutus nouam religionis veteris formam (*ἀνανομίαν*) induxisset, populum denique tantum per tot annos in desertis locis aluiſſet, gubernasset, et ad ipsum aditum terræ beatissimæ deduxisset. In his omnibus ergo Moſes similem sibi prophetam intelligi voluit, cuius ipse figuram et imaginem geſſiſſet. Fuit enim profecto in his omnibus Moſes typus Seruatoris, qui eadem omnia fecit, sed alio in genere, hoc est, quod totum ad meliorem hominis partem, melioremque salutem pertineret; quippe ex inuisibilis, sed haud paullo ſæuioris tyranni potestate ac seruitute, e perniciæ animi eaque æterna eripuit, quantum in ipſo fuit, vniuerſos, nouam religionis oeconomiam, e ſinu Patris coeleſtis deportatam, instituit, animos verbo diuino alit et tuetur, denique ad coeleſtis patrimonii hereditatem deducit. Haec ſunt luce clario-
ra. Enimuero, ſi haec ita ſunt; quis non intelligit, in Prophetæ nomine totum opus Seruatoris ineſſe, non tantum docendi prouinciam, quam ei vulgo attribuunt, idque eſſe regio plane par, et nulla re niſi ſono diuerſum? Itaque Moſes a multis appellatus eſt *rex*: auctore ipſo, qui, ſe regis munere functum in populo ſuo, diſcreto dicit *Deut. XXXIII, 5. **) Sed homines adſueti nominis prophete

*) Videant, qui alia exempla deſiderent, *Wilkins* ad Opera *Seldeni* præſationem p. VI et *Venemam* V. C. in *Diſſ. Saceris* p. 46. ed. ſec.

prophetici angustis, cum de ceteris dicitur, in eadem Seruatoris munus propheticum concluderunt, ut id aptum suis rationibus facerent.

Atque ut id nomen rebus tot ac tantis aptum esse intelligatur, nec minus maiestatis ac dignitatis habere nomine regio, usum eius veterrimum in gente Israelitica videamus. Fuit is autem sine dubitatione primum in gubernatoribus ac ducibus gentis a Deo extra ordinem missis, ut interpretibus voluntatis suae, primum in rebus ad fortunas populi pace ac bello pertinentibus, deinde etiam in custodia legum; qualis primus Moyses, post eum Iosua, alii post hunc, ultimus Samuel fuit. Atque erat hoc consilii diuini, ut gens illa semper talibus legatis atque interpretibus regeretur, non regia potestas induceretur. *1 Sam. VIII, 7.* Itaque a Moysi quidem temporibus usque ad institutum regnum, nullum maius nomen prophético fuit: et, si Seruator futurus hominum aliquotum nomine humano, ad dignitatis significationem et commendationem ad populum, appellandus erat, alio maiori appellari non poterat, praesertim apud eos, qui inter homines nihil maius propheta Mose norant aut credebant.

Sed id nomen cessit deinde regio, posteaquam gens Israelitica per reges gubernari coeperat, notum sic illud quidem, ut tolleretur omnino in Seruatore futuro appellando; quod secus esse narrationes Euangelicae declarant; sed ut frequentius esset regium (Messiae): primum, quod nominis regii splendor maior erat apud populum, cum prophetae nomen vetere more non amplius diceretur, essentque prophetae illius temporis homines privati: deinde quia Seruatoris natales genti regiae Dauidis assignauerat Deus, atque etiam per Dauidem ei id nomen diserte tribuerat. Atque id nomen etiam sic vel acceptum esse, vel accipi debuisse, ut nihil aliud in eo intelligeretur, quam in prophético, per Moysen tributo, facile doceri potest.

Primum

[3] Primum enim in Psalmis. vt LXXII aliisque, quibus rex hic regnumque eius describitur, nihil est praeter ea, quae in typo prophetae Moſis inſunt, niſi quod ei populus longe alius ac melior tribuitur, quam Moſes habuerat, ciues omnes fideles, veritatis amantes, iuſti, ſancti, intus puri; pulcri et ornati ſanctitate et iuſtitia. Tum cum regio nomine, ſicut in Deo, permutatur *Paeſtoris* appellatio, quae eſt veterrima Orientis et Graeciae conſuetudo, inſigniter apud *Jeremiam XXII. XXIII. et Ezechielem XXXIV, 24.* vbi ille *paſtor vnicus*, quem promalis paſtoribus, i. e. regibus et principibus tum populi, promittit, *Dauid* appellatur; hoc eſt, Rex e gente Dauidis. At ille *Paſtor Rex* ita et per Dauidem *Pſ. XXIII*, et ab ſemetipſo, *Io. X*, deſcribitur, et ab Apoſtolis, vt *Petro I, 2, 25.* vt omnia eadem reperiantur, quae ſupra in Prophetarum nomine cognouimus. Denique animaduerſione proſecto dignum eſt, quod eſt a *Iohanne* traditum c. *VI.* cum narrat, paſtis a Ieſu tot millibus hominum in deſerto, in manifeſtaque cibi inopia, miraculi inſolentia et nouitate percuſſos agnouiffe in eo Prophetam illum, generi humano promiſſum, per Moſen ſcilicet, et hoc palam praedicaffe: Ieſum autem ſubduxiffe ſe, et in montanam ſolitudinem ſeceſſiſſe, ne a populo rex proclamaretur. Quae proſecto non cohaerent aliter, quam vt intelligamus, ea nomina promiſcuae dici, et eiufdem perſonae ac dignitatis eſſe, nec differre niſi ſono, aut inſcitia interpretantium, ſi qui nomen regium humana potius vanitate et humilitate metirentur, quam diuina veritate et ſublimitate, quae in inuiſibilibus et ſpiritualibus maxime dominatur et intelligitur. Sed maximum illud eſt, et in quo valde videmus homines fanaticos, regnum Chriſti viſibile exſpectantes, torqueri, quod Ieſus ipſe regnum ſuum clare ita deſcribit: nec alium meliorem aut certioſorem quis interpretem deſideret: vt id ad ea, quae in Prophetarum nomine ſunt, referat. Nam Pilato quaerenti, an re vera rex ſit? eſſe ſe proſecto regem, natum in

in regium imperium et in lucem editum, respondit. Sed id interpretatur de veritatis professione, et ciues regni sui agnoscit modo eos, qui sint veritatis amantes; nam eos vocem suam imperantis audire, plane vt illae apud *Ioannem* c. X. oues. Et *veritatis* nomine fatis scimus intelligi Euangelium, hoc est, vniuersam rationem diuinam salutis per filium reparandae, et hominum ad eam per fidem adducendorum, quae Iesum et agendo et docendo auctorem habet, et perfectorem in fidelibus. Atque haec omnia firmantur iis sermonibus Iesu, quibus naturam regni sui per figuras varias describit, in quibus omnia ad Euangelium et veritatem, qualem descripsimus, referuntur.

Atque sic etiam eruditissimum quemque Ecclesiae veteris Doctorum sensisse, vel vnus ille insignis locus docet in *Origenis* egregio de *Oratione* libello, in quo partem Orationis dominicae eam, quae est de Regno Dei, demonstrat, (T. I. Opp. ed. *Ruaei*) p. 238. Nam *regnum Dei* intelligi ait, quod sit in nobis secundum illud Christi *Luc.* XVII, 20. et qui regnum Dei vt ad se veniat, oret, eum precari, de regno Dei in se, quod sit in eo, cum homo verbo Dei credat et legibus diuinis obediat, quod regnum opponi tyrannidi Diaboli cet.

Quae cum ita sint, non profecto conueniebat discernere, quae ita coniuncta sunt, et a scripturarum sermone discedere sine commodo aliquo in discendo, et locum facere inanibus disputationibus super prophetico et regio munere. Nam quod in eodem officio regio etiam regnum potentiae et gloriae commemoratur, id profecto alienum est. Etenim illud est prorsus diuinum, quod Iesus habet per communionem naturae diuinae, in eoque officium cogitare ineptum est. Nec regnum alterum, quod in coelum sublatus capeffuit, cuius nos etiam in coelo consortes futuri sumus 2 *Tim.* II, 12. cet. vllam rationem habet officii, pertinetque ad exaltationem Iesu, quae ei, propter exaltatum in humilitate opus maximum infinita

infinita cum aerumna et molestia contigit. Sed haec per se clara sunt. Atque etiam, quod sacerdotis nomine additur, officium id inesse pariter in regio, vnum illud planum facit, quod Iesus se talem regem et pastorem dicit, qui pro salute ciuium et ouium mortem subeat, *Io. X, 15.* et id veri et boni Regis et Pastoris esse; quod nec potest dubitationem habere. Sed de hoc ad illuminandum de sacerdote Iesu locum posthaec differemus.

Talem igitur Regem, non alium, agnoscere debemus Seruatorem, Messiam Dominum, quo nato gaudere debemus cum vniuerso genere humano, nec illius nominis spiritualem maiestatem vlla parte ac modo vlllo deducere ad humanorum et visibilium regnorum humilitatem. Neque enim satis digne honorare ipsum, aut satis liquido laetari animus pius natalibus ipsius possit, non profecto ita, vt pastores Bethlehemitici, qui primi hunc regem in stabulo adorauere laeti, vt Magi de oriente, qui in illa tenuitate summa cum laetitia et veneratione agnoscunt inuisibile regnum infantis Seruatoris. Sed hoc mali est in hac re, quod rerum sensibilibus vano splendore ita excaecati sunt homines, vt inuisibilem veram maiestatem et excellentiam dispicere et capere animis non possint, sed pro nihilo ducant. Itaque semper ingenium humanum procliuè fuit ad expectandum Regem aut regnum istius Regis, quod et in sensus externos incurreret, eoque traherent verba Scripturarum, a rebus sensibilibus ducta ad adumbrandam hominibus rerum inuisibilem praestantiam. Sed ad *Sacerdotis* nomen veniamus.

Iam primum nomen hoc et verbum Sacerdotis hebraica consuetudine loquendi metiendum esse, in promptu est. Nec minus dubio caret, in hebraico sacerdotii verbo primam et propriam significationem esse *ministerium*, vnde et in libris Apostolorum per *λειτουργίαν* exprimitur, sicut et ipse Christus, sacerdotii causa, *λειτουργός*, *minister* appellatur, *Hebr. VIII, 2. 6.* Nam, quod primam
et

et propriam significationem *Coccæus* mauult esse appropinquandi et accedendi, valde probante *Schultensio*, (in *Origg. Hebr. pag. 228.*) Arabismum secuto, vnde secunda et tropica significatio ducta sit amici regii et sacerdotis: id vt incertis coniecturis nititur, ita analogia linguarum refellitur tum hebraicae, tum aliarum, graecae et latinae, in quibus ministerium, quod alicui debetur ac praestatur, tropice per formulas accedendi ad aliquem, adstandi alicui, aut coram quo; in latina per verbum *apparendi alicui*, *apparitionem*, exprimi solet, velut honestandi ministerii causa aut emolliendi; faciliusque appropinquandi significatio a ministerio ducatur, quam contra. Vtunque sit, ministri quidem significationem in verbo hebraico sacerdotis dominari, et pro propria valere, certum est. Nec id ad humilitatem significationis, aut ad minuendam dignitatem personae, nomen hoc gerentis, valet; quod videntur timuisse viri boni quidam, in disputatione aduersus Iudaeos quosdam, verbum id in *Ps. CX, 4.* interpretantes *ministerium*. Nam et reges ministri Dei, *διακονοι τῷ Θεῷ*, et λειτουργοι dicuntur, *Rom. XIII, 4. 6.* et Angeli ipsi, *Hebr. I, ult.* quorum ministerium et ipsum humano more et figurate describitur per apparitionem stantium apud thronum diuinum. Omnino nihil, vera aestimatione, humile ac tenue est, cum ad honorem et voluntatem Dei pertinet. Sed cum id verbum ad eos transfertur, quos sacerdotes proprie appellat latinitas, Graeci *ιερεῖς*, accipit significationem ministerii, quod Deo praestetur in causa religionis ad salutem populi, in quo quis sacerdotis nomen ac locum obtinet; vt ministerium alterum, quod ad civilem rationem pertinet, regni vel principatus nomine appellatur; vnde verbum etiam ad fideles omnes ac pios traducitur cum magna dignitate, tum in vetere *Exod. XIX, 6.* tum in N. Testamento

Ernesti Opusc. Theol. B b *1 Pet.*

1 *Pet. II, 5. Apoc. I, 6.* quod ministeria Deo faciunt grata per fidem, pietatem et obedientiam vniuersam, quam omnem referre ad ipsius gratiam didicerunt: eorumque hoc *ministerium* etiam, propter excellentem pulcritudinem, *regium* appellatur.

Nec vero negligendum hoc videtur, in cognoscendo huius verbi vsu, praesertim figurato, quod, etsi interdum vniuersam ministerii sacerdotalis summam spectat, tamen interdum modo ad partem aliquam muneris refertur. Itaque non, vt sacerdotis vel sacerdotii nomen in aliqua re aut persona vsurpatur, sic statim similitudo vniuersa cogitanda est; sed, quomodo et quatenus figura ab sacerdotio petatur, indagandum videtur, ne, latius et vltra terminos. extensa similitudine, ingenii humani inventa traditis diuinitus permisceantur: quo nimis semper in figuris hebraicis inclinauere viri optimi, sed consilii melioris, quam ingenii et iudicii. Secundum haec de nomine sacerdotali, quam vim et vsu habeat in Christo, videamus.

In quo primum omnium animaduertenda videtur varietas eius vsurpandi, cum huius varietatis discriminibus. Tribuitur autem Messiae nomen sacerdotis in V. T. quidem duobus omnino locis, vno in Psalmo CX, 4. altero in Zachariano oraculo VI, 13: at in N. T. libris, neque sermones Iesu Christi in Euangeliiis aut Apostolorum in Actis, neque epistolae Apostolicae, Sacerdotii I. C. mentionem faciunt, praeter vnam ad Hebraeos epistolam Pauli, quae et Psalmi verba commemorat ad Iesumque refert, et Sacerdotis summi nomen eidem tribuit, et ad eius actiones pro salute hominum applicat. Itaque nomen hoc a duplici figura Christi in V. T. ducitur, Melchisedeco et Aarone.

Sed

Sed his duobus non alienum sit addere Moſen, cui libri ſacri, non illi quidem nomen ſacerdotis diſerte tribuunt, quod id proprium factum erat operam nauantibus Deo ac populo in ſtatis et legitimis ſacris, ſed rem ipſam adſerunt, agnoſcentibus etiam Iudaeorum doctores eruditiffimis. Nam fuit *μοſίτης τῆς διαθήκης*, interpres et confector foederis diuini cum gente Iſraëlitica; in quo ſine dubio figuram Chriſti ſuſtinuit, ſanguine ſuo ſancientis foedus nouum ac melius, idque haud paullo plus et clarius, quam Aaron ipſe in victimis expiatoriis. Ieſus Chriſtus quidem ipſe velut digito hanc figuram ſui demonſtrauit, in Sacramento corporis et ſanguinis ſui inſtituendo, iisdem totidemque verbis uſus, quae Moſes in vetere ſanciendo pronunciarat. Atque, vt opinamur, etiam hanc ob cauſſam *Philo* Moſen appellat *ſacerdotem* locis aliquot libri II et III *de vita Moſis*: quamquam et conſtituta ab ipſo et ordinata ſacra, quae per Sacerdotes et Leuitas curarentur, in appellatione hac ſpectari, non ignoro. Et ille omnino functus eſt ſacerdotio ante, quam fratri eam partem miniſterii ſui detuliſſet. Sed, quia ſacrae literae id nomen in Moſe non diſerte uſurpant, hoc quidem in loco rationem eius nullam habebimus.

Illud autem intelligendum eſt, quod fere in diſputatione de ſacerdotio I. C. praetermittitur, cum ad dogmaticam rationem inſtituitur, non eodem modo ſacerdotem eſſe, cum Melchizedeco comparatur, et cum Aaroniticis Pontificibus aſſimulatur; cum ſacerdos aeternus conſeſſiſſe in coelis in throno Dei dicitur, et cum ſacrificariſſe ſe, ad expianda generis humani peccata, in terris traditur. Nam in ſacerdotio Melchizedeciano nihil intelligi poteſt ac debet, quam, primum miniſterium vniuerſum Ieſu Chriſti, quod in religione ordinanda et conſtituenda Deo hominibusque praefſtitit, neque vllius alius rei intel-

B b 2

ligen-

ligendae vestigia in illo loco impressa sunt, quae a nobis notari possent, aut interpretatione Paullina demonstrata: deinde illius sacerdotii praestantia, tum e coniunctione cum potestate regia, tum ex duratione, quae finem habitura non sit. Et clarum est, Paullum eo in loco non tam primum illud, quam posterius intelligi velle. Nec aliud est in loco Zachariae Prophetæ. At cum Pontifex summus appellatur, comparatus cum Aarone, sola sacrificia expiatoria, inprimisque anniuersarium illud, spectantur, in quibus insignem figuram mortis Christi et redemptionis per mortem fuisse, in promptu est. Neque enim plus est in tota illa de sacerdote Iesu disputatione Paullina ad Christianos ex Hebraeis. His ita constitutis, deinceps, uti propositum est, an et quomodo haec in doctrinae Christianae institutione tradi et explicari conueniat, ad officium Christi intelligendum, videamus.

Primum ergo clarum esse arbitramur, Sacerdotis verbum non magis proprie dici de Iesu, quam regium; sed esse nomen figuratum seu typicum; quod Iudaeos maxime, qui Christianam religionem sequerentur, et vero etiam ceteros, ad intelligendam veritatem deduceret, quae sub figuris V. T. latuisset. Sed est haec perpetua consuetudo Apostolica, maxime Iudaeis comparata, ut typorum et figurarum nomina communicent cum rebus, per illas designatis; non quo propria sint earum rerum nomina, et sic usurpari debeant, sed ut intelligentiam typorum et vaticiniorum adiuent, doceantque, quid per eos designatum esset. Veluti Iesum Ioannes *agnus Dei* vocat *Io. I, 36.* non quo ipse agnus sit, sed ut intelligatur, Iesum esse eum, cuius patientia in cruciatibus et morte pro salute hominum obeundis, sub agni imagine, ab Iesaja Propheta fuerit adumbrata: eodemque modo *victimam* dicitur esse Christus pro peccatis, non quo ipse proprie *victimam* sit, sed quod satisfactio eius pro peccatis, quae poenis nostris

nostris perferendis peracta sit, per victimas adumbrata fuerit. Et sunt eius generis multa. Vnde fit, vt illa verba non pro dogmaticarum notionum vocabulis vsurpari in doctrinae institutione debeant, sed potius, vbi necesse sit, ea, quae propriis verbis proposita sint, et figuris istis consentire, et sub earum inuolucris latuisse; vt ad intelligentiam veteris Testamenti aditus detur et velamen Mosi detrahatur. Quae esse consentanea verae et legitimae methodo doctrinae, nemo, nisi valde rudis artium docendi, negare sustineat.

Atque id plane confirmat consuetudo Domini nostri Iesu Christi et Apostolorum. Etenim, vt obiter supra admonui, ille nuspiam se in sermonibus, qui quidem nobis proditi sunt; sunt autem sine dubitatione proditi ii, qui maxime ad cognoscendam veram Euangelii summam necessarii essent vtilesque: in iis igitur nuspiam se sacerdotem appellat, aut sacerdotium sibi attribuit; non profecto id nomen taciturus, si esset proprie de se dictum, et ad bene cognoscendum se, et consilium diuinum per se consummandum, necessarium: immo verbis planis et propriis omnia vbique exsequitur, quoties docendi causa loquitur; filium Dei se esse docet proprie, missum de coelo, et factum filium hominis, vt seruaret et liberaret homines a peccatorum poenis et peccatis ipsis, aeternae felicitatis participes redderet per fidem in se: hoc esse opus munusque suum de voluntate patris coelestis; idque se perfecturum patiendo ac moriendo secundum praedictiones Prophetarum. Non hoc nos imitari oportet, qui disciplinam eius per manus Apostolorum nobis traditam tenemus? Nam profecto meliorem magistrum docendi non expectabimus, aut quaerere debemus: praesertim cum Apostolos hanc eius rationem imitatos esse videamus in docendo, etiam cum scriberent ad eos, quibus summa doctrinae iam tradita esset, et cum in iis Ecclesiis, ad

B b 3

quas

quas scriberent, etiam Iudaicae originis Christiani reperirentur.

At Paullus in Epistola ad Hebraeos late de sacerdotio Christi differit. Recte. Sed primum, qui sunt isti Hebraei? Nempe, ut indicat res ipsa, et demonstratum est egregie ab viris eruditissimis, Christiani gentis Iudaicae, non extra Palaestinam agentes et immisti Graecis, sed qui in Palaestina vicinisque regionibus viuerent, essentque magis tenaces patrii moris. His porro quare ita scribat, ut Sacerdotem Christum faciat Aarone longe maiorem, neminem Interpretum vidi quaerere, praeter *Ioannem d'Outrein* in Commentario ad hanc epistolam. Is autem putat esse hanc causam, quod ad Christianos e gentibus ceteris scribere tale quid non potuisset commode, cum ii essent adfueti sacerdotibus Deastrorum, quibus Christus sacerdos similis non fuisset. Quo nihil frigidius dici poterat. Comparare Christum cum istis sacerdotibus non poterat; at sacerdotem Christum veri Dei fuisse, et eum longe maiorem Aaroniticis, nihil impendebat dicere. Enimvero istis Christianis e Iudaismo ortis ista scribit, necessitate permagna et graui eorum periculo motus, quod multi ex eo genere Christiani, relicto Euangelio, ad Iudaismum reuertissent, alii labarent. Inconstantiae autem et periculi causa non tam erat in afflictionibus, quae propter Euangelium essent perferendae, quamquam in his quoque, quam in vetere adfuesactione animorum ad Moysis admirationem, oculorum autem ad pompam sacrificiorum atque Pontificis summi totiusque sacerdotii, cui nihil simile aut par, neque in Christo ipso, neque inter Christianos vspiam reperiabant, non in doctoribus, non in toto cultu religioso; sed omnia tenuia, humilia, simplicia, omni specie incurrente in oculos, omnique pompa detracta. Huius igitur periculi depellendi, animorumque corroborandorum causa, totam illam disputationem suscepit, ostendit.

ostenditque, primum Iesum longe maiorem esse Mose, cuius tanta admiratione tenerentur; tum, si tamen Pontificis verbo et dignitate mouerentur, Iesum esse eum, et fecisse ea, propter quae longe maior illo Pontifice Hierosolymitano esset, in quo tantum umbra eius, vel operis ab eo peracti ad salutem hominum fuisset, quae, cum iam veritas adesset, non amplius opus esse. Ex quibus intelligitur, ista non ad omnes Christianos, ut necessariam partem doctrinae, pertinere, sed ad robustiores, vel doctores, qui uti iis ad redarguendos aut convertendos Iudaeos velint, vel coniunctionem disciplinae Christianae cum vetere Mosaica intelligere cupiant: quo tota interpretatio typorum Veteris Testamenti pertinet.

Nam quid utilitatis habere potest ad accurate intelligendum munus a Christo susceptum, si doctrinae in scholis et ecclesia explicandae inferatur, praesertim coniuncte cum prophetae et regis munere, cum nihil in sacerdotio Christi sit, quod non suo modo insit in Regis et Prophetae nominibus, in quibus, ante docuimus, inesse easdem, non diuersas muneris Christi partes. Quid esse ergo in sacerdotio Christi dicimus? nempe satisfactionem pro peccatis ad restituendam salutem et felicitatem, a bonitate diuina destinatam generi humano, et perpetuam pro hominibus, inprimis fidelibus, deprecationem, ut illius satisfactionis et redemptionis per mortem eius participes fiant. Enimuero in nomine prophetae haec intelligi posse ac debere, si recte capiatur, nempe ad exemplum et figuram Moysis, in quo fuit Christi typus et figura, id facile est ad demonstrandum. Fuit enim et Moses *μεσίτης*, mediator Dei atque populi Iudaici, siue foederis a Deo cum populo sanciti, quo nomine totum officium ac munus Christi exprimi certum est: neque enim accurate faciunt, qui id nomen angustius capiunt. Huius

autem muneris partes Moses Propheta fidelissime peregit, legem seu foederis formulam a Deo accipiendo, et genti Israëliticae tradendo, *Gal. III, 1.* explicando, inculcando, victimarum denique sanguine sanciendo, iisdem etiam verbis, quibus Christus usus est, ut supra diximus, (*Matth. XXVI, 25. Ebr. IX, 20.*) tum pro populo assidue Deum deprecando, et se pro ipsorum culpa et poena deuouendo. *Exod. XXXII, 11. f. 32. Num. XIV, 13 f.* Nec minus ista perspiciuntur in nomine ac munere *regis*; praesertim, si id exemplo Dauidis aestimemus, in quo, ut rege, Christi figuram fuisse, clarum fecimus superiori disputatiunculae parte, aut Salomonis, similiumque, iudicio diuino probatorum. Nam rex bonus non modo potestate censetur, sed etiam officio, cum salutem populi cura amplectitur, legibus, institutis, deprecationibus apud Deum, omni ratione munit, adiuuat, et pro populo vitam profundere non dubitat: vnde *pastoris boni* nomine a Prophetis appellatur, cuius nominis figura Iesus totum munus suum expressit ipse, etiam eam partem, in qua Sacerdotium eius maxime ponitur, *Io. X, 12.* Ex quibus apparet, in varietate hac verborum non esse diuersorum officiorum distinctionem, sed vnius eiusdemque per imagines humanas adumbrandi varietatem, nec iniucundam audientibus, nec inutilem; quippe et altera illuminat alteram propria quadam virtute sua, h. e. aliqua parte veritatis clarius et expressius proponenda.

Ex his putamus satis intelligi, in hac ratione explicandi operis ac muneris Christi, praeterquam, quod apud nos nullam perspicuam utilitatem habet, non esse eam ἀρεσκίαν aut perspicuitatem, quae requiritur in disciplina, repudiante troporum et figurarum umbras. Nam doctrina illa accurata et institutio lucem figuris et adumbratis simulacris dare, subtiliter explicandis rerum notionibus, non ab ipsis repetere debet: estque hoc in
prae-

praecipuis Christianorum bonis, quod velamine figurarum Veteris Testamenti per Spiritum Sanctum sublato, ipsum Dominum Iesum Christum spectare possunt, rerum ipsarum veritatem, 2 *Corinth. III, 18.* vt est iis a Iesu Christo et Apostolis tradita. Sed esset id incommodum fortasse ferendum, si non accederent alia maiora.

Etenim, si opus illud longe maximum et supra omnia alia admirandum Iesu Christi, quod peccatorum humanorum poenis luendis ad salutem nostram pergit, figurato illi sacerdotis nomini annectitur, quam facile fit, vt illo ipso nomine apud populum, haerentem in verborum cortice, obscuratur aut minuatur, ab oecurrente iis tenuitate eorum, in quibus nos sacerdotis nomen vsurpamus; quod secus fuit apud Iudaeos, apud quos proxima a regibus veneratio et dignitas Pontificum fuit: secus fortasse etiam sit apud hominem Romanae Ecclesiae sacris adfuetum, cuius animo obuersari illa Pontificum suorum pompa in Misae scena possit. Sed nec hic, ab tali adsuefactione sensuum ortus animi admirantis motus, gratus ac probatus Christo sit, nec vlllo modo verae venerationis, a vera magnitudine operis Christi cognita ortae, vim ac nomen habere possit.

Quam facile porro in tanta libidine ingeniorum, non bene subactorum disciplinis literarum, quae sunt bene multa, per *κακοζήλιαν* quandam, etiam cum specie religionis, trahuntur figurae tales vltra terminos, quos mens diuina fixit ac demonstraui, vt fit persaepe in omni typica ac parabolica ratione: vnde nascuntur argutiae inanes, non modo nihil ad *οικονομίαν* profuturæ, sed ei etiam obfuturæ apud multos, vel deceptos ab illis et illusos, vel offensos, et eam

offensionem imputantes rebus innoxiiis et sanctis. Saepe etiam in iis figuris latebras quaerit, interdum etiam inuenit prauitas opinionum: neque enim quicquam iis est, vt inimicius proprietate verborum, sic amicius et accommodatius figuris. Quae enim alia inuolucra prauitati opinionum suarum circumdat Mysticorum et Fanaticorum natio, et quibus aliis illecebris magis capit animos simplices, et quid intelligant nec ne, nec discernentes, nec ad discernendum acutos? Quid quod etiam facilius et torquentur ad defensionem errorum, et decipiunt non bene cautos specie quadam, quae facile oritur ab earum naturali ambiguitate. Denique, quam facile et saepe immiscet se phantasia male sedula, et lusibus suis, plerumque humilibus et indignis rerum sublimitate inuisibili, deformat res sanctissimas? Quae mala omnia eruperunt in hanc sacerdotii figuram ad nostram vsque aetatem ea multitudine, vt in iis enarrandis et refellendis iusti voluminis materia sit.

Quanto ergo melius et salubrius et tutius est, in re tanta explicanda tenere simplicitatem Euangelicam, quae nullis argutiis, calumniis et deprauationibus obnoxia sit, sed mentibus veritatem ipsam ad recte intelligendum perspicue, et ad animos admiratione, pietate, et solatio imbuendos efficaciter proponat. Habemus Seruatorem magnum, destinatum nobis aeterno sapientiae diuinae consilio, filium Dei ipsum, qui factus homo, vt posset humana opera facere, et humanos dolores humanasque poenas suscipere, necessitatem puniendorum a Deo peccatorum nostrorum sustulit, legi diuinae suum ius, suam auctoritatem reddendo perfecta sanctitate et obedientia sua, poenas autem peccatorum humanorum iustitiae diuinae persoluendo, vt benignitas Patris, saluo iam iustitiae iure, salua sapientiae dignitate,

tate, condonare hominibus poenas peccatorum, et felicitatem, iis destinatam in ipso creandi consilio, volentibus et accipientibus per fidem, impertire posset. Post hoc tantum opus, tam salutare hominibus, tam gratum bonitati immensae Patris, tam illustre ad iustitiam et sapientiam et vniuersam maiestatem diuinam intelligendam, a morte, in qua perfectio et finis operis illius fuit, reuocatus in vitam, sublatusque in coelos, totus venit in consortium maiestatis diuinæ fruendae et vsurpandae, Dominus factus omnium, et conseruanda benignissima sua et efficacissima erga nos omnes, inprimisque fideles, erga peculium suum, voluntate, quae deprecationis instar est apud Patrem, adiuvat nos, tuetur, defendit, vt salutem ab se partam tenere possimus.

Huius tanti operis puram et assiduam cogitationem cum omni tempore exercere debeamus, vt per eam explicare vim suam Spiritus Sanctus possit in animis nostris ad fidem vel ingenerandam vel corroborandam, sentiamusque toto animo immensam diuinæ benignitatis, iustitiae et sapientiae magnitudinem, et amorem summum erga nos Iesu Christi Seruatoris nostri; tum maxime his diebus, qui proprie eius rei memoriae vsurpandae et exercendae destinati sunt, vt incendatur alaturque amor noster erga Deum Patrem et filium eius Iesum Christum, amorisque huius incitamentis efficaciter moti, toto animo studeamus in Deum, tanti boni auctorem, grati esse, et filio eius, Seruatori nostro, similes fieri amore Patris, sanctitate vniuersa, obedientia, et patientia in rebus aduersis. Cogitemus, quid Deus pater promiserit filio, Domino nostro ac Seruatori, post exantlatos pro nobis labores in vitam reuocato: *In die maiestatis tuae populum tuum habebis promptissimum et sanctitate ornatissimum. Ps. CX, 3.*
Ecce,

Ecce, haec est dies maiestatis Christi; nos sumus populus eius, λαὸς περιέσιος. Perfoluamus igitur hac die Domino, quae ei, de promisso, et vero etiam, quod ad nos quidem attinet, praecepto Dei Patris debentur, praebeamusque nos ei paratos ad omne obsequium per fidem in ipsum, et gratias laudesque perfoluamus animo sancto et religioso cet.



DE
CONIVNCTIONE
RERVVM COELESTIVM
ET
TERRESTRIVM
EPH. I. ET COLOSS. I.

DE
CONIVNCTIONE RERV
COELESTIVM ET TERRESTRIVM

EPH. I. ET COLOSS. I.

Cum vniuerso generi humano communis sit, vt salutis restitutio, per mortem I. C. parta et per reditum eius in vitam obsignata, ita laetitia ex tanto, tam necessario nobis et optabili bono; tum vero ea tam iusta laetitia quandam, nec illam parvam, accessionem habet in nobis, qui non de genere Abrahami nati, illius salutis legitimi heredes sumus, sed e gentium impiarum colluvie ad tanti boni communionem vocati, veluti heredes secundi accessimus. Etenim hunc aditum ad eam societatem nobis proprie patefactum esse per mortem Christi et reditum eius in vitam, clare docent tum alia, tum praeceptum Christi viuificati, de salute sua gentibus omnibus promiscue deferenda, et diserta Paulli Apostoli demonstratio.

Ipsam quidem Christum, quoad docendi munere in his terris fungeretur, et verbis et factis se Israëuitarum modo doctorem tulisse, iis solis salutem suam, vt quibus solis diserte per prophetas promissa esset, obtulisse (*Matth. XV, 24.*) atque his finibus etiam discipulorum in docendo ministerium circumscripsisse, (*Matth. X, 5. 6.*) satis constat. Nam etiamsi interdum quasdam significationes dederat eiusdem salutis post haec cum aliis gentibus communicandae, quales etiam per prophetas editas constabat inter ipsos Iudaeorum doctores: rem tamen ipsam

ipsam distulerat, nec eius initia iusta modumque definierat, aut de ea mandata discipulis dederat, ne in illis vltimis quidem sermonibus, quibus, morti proximus, dederat de aliis multis. In quo ipso fecerat, vt in omnibus aliis, sanctissimus Seruator, et totus ad voluntatem Patris compositus, quod promissis consentiret ipsi Prophetarum ore factis, *Ef.* LIII, 10 sqq. *Pf.* XXII, 28 sqq. vt in gentium fide esset praemium susceptae pro generis humani salute mortis acerbissimae, et pars illustris regni noui, cuius initium proprie ab reditu in vitam ducetur, solennis autem inauguratio in sacro quinquagesimae per effusionem Spiritus et signum linguarum nouarum. Itaque tum demum rem aperuit discipulis, cum instaret illa solennis regni sui inauguratio, etiam tum nondum fatis percipientibus, quae diceret, donec multis alijs significationibus diuinis et rebus ipsis erudirentur.

Sed nihil clarius est testimoniis Pauli Apostoli, in ea re inprimis docti, vt cuius ministerium maxime inter Gentes exercebatur. Nam *Eph.* II, 15, scribens ad Christianos inprimis eos, qui e Gentibus essent, per mortem Christi esse sublatam, ait, obstructionem, quae Iudaeos ab ipsis discreuisset, et extinctam inimicitiam ab lege ceremoniali, τῷ νόμῳ τῶν ἐντολῶν ἐν δόγμασι, ipsa lege illa abolenda: in epistola autem ad *Colossenses* II, 14, in cruce deletam esse legem ritalem, et velut fixam clauis et discissam, quae discidium illud inter Iudaeos et Gentes ceteras attulisset, nec fuisset coire pacem et societatem vtriusque generis. Nam χειρόγραφον τοῖς δόγμασι, scriptura ritualis, vel de ritibus, nihil aliud est, quam νόμος ἐντολῶν ἐν δόγμασι, lex, habens praecepta ritualia; quam eleganter *chirographum*, obstans Gentibus, appellat, non modo ad vsum verbi in re pecuniaria alludens, sed etiam ad legis ab Euangelio discrimen, propter quod lex, quia primum per scripturam promulgata est, *chirographum*,
vt

vt 2 Cor. III, 6. *γράμμα*, *scriptura*, appellatur, cum Euangelium dicatur *spiritus*, *πνεῦμα*, quia eius prima promulgatio sine litteris et scriptura, per Spiritum Sanctum, in Christo et per Apostolos loquentem, facta est. Ea autem discidii causa sublata, per vitam Christi nouam, Gentibus, ait, esse datam vitam nouam, v. 13. (*συνηχοποίησεν*, ait, *ὑμᾶς σὺν αὐτῷ*) primum condonatione peccatorum paranda, deinde lege rituali, et, cum hac, circumcisione tollenda, quae mortis instar fuisse, ante dixerat: *νεκρὸς ὄντας ἐν τοῖς παραπτώμασι καὶ τῇ ἀκροβυσσίᾳ τῆς σαρκὸς ὑμῶν*.

Omnino totus ille locus de consociatione vtriusque partis, eiusque causis et consequentibus, nusquam luculentius est explicatus in libris Apostolicis, quam in his duabus ad Christianos Ephesinos et Colossenses, quorum maxima pars e Gentibus erat, epistolis, argumento, ratiocinationis ac disputationis serie, etiam genere verborum simillimis, et difficultate intelligendi singula, si non populari librorum elementarium trutina ponderare, sed ad subtilis iudicii normam exigere coneris. Hic profecto sunt non pauca ex illis *tenebrosis Paulli*, quae negligi ab Observationum sacrarum scriptoribus dolebat *Valkenarius*. V. Cel. (ad *Euripid. Phoeniss.* p. 453.) dum in perspicuis illustrandis obscuram diligentiam consumerent. Quo minus alienum erit et ab studiis nostris et ab hoc tempore, aliquid studii ponere in locis quibusdam non modo earum epistolarum, sed etiam proprie pertinentibus ad eam, de qua diximus, causam, quae hoc tempore proprium nobis laetandi argumentum praebet.

Etenim quibus locis de ea coniunctione Israelitarum et Gentium ceterarum loquitur Paulus, per mortem Christi conflata, in vtraque epistola, commemorat etiam eorum, quae in coelis et quae in terra sunt, pacificationem, *Eph. I, 10. Col. I, 20*. In quo interpretando omni tempore vel fluctuati sunt, vel torserunt se doctores. Nam quae in coelis sunt, alii de Deo patre acceperunt, quem terris esse per Christi mortem reconciliatum, vt *Cyrillus Hierosol. Catech. XIII.* alii de angelis, vt *Chrysostomus*. et quicumque ex eius

Ernesti Opusc. Theol. Cc com-

commentariis profecere, hoc est, Graeci interpretes post eum omnes; quae et inter Latinos sententia tenuit et inter nostros. In quo tamen et ipso varie senserunt, cum explicandum esset dissidium, quod angelos hominesque intercessisset; aliis ad odium angelorum aduersus homines improbos, aliis, vt *Damasceno*, ad luctum modo ex viitiis et miseriis humanis trahentibus.

Enimuero sicut priorem illam interpretationem ipsa forma verborum repudiat, multitudinem intelligi iubens; sic vtrique res videtur repugnare. Nam ii, quos inter facta est reconciliatio, per eam coniuncti sunt sub capite communi Christo, *Eph. I, 10.* quod *Col. I, 20.* est, *reconciliari ad ipsum (eis αὐτόν)*, vt ad ipsum communiter tendant, ei se pariter adiungant sensu, cultu, spe cet. Id, vt est in promptu, nullo modo in Deum Patrem cadere, sic nec angelis aptum est, qui etsi Christum, vt Creatorem, et Dominum suum, pariter adorant, *Ebr. I, 6.* et opus ab ipso peractum laude et admiratione prosequuntur; tamen in membris corporis, vt capitis communis, non numerantur, nec ad ipsos vlla ex parte pertinuit redemptionis opus eiusque fructus, (*Ebr. II, 16.*) sed ad solos homines, quod iam intellexit *Beza*, cum Deo per ipsum, et cum ipso per fidei vnitatem, inter se denique per amoris ab illo orti vinculum copulandos.

Ac bene est, quod praeclari, etiam de nostris, viri, e are perspecta, coepere discessionem facere ab illa prisca interpretatione, quae se facile obtulerat, a primo adspectu verborum occurrente angelorum cogitatione. Sed nescimus, an multo melius, ac non etiam contortius sit, quod est ei ab horum ingenio substitutum. Volunt enim partem eam, quae in coelis est, intelligi de coetu animarum beatarum, quam Ecclesiam triumphantem consuetudo nostra ex *Ebr. XII, 23.* appellat. Nam quod *Beza*, primus, quod sciamus, a prisca interpretatione discedere ausus, fideles Veteris Testamenti, qui tum in coelis essent, intelligi voluit, id reddit eodem. Quod si sola illa verba in epistola ad Ephesios spectarentur, et ea, quae ibi memoratur, *ἀνακαταστά-*

σις in Christo, esset fortasse, ut ea ratio probaretur. At reclamant, ut opinamur, cetera omnia.

Primum, in illo ipso versiculo, ea coniunctio facta dicitur *εις οικονομίαν τοῦ πληρώματος τῶν καιρῶν*, *tempore, quod esset destinatum consilio diuino.* At Ecclesiae triumphantis et militantis consociatio, etsi nititur Christi morte, tamen non illo demum tempore, quo mortuus est, initium habuit, sed fuit semper, et per omnem testamenti veteris tractum. Deinde non oportet illa sola verba spectare, sed quae de ea re et C. II, 14-18, et in primis Col. I, 20 dicuntur, ubi eandem rem aliis verbis exprimi clarum est. At in posteriori loco, *ea, quae in coelis et in terris sunt, reconciliata dicuntur ad unitatem in ipso*: nec ea est reconciliatio cum Deo Patre, quae separatim per parenthesin commemoratur *pater facta per mortem*: in altero, *οἱ δύο, οἱ μακράν καὶ οἱ ἕγγυς*, et per illam reconciliationem utrique in Christo vno Spiritu accessum habere ad Deum Patrem. Quam autem reconciliationem *κατὰ πλήρωμα τῶν καιρῶν*, *à certo tempore*, et concordiam morte Christi constitutam esse dicemus utriusque Ecclesiae, quae semper est et fuit concors, et omnem cogitationem dissidii ac discidii respuit, cum militantis et triumphantis Ecclesiae non sit generis in diversas formas, aut totius in partes diuisio, sed eiusdem numero Ecclesiae duplex modo status et conditio, in quarum altera sit spes, in altera res et possessio. Denique, quomodo Paullus hanc beatorum in coelis et fidelium in terris coniunctionem in Christo, vocet *mysterium, arcantum Dei consilium Eph. 1, 9.* cet. sub tempore reuelandum, sibi que in primis, et per se alijs patefactum? cum illa coniunctio fidelium omnium nunquam non perspecta fuerit fidelibus, inde ab origine religionis, quae salutem per Messiam sperandam et petendam proponeret, intelligaturque per se, sicut omnes, quae usquam sunt, naturae intelligentes, vnam, velut vnius domus et parentis Dei, familiam conficere, communis creatio indicat.

Itaque in promptu est, aliam esse interpretationem quaerendam, quae cum consilio Paulli, et tota vtriusque epistolae serie, dictisque omnibus, magis consentiat, nec tamen pugnet cum usu loquendi Scripturarum sacrarum. Quam olim nos quaerentes, cum Scripturas coepissemus tractare studio nostro, hoc est, assidua et crebra lectione, et obseruandis comparandisque locis similibus, in quo clauem esse Scripturarum, ut est, ita traditum nobis tenebamus, suspicati sumus fore talem, si ea, quae in coelis essent, intelligeremus Israëlitas, quae in terris, Gentes. Sed in ea suspicione ab rebus ducta, aduersari videbantur verba, quae vel sic dicta esse, vel in tali genere orationis sic dici posse, non vel audieramus vel repereramus. Post idem dudum *Lockio* visum cognouimus, quem eadem via ad opinionem eam delatum fuisse, ut ad alias ex eodem genere, planum erat, quamquam adiutum etiam, ut ait ipse, et forte primo monitum interpretatione verbi ἀναξΦαλαιώσασθαι in Versione Britannica, sumta a *Caluino* scilicet et *Beza*, qui *recolligere* interpretati sunt. Et postea alios quoque meminimus nos reperire, sed omnes *Lockio* posteriores, ut *Schoettgenium* in *Horis Talmud*. qui eam interpretationem probarent, siue sumtam ab illo, siue eadem via, ut fit, repertam, sed ita, ut ei firmandae et illustrandae iustam operam non impenderint. Nam habet profecto illa interpretatio aliquid offensionis, ut diximus, ex adfuetudine *res coelestes et terrestres* intelligendi de angelis et hominibus, et in *coelo* et *terra* cogitandi loca, quae verbis iis propria exprimuntur: nec sufficit dicere (cum *Lockio* et *Schoettgenio*) etiam alibi coelum de Ecclesia dici, ut bene monuit *Bruckerus* ad h. l.

In quo tamen cauenda est iniquitas, aut fortasse interdum etiam inscitia nonnullorum, qui ita dicant, ut in aliis interpretationibus non malis recentiorum vidi interdum dictum esse, non esse consequens, ut, quia verbum *coelorum* vno aut altero loco de Ecclesia dicatur, propterea etiam hoc in loco ita intelligi debeat. Nam profecto
non

non est hoc consequens, sed nec quisquam interpretandi non plane rudis ita ratiocinatur: sed quando clarum est, in genere illo orationis graecae, quo vtuntur scriptores diuini, esse non nimis pauca, quae nec e graeca lingua, nec ex hebraica, quoad libris V. T. cognoscendis tenetur, perspicue ducta videantur, ea quae sunt in idiomatis orationis Apostolicae; intelligitur id, quod magistri interpretandi in Ecclesia nostra semper tenere, et teneri voluere, in pluribus locis sensum indagandum esse ex rebus, contextu et collatione locorum similium: ea autem via vbi repertus sit sensus, iis omnibus bene consentiens, tentandum esse, si possit cum vsu loquendi conciliari sic, vt intelligatur aliquo modo, quomodo verba sic dici potuerint: quod praecipitur, estque necessarium propterea, ne libidini fingendi quidlibet, et rerum indolem praetexendi, fores aperiantur. Eam rationem esse oertam, et omnibus omni tempore bonis interpretibus, etiam in libris humanis, vsurpatam, dubitari sine turpitudine non potest. Nam multa etiam in his sic primum intellecta sunt, vsusque loquendi cognitio saepe fuit posterior cognitione sensus ex rebus ducta. Agite igitur, periculum faciamus, an possimus illam sententiam rebus ipsis, et velut Pauli ipsius auctoritate adhibenda, probabiliorem efficere, et minuere offensionem, quam ex verbis videtur habere.

Ac primum, vt ab eo initium faciamus, quod, concessu et consensu omnium interpretum, sumere possumus, clarum est, partem vtriusque epistolae primam, quae est dogmatica, pertinere ad explicationem beneficii diuini, quod hominibus, primum communiter omnibus, tributum est, per redemptionem I. C. deinde, et quidem inprimis, alterius, quod proprie Gentibus, vocatis et adductis ad communionem bonorum Christi, et, inuisa Gentibus lege rituali abolenda, insertis Ecclesiae verae, quae fuerat ante in populo Iudaico vno; vt essent iam cum Christianis e Iudaismo vnum Christi corpus, vt capi-

tis. Ea porro demonstratio, vt in vtraque epistola confertur ad incendendos animos admiratione benignitatis diuinæ aduersus eos, quibus nihil illius salutis promissum erat, aut debebatur, ita proprie in epistola ad *Colossenses*, ad firmandos animos aduersus doctrinam Iudaicæ legi faventem, exigentemque a Christianis nouitiis circumcissionis et aliorum rituum conseruationem, II, 8-23. In hoc igitur argumento explicando, quem locum habere potest vel instaurata inter angelos et homines amicitia, vel Sanctorum in coelis et in terris consociatio spiritualis? Quis non statim intelligit, in iis verbis, de quibus quaeritur, et in quibus, certe in epistola ad Ephesios, est summa institutæ disputationis, expressam esse debere illam coniunctionem Iudæorum et Gentium ad vnitatem Ecclesiæ, quæ est Christi corpus, *Eph. I, 23*. quod tum demum est, si verba eo, quo propositum est, modo explicentur.

Illud porro non est leuius, quod in vtroque loco statim sequitur applicatio eius, quod vniuerse de coniunctione coeli et terrarum dixerat ad Christianos Ephesios et Colossenses e Gentilismo et Iudaismo: *ἐν αὐτῷ*, inquit, *Eph. I, 11*. *ἐν ᾧ καὶ ἐκλερωθήμεν* cet. in eo Christo, inquit, hæc copulatio coeli et terræ facta est, in quo primum nos, Iudæi, alleci sumus, vt essemus, secundum promissa prophetarum, primi, qui crederemus Christo, deinde v. 13. etiam vos Gentiles, cognito Euangelio, quod illam vobis salutem denunciat. Tum porro pergit ad latius rem explicandam, demonstrandumque, quales fuerint, quales nunc sint, postquam Christus sustulerit morte sua id, quod distingeretur vtraque generis humani pars, et eos coniunxerit cum illis, qui per natales essent heredes salutis diuinæ per Christum, I, 18. II, 22. vid. inpr. v. 11. 12. III, 6-13. Nec alia est series orationis in epistola altera. Nam ab eadem propositione I, 19. de decreto diuino per Christum reconciliandi omnia, et quæ in coelis sint, et quæ in terris, transit ad euentum illius decreti in ipsis Colossensibus, quos ante extraneos, ad-

ductos

duftos esse ad salutem: quod deinde II, 9. diligentius explicat, modo etiam rei demonstrando. In hac tali serie differendi, quem locum possunt habere angeli aut sancti in coelis? aut de quibus aliis, quam de Iudaeis et Gentibus cogitari potest? Neque enim potest esse aliud in propositione et summa rei, aliud in explicatione et applicatione, nisi quis Paullum nauiter imperitum differendi velit iudicare: quod profecto quisque longe ab se velit abesse.

Illud autem iam supra tetigimus, quod est profecto non leue, et haud scio an grauissimum, quod in ea re Paullus ait esse *arcanum, rem ante ignotam*, nunc demum sibi et aliis, quibus Deo placuerit, patefactam, *Eph. I, 9.* proxime ante illam propositionem, de coelis et terris per Christum confociatis. Sed illius arcani mentio etiam crebra est posthaec per epistolam, et illam ipsam, et alteram, vt *Eph. III, 3. 4. 9.* iisdem quibus ante verbis, *Coloss. I, 26. 27.* et est semper eiusmodi, vt ad coniunctionem Gentium cum vera Ecclesia Christi, quae e Iudaica orta est, referatur, et per eam explicetur. An igitur aliud esse potest in loco eo, vbi primum summam illius mysterii proponit? Non profecto, si nouimus Paulum et eius rationes differendi, omninoque rationem rei bene explicandae non penitus ignoramus.

Ipforum autem verborum, quibus mysterium illud explicatur, *ἀνακεφαλαιώσασθαι τὰ ἐν τοῖς ἑρανοῖς καὶ τὰ ἐπὶ τῆς γῆς*, collatio cum aliis formis verborum ad id explicandum pertinentibus, pro ea, quam tractamus, interpretatione, pugnat. Nam *Cap. II, 14. sqq.* iterat illam sententiam, commendandi beneficii causa, cuius vult Ephesios esse memores *v. 11.* Iam *ἀνακεφαλαιώσασθαι* clare exprimitur per *ἐν ποιῆσαι, ἵνα καινὸν ἄνθρωπον κτίσας*, *v. 14. 15.* Itaque et *ἀμφοτέρω* et *ἀμφοτέροι*, quos Christus pace facta vnum nouum hominem redegerit, sunt *τὰ ἐν τοῖς ἑρ. καὶ ἐπὶ τῆς γῆς*. At illi sine omni dubitatione sunt Iudaei et Gentiles *οἱ μα-*

πρὸν καὶ οἱ ἐγγύς υ. 17. οἱ λεγόμενοι ἀκροβυστία, καὶ ἡ λεγόμενη περιτεμὴ ἐν τῇ σαρκί, υ. 11.

Denique in fine totius loci et partis dogmaticae, explicata clare coniunctione Iudaeorum et Gentium et discriminationis omnis sublatione, preces pro Christianis nouis faciens, III, 1. τῷ του χάρι, inquit, ἐγὼ π. cet. *Propterea igitur adoro Patrem I. C. ex quo omnis illa coelestis et terrestris familia et est et appellatur.* In quo clarum est respici ad superiora, verbis ad I, 9. sententia ad explicationem arcani de Iudaeis et Gentibus. Aut nihil in toto hoc genere interpretandi vsquam collatio et inde ducta ratiocinatio valet, aut hinc clarum est, τὰ ἐν τοῖς ἑρανοῖς καὶ τὰ ἐπὶ τῆς γῆς esse eo, quo diximus, modo, intelligenda.

Et haec quidem ab re, contextu et collatione argumenta sunt: ad verba veniamus; a quibus maxima est illius interpretationis offensio. Nam in tali disputatione, cum sensus loci difficilius quaeritur, maxime solet esse in promptu, vt in verbis maneat, etiam apud eos, quibus nihil minus, quam verborum et litterarum scientia curae est. Sed ego in hac parte defensionis non admodum vtar locis propheticorum librorum, aut solis iis, in quibus *coelum* et *terra*, vel solum *coelum* symbolica Ecclesiae appellatio est, vt satis ex *Esai*a et Ioanne Apocalypsi constat, et *Vitringae* ad vtriusque loca (*Es. V, 6. XXIV, 21. Apocal. VI, 12.*) et aliorum notatis. Nam quae in figurata illa et symbolica oratione dicuntur, ea non statim et eodem modo dicuntur in sermone docentis et explicantis capita doctrinae. Ceterum illud tamen recte dici potest, atque exemplis clarum fieri, ab illa tam crebra Ecclesiae verae per *coelum* appellatione, in qua regnaret Messias, ductum fuisse in scholis Iudaeorum morem, tempora Messiae et veram Ecclesiam per *regnum coelorum* exprimendi, etiam in docendo, vt patet ex Collectis *Wetstenii* ad *Matth. III, 2.* eamque ob causam sic a Christo usurpatam eam appellationem esse in ipsa doctrina perpetua. Sed e sermonibus Christi inprimis huc retu-

retulerim loca, vbi clare de Ecclesia sermo est, vt cum Gentes dicuntur cum Abrahamo, Isaaco et Iacobo in coelis, vel coelesti regno, sessurae ad mensam, fruenter bonis Messiae, *Matth. VIII, 11.* Item cum *clavis regni coelorum et clavis scientiae* permutantur, *Matth. XXIII, 13. Luc. XI, 52.* Quod autem ad appellationem *terrae* de Gentibus attinet, ea illustrari videtur posse locis iis, vbi de Gentilibus, quoad a Iudaeis distinguuntur, manifeste κόσμος dicitur, quod fit non raro. Sunt enim vsu Apostolico eiusdem potestatis. Nam *Rom. XI, 12. seq. πᾶτος ἔθνων* et *πᾶτος κόσμος* permutantur: et quia olim, e consuetudine Iudaeorum graece loquentium, κόσμος dictus erat de Gentilibus, quoad essent extra Ecclesiam, propterea post etiam ii, qui non essent Christiani, sic appellati sunt, vt clare *1 Cor. V, 10. VI, 2.* Hic est *Mundus Gentilium*, de quo exstat *Iacobi Altingii* libellus in *Heptade Disp. V, n. 5. (T. V. Opp. 142.)* Sed ille delectatus, vt opinor, sua de verbo hoc obseruatione, significationem eam quaerit in locis N. T. iis, a quibus est alienissima, vt *Io. III, 16. XII, 19, I, 29. cet.* et contra non videt loca alia, quae sunt perspicue huius significationis, praesertim in illis duabus epistolis, vbi ea verba ab interpretibus fere praetermittuntur, vt *Eph. II, 12.* vbi Gentiles dicuntur ante susceptam fidem fuisse ἄθροα, ἐν τῷ κόσμῳ, vt interpungit non male *Bengelius*: (quamquam etiam coniunctum cum ἄθροα aliter capi vix potest; nam in eo, qui physice κόσμος dicitur, fuisse, nihil attinebat dicere) *Coloss. II, 20. III, 5.* Terram autem ipsam alijs locis Apostolicis sic dici non notavi, nisi sic velit quis accipere in illa Pauli-cohortatione in eadem epistola ad *Coloss. III, 5. νεκρώσατε τὰ μέλη ὑμῶν τὰ ἐπὶ τῆς γῆς*, quod non absurdum sit, intelligere, necato illa vitia, quibus indulgent Gentes, nondum conuersae ad Christum, nec receptae in πολιτείαν Christi. Nam, enumeratis vitiis, quae membra Ephesiorum terrestria dixerat, addit, *quibus et vos ante dediti fuistis.* Sed haec omnia etsi non

habent iustam euidentiā, qualis debet esse, cum e verbis rem et sententiā consequi necesse est, vt in summis capitibus doctrinae, aut cum contextus et res nullas dant anfas tenendi sensus; tamen aliquam vim habent ad sententiā eam, quam res et ratio docet, vtcunque conciliandi cum vsu et analogia sermonis Apostolici, quod in tali genere locorum sufficere potest.

Sed haec disputasse et considerasse vel hac de causa non alienum fuerit, vt animi occupentur diligentiori cogitatione illius beneficii, de quo in principio diximus, incendamurque studio praedicandae benignitatis diuinæ, quae et nos per Christum placatos vocauit ad regnum coelorum et Ecclesiam Christi, et per regenerationem a morte reuocatos et viuificatos cum Christo *συνεσθίσεν ἡ τοῖς ἐνγεγαυτοῖς*, in ipsis coelestibus collocauit in *glor.* Eph. II, 4. Nam ea facta esse, ait Apostolus, vt perspiciantur diuitiae immensae bonitatis diuinæ aduersus nos. Sed hae ipsae tam iucundae et laetae cogitationes etiam hanc vim habebunt, vt inflamment nos studio vitae sanctae, in qua, vitiis pristinis eorumque reliquiis extirpatis, nouam cum Christo vitam viuamus, per quam sanctitas diuina illustretur, et sanctum Euangelium Iesu Christi ornatur. Ita etiam spem vitae alterius nouae in coelis apud Deum cum Christo per omnem aeternitatem agenda et tenebimus et firmabimus, qua beatius in his terris esse nihil potest. Eas autem tales, tam pias cogitationes, sensus et motus animi, alemus, religiose obsecundis per hos dies, tam sanctos et laetos nobis, sacris publicis, tum aliis communibus vniuersae huic Ciuitati, tum propriis nobis, quae fient feria prima in Aede Paulina ab hora XII. inter quae Orationem disertam et elegantem de *Dignitate Fidelium e futuro eorum in vitam reditu cognoscenda*, recitabit M. Samuel Fridericus Nathanael Morus, Collegii Principalis Maioris Sodalis, vir Doctissimus, quam audiuisse non poenituerit.

AD

AD
I. COR. XIV
DE
DONO LINGVARVM
of. Brachet

AD I. COR. XIV.
DE DONO LINGVARVM

Vt duas Deus veritati vias ad mentem animumque humanum patefecit, oculorum alteram, alteram aurium: sic vtrisque suas veluti regiones attribuit, intra quas mens humana, illarum instrumento adiuta, veritatem persequatur et indaget; oculis quidem naturam universam adspectabilem, quod regnum Dei naturale vocamus, auribus autem mundum inuisibilem, quod est regnum gratiae diuinae constitutum per filium Dei, Iesum Christum. Nam naturae illud regnum profecto merum est *spectaculum*, alterum gratiae totum *acroama*: quippe in illo, spectandis operibus ac muneribus diuinis, mens deduci debet ad contuendum animo inadspectabilem rerum omnium auctorem, cum vniuersa eius maiestate, *Rom. I, 20.* in hoc, audiendo verbo Dei, accipit notionem Dei rerumque diuinarum, et scientiam consiliorum diuinorum ad salutem humanam, per Iesum Christum partam, pertinentium, *Rom. X, 16.* vnde Euangelium *λόγος αἰωνῆς* dicitur, et *audiendi* verbo exprimitur, quicquid, de consilio diuino, ad salutem propositam consequendam valet. In quo est in promptu, quanto expeditior sit et planior via veritatis, quae patet ei per aures, quam quae per oculos vadit. Nam etsi splendore, apto ad oculos capiendos, longe praestant illa tanta spectacula naturae, faciuntque magnam admirationem contuentibus, cum illud Euangelicum *acroama* tenue sit, simplex, sine omni ad sensus humanos commendatione: tamen, vt ille ipse splendor officit animi luminibus, vitiat et naturae et
adsue.

adſuetudinis prauitate, hebetatque oculorum aciem vi ſua, vt longius proſpicere, et videre latentem veritatem nec poſſint, nec velint; ſic hæc tenuitas, omni ſenſibili ornatu, velut veſte, detracto, apertioſiorem facit veritatem, et admoſuet propius et celerius animis ad intelligendum et recipiendum. Videmus, illud ipſum inuſitatum acroama linguarum nouarum, quo regnum Ieſu Chriſti ſpirituale vel inauguratum eſt vel promulgatum vniuerſo generi humano, admiratione ſui obſtupefecit potius animos, quam ad videndum verum acuiſſe; oratione autem Petri demum adiutum, habuiſſe vim ad docendum et ad perſuadendum. Nam nec cetera illa Ieſu Chriſti et Apoſtolorum miracula, quæ oculis cernerentur, ſine verbo, placidis auribus et animis accepto, valere ad perſuadendum, eorumque vis omnis conſumta eſt in ſtupore et admiratione inani apud eos, qui oculos modo adhiberent ad ſpectandum. Sed homines, vanitate mentis decepti, fere plus tribuunt iis, in quibus eſt ſenſibilis aliqua, fortius ſerens animos, magnificentia, eaque magis, ſed plerumque ſine fructu, admirantur, quam quæ tali pompa carent. Itaque Corinthii, vt in exemplo propoſito maneamus, magis in donis Spiritus ſancti expetebant id, per quod linguis ſibi ignotis, ſine doctrina, loqui poſſent, quam per quod verbum Dei bene explicarent ac docerent. Super quo dono Spiritus ſancti tam admirabili, cuius exempla prima edita ſunt ea ipſa die, quam religione recalemus craſtini diei, non alienum fuerit hoc tempore diſſerere, et periculum facere, ſi poſſimus mediam quandam reperire viam, quæ, vitatis vulgatarum de eo opinionum difficultatibus, ad veritatem ducat, poſteaquam nuper in Britannia vehementius diſputatum eſt *Warburtonum*, Episcopum Gloceſtriensẽ, inter, et ⁴²⁷ *Midletonum*, Viros doctiſſimos, ſuper eius doni indole; cum ille, communem ſecutus opinionem, in eo dono *Æiv* defenderet, hoc eſt, facultatem linguæ cuiusuis talẽ, vt ea pro vernacula, cum vellent, in dicendo ſcribendo-

bendoque vti possent, hic autem motum transeuntem modo agnosceret, sine constantia ea, quae est in *ἔξει, habitu*. In qua disputatione lapsus est vterque, vt sit, opinionis suae defendendae studio, cui tam facile se admiscet, etiam in bona causa, cupiditas suae laudis et auctoritatis, fallitque homines veritatis defendendae specie inani, cum pro sua causa depugnant. Nam *Midletonus* quidem ita sententiae suae defendendae causa disputauit in libello eo, quem *de dono linguarum* scripsit, vt *Ἰσορροσίαν* Apostolorum in docendo scribendoque in dubitationem adducere videretur, et propemodum contumeliosus fieret in libros eorum, siue orationem Apostolicam: *Warburtonus* autem, dum difficultates, contra constantiam doni linguarum, eiusque in scribendo usum, a *Midletono* motas conabatur de medio tollere, descendit ad mirabiles et parum graues de oratione diuinitus inspirata opiniones, quas nullo modo potuit probare peritiorum, in his *Th. Lelando*, Theologiae et Eloquentiae in Dublinensi Academia Professori eruditissimo, a quo est etiam nuper erudito libro refutatus. Vtriusque libri et *Warburtoniani*, de *Natura Gratiae*, cuius in Libri primi capite secundo et tertio hoc egit, et *Lelandini* indicium factum est nuper in *Bibliotheca Theologica*. Sed ante idem egerat *Warburtonus* in libro, quem *de Principiis religionis naturalis et reuelatae* inscripserat. (T. I. *Homilia sexta, ad Ioh. XIV, 16.*) Sed rem altius repetamus, vt aliqua cum fiducia de causa tota iudicandi facultatem legentibus praebeamus.

Antiquissimis, et non nimis remotis ab aetate Apostolica seculis, videmus ita parum certam et perspicuam, de dono linguarum eiusque natura, famam fuisse, vt coniecturis modo niterentur Doctores; quae, vt sit, parum inter se constabant. Causa fuit, quod id charisma ultra aetatem Apostolorum non viguerat, nec ea ipsa, aut, quae statim secuta est, habuerat, qui rem sua memoria actam et vulgo notam; planius describerent; ne proximis

mis quidem, qui forte ab his acceptam rem tenerent, posteris tradere curantibus. Primus, quod nos quidem sciamus et obseruauerimus, rem tetigit *Tertullianus*, eo, quem posthac commemorabimus, loco; sed et ipse ita, vt verear, ne alio trahant, qui suae opinioni aduersari verba eius existiment. Ac nescimus, an aliquid fuerit in *Hippolyti* libello de *Charismatis*, quod eo pertineret. Nam commentitius ille, qui inter opera eius, ex *Constit. Apost. VIII*, 3. est editus, estque fortasse ad genuini formam factus, tantum ad vsum eorum pertinet, qui sit in modestia. Seculo quinto, clarum est, duplicem opinionem tenuisse; alteram, quae Apostolis et ceteris sodalibus omnibus sua lingua, vna eademque, loquentibus, audiuisse diceret homines suae quemque linguae sonum et verba; alteram, quae Apostolos ipsos, et quicumque eo charismate donati essent, existimaret, coepisse vi divina loqui verbis linguarum peregrinarum, et sibi nullo vfu cognitarum, tanquam linguae suae et sermonis sibi vfitati a longo tempore. Nam vtramque ita narrat *Gregorius Naz. Or. XLIV*. vt rem ambiguam esse fateatur, eeterum magis ad posteriorem rationem inclinet, quae ab Latinis, *Ambrosio*, *Augustino*, *Leone M. Gregorio M.* et aliis probata, conualuit in Ecclesia Latina; in qua tamen ipsa non defuere, qui priorem sententiam probarent, quibus olim *Erasmus*, *Grauesonius*, nuper et *Io. Lamius*, accessere. Et veteres quidem, vt e *Gregorii* loco intelligitur, in illam sententiarum varietatem deduci sunt ambiguitate, vt existimabant, verborum apud *Lucam Act. II*, 6. ἤκουσιν εἰς ἑκάστος τῇ ἰδίᾳ διαλέκτῳ λαλόντων αὐτῶν in quibus τῇ ἰδίᾳ διαλέκτῳ et ad ἤκουσιν referri posse, vnde prior illa opinio nasceretur, et ad λαλόντων αὐτῶν, vnde altera existeret. Quod sane mirum videatur accidere potuisse hominibus graecis; cum ἀκούειν διαλέκτῳ, nullo modo graeca loquendi ratio ferat, nec eius formae vllum exemplum proferri possit. *Erasmus* autem conturbatus fuisse videtur versus quarti verbis, quod

quod *omnes*, pleni Spiritu Sancto, coepisse dicantur peregrino sermone loqui, nec credibile sit, qui pariter loquerentur, eodem tempore diuerso sermone vsos esse: quod ita intelligi non est necesse, sed potius, vt omnes deinceps, alius post alium, ἀνὰ μῆκος, vt Paullus ait, alternis, alia alius lingua, sicut 1 *Cor. XIV.* 23. 24. 27. 29. 30. 31. Verum haec sententia facile reuincitur, tum illa ratione, qua *Nazianzenus* vtitur, quod ea miraculum, et eius veluti sedem, ab Apostolis loquentibus transfert ad audientes, tum ipsis Christi Lucaeque verbis, quae *novas* vel *alias linguas* tribuunt in eo miraculo Apostolis et ceteris fidelibus, quibus id charisma contigisset; quae esse non possunt, nisi nouo et inusitato sibi sermone, διαλέκτῳ, vtentium. Nam *Lamii* ratio, ab orationis graecae, Apostolis vsurpatae, inelegantia ducta, quam nullo modo conuenisse putat iis, qui eius magistrum Spiritum sanctum haberent, plane aliena est ab hac causa: quippe hic non de oratione graeca sola, aut ea sermo est, qua in libris suis post sunt vsi. Etenim illius sermonis graeci in dicendo ac scribendo facultatem diuinitus iis repente infusam fuisse, nulla ratio idonea cogit credere, etsi in ipso scribendi actu vim diuinam intercessisse defendimus, sed haecenus, vt sua quisque facultate vteretur apte ad exprimendos sensus mentis diuinae. Sed si etiam tum in illo numero fuere, qui graece primum vi Spiritus sancti loquerentur, quod concedi facile posset: qualis illa oratio fuerit, non certo scimus; etsi credibile est, simillimam ei fuisse, quam in libris sacris videmus, eademque de causa, vt Iudaei et profelyti e regionibus graecis, ei generi orationis e versione graeca librorum sacrorum aduerti, intelligere possent: quo tollitur tota illa difficultas, quam tantopere auxit verbis *Middletonus*, *Warburtonus* autem tollere, infelicissime tentauit.

Sed hac opinione, de sede miraculi, sublata, relinquitur non vna difficultas in altera eaque vera sententia,
Eusebii Opus. Theol. D d

si modum et usum charismatis consideres. Atque nos iam mittamus ea; quae hodie haud dubie in commentis ponuntur: quale est, quod Veteres genera linguarum numerant ad duo supra septuaginta; quem numerum pari vanitate in confusione linguarum Babylonica exortum, et in genere humano seruatum, finxere: quod unicuique Apostolo vel omnia illa genera tribuunt, vel plura, vel denique, ut video placere *Chrysostomo*, illud, quod opus futurum erat in regionibus iis, ad quas esset cuique eundum docendi causa; super quibus pariter multa, inter varios dissensus, confinxere, ut nuper bene demonstrauit *Semlerus* V. S. R. in hist. dogm. fidei, p. 41. Illud, quod maiorem habet difficultatem, videamus, super quo ex parte disputatio illa in Britannia agitata est, ut supra diximus. Et id quaeri et explicari multum refert; quod ab eo maxime pendet intelligentia capitis XII. et XIV. prioris Paullinae ad Corinthios Epistolae, ut res docet ipsa, et agnoscit *Clericus* ad h. l. qui et ipse nullam magis ob causam nihil ei loco lucis attulit, immo omnia praeter nugis referfit, quam, quod modum et usum illius *Χαρίσματος* non assecutus erat. De hoc igitur, seposita omni humana auctoritate, solisque orationis Paullinae vestigiis persequendis, videamus, si ad verum peruenire, et eadem opera lucis aliquid loco Paullino affundere possimus. Sed haec disputatio nobis ita diuisa sit, ut primum, qui finis, qui usus illius doni fuerit, discere ab Apostolo, deinde ex eo imprimis indolem eius reperire tentemus.

Iam non ignoro, veteribus ita placuisse, iisque recentiores vniuerso propemodum consensu adstipulatos esse, ut charismatis illius finis referretur ad usum in docendo Euangelio apud gentes vniuersas. Nam inde omnia fere illa commenta veterum, quae ante tetigimus, nata sunt. Et erat procliuē ad hanc opinionem venire, rem ex vulgari linguarum usu aestimantibus. Sed id ipsum

ipsum est, quod tenebras obfudit. viris doctis in loci Paul-
lini interpretatione, nec, vt nostra fert opinio, consi-
stere cum iis potest, quae literae sacrae de eo dono per-
spicue tradidere: quae age in vnum locum colligamus,
atque ita nobis viam ad verum praeparemus.

Ac primum Dominus noster Iesus Christus, in eo
charismate promittendo, diserte id ab doctrina distin-
guit *Mar. XVI*, 17. et signum veritatis traditae et acce-
ptae, non instrumentum docendae et explicandae facit,
vt cetera, quae pariter promittit. Nec id Apostolis
modo promittit, sed τῶς πισύσας, qui Euangelio ab
iis tradito crediderint; qui non omnes doctores erant
futuri. Idque firmavit euentus, in illis Iohannis discipu-
lis *Act. XIX*, 6. quos, nulla profecto causa est existi-
mandi, omnes factos doctores, vt nec Cornelium, cen-
turionem, cum suis, *XI*, 44-46. qui audiendo pie verbo
credentes, id charisma acceperunt. Veniamus ad Paul-
lum; qui ita de eo loquitur, vt non doctores Corinthio-
rum, sed de Corinthiorum coetu multos illius doni ap-
petentes, dicat fuisse: et *XIV*, 2. sua si vota valerent,
omnes hoc donum accepturos esse. An igitur omnes
doctores Euangelii fieri, et proficisci ad gentes barbaras
vel ipsi voluere, vel Paullus voluit, vt eas docerent
Euangelium? Nullo sane modo. Immo ad vanitatem id
donum ab iis expetitur esse arguit ac reprehendit, quod
in eo esset maior admiratio quam in ceteris, iubetque
expetere alia, etsi minus splendida charismata, at vti-
liora Ecclesiae: in quo genere? in docendo, consolando,
cohortando, similibusque. Non hinc planum fit, do-
num linguarum non ad docendum valuisse? Tum clarum
est ex illo ipso loco, qui illo charismate essent donati, eo
vso esse in ipsa Ecclesia Corinthiaca, inter conuentus,
qui sacrorum causa fierent, vbi profecto non opus erat
linguis peregrinis ad docendos homines, qui graece
modo scirent. Quid? quod hoc donum a dono τῆς δι-

D d 2

δαχῆς

δαχῆς clare distinguit v. 6. 19. Atque etiam ita quosdam inter sacra lingua peregrina locutos esse diserte tradit, vt, quae dixissent, sua lingua tradere, hoc est, interpretari non possent, nec quisquam, quid dixissent, sciret, nisi aut ipsi pariter haberent charisma interpretandi, quae glossis dicta essent, aut praesto esset, qui facultatem diuinitus haberet interpretandi, quae ita prolata essent. Et talia sunt multa alia in capite quarto decimo, vt v. 2. vbi, qui lingua peregrina loquantur, non hominibus loqui dicit, quia nemo intelligat; nam id est *ἰδεῖς ἀνθρώπων*: vt v. 13. vbi eos iubet rogare Deum, vt accipiant vim interpretandi, quae per glossas dixissent inspirante Spiritu diuino: v. 28. vbi iubet eos silere, nec vti dono suo, vbi desit interpres: v. 19. vbi se ait malle lingua vulgari loqui in Ecclesia, vt alios erudiat. Quae omnia planum faciunt, id donum proprie ad docendum datum non fuisse; etsi ad fidem pietatemque excitandam alendamque prodesse poterat, si quis adesset forte, vt olim Hierosolymis, qui intelligere posset, aut si quis dicta interpretaretur.

Dicat aliquis, etsi non in omnibus ad dicendi facultatem pertinuerit, tamen in Apostolis eo spectare potuisse. At Paullus illo dono supra ceteros instructus fuit, vt ipse ait, 14, 18. *Gratias ago Deo, quod vobis omnibus magis possum loqui linguis peregrinis*; quod male peruertunt, qui, ex versione latina, *μᾶλλον, magis*, deleri volunt, referuntque ad multitudinem linguarum, cum ad frequentiam vsus pertineat. Quid enim esset, *vestrum omnium linguis loqui possum*; cum Corinthii vna graeca lingua vterentur. Nam si maxime ibi essent Iudaei quidam, qui etiam chaldaice loqui possent, id tamen non esset, nec dignum illa tali gratulatione, nec ad hunc locum pertineret, in quo non de linguis vsu comparatis, sed diuinitus infusus sermo est. Quamquam et Epiphanius, auctor in hoc genere non locuples, ad solam graecam

græcam linguam refert, quam se Paulus dicat melius omnibus Corinthiis callere *adu. hæc. n. XLII. p. 363.* quo nihil stultius dici possit. Sed, ut ad rem redeamus, si charisma linguarum ad docendi facultatem et usum in Apostolis pertinuit, cur id supra ceteros datum Paulo, qui nuspiam docuit, ubi alius, quam chaldaicæ aut græcæ, usus aut necessitas esset, nec unquam alia usus est, ut ex Actis eius clare patet. Nam eius doctrina se intra fines imperii Romani continuit, et regionibus fere græcis; omnibusque in locis initium docendi fecit a Iudæis et in Synagoga, ubi sola græca lingua usurparetur, quæ et in nobilibus urbibus vulgo nota erat. Itaque et Romanæ Ecclesiæ græce scripsit, non latine. Nec vero ceteris Apostolis ad usum docendi per orbem terrarum alia, quam vernacula Palaestinae, aut græca opus erat, quam callebant utramque, quantum erat ad hunc usum satis. Erat enim inter Iudæos in Palaestina lingua græca, ab multo usu et commercio cum Græcis et Syria, Asia, Aegypto, a multo tempore etiam vulgo nota. Nec id mirum potest peritis rerum videri; cum nunc quoque Francici generis homines, in Germania nati et educati, et vicissim Germani sub Francorum imperio degentes in ipsa Germania, utramque linguam, quantum satis est ad vitæ humanæ rationes, teneant: ii autem Iudæi, qui ex omnibus terrarum partibus tum Hierosolyma confluerant, utramque linguam pariter calluerint, et Hierosolymitanam, et alteram illam, in qua se natos et educatos dicebant. Id autem tum in Oriente frequens fuisse, ut in una eademque vrbe ac regione duæ diuersæ linguae promiscue usurparentur, inter alia hoc quoque arguit, quod in ruinis Palmyrenis tituli utriusque linguae, et græcæ, veluti hospitæ, et alterius indigenæ, reperti sunt. Atque græca illa videatur sufficere potuisse etiam iis, qui versus Orientem, et ultra Euphratem, cum Euangelio tenderent. Nam eæ quoque regiones fuerant olim satis diu sub Græcis, arripuerantque usum linguae

D d 3

græc-

græcæ, quæ sibi iam ante Græcorum imperium viam in eas regiones per commercia, quæ temporibus antiquissimis Græci in omnibus partibus terrarum instituerant, ita patefecerat, ut multa eius verba in chaldaicum sermonem reciperentur. In quo auctorem habemus Daniellem, in cuius libro græca quædam verba reperiuntur chaldaica forma; quæ etiam adnumerat in *Exercitationibus contra Baronium* p. 434. *Casaubonus*. Sed si maxime opus erat lingua chaldaica aut simili dialecto, non magis necesse erat, eam ipsis infundi diuinitus. Ex quo fit, ut ad docendi rationem non desiderarint Apostoli linguarum scientiam, quam quas in patria usu didicissent.

Nec minus hic valere debet observatio commemorata multis, qui in linguæ græcæ per omnem orbem terrarum propagatione cerni dixere providentiam aliquam diuinam, munientis Euangelio viam per omnem terram: quod aliter intelligi non potest, quam quod Christi legati vna illa lingua satis instructi essent ad omnia loca adeunda, et gentes omnes imbuendas disciplina Christi. Quod si est, non iis opus fuit dono linguarum aliarum, ut instrumento muneris Apostolici, inter gentes docendo gerendi. Certe planum est, iis nulla noua aut alia, præter patriam et græcam, lingua opus fuisse omnibus in regionibus, e quibus Iudæi, aut sacris Iudaicis addicti, memorantur a Luca. Nec videntur Apostoli, si certis modo testimoniis velimus niti, ultra illarum regionum terminos progressi esse, sed fundatis Ecclesiis christianis, qua parte Iudæorum olim velut coloniae fuissent, illis, et post futuris, latius propagandi Euangelii laborem curamque reliquisse. In Occidente certe non esse ulterius progressos, satis constat. Sed id quaecunque sit, parum ætque refert. Illud potius videndum est, ut, si charisma linguarum non habuit proprie docendi finem, aut usum inter gentes, quarum linguas non didicissent, quo igitur fine

sine dactam fuerit, et quatenus usum, habuerit in Ecclesia, reperiatur.

Primus igitur finis haud dubie pertinuit ad illos ipsos, qui Christo, ut Apostoli et ceteri eius amici atque sectatores, qui deinde Apostolis credidissent, ut Ioannei *Act. IX.* ut Cornelius cum suis, ut innumerabiles alii; ut ii confirmarentur, et hoc haberent pignus veritatis. Nam et hac de causa, et horum *χαρισμάτων* nomine, Spiritus S. fuit arrhabo fidelium, fuitque in hoc dono insigne testimonium Spiritus sancti, quod perhiberet in animis fidelium veritati, quanquam ipsi suis signis satis lucenti. Alter, ab Christo ipso et Apostolis clare proditus, attigit eos, qui nondum crederent: *γλῶσσαι, sunt eis σημεῖον καὶ ἀπόδειξις*, ait Paulus, *1 Cor. XIV. 22.* coll. *Act. V. 32*: ut earum admiratione percussi, animum aduerterent ad cogitandum et cognoscendum, haberentque hunc aditum primum ad veritatis cognitionem; qui finis ei fuit communis cum ceteris donis, *Marc. XVI.* commemoratis, in quibus incurrens vehementius in sensus vis aliqua intercessit. Nam in *μαρτυρίαις αἰγίς πνεύματος*, quibus Deus doctrinae Christi *συνεπιμαρτυρῆσαι, testimonium veritatis perhibuisse*, dicitur Paulo (*Ebr. II. 4.*) donum linguarum numerandum esse, dubitationem non habet. Et videmus, quantum incrementum Ecclesiae pepererit statim in principio, cum eius vim et causam auditores admirabundi Petri oratione cognouissent *Act. II. 41.* Ceterum, uterque finis eam habuit saepe coniunctionem, ut eodem tempore pariter teneretur: sicut in illo primo veluti actu, et Apostoli confirmati sunt euentu promissi, quod Christus abiens in coelum iusserat expectari Hierosolymis, *Act. I. 4.* et conuersa est ad cognoscendum de Christo, et ad credendum tanta multitudo. Ceterum, ut diuina sapientia omnia, quantum fieri potest, omnibus consiliis suis consentientia efficere solet, sic hos fines ita cum aliis religionis partibus copulauit usu et actu, ut

idem charisma esset cuique etiam pietatis cum fese tam alienae incendendae et alendae. Etenim rem ita moderatus est Spiritus Dei, ut linguas fidelium ad loquendum per aliena verba flecteret in sacris, et conventibus sacrorum causa institutis, cum sermones fierent de rebus religiosis, scripturae legerentur *et*. deinde, ut argumentum orationis esset totum in precando, et Deo laudando, eius operibus, decretis, beneficiis per Christum commemorandis. Id ita fuisse, patet omnibus locis Scripturarum, in quibus eius rei est commemoratio, inprimis *Act. I. et Cor. XIV.* Nam in illo quidem *μεγαλῆα τῷ Θεῷ* sunt haud dubie laudes diuinae, quas celebrant ex ordine omnes, in altero autem ita clarum est, totum referri ad orandi et laudandi Dei rationem, ut nihil supra: *Ὁ λαλῶν*, inquit Apostolus, v. 13. *τῇ γλώσσῃ, προσευχόμενος, ἵνα διερμηνεύῃ. Ἐάν γὰρ προσεύχωμαι τῇ γλώσσῃ *cet.** Qui lingua aliena loquitur, oret Deum, ut et interpretandi vim accipiat: nam si orem aliena lingua *cet.* Vides, *λαλῶν τῇ γλώσσῃ* et *προσεύχεται γλ.* permutari: quod est perspicuum argumentum, nil differre: eique consentiunt cetera omnia, v. 15. 16. *cet.* Et haec quidem de fine et usu huius charismatis dicta sunt: restat, ut de modo et forma eius quaeramus, iisdem ducibus.

Videamus primum exempla accipientium id *χάρισμα*, in quibus omnibus intelligitur motus quidam impressus a Spiritu sancto, linguas et ora flectentis ad laudem diuinam per vias nouas et incognitas, hoc est, per verba ignota et nulla institutione, nullo usu parata. Nam eodem modo res exprimitur, quo fit in exemplis ab afflatu diuino repente loquentium, quae ipsi non cogitassent, aut meditatione sua praeparassent, ut *Luc. I, 41. 42. 67.* dicunturque vtrique pleni Spiritus facti: nec aliud est discriminis in vtroque genere, quam, quod his suo et noto sermone subiicitur, quod dicant, illis alieno et ignoto. Paulo aliter res acta est in iis, qui non primum
incipi-

inciperent ita loqui, sed vterentur charismate ante accepto. Nam dicuntur *γλῶσσαν ἔχειν*, 1 Cor. XIV, 26. Ceterum modus est idem, fitque oratio non per scientiam illius linguae nouae, qualis est in iis, qui didicere, sed impulsu spiritus et actione diuina, ut in omni *θεοπνευσία* et inspiratione diuina. Id intelligitur ex eo planissime, quod Paullus clare dicit, in iis, qui eo charismate vterentur, fuisse, qui, quae sermone peregrino dixissent, eloqui suo non possent; quod nullo modo locum habet in iis, qui linguae facultatem habent talem, qualis est a disciplina et exercitatione, ut ea uti possint, quando et quomodo velint. Nam hi, quae ante, fere suo, vernaculo sermone, cogitarunt, eloquuntur, v. c. latino, et quae latine dixere, facile reddunt, et sermone patrio interpretantur petentibus, nec requirunt alium interpretem orationis suae, latine prolatae. Similisque est ratio *Interpretum* Paullinorum, in quibus valde se torserunt multi. Non enim sunt tales, quales vulgo dicimus: sed qui ab alio dicta, per diuinam suggestionem statim ex ordine reddunt lingua nota, cum ipsi illius linguae, cuius verba interpretantur, sint rudes. Neque enim aliter esset *χάρισμα* Spiritus sancti, quod cum *ἀποκαλύψει* et similibus comparari, aut precibus a Deo impetrari, nec potius discendo comparari deberet.

Atque sic rem antiquissimis temporibus, et aetati Apostolicae proximis, intellectam esse, colligi posse videtur e *Tertulliani* loco, in quinto contra *Marcionem*, p. 591. *Exhibeat itaque Marcion Dei sui dona, aliquos prophetas, qui tamen non de humano sensu, sed de Dei Spiritu sint locuti, qui et futura praenunciarent, et cordis occulta traduxerint. Edat aliquem psalmum, aliquam visionem, aliquam orationem duntaxat spiritalem, in ecstasi, id est, amentia, si qua linguae interpretatio accessit *)*.

D d 5

In

*) Obiter admonemus, illa verba *de humano sensu* cet. exprimere *θελήματα ἀνθρώπου*. 2 *Petr. I, extr.* tum eleganter, *occulta cordis*

In his, clarum est, ultimum esse e I. Cor. XIV, 26. ὅταν συνέχησθε, ἕκαστος ὑμῶν ψαλμὸν ἔχει, γλῶσσαν ἔχει, διδασκῆν ἔχει, ἀποκάλυψιν ἔχει, ἐρμηνείαν ἔχει, non verbum de verbo exprimendo, sed sententiam, cum aliqua tamen varietate. Nam *psalmum* videmus; *visionem*, ἀποκάλυψιν; *orationem spiritalem*, διδασκῆν; cetera pertinent ad γλῶσσαν, nisi *orationem spiritalem* eo referre velis, quod orationem de precibus dicere solet *Tertullianus*, reliqua ad ἐρμηνείαν. Vtcumque sit, locus hic primum valet, ut id obiter moneamus, etiam ad revincendam *Marklandi* (ad *Lyfiam* p. 574.) coniecturam, pro γλῶσσαν corrigentis γνώσιν; et non necessariam, et abhorrentem, quod ἐρμηνεία sequitur, quae sine γλώσσης mentione stare non potest, respiciturque ad v. 13. Deinde indicat, *Tertullianam* orationem ἐν γλώσση x. vi Spiritus sancti duxisse, et in ea ἕκαστον quandam intellexisse, quod optime convenit iis, quae diximus.

His ita explicatis et constitutis, primum intelligitur, in eo non falsum fuisse *Midletonum*, quod, post *Salmasium de lingua Hellenist.* p. 252. in illo charismate motum Sp. S. transeuntem modo fuisse, defendit, qualem in inspiratione diuina inter scribendum fuisse scimus, nec id pertinuisse proprie ad facultatem docendi et scribendi:

cordis traduxeris, Paullinum I Cor. XIV, 25. τὰ κρυπτά τῆς καρδίας φανερά γίνεσθαι, nempe, ut prauitatem consiliorum occultorum indicet, quae patefaciat propheta; quo sensu τὰ κρυπτά τῆς καρδίας in libris sacris dicuntur. Nam *traducere* (παράδεγματού) est Latine, maleficum hominem contumeliae causa ducere per ora hominum ad spectandum: eoque verbo vltus est, ut sententiam Apostoli plene exprimeret, quod *consilia occulta* Latinis etiam in bonam partem dicuntur. Sunt multa in illo scriptore ad bene intelligendam phrasin N. T. vtilia, itemque ad κρίσιν. Sed eo consilio legendus est, ut obseruentur: quam rationem in eo legendo habuisse, vix quemquam nouimus, praeter *Semlerum*, Theologum eruditissimum,

in quo etiam nihil incommodi est ad rem Christianam. Sed in hoc errauit vehementer, quod eum motum semel impressum ita transisse defendit, vt nunquam repeteretur. Nam id prorsus repugnat iis, quæ Paullus de hoc charismate suo et aliorum Christianorum inter Corinthios tradit: ex quibus clarum est, eum motum rediisse subinde inter conuentus, qui sacrorum causa fierent, ad vsum precandi et veritatis firmandæ. Et propter hanc causam recte defendi potest, id charisma tenuisse, quibus contigisset, *Æsop* habitus modo, quod defendit cum aliis *Warburtonus*, sed non hæcenus, vt eas linguas, quibus in illo motu diuino loquerentur, ita postea in potestate haberent, vt iis vt in vita quotidiana, in sermonibus quibuscunque, in scribendo possent, quod secus fuisse, per ea intelligitur, quæ supra disputauimus. Quod si ita rem concepissent, comparandis diligenter locis Scripturarum eo pertinentibus, totam illam disputationem de genere orationis Apostolicæ, quoad grammaticis et rhetoricis artibus iudicatur, ab hac causa esse alienam vidissent; in qua et *Midletonus* grauissime et periculose errauit, cum orationem graecam Apostolorum indignam esse Deo auctore, nec originem a Spiritu S. habere posse defendit, quod grammaticam et rhetoricam elegantiam non habeat, et *Warburtonus* fecit parum eleganter, nec vt dignum erat tanta doctrina sua, cum *Midletoni* refellendi causa, super indole linguarum, et tota hac causa philosophando, eo descendit, vt orationem maxime vitiosam verbis, Deo et religione dignissimam diceret; vicissim, cum refutet *Midletonum* (L. I. c. 7.) existimantem, genus orationis, quod Spiritus sanctus suggerat, debere esse ex omni parte perfectum, ipse, de inspiratione librorum sacrorum differens præcedentibus capitibus, sententiam de inspiratione verborum pro supersticiosa reiicit, iisdem fere de causis, quibus *Midletonus* in sua sententia defendenda erat usus. Adeo homines etiam doctissimi sibi non constant, cum in disputando non, quid vera prin-

cipia

cipia semel constituta pestulent, sed quid in singulis causis : ro sua opinione dicere possint, vident, et cupiditate magis sua incitantur, quam tranquillo veritatis amore ducuntur.

Ceterum, hac nostra ratione probata, quid lucis accedat verbis Pauli v. 14. 15. 16. 19. videamus; in quibus orationem precantium eam, quae fiat *ἐν γλώσσῃ*, *lingua externa*, ait fieri *ἐν πνεύματι*, quocum etiam verba *ἐν γλώσσῃ* v. 19. permutat, eique opponit preces et verba, quae fiant *διὰ τῷ νοῷ* vel *νοῦ*. Nam si in omni illius doni usu est extraordinarius Spiritus sancti motus, vt in *ἀποκαλύψει*, et, vt *Tertullianus* appellare videtur, *ἐκστασις* in qua qui sunt, dicuntur esse *ἐν πνεύματι*, *Apo. I, 10*, nam id nihil differt ab altera forma *ἐν ἐκστάσει*, *Act. XI, 5*. si ita, inquam, est, vt nos existimamus, in precibus, quae fiunt ab aliquo in Ecclesia *ἐν γλώσσῃ*, erit mera perceptio animi, recipientis motum impressum diuinitus, cuius perceptio intima adficiat animum apte ad pietatem. Sed ille sensus non magis prodit foras, quam illi *συνάγωγῃ αἰάλητοι*, *Rom. VIII, 26*. seruitque adeo precanti, non audienti. Quod secus est, cum aliquis in precando vitetur vi cogitandi, quaerens ipse sententias, et ordinans, et verbis suis, et aptis, et notis coetui audientium, exprimens. Nam in hac actione, quae proprie est, secundum Graecorum consuetudinem loquendi, *νοῦντων, συννοῦντων*, adeoque *τῷ νοῷ*, non modo animus cogitantis pie mouetur, sed etiam pari sensu adfici possunt ii, qui audiunt. Atque hoc firmat versus quartus, ubi ait, cum, qui *ἐν γλώσσῃ* loquatur, *ἐαυτὸν οἰκοδομεῖν*, (quod v. 14. est *πνεῦμα προσεύχεται*) non alios, *ἐκκλησίαν*, pro quo v. 14. est *ὁ δὲ νῦν ἀκαρπὸς ἐστὶ*, *at mens mea nullum fructum edit*, nullam *οἰκοδομὴν* affert praesenti et audienti Ecclesiae, quod tamen fieri debet in omnibus, quae in Ecclesia aguntur. Vno loco, v. 2. *πνεύματι λαλεῖν* aliter dicitur, non vt de instrumento, sed vt de fine, ad quem

quem tendat a se loquentis ἐν γλώσσῃ quod non est alienum a consuetudine Paullina, qui libenter utitur figura variante eiusdem verbi sensum, *πλοκὴν* vocant Rhetores: *πνεύματι λαλεῖ* inquit, *μυστήρια*, *animo suo*, i. e. sibi, ut ait v. 28. *loquitur arcana*: non quae sibi sint, alioqui sibi non prodesset, quod tamen fit; nam *ὁ λαλῶν ἐν γλώσσῃ, ἑαυτὸν οἰκοδομεῖ*, v. 3. sed quae sint audientibus: *οὐδεὶς γὰρ ἀκροῖ*, nemo enim intelligit, quid dicat: estque phrasīs Graecorum et Latinorum, prope vim prouerbiū habens, *mihi ista sunt mysteria*, cum volunt dicere, nihil eorum, quae dicantur, a se intelligi.

Non aliena haec ab temporis huius cerimonia sunt, nec nihil refert, an et quomodo ista, quae de donis Spiritus sancti in Scripturis traduntur, intelligamus. Nam et scrutari opera diuina, praesertim ea, quae filio Dei et regno eius illustrando seruiuerint, conuenit, et male intellecta locum faciunt dubitationibus et opinionibus, ut vidimus, periculosis; quibus aditum praeccludere accurata rerum cognitione debemus, quibus etiam occurrere disputando posse decet, qui religionis Christianae doctrina tuendae munus vel sustinent, vel appetunt. Nec tamen talium et omnium aliarum rerum diuinarum scientiam, quamuis accuratam et copiosam, trahere ad ostentationem et vanitatem, ad fastum decet, ut in illis donis faciebant Corinthii, nec sibi docti esse debent Doctores, sed Deo, sed Ecclesiae, sed discipulis, sibi autem hactenus modo, ut scientiam conuertant ad incendendum studium pietatis et virtutis, quae debet esse in quoque hoc maior, quo est rerum diuinarum scientior. Nam omnis haec scientia comparari debet, et est data diuinitus, ut per eam et accipiamus dona Spiritus sancti, pertinentia ad salutem nostram, et augeamus, fidem et sanctitatem, quae etiam sunt maiora et salubriora utentibus, quam illa vetera fuere, quae ad fundandam Ecclesiam Christi erant data. In quo est salubris et apta huic temporis cogitatio, quam

quam die crastino, in aede Paullina, inter Sacra Eucharistica, diserta oratione alet Vir doctissimus, *M. Dan. Gotthold Iosephus Hublerus*, Fribergensis, qua, comparando Ecclesiae primae et nostrae conditionem, nihilo nostram minus felicem demonstrabit, quae donis Spiritus S. veteri concessis careat, debeatque contenta esse iis, quae ad fidem et sanctitatem pertinent.

AD
ACT. APOST. III, 21

AD
ACT. APOST. III. 21

In diebus iis, quibus Iesus Seruator, sublatuſ in coelum, primum conſpicuam fecit acceptam a Patre maiestatem, nihil magis conuenit cogitatione amplecti, quam documenta eius per Apostolos edita, iisque conſiderandis implere animos admiratione et excitare ad cultum tanta maiestate dignum. Sed eorum duo genera sunt: alterum pertinens ad intelligendam vim diuinam, cui vniuerſa natura viſibilis pareat, alterum, quod cernatur in animis hominum flectendis ad obediendum; in quo proprie intelligitur Regnum Chriſti, cuius demonſtratio prima, in vrbe Hieroſolymitana, vetere regni Dauidici ſede, inde poſt per omnes terrarum partes fieri debebat *Pſ. CX, 2.* Ex illo genere primum editum eſt in iſtis Ieſu Chriſti diſcipulis, repente vſurpantibus ſermonis genera, nunquam per diſciplinam aut conſuetudinem aliquam cognita, cum ſumma audientium admiratione: alterum per eodem, verbo ſanantes hominem pedibus captum ab vtero matris: in genere altero eſt admiranda illa magnae multitudinis ad fidem Euangelio habendam conuerſio, facta per Apoſtolorum orationes.

Sed in hiſ orationibus quaedam ſunt, nondum ſatis accurate explicata, et propterea in varias ſententias tracta ingeniis interpretantium, dum id quiſque reperire in iis cuperet, quod eſſet ſuis opinionibus opportunius. In hiſ vel maxime ſunt verba orationis ſecundae, Cap. III. ſegmento primo et vigefimo, vbi Petruſ, cohortatuſ populum, vt agnoſcerent culpam, in Ieſu repudiando et

Erneſti Opuſc. Theol. *Ee* *inter-*

interficiendo commissam, et emendarent fide in ipsum, pollicitusque condonationem tanti facinoris peccatorumque ceterorum, et salutis per Christum partae communionem, adiungit haec: ὃν θεῶν ἔρανὸν μὲν δεῖξασθαι ἄχρι χρόνων ἀποκατάστασις πάντων cet. Haec igitur hoc tempore ab ambiguitate liberare, iisque certum sensum reddere tentabimus, ne posthac ad priuatas opiniones accommodentur, sed potius prosint ad firmandam veritatem, perspicuis alibi testimoniis Scripturarum sacrarum traditam, et ad intelligendam sapientiam consiliorum diuinorum in constituenda et administranda salute humana per filium suum. Sed interpretum sententiae in diuersa trahuntur tribus de rebus: primum, cum quaeritur, verba prima quomodo accipienda sint, vtrum sic, vt Christus coelum capefferit, an, vt eum acceperit retineatque coelum: deinde, quomodo tempus definitum expressumque sit, et quod tempus intelligi debeat: denique, quae sit ἀποκατάστασις πάντων. De quibus singulis breuiter dicemus.

Atque in primo quidem, si valet aliquid antiquitatis auctoritas, magnum praeiudicium facit in partem eam, quae coelo receptum Christum intelligit, ibique ad certum tempus mansurum. Antiquissimum testimonium habemus *Iustini Martyris*, in Apol. I. §. 60. ὅτι δὲ ἀγαγεῖν, inquit, τὸν Χριστὸν εἰς τὸν οὐρανὸν ὁ πατὴρ πάντων Θεός, μετὰ τὸ ἀναστῆσαι ἐκ νεκρῶν αὐτὸν ἔμελλε, καὶ ΚΑΤΕΧΕΙΝ, ΕΩΣ ἌΝ, cet. In quibus, clarum est, eum in animo habuisse verba Lucae, eaque sic accepisse, vt diximus. *Didymus* porro *Alexandrinus* (in Catena ap. *Wolf. Anecd. Gr. T. IV. p. 17.*) sic interpretatur: ἡγητόν, ὡς ὁ Χριστὸς ἀναληφθεὶς εἰς ἔρανὸς μένει ἐκεί ἕως τῆς τῷ κόσμῳ συντελείας, ἐλευσόμενος μετὰ δυνάμεως, ἀποκαταστήσας πάντων, cet. quae totidem verbis repetita sunt a *Theophylacto* ad h. l. Nec aliter *Chrysostomum* cepisse manifestum est. Quaerit enim, quare non dictum sit, ὃν ἔρανὸς εἰδέξατο, sed ὃν θεῶν ἔρανὸν δεῖξασθαι, quasi nondum suscepe-

ceperit, respondetque, ὡς περὶ τῶν ἄνω χρόνων διαλεγόμενος, ἕτως ὡκονόμηται, ἕτως συνετέθη, Φησί, *tanquam de superioribus temporibus dicat, ita loquitur; tanquam si dicat: Sic dispositum est, sic constitutum*: quae planius edidit Enarratio Actorum, quae sub *Oecumenii* nomine editur: καίτοιγε ὑπέδεικτο ἤδη κατὰ τὸν καιρὸν τῆς ἀναλήψεως· ἀλλὰ τῷ ἰδιωτικώτερον κέχρηται τῷ λόγῳ (sc. Petrus) συνήθως τῇ ἑαυτῆ ἐπιστολῇ cet. ὥς τὸ, ὃν δεῖ ὑποδέξασθαι, (sic) τὸ δεῖ ἀντὶ τῆ ἐδῆ εἰληφθαι, *enimvero susceptus erat (in coelum) iam tempore ascensionis. Sed crassius locutus est, ut facit et in epistola (prima) cet. ut adeo oportet pro oportebat capiendum sit.* Haec omnia latebant *Beza*, cum hanc interpretationem defenderet, cogebaturque vno *Gregorii Nazianzeni*, eoque haud satis idoneo, loco, uti. Nec plus sciebant nostri, repugnantes huic rationi, ut *Chemnitius Loc. Theol. P. III. p. 165.* Nec ab Graecorum interpretatione recessisse alias Ecclesias, primum Syriaca versio docet, quae eodem modo interpretatur, tum antiquissimae versiones Latinae arguunt, quae varie quidem verbum *δέξασθαι* interpretantur, ut *recipere*, Vetus, quam Italicam appellant, *accipere*, Cantabrigiensis cum *Tertulliano* de resurr. Carn. p. m. 396. *suscipere* denique Vulgata, cum ea, quae est ap. *Irenaeum* Libri III. principio; sed omnes ita, ut ad coelum referant. Et sic accepere etiam Latini, quos nos quidem cognouimus, interpretes, velut *Beda* in lectu digna *Retractione* in *Act. Apost.* Hoc est, adscribit illis verbis, quod eidem Domino I. C. a patre dictum *Psalmistae* testatur: *Sede a dextris meis cet. Assumptus namque est in coelum et sedet a dextris Dei: in qua nimirum sede paternae maiestatis semper diuinitus manet, neque inde unquam absuit.* Quae sumpta esse e Graecis, facile comparatio doceat.

Sed veteres, cum verba ita interpretabantur, nec ipsi ea ad circumscribendam Christi maiestatem trahebant, nec alios facturos sperabant. Primus *Beza*, dum acrius

Ee 2

defen-

defendere conatur absentiam naturae Christi humanae a terris, vt veram corporis et sanguinis in Eucharistia praesentiam tolleret, hanc interpretationem ad eam opinionem firmandam contulit, eaque re, vt sit, suspectam et inuisam nostris fecit: vnde coepit interpretatio altera vulgatiores esse, et a plerisque prope canonica haberi, quae τὸ δέξασθαι, capiendi actum, ad Iesum refert, ab eoque coelum occupatum dici, defendit. Nunc, cum ille ardor disputandi refrigit, liberiori animo licet ista tractare, et diiudicare, quae sit eorum verborum sententia.

Iam primum, sumi hoc arbitramur posse, non refragantibus, qui linguae graecae usum aliquem habent, verbum δέξασθαι, cum iungitur loco, eiusdem esse attributum: locus proprie capit hominem, non homo locum. Nec ea ratio tollitur, paucis exemplis in contrarium allatis, in quibus quaedam etiam sunt aliena. Non enim sinunt vera interpretandi praecepta, ab significatione verborum propria et vulgata recedere, et sequi paucorum exemplorum auctoritatem contrariorum, praesertim in libris Apostolorum, qui illa rariora ignorabant, nisi euidens necessitas cogat: quae profecto hic nulla nec intellecta est ab antiquis, nec intelligi potest. Immo vero res et consilium Apostoli iubet manere in vsitata illa significatione verbi δέξασθαι. Est autem clarum, Apostolum docere velle, quare Christus peracta in terris expiatione peccatorum, e medio discesserit, sublatus in coelum; nempe quod ita placuerit Deo, eam interea in coelo esse et manere, sedentem a dextera sua, et remotum ab oculorum humanorum adspectu, dum durent tempora Oeconomiae Euangelicae, quae praedixerit per Prophetas. Sed huic rei magis apta videtur interpretatio illa antiquior: coeli debent Christum receptum retinere, quam recentior: Christus debuit coelum, sedem maiestatis diuinae, occupare; praesertim cum illi etiam cetera melius conueniant. Estque simillimum illud *Lyfias* Or. c. Andoc. p. 117. vbi hominem expulsam patria, nullam dicit

specu hominum redibit in terram, vt abiit ante in coelum *Act. I, 11.* Christum habebunt coeli per omne *ἀποκαταστάσις* tempus, nec ante eum terris conspiciendum reddent, quam definita *ἀποκαταστάσις* tempora exierint. *Ἀποκατάστασις* autem quid sit, in eo dissensere omni tempore interpretes, dum in explicando etymologiam potius verbi et Lexicorum vulgarium auctoritatem sequuntur, quam ipsas Scripturas audiunt; suntque nonnulli ad fanaticas opiniones prolapsi, quos ne nunc quidem euauerunt.

Optimum autem interpretem habemus Paullum *Ebr.*

IX. 10. manifeste, quam Lucas *ἀποκατάστασις* vocat, *διόρθωσις* appellansem: quo in loco etiam antiquior *Interpres* latinus *διόρθωσις* vertit *restitutionem*; pro qua *Hieronymus* rescripsit *correctionem*. Sed *διόρθωσις* opponitur a Paulo veteri disciplinae Iudaicae, per legem rituales constitutae; quae durare ad *διόρθώσις* usque tempus debebat. Vnde fit, vt *ἀποκατάστασις πάντων* nihil aliud sit, quam Euangelii clara, et ab omnibus figurarum et rituum umbris libera doctrina, per Ioannem primum denuncianda, per Iesum deinde proferenda inter Iudaeos et per Apostolos quaqua versum propaganda, in Ecclesia denique, per ipsorum aliorumque ministerium, constituta, ad salutem hominum tradenda. Etenim in ea re fuit veteris disciplinae Mosaicae emendatio et doctrinae religiosae perfectio. Neque enim in *διόρθώσις* verbo nimis premenda est etymologia, et mera correctio intelligenda: quippe hoc genus verborum graecorum etiam perfectionem et excellentiam, aliquam exprimit. *κατορθώματα* quidem et *διόρθώματα* sunt res praeclare ad salutem patriae gestae vel constitutae: in scholis Philosophorum *κατορθώματα* etiam officia perfecta, virtutes perfectae, quae mediis et vulgaribus opponuntur, in quibus tantum sunt adumbrata officii simulacra. Theodoretus quidem ad h. l. cum *διόρθώσει* permutat recte *τελειότητα*. Haec talis *διόρθωσις* vel *ἀποκατάστασις* tum
doctri-

doctrinae, tum cultus religiosi, et beata inde futura tempora, promissa fuere, ut ait Petrus, (neque enim alio trahenda sunt ista) a prophetis, primum a Mose; cuius gravis commendatio, pertinens ad doctrinam prophetae maioris, profecto spectat ad doctrinae ipsius et cultus perfectionem. In quo, ut hoc obiter dicamus, magnum argumentum est aduersus eos, qui in illo propheta, Mosi similitudinem habituro, Iosua aliosque post eum intelligunt: in quos illa noua perfectio doctrinae non cadit. Tum *David* in Psalmis pluribus, *Iesaias XI*, 9. *Ierem. XXXI*, 33. aliique prophetae, quam luculenter praedicant felicitatem temporum Messianorum propter nouam doctrinae lucem et cultus religiosi pulchritudinem? Vel in illo Psalmo, qui ad h. l. quem in manibus habemus, maxime pertinet, i. e. decimo et centesimo, quam pulcre describitur, multitudo repentina fidelium, cultu non molesto et coacto per victimas, in quo iacturae perpetuae essent rei familiaris, sed puro et spontaneo, qui est e fide, commemorandis. Et eo respici a Petro, clarum faciunt verba, quae, denunciata esse a Prophetis orta iam tempora, (κατήγγυλαν τὰς ἡμέρας ταύτας, scilicet ἀποκαταστάσις π.) pronuntiant.

Sed de verbis adhuc aliquid dicendum videtur. Ac primum errant, qui in verbo ἀποκαταστάσις praepositionem ita urgent, ut modo rerum corruptarum emendationem intelligant, etiam e *resstitutionis* verbo, quo latini interpretes fere vtuntur; cum nihil intelligi debeat, quemadmodum diximus ante, nisi maior, et vera, etiam noua perfectio religionis; ut, cum Graeci τὰ καθιεῖν dicunt, Latini *constituta*. Itaque et in Elia altero, quem Iudaei dicebant πάντα ἀποκαταστήσει *Matth. XVII*, 11. hoc est, Ioannae, nihil aliud intelligendum, quam illa melior et luculentior praedicatio Euangelii, quae nihil, nisi poenitentiam et fidem in Messiam propediem in publicum proditurum, postulabat. Origenes ἀποκατάστασιν videtur referre ad remissionem peccatorum (*Homil. 14. in*

Ierem. c. XV, 19. T. III. opp. p. 221.) quod in ea esset genus sanationis, explicans verbum e Graecis Ieremiae: *ἐὰν ἐπιστρέψῃς πρὸς με, καὶ ἀποκαταστήσω σε*, quod ille refert ad sanationem plagae et vulneris, cuius ante mentio fit. Sed in hebraico textu aliter est, nec de sanatione intelligi hebraicum verbum potest. Ceterum ea vis verbi est in N. T. vbi de manu sanata dicitur, *Matth. XII, 13.* Nec vero τὰ πάντα, quorum ἀποκατάστασις promissa fuit, alio, quam ad religionis disciplinam referenda sunt: nam nec in Ioanne ἀποκατάστασις τῶν πάντων aliter intelligi possunt: et tum in omni genere sermonis, tum in Scripturis, τὰ πάντα circumscribenda sunt eius rei terminis, de qua sermo est. Bene illa apud Ioannem IV, 25. Samaritana mulier: Scimus, inquit, Christum venturum; is cum venerit, ἀναγγελεῖ ἡμῖν πάντα, similiterque Ioannes τὰ πάντα εἰδέναι, et veritatem cognouisse, i. e. Euangelii veram et perfectam scientiam habere, permutat, Epist. primae II, 20.

Erasmus mirabatur, quare in versione latina huius loci apud *Irenaeum III, 1. ἀποκατάστασις πάντων*, per dispositionem omnium expressa esset, nec capiebat illius verbi vim: quod sane, secundum vulgatas ἀποκατάστασις πάντων interpretationes, est alienum, at, secundum nostram, vel Paullinam potius interpretationem, optime conuenit, ostenditque, in Ecclesia antiquissimis temporibus fuisse, qui ita acciperent. Nam Euangelium, quod a Christo et Apostolis traditum tenemus, est profecto dispositio, ordinatio, constitutio religionis perfecta. *διογ-
σσις, οἰκονομία* noua a Deo promissa in V. T. quod verbum per dispositionem exprimit vetus latinitas Ecclesiastica, saepe *Tertullianus*, in quo est latinitatis illius basis.

Nec praetermittenda videtur versio, quae est apud hunc ipsum *Tertullianum*, quo supra indicauimus loco: usque ad tempora exhibitionis omnium: siue ipse ita verit, siue ex aliquo versionis exemplo sumsit. Id consentit cum Syriaca, interpretante euentum omnium; quae a Deo

Deo promissa essent. Dicitur autem in hunc sensum ex-
 quilita latinitate *exhibitis*: et vetustiores quaedam versio-
 nes hoc verbo etiam τὸ ἀπαράδειξαι *Abi. I. 6.* inter-
 pretabantur. Apud *Augustinum* quidem, pluribus libris;
 hoc verbum *praesentare* vertitur: *Domine, si in hoc tem-*
pore praesentabis regnum Israel? (v. loca collecta in *Sa-*
batiarii Bibl. Ital. vers. T. III. p. 498.) quod nihil aliud
 est, quam exhibebis, praestabis, secundum promissa Dei
 antiqua. Nam et *Glossae* antiquae verbum ἀπαράδειξαι
 vix exhibere pariter ac *repraesentare* interpretantur. Et
 est haec interpretatio verbi ἀπαράδειξαι per se com-
 moda, sed hic cum contextu non satis consentit, secundum
 ea, quae supra diximus; nec cum interpretatione Pauli-
 na. Haec de interpretatione verborum. Sed ea sunt
 conferenda ad vsus doctrinae et pietatis.

Ac primum, si Christus, de consilio aeterno, in coelo
 mansurus est, remotus a conspectu hominum, dum du-
 rabit haec Oeconomia Evangelica, hoc est: ad finem vs-
 que rerum: frustra profecto alius, et intermedius inter
 primum et ultimum, aduentus Christi in terras fingitur,
 ad reuocanda in vitam Martyrum corpora, et cum iis
 regnum visibile, et quod proprie dicatur, suo in terrar-
 suo in coelis, vt quidam dicunt, exercendum, et quidem
 in mille annos: intelligiturque symbolicae illas visiones
 esse *νῦν παρὸν* interpretandas, ne pugnent cum iis,
 quae Christus et Apostoli de rebus futuris perspicue, et
 sine vltro involucri figurarum, praedixerunt. Quippe
 ad horum potius normam interpretandae sunt figurae,
 quam per has illa torquenda ad phantasiae ludibria.

Sed nos illud potius quaeramus, quare ita placuisse
 putemus sapientiae divinae, vt Christus, peracto opere,
 cuius causa missus erat, subtraheretur oculis hominum,
 in coelo tantum spectandus. Neque enim minor foret
 in terris, quam est in coelo. Quippe et hic Deus est
 hic dextra eius, ad quam confedit, i. e. maiestas, in cui-
 us conspectum venit. Et videtur potest fidelibus ad sua-

vitatem vberimum fore, si coram daretur intueri os Seruatoris carissimi, Ecclesiae vero vtilissimum, si vocem audiret Domini ipsius. Nam quae ei ab impiis iniuriae fieri possent, eae non leuiiores sunt, aut minus indignitatis habent, cum inferuntur non ita praesenti, vt oculis cernatur. Verum ista debent non sensibus nostris et ἀνθρώπων αἰσῶς aestimari, sed ad Euangelici spiritus puritatem iudicari. Nam nos, propter naturae nostrae imbecillitatem, nimis proni sumus in hanc partem, vt res etiam diuinas aliquo modo ad sensus referamus, iisque earum praestantiam metiamur. Deus autem, per Euangelium filii sui et vniuersam illam Oeconomiam Euangelicam, ab iis nos potius abducere voluit, vt spiritus ab eorum imbecillitate paulatim liberatus, acutius cernere, et veram lucem ac vim rerum coelestium capere disceret, quae in Euangelio Christi spectandae mentibus et cognoscendae proponuntur. Ei consilio sane consentaneum videtur esse, quod adspectus Christi nobis ademptus est; qui profecto si daretur nobis, cum auditu vocis eius, quamvis grata oculis auribusque res foret, tamen non posset illo modo eam nobis imprimere speciem maiestatis eius, qualem a verbo, quod in Apostolorum scriptis sonat, accipere possumus, si modo bene intellectum animis nostris identidem adhibeamus; impediret fortasse potius, propter imbecillitatem nostram. Nam illa oris species, tamen corporis modo foret: at in verbo spiritualis ac vera maiestas Christi lucet, quam cum animus recte in verbo Euangelii contuetur, repletur vera Dei patris cognitione, eiusdem vero amore; vero ei obediendi studio, vera et liquida consolatione. Quod Christus ipse dixit: *Caro nihil prodest, spiritus est, qui viuificat; at verba mea habent illum spiritum viuificantem*: id, tum dictum iis, qui sensibus metiebantur, quae de carne sua edenda ad salutem dixerat, etiam latius patet. Sed homines, vt bene Lutherus noster solebat dicere, nunquam satis aestimant verbum Dei, et ne possunt quidem: tanta est eius praestantia.

stantia. Itaque alia captant, in quibus putent esse aliquam vim magnam, et quae non sit a verbo; hoc est, in quo sensus et phantasia habeant, quo moueantur et afficiantur. Videmus Euangeliam per Apostolos praedicatum non modo non minus, sed etiam plus valuisse ad fidem hominum, quam cum ex ore Christi coram audiretur: ita dispensante rem Deo, ut intelligeretur, non ab humanis rebus, sono vocis, figura corporis, similibusque in sensus incurrentibus rebus, vim singularem aliquam proficisci, sed ab solo verbo suo, quod a spiritu Christi inuisibili proficeretur et animis hominum admoueretur. Ac nescimus, an satis digne Euangelio Christi faciant, aut multum proficiant ad id, quod spectant, qui de altera illa in coelis vita beata aut dicentes apud populum, aut scribentes populo, nimis multum commemorant adspectum Christi, amplexationes etiam et oscula, quae profecto nulla futura sunt; cum interea taceant fere de inuisibili maiestate Christi, quae nobis tum erit et mentibus nostris ad cognoscendum velut apertior, immo tota resecta, hoc est, de immensa operis ab ipso peracti ad salutem hominum praestantia, in gubernanda Ecclesia demonstrata sapientia, omnisque veritatis ab eo nobis traditae sanctitate et salubritate, quae tum planissime cognoscentur. Nam in his est verus et melior Christus, quem cum summa suauitate videbimus in coelis, etiam corpore nondum recepto; cum interea etiam iucundum erit, videre corpus illud, cuius velut instrumento usus est filius Dei, ad expianda peccata nostra, et in terris patefaciendum voce sua consilium patris de salute humana.

Sed huic coelesti et vere diuino spectaculo praeparandus est animus in hac vita, primum consilium diuinum eiusque sapientiam in auocato ex terris et conspectu hominum filio suo Iesu agnoscendo, deinde animum ad inuisibilem eius maiestatem in Euangelio reuelatam convertendo, ut eam magis in dies magisque perspiciat, eius
admira-

admiratione atque amore acerrimo imbuatur, et ita etiam sensus eius omnes assumat. Nec vero aptius his talibus cogitationibus tempus dari potest, quam quod dierum imminentium solemnia nobis suppeditant, per quae memoria operis primi recoletur publica cerimonia, quod Christus, Seruator noster, post abitum ex oculis suorum ad inuisibilem in coelis sedem, per Spiritum suum edidit. In quo opere cognoscendo et ipso videbimus, quanto plus possit in animis hominum verbi diuini vis tranquilla, quam sensibilis operis quamuis diuini magnitudo; quas profecto in iis ipsis, qui cum stupore viderant, mox euanissset sine effectū salutari, nisi verbum diuinum accessisset, quod leni efficacia flecteret animos ad fidem in Christum.



**NARRATIO CRITICA
DE
INTERPRETATIONE
P R O P H E T I A R V M
M E S S I A N A R V M
IN
ECCLESIA CHRISTIANA**

ATTENTION
TO
YOUR
EYES
IN THE
MAGAZINE
AND
PAPER

NARRATIO CRITICA
DE
INTERPRETATIONE
PROPHETIARVM MESSIANARVM
IN ECCLESIA CHRISTIANA

Cum paremus ad altiore[m] honorum theologicorum gradum producere Viros doctissimos, et de Ecclesia literisque sacris egregie merentes, eique actui, more institutoque maiorum, proludere disputatiuncula, ad literas communes pertinente; nihil accommodatius ad eorum personas videmur facturum, quam si hoc differendi officium ad aliquam literarum et doctrinae partem dirigamus, in qua eorum studium imprimis elaboravit, hoc est, ad librorum sacrorum, imprimis hebraicorum, interpretationem. Eius autem pulcherrima illa quidem, sed eadem difficillima pars est, quae in explicandis libris propheticiis versatur, praesertim qua Christum spectant, eamque ob causam omni tempore a non multis bene feliciterque tractata, et infinitis prope disputationibus referta, dum eam vel sine iusta literarum scientia, linguarum recte ad intelligendum tractandarum usu, ingenioque non subacto ad interpretandi facultatem, vel etiam non satis religiose et modeste attingunt. Itaque nobis venit in mentem adumbrare hoc tempore studiosis historiam illius interpretationis inter Christianos, apte, quoad possemus, ad usum interpretandi ipsum, et ad facultatem recte et modeste iudicandi de hoc genere interpretandi atque de interpretibus ipsis. Nam quae nos quidem ab aliis

aliis tradita cognouimus, qui historiam interpretandarum literarum sacrarum scribere instituere, ea vel parum accurata et imperfecta, vel non e fontibus hausta et ipsis interpretibus tractandis animaduersa, reperimus.

Atque primis quidem ab Apostolorum aetate temporibus, cum ii, qui Ecclesiis praeessent, non ad scholae modum docti essent, nec literas hebraicas callerent artesque interpretandi; intelligitur sponte, totam prophetas interpretandi rationem simplicem, popularem, dogmaticam potius, quam grammaticam et eruditam fuisse, qualem nunc esse volumus atque expetimus; magis per traditionem acceptam, quam ingenio doctorum repertam et cultam: qualis tum fere et cetera erat, auctore *Irenaeo*. Quod si qui aliquid ipsi conarentur, e versionibus, graeca et latina, pendebant; unde saepe ab textus hebraei sensu aberrabant, pii magis quam eruditi interpretes. Hoc ita esse, Iustini Martyris, et aliorum ex ea, et proxime secuta aetate, scripta clamant, in quibus interpretatio prophetarum oraculorum de Christo attingitur.

Erat autem tempus illud, quo crebrae disputationes essent cum Iudaeis, vel ad persuadendum, vel ad refellendum: ut tum ex aliis, tum his libris, qui contra Iudaeos illis seculis scripti sunt, planum fieri potest. Itaque, dum studiosius conquirebant e Prophetis, quibus in eo genere disputandi vterentur, arripiebant, ut sit in tali studio, quicquid ipsis aliquam speciem habere videretur, aestimantibus rem e verbis graecis latinisque, inclinabantque ad rationem mysticam et allegoricam, quo modo et ratione tractata profutura erat, nec modo apud suos, sed etiam apud Iudaeos, nimis frequentata, aut parum dextre vsurpata nocebat magis.

Atque id incommodum auctum est in Ecclesia graeca per *Origenem*, quamquam literatum interpretem, sed qui omnia historica et sensibilia ad coelestia et intelligibilia torqueret, consilio optimo ille quidem, et ad vsus Christiani populi accommodato, sed ad rationem propriam inter-

interpretandi Prophetas, et aduersarios Iudaëos refellendos inutili, planeque abhorrente, et posthac etiam materiam daturò vberriam rixandi calumniandique. Itaque cum ille iudicaret, id quod est verissimum, πάσης προφητείας κεφάλαιον, summam Prophetiae esse Christum (in *Matth.* p. 472. T. III. ed. *Ruaei*) et, si Christus et eius in his terris αἰῶν (τὰ περὶ τῆς κυρίας ἡμῶν οἰκονομίας) eximerentur e Prophetis, nihil, quod insigne esset aut ad Christianos magnopere pertineret, reliquum fore (in *Io.* p. 88. T. IV.) omnia prope allegoriis eo trahebat. In quo ille imitatores habuit prope vniuersos, qui eundem de prophetis sensum haberent, h. e. optimos quosque, alliciente etiam facilitate rei, quod, vt et *Hieronymus* iudicat, et res ipsa indicat, ad eam rationem non opus est literis multis et doctrina, et blanditur ingenii specie. Nec id modo populares, Graeci, imitati sunt, sed etiam Latini, ad quos *Origeniani* Commentarii per versiones aut compilationes, vt *Hilarii*, *Ruffini* et aliorum venerant. Sed cum *Origenes* ipse, et si qui essent ipsi similes doctrina et literarum scientia, non ignorarent, in Prophetis alia proprie de Christo, et eò vno dicta esse, alia alio modo, nec, quae ipsi de Christo interpretarentur in commentariis et homiliis, esse e genere priori; per inscitiam ceterorum ista mirifice sunt confusa, et, quae per allegoriam ad Christum interpretando relata essent, iis, quae proprie ad eum pertinerent, aequata. Itaque in disputationibus cum Iudaeis et Philosophis paganis saepe iridebantur.

Eo incommodo, vt opinor, motus, siue alia de causa, *Eusebius* Emisenus instituit primus, quantum quidem scimus, diuersa illa genera distinguere, et in interpretando sequi illud modo, quod historiam teneret, et ea modo vaticinia ad Christum referre, iis solis vt in disputando, in quibus proprie de eo et vno sermo esset, (*Hieron. Catal. Scr. Eccles. c. 119.*) quod fortasse in opere aduersus Iudaeos (ibid. 91.) fecit in primis; sicut et to-

Ernesti Opusc. Theol.

F f

tum

tum allegoricum genus, quod historiam ad res intelligibiles trahit, in dicendo scribendoque repudiabat. Cum libri eius a permultis legerentur, tamen res non est admodum animaduersa, aut reprehensa, et ad inuidiam ei faciendam tracta: siue, quod eloquentia, propter quam legebantur cupidius, rem tegeret, siue, quod nihil inuidendum esset in eius fortuna. Et tunc erant alia, quae occuparent animos et linguas calamosque.

Exstincta fortasse esset celeriter illa nouitas, nisi *Diodorus Tarsensis* ei imitator contigisset (*Hieron.* l. c. 119.) qui rem ab eo acceptam diligentius scribendo docendoque tractaret. Nec ipse multum profecisset, quamquam in clara et ampla urbe Episcopus, quod eius libri nullam ab ingenio et elegantia commendationem haberent, nec a multis legerentur: sed nactus est discipulos, ipso et doctiores et disertiores, tum alios, tum duos insignes, *Theodorum*, Mopsuestinae postea Episcopum, et *Iannem Chrysostomum*, quem et *Eusebii Emisani* imitatore facit, cum *Hieronimo* (c. 129.) *Suidas* in *Ioanne Chrysostomo*. Per eos res celebritatem maiorem et inuidiam reperit. Sed de *Diodori* disciplina interpretandi aliquid dicendum videtur.

Neque enim explicatum est satis, quod quidem reperimus, quid sit id, quod *Suidas* tradit, ab eo constitutum fuisse discrimen *ἀλλογορίας* et *θωρίαν* in interpretando, idque libello proprio explicatum: cuius nihil hodie exstat. Nam quod *Kaſſerus*, ad eum *Suidae* locum, *θωρίαν* e *Sozomeni* et *Socratis* notis locis interpretatur: vterque eam opponit τῷ ἐντῷ vel τῷ ψιλῷ γράμματι, i. e. sensui grammatico; in quo ab allegoria non differt, cum eaque sexcenties permutatur, tum apud alios, tum apud *Isidorum* Pelusiotam Ep. IV, 117. vbi v. et *Rittershusium*, qui et ἐμπνεῖα τῇ κατ' ἰσορίαν, interpretationi *historici sensus*, *θωρίαν* opponit, et itemque τῇ ἰσορίᾳ, Ep. 203. Nec satisfacit, cum dicit, *θωρίαν* esse sublimiorum rerum, *ἀλλογορίαν* in humilioribus occupari. Repugnat enim

enim vsus perpetuus veterum et consuetudo loquendi. Nobis certum videtur, *Θεωρίαν* eum ita dixisse, vt intelligeret interpretationes, quae res sensibiles ad inuisibilia et intelligibilia (spiritualia) traduceret ingenio et arte: cui generi id verbum bene conuenit per reliquum et vetterimum eius vsus; per quem rerum maxime diuinarum inuisibiliūque contemplationem subtiliorem significat. Atque haud scio, an verbi huius in ea re vsus e *Polybii* disciplina, vt aliorum multorum apud scriptores graecos Ecclesiasticos, fluxerit, qui, inter alia Philosophorum verba, et *Θεωρίας* nomen ad historiam transtulit, quae esset *πραγματικῇ*, adque Philosophiam quandam super euentis, in historia traditis, ad acuendum iudicium de rebus ipsis, quae narrarentur, et in rebus gerendis. *Ἀλληγορίαν* igitur intelligemus positam a *Diodoro* esse in iis, in quibus per figuram aliquam, de consilio Spiritus S. exprimerentur res Christi: quem sensum mysticum dicimus proprie, dicuntque veteres, si qui accuratius scribunt: vt, cum sub nomine et figura Davidis aliquid de Messia dicitur. Etenim est etiam hic proprius et antiquissimus verbi *ἀλληγορεῖν* vsus, vt dicatur tum, cum rei non suum, sed aliud nomen tribuitur, in quo suum nomen καθ' ὑπόνοιαν, sic loquuntur, intelligatur ex indiciis quibusdam. Veluti, si dicas ab Ezechiele propheta *ἀλληγορεῖσθαι Δαβίδ*. Nam sic et Clemens in *Paedag. I. p. m. 87. τὸν λόγον ἀμπελον ἀλληγορεῖ*, *rationem alieno vitis verbo appellat et exprimit*. Item *Strom. VI. p. 676. mysteria et arcana ἀλληγορεῖται, εἰς ὧς λέγεσθαι, figurate dicuntur, in aurem dici*. Ea quae vulgo nota est verbi *ἀλληγορίας* significatio, non diuersa ab *Θεωρίας* vi, est recentior, *Origenis* demum, vt videtur, temporibus nata. Inde fit, vt *Diodorus* interpretationem, quae res sensibiles interpretando in inuisibilia per ingenium conuertit, distinxerit ab ea, quae res sub nominibus alienis personisque occultatas, indagat et explicat. Et est sane vtriusque verum nec paruum discrimen. Nam

F f 2

cum

* *Sm. G. N. A. 169. X, 502.*
Op. 1702. 200.

cum primum illud genus tantum comparatum sit ad illustrandas res sacras et inuisibiles per res sensibiles, ad vsus populi, vt per sensibilia adducatur ad inuisibilia, nec sit proprie interpretandi genus, sed accommodatio illorum ad haec illustranda; alterum contra eruit reuera abdita sub verborum figuris, estque haud paullo illo superiori melius et grauius. *Facundus* quidem de *tribus Capit. III.* p. 499. diserte distinguit *mysticam* et *moralem* interpretationem Prophetarum, et quae mystice dicta sint a Prophetis, ea pariter prophetice dicta esse dicit, pag. 497. Itaque cum Diodorus dicitur a *Sozomeno* et *Socrate* τὰς *ὑψηλὰς ἐντέλειαν*, id non ad interpretationes mysticas, siue typicas pertinet, sed ad illam Origenianam, ac Philonis Iudaei imitatricem, res historicas conuertentem in morales, vnde et *moralis interpretatio* dicitur *Facundo* pluribus locis, de *tribus Capit. vt p. 496.* Nam illud quidem genus ab Diodoro seruatum esse, atque ab discipulis, adeo non dubitatum est, vt in eo vsurpando etiam modum excessisse viderentur, cum multa, quae de Christo proprie dicta vulgo viderentur, et in disputationibus cum Iudaeis vsurpari solerent, tantum *μυσμῶς*, sed vere tamē, ad eum pertinere dicerent.

Ceterum *Diodoro*, propter hanc mutationem interpretationis, nemo, neque viuo ita molestus fuit, vt rem ad haeresin traheret, neque mortuo, cum in discipulis eius, *Theodoro* maxime, id fieret. Viuum quidem semper laudatum esse tradit idem *Facundus* p. 512. propter sanctitatem vitae et puritatem doctrinae. Crediderim etiam modestiam ei prouisse viuo, quod rationem illam suam tractaret Commentariis scribendis, et tantum suo modo libris sacris interpretandis, non aliis impugnandis, et irridendis, h. e. irritandis: nec, cum *Theodorus*, etiam nominatim huius interpretationis causa, damnaretur mortuus, vlla eius mentio facta est; qui, si ille propterea damnandus erat, pariter damnari debuisset videtur: cuius rei causam idem *Facundus* p. 509. ab inuidia in *Theodorum*

rum repetit, quae *Diodorum* non tetigerit, quod in Synodo Chalcedonenſi non pariter laudatus fuiſſet: an vere, nihil attinet hic quaerere.

Vt ſummam rei faciamus, proprie ad inſtitutum noſtrum pertinentis, *Diodori* ratio interpretandi ſcripta prophetica fuit haec, vt alia eorum dicta ita ad Chriſtum pertinere diceret, vt de eo vno proprieque, vt dicit *Cosmas*, eius rationis aemulus, *Topogr. Chriſt.* V. p. 227. εἰς τὸν Χριστὸν μόνον καὶ κυρίως, intelligi deberent, κατὰ ἑκτὸν et κατὰ ἰσορρίαν: ſed ea non eſſe valde multa; alia μνηστικῶς, quae κατὰ ἑκτὸν et κατὰ ἰσορρίαν de aliis, vt Davide, Salomone, Ezechia, euentisque humanis ſcripta eſſent. Vtrumque genus propheticum, vtriusque generis ἑήσεις propheticæ dictas dicebat. Eſſe etiam, quae ad Chriſtum referrentur interpretando, exemplo Apoſtolorum ipſorum, etſi propheticæ dicta de eo non eſſent: id fieri per *Σεμειῶν*, rebus hiſtoricis et naturalibus ad ſpiritualia trahendis; quam rationem non eſſe interpretantis, ſed accommodantis, nec adeo in Commentariis, ad interpretationem, quae proprie dicatur, pertinentibus, aut aduerſus Iudaeos uſurpandam.

In hac igitur cauſſa vniuerſa nihil eſſe, quod reprehendendum ſit, nemo negauerit. Sed quae vniuerſe recta ſunt et probanda, in iis ſaepe vel peccatur, vel diſſenſus oritur, cum ſecundum eam rationem in ſingulis rebus iudicatur: in quo interdum ſit, vt etiam vniuerſa illa ratio deſeratur, atque adeo oppugnetur. Sed in tali re, et peccatis et diſſenſionibus locum facit maxime explicandi et praecipiendi ratio vaga, nullas praebens perſpicuas et certas notas veritatis, nec demonſtrans viam reperiendi, ſed modo, quid reperiendum ſit, explicans: quod fuit omni tempore frequens praecipientium vitium; eſtque ea vera cauſſa omnis controuerſiae, quae in ea re ab illis inde temporibus ſaepe interceſſere, interdum magnis cum animorum motibus. Sed nos hiſtoriam perſequemur.

In discipulis igitur *Diodori* fuere duo insignes, *Theodorus*, qui post *Mopsuestiae* in Cilicia Episcopus fuit, et *Ioannes*, post *Chrysostomus* appellatus. Et hunc quidem ex ea disciplina nihil inuidiae tetigit; nam et moderatius ea ratione utebatur, nec in haereseos suspicionem ac crimen alia de causa venerat: tota eius moles inuasit *Theodorum*. Et ille quidem viuis irritauerat interpretationis ab *Origene* ortae studiosos, quae erat longe maxima doctorum pars, scripto aduersus eorum rationem libro proprio, qui contra *Allegoristas* vulgo dicitur. *Facundus* titulum facit, de *Allgoria et historia contra Origenem* III. pag. 496. vbi et locum e praefatione ad *Cerdonem* quendam affert, cui opus illud inscripserat: quod contra opus, ut aduersus alias reprehensiones, scripsit *Eusebius* in *Apologia Origenis*, cuius, sub *Pamphili* nomine, Liber primus exstat latine versus ab *Rufino*, inter *Hieronymi* opera et *Origenis* ex editione *Ruasi* T. IV. Sed in eo nihil ad *Theodorum* proprie, et ad hanc causam pertinet, praeter cap. 6. in quo defenditur *Origenis* ab reprehensione, pertinente ad rerum historicarum interpretationem, quae sensum historicum plane tollebat. Sed interpretationis Theodorianae ratio demum in crimen haereseos, Iudaismi nomine, vocata est per occasionem controuersiae Nestorianae, in cuius societatem mortuus vocatus est, quod praeceptor *Nestorii* fuerat, oique in errore eo proluisse credebatur, propter quem accusatus et damnatus est, ut patet ex Actis Concil. Constantinop. II. et Epist. *Iustiniani* Imp. nuper in *Bandini*, V. C. Catalogo, Bibl. Medic. T. I. p. 166. edita: in qua multa e libris *Theodori* fragmenta exstant, ut alio loco indicavimus. .s. J. M., 482.

Sed interpretationis Theodorianae ratio quae fuerit, optime, ut opinamur, cognosci potest ex *Facundi* illo opere, eiusque Libro tertio, qui eius interpretationis defensionem habet in eam partem, ut ea liberetur ab haereseos Iudaicae et impietatis crimine. Etenim plane
intelli-

intelligitur, eam vniuerse a Diodoriana nihil diuersum
 habuisse. Nec vero illa vniuersa Prophetarum interpre-
 tandorum ratio reprehensa est; neque enim aliquid vitii
 habet; sed vsus, quod nimis pauca loca eorum καὶ ἰσο-
 γίαν ad Christum in Commentariis retulisset, veluti in
 Psalmis tantum tres aut quatuor; in ceterorum interpre-
 tatione, quae ad Messiam ab aliis vocarentur, fere cum
 Iudaeorum magistris consensisset, quod etiam discipulus
 eius *Theodoretus* pluribus locis iudicat. Quanquam for-
 tasse etiam apud quosdam hoc ad Iudaismi crimen voca-
 tum est, quod secundum textum hebraicum interpretatus
 esset, ex hebraei sermonis natura, et contra versionem
 graecam latinamque, quae e graeca facta erat. Nam id
 etiam aliis accidit, nominatim *Hieronymo* propter versio-
 nem latinam, quam ex hebraico fecerat. Causa rei erat
 haec, quod doctores Ecclesiae versionem graecam, Iu-
 daeorum graecorum fabulas de eius origine secuti, aucto-
 rem habere Spiritum S. credebant, eamque ob causam tex-
 tum hebraicum Iudaeorum, quod ab ea discreparet mul-
 tis locis, saepe et iis, quibus in disputando vterentur con-
 tra Iudaeos, corruptum ab ipsis consulto iudicabant.
 Itaque quicquid in interpretando cum textu hebraico con-
 sentire dicebatur, id, si discreparet a sententia, quam ipsi
 in verbis graecis videbant, pro iudaico repudiabant. Nam
 quod ad interpretationem V. T. attinet, qua est gram-
 matica, pendetque ab intelligentia linguae hebraicae;
 et fatentur, qui eius reliquias in Catenis cognouerunt
 atque exeusserunt, etiam si improbantur eius interpreta-
 tiones vaticiniorum de Christo, eam esse eiusmodi, vt
 egregium et hebraismi bene peritum virum arguat; et
 res ipsa quemque idoneum iudicem doceat: qua de re
 etiam liquidius iudicari posset, si, qui in Vindobonensi
 et Medicea Bibliotheca scriptus existat Commentarius in
 XII. Prophetas minores, ederetur: cuius rei spem, fa-
 ctam a *Bandurio*, destituit mors viri. Sed de eruditione
 viri hebraica post, per aliam similemque occasionem, ali-

quid dicemus. Apud veteres quidem, etiam in Ecclesia graeca. Orthodoxos, etsi eius errores alios improbant, et illam rationem interpretandorum vaticiniorum de Christo, tamen in magno pretio fuit, ut *Interpres* vniuersae, eiusque Commentariis saepe in interpretando vti sunt. Atque ego reperi, multos ex his, eosque maxime illustres, secutos eum esse in multis, etiam in talibus interpretationibus, quarum rationem vniuersae improbant; inprimis hos, qui se dicerent media via incedere velle, inter Origenianam et Theodorianam. Nam cum illa via media certis limitibus definita non esset, accidit his, quod omnibus, qui nihil nisi *viam mediam* iactant in aliqua re, ut fluctuarent et errarent, e casuque magis penderent, quam e certa ratione, ut nuper de *Theodoro* notauimus; in *Bibl. Theol. Vol. IX. p. 490.* Apud Syros autem, ut olim, ita cum maxime vocatur *Interpretis* nomine simpliciter, quasi Princeps interpretum omnium, ut docet *Renaldotius* Liturg. Orient. T. II. p. 622. ad Liturgiam Interpretis, i. e. *Theodori*: quanquam id ad Syros Nestorianos pertinet, ut res ipsa docet, et *Assermannus* *Bibl. Orient. T. III. P. II. p. 127.* sq.

Atque hinc quasi classes quaedam interpretum propheticorum exstiterunt. Nam erant, qui Theodorianas interpretationes fere probarent, ac defenderent, quanquam admodum pauci: qualem *Cosmam Indopleustem* cognouimus, tum in interpretatione Psalmorum, quatuor tantum Psalmos *ααθ' ισογλαυ* ac proprie de Christo accipientem, *Topograph. Christ.* p. 90. tum in aliis Prophetis multa cum *Theodoro* de hominibus dicta intelligentem, et per mysticam modo rationem ad Christum transferentem; velut illud Zachariae: *Gaude filia Sion, venit rex tuus*, ad Sorobabelem, sed ut hyperbolen agnoscat, et euentum proprium et *ααθ' αινεβειας* pertinere dicat ad Christum Dominum. Nam et Commentarii in Psalmos titulus, a veteribus traditus, est eiusmodi, ut et historiam et mysticam interpretationem secutum esse appareat.

Hic

Hic commentarius, vt hoc obiter addamus, qui etiam-
 num scriptus exstat, siue in Vaticana, siue alia qua Italica
 Bibliotheca, vsurpatus est ab *Agellio*, in eruditissimo in
 Psalmos Commentario, insertis pluribus ex eo excerptis;
 quod non animaduersum *Fabricio* in *Bibl. Gr.* nude eius
 indicium facienti e *Cangii Gloss. Gr.* in Addendis ad Vol.
 II. p. 830; ne *Montesalcomio* quidem in Prolegom. ad *Cos-
 mae Topogr.* qui huius tamen Commentarii mentionem
 facit in *Proleg. ad Eusebii Commentar. in Psal.* p. V. nec
 ignorabat *Agellii* Commentarium, vt in iisdem animad-
 vertimus. *Agellius* ipse Commentarium non contemnen-
 dum iudicat. Alia classis fuit eorum, qui se velut Ecclési-
 cos profiterentur, et, vt supra dixi, via media incedere
 vellent. In quo delectu illi sane interdum non falsi sunt;
 sed tamen certo et constanti gradu non inceserunt, neu-
 triusque partis gratiam tenuere. Ceterum ipsa modestia
 eorum probanda est, etiam nonnullorum in hoc, quod,
 cum historicam interpretationem defendunt, aliis liberta-
 tem iudicandi relinquunt, et vicissim sibi eam concedi
 velint. Tertium genus est, quod studiose hoc agit, vt
 quoquo modo quam plurima ad Christum referat, nec
 modo vt mystice ad eum pertinentia, et per allegoriam
 seu accommodationem, sed etiam proprie, eosque, qui
 historiam ad humana accommodant, quanquam in iis fi-
 guram Christi agnoscunt, Iudaismi accusant; in quo et-
 iam honori Christi et Prophetarum vniuersaeque Script,
 Sacr. et religioni christianae, se consulere putant. Atque
 hoc genus tum in Graeca, tum in Latina Ecclesia nume-
 rosissimum fuit, et labentibus temporibus, cum literarum
 hebraicarum et graecarum studia vel nulla, vel tenuia es-
 sent, tenuit Ecclesiam, ad fidem et pietatem sine noxa;
 immo etiam vtiliter, sed ad vsus disputandi aduersus lu-
 daeos, et ad accuratam intelligentiam Scripturarum S.
 parum perite: qua de re aliquid dicemus paullo post:
 nunc sententias Theologorum, inprimisque interpretum
 illustriorum, primum veterum, nec modo qui post *Dia-*

dorum Theodorumque fuere, sed etiam superiorum, tum et ceterorum, qui proximis a sacrorum et literarum restitutione temporibus fuere, de prophetia, et modo rependiendi sensus, et ipsum cuiusque modum interpretandi, testimoniis exemplisque proferendis, commemorabimus, ut, ex quo quisque genere fuerit, intelligi possit.

Ac prophetiam quidem vniuersam, consensu tradunt, ipsam esse obscuram et ad intelligendum difficilem, quippe etiam parabolis et allegoriis inuolutam; idque ipsos prophetas interdum fateri, ut habet *Irenaeus II*, 22. *IV*, 26. unde eam ἀντιλογίαν esse hominibus, altercandi ac disputandi materiam. In quam partem late disputat *Clemens Strom. VI*. p. 677. ut alios multos mittamus: nec omnium dicta commemorare attinet: neque enim profuerint ad ipsam interpretandi rationem: quippe nec causas illius satis explicant, nec suppeditant plerique aliud, quod ei dissipandae ac demendae profit, praeter euentum, quo omnem obscuritatem sublatam dicunt. Etiam quod *Chrysostomus* in eam rem habet, non multum profuerit: sed id explicandi causa ponemus, et habere etiam aliam utilitatem potest. In *Comm.* igitur in *Psal.* p. 325. *Matth. XXI*, 42. inquit, si, quod e *Psalmo CXVII.* ad Christum refertur, non cohaeret cum historia illius *Psalmi*, sed vaticinium mediae historiae insertum est; non mirum aut nouum videri debet: nam plura alia ita in *V. T.* proposita sunt, διὰ τὸ δὲ στυγιάζειν τὴν τῶς, ὥς μὴ καὶ τὰ βιβλία αὐτὰ ἐξαλειφθῆναι: propterea quod ea oportuit inumbrari et obscure tradi tum, ne libri ipsi abolerentur, ab Iudaeis videlicet, qui ista vaticinia non erant toleraturi: quae est utique mirifica ratio. Immo longe alia causa rei intelligenda videtur, quae ad iudicandum de toto genere prophetiarum, et earum interpretandarum ratione profit.

Est igitur verissima et praecipua causa rei in consilio diuino super modo promulgandi, et perficiendi, quae de salute hominum per filium suum reparanda decreuisset: quod

quod eam rem primum patefieri vellet per multos et varios gradus, perfici autem post longas et multas praeparationes. Itaque primum nihil aliud placuit promitti, quam hominem, per quem salus redderetur: post et ille ipse, et salus per eum paranda, cum bonis eius omnibus, per magnam nominum varietatem, variasque imagines et figuras rerum hominumque, adumbrata sunt, quarum vim vix intelligeret, qui non diuinitus erudiretur, aut quae per euentum demum acciperent lucem suam, et hanc ipsam tum quoque per multas demum admonitiones et demonstrationes capiendam oculis animorum humanorum. Ad hanc igitur quasi legem et normam consilii diuini, prophetia tota, quae proprie dicitur, de Messia composita fuit necessario, vt consentirent inter se omnia, doctrina, et cultus religiosus, et historia populi. Sed ne plane aenigma fieret totum hoc, vt non dubitat appellare prophetiam omnem *Irenaeus*, eiusque, in praesens certe, vsus vniuersus tolleretur: immiscenda erant necessario, quae non obscurarentur figurarum inuolucris, sed quae historice ac proprie dicerentur et acciperentur, praeberentque ansam quasiprehendendorum, quae sub istis inuolueris laterent et in lumen proferendorum per eos, quibus Deus hoc mandare destinasset, aut concederet, et quibus temporibus id fieri placeret: qualia esse, saltem quaedam, ad Iudaeos conuincendos euidentissima, in confesso est in omni genere Interpretum prophetico- rum, etiam apud Iudaeos ipsos semper fuit. Haec obscuritatis propheticae causa recte cognita quos vsus habeat, post videbimus. Nam aliae, etsi non improbandae aut omnino falsae, v. c. ad euentum impediendum valituram fuisse claritatem summam vaticiniorum; quo pertinent *Chrysostomi* verba, ante memorata, et plura apud eum loca, vt ad *Es. II.* p. 20. et in homiliis, de *prophetiarum obscuritate*, p. 175: eae igitur, ad iudicandum de interpretandi ratione ac modo, nihil admodum profunt. Ad interpretes veniamus, in quibus recensendis

dis non illa tria supra constituta genera seruabimus, sed ordinem temporum sequemur. Id nobis erit ad praesentis temporis rationem et breuitatem aptius.

Proximus igitur ab *Origene* est *Eusebius Caesariensis*, cuius et in *Psalms*, et in *Esaïam* Commentarios habemus, a *Montefalconio* primum editos, magnos illos quidem mole, sed tamen non integros, et varie, forte et a variis, excerptos ex integris Commentariis. In *Esaïam* quidem Commentarii exemplum ab edito diuersum pluribus locis in Bibliotheca Medicea esse docet Cl. *Bandinus* in *Catal. T. 1. p. 90.* ex altero autem ab *Agellio* plura commemorata vidi, quae in edito non reperiuntur, nominatim ad Psalmum CX. (Gr. CIX.) in quæ quæ sunt in Montefalconiano exemplo, scholia sunt magis e Commentario Eusebiano, quam Commentarius ipse. In his igitur, quæ in Psalmos scripsit, plane sequitur Origenianam rationem, cuius fortasse Commentarium in Psalmos compilauit. Nec alia ratione vtitur in altero; quod etiam olim reprehendit *Hieronymus*, quamquam ipse Origenianæ rationis admirator et defensor. Sed *Eusebius* promiserat, se historiam secuturum et τὸ ἔνθεν, nec id fecerat: id vero improbat *Hieronymus*: veluti, statim c. primo, versum 2. 3. ad Christum a Iudæis spretum refert: eum contemptum προφῆτικῶς αἰνέσασθαι, putat. Eandem sectam sequitur *Athanasius*, vt vel e prooemio in Psalmos patet, apud *Montefalconium*, Collectione noua PP. T. II, p. 60. Nam Dauidem, ait, cum esset Propheta, spiritalia magis et inuisibilia vidisse, quam externa et sensibilia, velut, cum aduersus hostes preces faceret, demonas, quam homines aduersarios, et contra illos, non hos preces fecisse, sub nominibus visibilium hostium, et, si non ita interpretemur Psalmos, nullum ex iis fructum capi: itaque videndum esse, vt verborum sensus assequamur secundum hanc rationem, et v. c. in Ps. I, 1. in verbis *impiorum, peccatorum et irrisorum*, intelligamus tria hominum genera tempore Christi, *Scribas*,

bas, Phariseos et Legis doctores. Et huius generis sunt in istis plurima. Psalmo II, vt hoc obiter addamus, verba, *Ego hodie te genui*, de natalibus Iesu accipit.

His adiungimus *Hilarium Pictaviensem*, auctorem Commentariorum in Psalmos: qui, si non est interpres et compilator Origeniani Commentarii, quod contra pugnat *Coustant*, tamen in summa operis et modo interpretandi ab *Origene* totus pendet, omnia in Psalmis prophetica esse contendens, et in singulis prope infidelitatem, ita loquitur, exprobrans iis, qui non totos de Christo accipiant, vt in secundo: in quo ceterum illud, *tu es filius meus cet.* ad Christi reditum in vitam refert, vt multi ex orthodoxis interpretibus antiquis. Sed huic similes fere sunt ceteri Latini interpretes prophetici, vt *Ambrosius*, *Hieronymus* item, certe in summa rei, et *Augustinus*. Itaque de singulis separatim dicere nihil attinet: in oriente erudito nos continebimus.

In quo primus nobis occurrit *Ephremus Syrus*, cuius Commentarios, in plerosque Prophetas, syriace et latine editos, debemus *Assemanno*. Eum igitur ab Origeniano vitio intactum, et propiorem *Diodori* aut *Theodori* rationi, vel saltem *Chrysostomi*, *Isidori*, similiumque moderationi, qui historica et prophetica permixta esse, saepe in vno eodemque orationis tenore, in eodem etiam Psalmo, alia *κατὰ ἑνὸν*, alia *μυσικῶς* prophetica esse, defendunt. Exempla aliquot insignia commemorasse sat erit. Ad *Esaiæ* igitur c. IX. (T. II. p. 36.) scribit in hanc sententiam: „et si ex his, quae hoc loco leguntur, nonnulla ad Ezechiam pertinent, sunt tamen alia, quae ad illum nullo modo quadrant: sed et illa ipsa, quae ad eum referri possunt, iuxta arcanum et mysticum sensum, ad illius Dominum, ex eadem stirpe nasciturum, traducenda sunt.“ Secundum hanc rationem fere interpretatur c. XI. *surticulum Iesse*, vt ad Ezechiam referri possit, sed melius ac plenius ad Christum. Tum *Ioëlis* vaticinium de effundendo diuino spiritu refert ad populum, qui Ezechiae tempo-

tempore fuit, vt hoc pignore praenosceret futuram Senacheribi cladem; et prodigia ibi denunciata primum ad Ezechiae tempus, iterum ad tempus Gog, sed ad vtrumque ex parte, perfecte ad Christi aduentum vtrumque. Item *Amos* c. IX, 11. ait euentum habuisse in reditu Iudaeorum e seruitute Chaldaica, iterum et plenius in crucifixione Christi: v. 13. autem secundum obuiam significationem verborum Sorobabelis tempus respicere - secundum sublimiorem intelligentiam spiritus, coelestia dona post resurrectionem Christi. Quae denique de *Zemach Zach. VI*, 12. dicuntur, ad Sorobabelem pertinere iudicat, per mysticam rationem de Christo praedicta esse. Sed haec specimina Ephremianae interpretationis sufficiunt, vt opinor, ad iudicandum.

Eadem via incedit, etsi in singulis exemplis ab *Ephremo* discrepans, *Basilius*, magnus illius admirator. Placuit facit vel vna clausula praefationis in Commentarium in *Esaiam*, cuius pars nobis reliqua est. Nam enarrato totius operis prophetici argumento historico, rebus ibi traditis vbique, ait, adspersa esse, quae ad Christum pertineant: τὰ περὶ Χριστοῦ πάση τῇ προφητείᾳ ἐνεσπαρμένα, ἐκάστη τῶν καθ' ἱστορίαν λεγομένων καὶ τῶ μυστικῷ συγκαταπεπλεγμένων (sic enim pro συγκαταπεπλεγμένων scribendum, e vestigiis Cod. Paris. nisi quis etiam καὶ delerit malit.) In quo mixturae illius Ephremianae forma manifeste exprimitur: quam et in interpretando sequitur; nisi quod, vti diximus, in singulis locis, vt *Es. VII*, 14. et c. IX. ab eo dissentit, non ad mysticam ea, sed propriam rationem referens.

Clarius interpretandi arte *Io. Chrysostomus* est, sed via et ratione in hoc genere non dispar, idem de indole propheticorum scriptorum sentiens, eodemque modo interpretans orationem prophetarum, vt contextum ipsum plerumque faciat historicum, eique subinde inserta dicat, quae proprie de re Christi intelligantur, ceterum etiam in iis, quae historiae humanae sint, abdita existimet, quae ad

ad Christum pertineant. In quo dicit esse ad *Pf. XLIV.* p. 165. discrimen Euangelistarum et Prophetarum. Nam illos quidem ex ordine res Christi enarrare debuisse, Prophetas ubique ὀλίγα τινὰ μέρη εἰς τὴν ἰστορίαν ἐμβάλλον-
τας καὶ συσκιαζόντας ἀποχωρεῖν. In Psalmis quidem sunt, quos totos ad Christum refert, refellens etiam Iudaeos, qui ad homines trahere conentur, vt *Pf. XLIV.* CX. et alios quosdam; in quibus dignum est cognoscere, quomodo eos refellat: sed saepissime tantum particulas Psalmorum ad Christum refert eo, quo diximus, modo, interrupta historia et oratione ad homines pertinente, vt etiam Psalmo octauo. Exempla pauca alia attingemus. Psalmi igitur CIX. argumentum vniuersum refert ad Davidis historiam, sed propheticè de Christo insertam esse particulam, pertinentem ad proditorem eius Iudam. Petrus, inquit, Psalmum hunc refert ad Iudam, μαλλον δὲ ἢ τὸν ψαλμὸν ἅπαντα, ἀλλὰ τῷ ψαλμῷ τὸ μέρος. p. 145. post quam particulam Dauidem ad se redire, καὶ γὰρ τῷτο προφητείας ἔδος, μεταξύ διακόπτειν καὶ ἰστορίαν τινὰ ἐμβάλλειν, καὶ μετὰ τὸ ταῦτα διεξελθεῖν πάλιν ἐπὶ τὰ πρότερα καὶ ἐπανέβαιναι. p. 246. Similiter *Pf. CXVIII.* (Gr. CXVII.) tantum v. 22. ad Christum proprie refert, et addit: εἰ δὲ μὴ δοκῇ ἐξ αὐτῆς ἡγεῖσθαι τῆς ἰστορίας τὸ ἐρημένον, ἀλλὰ μέσσην τὴν ἀκολουθίαν διακόψασα ἡ προφητεία ἐπιστῇ, θαυμαζὸν εἶναι εἰ δὲ καινόν. ἔγω γὰρ αἱ πλείους τῶν προφητειῶν, διὰ τὸ δεῖν αὐτὰς συσκιαζεσθαι τίως cet. Atque ex hoc genere ait esse locum *Esf. VII.* 14. Sed in *Esaiae* capita octo habemus homilias, sine dubio *Chrysostomi*, eximias, in quibus insignia interpretationis vtriusque, et eius, quae proprietatem vindicat, et quae sub figuris verborum latentes sensus indagat, exempla reperiuntur, vt posterioris generis ad c. II, 2. qui locus exempli et regulae vim habere potest. Enimuero, ex paucis quae *Chrysostomi* in Prophetas inde ab *Esaia* habemus, si cui non satis liquido de eius ratione iudicari posse videatur, vicarium ei sumat.

Theodo-

Theodoretum, qui eum in his plerumque secutus est, rationibus iisdem ad confirmandum usurpahdis. Exempli causa legent, qui volent, quae ad vindicandum Christo *κρυφῶς* illud *Esaiæ* c. VII, 14. ab utroque dicuntur,

Sed ad hunc *Chrysostomi* discipulum veniamus, *Theodoretum*, quamquam et *Theodorum* praeceptorem habuit. Eum vero ab *Theodori* ratione discessisse, eamque cum *Chrysostomo* mitigare tentasse, mediam viam quandam tentando, supra iam monuimus, estque clara eius professio in *praef. in Comm. in Psalmos*, non longe a principio, cum se dicit et Allegoricorum, et eorum *ἀπορρίαν* vitare, qui prophetias historiam faciant, nihil ad Christum pertinentes. Itaque refellit saepe in Commentariis in V. T. scriptores *Theodori* interpretationes, quibus proprie aut omnino de Christo dicta prophetica intelligenda negabat. Nec tamen omnes proprie et historice de Christo interpretatur prophetias, sed quasdam etiam mystice. *Τῆς προφητικῆς συνθήκης*, inquit *praef. in Es. p. 2.* καὶ μὴ ἐστὶ σαφὴ καὶ γυμνὴ ἔχοντα τὴν διάνοιαν, τὰ δὲ προφητικῶς εἰρημύνα καὶ ἐμπνεύσεως δόμματα: ex quo genere sunt mystice dicta. Sed illam mediam viam quomodo secutus sit, ante monuimus. Nec modo a *Theodori* ratione in Psalmis discedit, sed etiam *Chrysostomum* deserit, ut qui v. c. *Pf. CIX.* totum Christi preces facit. In *Pf. CXVIII.* similior est *Chrysostomo*, sed mysticam pariter rationem sequitur. Nam hymnum quidem historice tribuit Iudaeis reuersis in patriam, ceterum magis congruere his, qui e gentibus credidere, quod in eo res horum potius adumbratae sint. Atque huius generis exempla sunt permulta. In prophetis eandem rationem tenet, interdum tamen historice modo, sine respectu villo ad Christum interpretatur, in quibus alii alterutrum defendunt, velut *Zach. VI, 12.* quem locum simpliciter de vno Sorobabele, καὶ ἰσοφίαν, accipit, sine villo ad Christum respectu, quem alii in eo loco agnoscebant, ut sit etiam nunc.

Omnino

Omnino multum est dissensionis inter Interpretes, etiam eos, qui idem videntur spectare, ut hi, de quibus diximus, qui inter Origenianam et Theodorianam rationem medii esse voluerunt: cuius rei causam supra commemorauimus. *Chrysostomus* interpretans Prophetarum capita in partem eam, ut ad Christum referat, vindicetque aduersus eos, qui aliter interpretabantur, spargit ille quidem, ut inprimis in iis, quae in *Isaiam* scripsit, quaedam interdum, quae ad rationem praecipiendi de modo interpretandarum prophetiarum spectant, quod et facit *Theodoretus*; sed ea non satis definite sunt aut sufficient, et interdum decernunt magis, quam decet; vtunturque argumentis e natura rerum non satis euidentibus: cum id genus alias minime omnium sit contemnendum. Ad praecipiendi rationem magis spectantia quaedam *Isidorus Pelusiota* habet, discipulus et ipse *Chrysostomi*, elegantis ingenii et doctrinae vir; cuius commentarios quidem in libros biblicos nullos habemus, sed tamen epistolas plerasque, ad interpretationem scripturarum pertinentes, in quibus etiam quaedam ad prophetica scripta pertinent. At maxime insignis ad hanc rationem, de qua nunc agimus, est epistola 203. *libri quarti*. Ibi enim hoc agit, ut regulam interpretandi prophetica dicta scribat, quam exemplo Psalmi LXXII. illustret. Incipit ergo ab eo, quod e *Chrysostomo* commemorauimus, ut Prophetas, dicat, non simpliciter et planissime proposuisse vaticinia rerum futurarum, sed res futuras praesentibus miscuisse ita, ut et, qui tum essent, aliquid inde utilitatis caperent, post euentum autem futuri res praedictas planissime possent cognoscere. Id adeo se exemplo illius Psalmi demonstraturum, ut inde de aliis iudicari posset. Nam eum Psalmum, secundum sensum obuium, pertinere utique ad Salomonem, sed ex parte; cetera ad Christum, cuius Salomo figuram habeat. Vtriusque autem generis discernendi hanc legem scribit, ut, quae humilia et humana sint, ad Salomonem, cetera, huma-

Ernesti Opusc. Theol.

G g

nitatis

nitatis modum excedentia, ad Christum referantur. Itaque non esse, omnibus eodem modo interpretandis; vim faciendam prophetis, nec, quae historice, de rebus illorum temporum, dicta sint; accipienda de rebus futuris, et ad Christum pertinentibus: quam ille *Σωφίας* vocat; nec, quae ex hoc genere sint, ad illud per vim trahenda esse. In quam sententiam etiam aliis quibusdam in epistolis, tractans loca prophetica, disserit. Et est utique illa tum obseruatio; tum inde ducta regula valde bona, sed nec omnibus locis apta, et interdum difficilem applicationem reddit tum linguae hebraicae indoles, tum rerum ipsarum natura. Itaque cum nemo facile regulam ipsam repudiet, tamen in singulis locis interpretandis ad hanc regulam, valde discrepant. Sed in historia pergemus.

In eandem igitur aetatem incidit *Cyrillus* Alexandrinus, cuius Commentarios propheticos multos habemus. Sed de interpretatione prophetarum quid senserit, plenum est e praefatione Commentarii in *Esaiam*, et in *Zachariam*, (T. II. et III. Opp.) itemque e *Glaphyris*, 1. et selectis et insignibus locis, *Pentateuchi* L. I. pr. Credo bat ille, Vetus Testamentum totum esse figuram Christi et N. T. quod suo modo verum est; sed vniuerse dictum habet ambiguitatem lubricam in interpretando, quae et ipsum decepit, et ad Origenianam rationem interpretandi nimis inclinauit; praesertim qui esset, vt *Athanasius*, de quo supra, exercitatio in dogmaticis controuersiis, quam in linguis tractandis. Sed tamen historiam interdum relinquit, et in ea tantum figuram Christi agnoscit; verum, quae non ingenio humano ficta sit, sed consentiat consilio diuino, vt in *Zemach Zachariae* (T. III. p. 705.) et si quid aliud adiungit e genere morali, per similitudinem tantum, doctrinae illustrandae causa facit, vt in *Ioel* III, 9. et 24. (T. III. p. 234. 244.) et locis aliis.

Possemus referre plures, vt *Seuerum* Antiochenum, *Euthymium*, et alios serioris aevi interpretes Prophetarum

ram, quorum modus interpretandis reliquis quibusdam, ut illius in *Catenis*, huius ap. *Monachium* in *Var. sacr. T. I.* (est proem in Psalmos) cognosci potest. Et est in iis interdum aliquid boni iudicii; sed magis magisque ad allegoricam illam *Origenis* disciplinam lapsi sunt, studiis doctrinae magis magisque labentibus, et omnibus e Commentariis superiorum pendentibus, e quibus maxime sequebantur eos, qui ad rationem dogmaticam et concionatoriam aptissimi essent. Itaque longius non progrediemur, ne nimis excreseat narratio. In Ecclesia latina reperiuntur vestigia reuiuiscantis studii prophetici, per tempora Carolingica, incitantibus Doctorum studia Iudaeis, qui in Hispaniam et Galliam copiosius infusi, et per copias e mercatura, potentiae et gratiae plus, quam satis esset, etiam in aulis Regum nacti, ut ex *Agobardi* aliorumque scriptis et querelis discimus, insolenter doctoribus Ecclesiae illudebant. Nam et hebraicas litteras quidam discere instituerunt, pro modo facultatis, quam quidam Iudaei, qui Christiani facti essent, dabant, aut eos consulebant super textu hebraico, quod *Rhabanum Maurum* fecisse scimus *), ut pugnare contra Iudaeos possent; in quo scientia et interpretatio scripturarum propheticarum necessaria erat. Sed ea res intra angustos fines constitit, et qui tum, sequentibusque temporibus, exorti sunt in Prophetas Commentarii, magis e veteribus Latinis collecti, quam auctoris modo et arte scripti sunt. Itaque ista tempora tantum attingenda putauimus. Nec immoramur iis, per quos aurora litterarum hebraicarum et melioris interpretationis exorta est, ut per *Liranum*: ad illa ipsa beata tempora, quae institutionem verae interpretationis biblicae atque doctrinae habuere, ad seculum *Lutheri*, ita appellemus licet, transibimus.

G g 2

Et

*) v. Comm. eius in libros Regum praef. et Marcianae Prolegom. ad Hieron. Biblioth. diu. III, 6.

Et *Lutherus* quidem ipse, etsi in Commentariis, quos ad vsus populares scripsit, vt in Psalmos, veterem rationem sequitur, quam e disciplina Augustini acciperat, allegoria tractantem: tamen intelligebat, vulgaribus interpretationibus prophetiis ad Christum quaedam trahi, quae secundum accuratum iudicium eo non pertinerent, vt ex epistolis eius alio tempore commemorauimus *). Sed exortus est mox non paruus numerus interpretum propheti-
corum, *Phil. Melanchthon*, *Aretius Feknus*, i. e. *Mart. Bucerus*, *Oecolampadius*, *Pellicanus*, *Musculus*, *Calvinus*, *Esromus Rudingerus*, de quorum methodo dicendum videtur.

Melanchthon igitur primum illam veterum regulam saluberrimam et verissimam agnoscit, et subinde inculcat, Prophetas rebus historicis suorum temporum et humanis immiscere res Messiae, et promissiones de Messia et eius bonis, Ecclesia cet. v. Argumentum *Ierem. T. II. opp. p. 408. et admonitionem de hebdomadibus Dan. p. 404. praef. ad Zach. p. 533.* vbi dicit, esse obseruandum, vbi de sua politia loquatur; nec necesse esse omnia in allegorias transformari et ad Christum referri. Ea regula saepe ab eo commendatur in Psalmis, nec totum statim Psalmum ad Christum vult referri, cuius particula aliqua ad eum pertineat. Item in iis vult obseruari, vocem Dauidis esse simul vocem Christi, h. e. Dauidem, cum de se et suis rebus, bonis, malis, loquatur, simul de Christo, et nomine eius loqui, velut *Pf. XXII.* quod mala Dauidis sint figurae malorum Christi. cf. ad *Pf. III.* Contra *Pf. XVI.* solam Christi vocem agnoscit *Ἰδαυναλικήν*. In quo genere ponit et secundum, *XLV. OX. v. praef. ad Pf. CX. p. 714.* et videtur non valde multos huius generis agnoscere. Vtitur tamen interdum etiam allegoria, sed raro, vt in *Daniele*, vaticinii ad Antiochum historice pertinentis accommodationem ad Antichristum agnoscit cet.

In

*) in *Diatr. de libertate ingenii in causa religionis.*

In his omnibus ei similes sunt ceteri, sed interdum longius progrediuntur et liberius interpretantur, ut *Felicius in Comm. in Psalmos*; libro erudito, at raro, interdum duplicem sensum faciens, ubi ille vnum agnoscit, sed vtrumque verum et diuinum, ut in *Pf. II. (p. m. 24. et 29.)* ut historicus, ad Dauidem, ex 2 *Reg. V.* alter, mysticus, ad Messiam pertineat. *Veritati enim*, inquit, *id nil offit, et facit omnia clariora*: qua de re etiam latius disserit ad *Matth. II, 15.* Nam in *Pf. XXII.* et aliis eum *Philippo* consentit. Ceterum *Philippo* prior est. Nam illum *Commentarium* edidit primum 1529. nostrum exemplum serius factum.

Oecolampadius, hebraice tum doctissimus, ut alii ex illa *Besilienfi* schola, qui e monasterio ibi *Franciscanorum* exierant, in quo litterae hebraicae cultae erant diligentius: illius igitur plures *Commentariolos* in prophetas habemus, vel e lectionibus scholasticis excerptos, vel ab ipso editos et elaboratiores. Et is primus *Euangelicorum* hoc genus tentauit. Nam in *Esaïam Comm.* editus est an. 1525. Quid autem de interpretatione *Prophetarum* senserit, ipse explicat, primum in *Comm. in Esaïam* principio, p. 4. a. Vult enim in prophetarum interprete esse historiam temporum prophetae cuiusque, et pro fundamento poni. Nam *nisi*, inquit, *quis illam recte pro fundamento praeiecerit, quicquid superstruxerit, ruet; quemadmodum, si iuste illam traxerit, feliciter etiam allegoriarum mysteria colligere poterit: quas male vel in uniuersum contemseris, vel intempestiue protuleris.* Inteligit sensum mysticum, sed non commentitium et inuentum ingenio humano. Et sequuntur alia lectu digna, iis, quae de *Chrysofomo*, *Theodoreto*, *Philippo* retulimus, simillima: possuntque addi, quae in *Ioel* p. 136. 138. itemque ad *Hoseam*, de modo Christi in prophetis agnoscendi, dixit p. 3. quae ad anagogicam rationem pertinent. Est autem in usurpanda ratione historica, valde consen-

consentiens communibus sententiis. Quod secus est in *Pellicano, Musculo et Caluino*.

Et *Pellicanus* quidem, eruditissimus librorum sacrorum interpres, ut vniuersae de eius interpretatione dicamus, in Psalmis, fatetur, se secutum esse maxime *Pellinum*, eiusque rationem Psalmorum interpretandorum. E Prophetis ceteris ut aliquid speciminis proponamus, *Es. VII.* locum ille quidem de virgine grauida historice interpretatur, sed innui a Spiritu S. aliquid, quod Ahas tum nondum intellexerit: at c. IX. et si priora de Ezechia intelligi possint, cum respectu mystico ad aliud in N. T. tamen v. 6. de puero nascendo, nullo modo (p. 13.) *Cap. XI.* plane de Christo interpretatur vno, item uti c. *LIII.* De Zachariae viro Zemach sentit cum *Melanchthone*, ad Iosua Pontificem referente, cum significatione Messiae et Ecclesiae eius: ut appareat, eum mixtum et temperatum e duobus interpretum generibus contrariis: altero, quod historiam nimis amouet, et altero, quod nimis amplectitur.

Paullo plus ad historicum genus inclinat *Musculus*, item hebraice et graece doctus, copiosi et docti in Psalmos Commentarii, itemque in *Esaia* auctor de medio seculo sexto decimo. Nam *Pf. II.* sub regni Dauidici figura de regno Christi vaticinari putat. *Pf. VIII.* dicit ad hominem pertinere, quem Deus extulerit, primum in Adamo typice, deinde in Christo perfecte. *Pf. XVI.* autem v. 10. sic ad Christum pertinere dicit, ut ad Dauidem nullo modo trahi possit; at reliqua esse Dauidi et Christo communia. In *Pf. XXII.* porro, sub Dauidis persona, Christum describi κατὰ ταπεινωσιν et κ. ὑψωσιν. Eodemque modo *Pf. XLV.* secundum typum ad Salomonem, secundum veritatem ad Christum reuocandum esse. Tum in *Pf. XLI.* tantum decimum versum typicum facit. Non omnia, inquit p. 362. mox eius Psalmi ad Christum pertinent, sed unus et alter versiculus; plane ad veterem rationem, a nobis memoratam supra cet. De *Caluino* autem non, ut opinor, attinet

attinet commemorare late, quo genere interpretandi prophetas utatur: cum sit nota et vetas multorum reprehensio, quod nimis indulgeat mysticae rationi in vaticiniis de Christo, et accommodationi, adimatque Christo vaticinia, ut reddat hominibus: in quo tamen subleuatur a nonnullis, nec modo suis, sed etiam aliis, ad lenitatem in hoc genere propensis. Ad ultimum eius nomen, quem proposuimus, veniamus, ignotum prope omnibus, nec eruditissimo Carpzouio, *Introd. ad Libr. Bibl.* auctori, aliisque cognitum ac commemoratum, *Esromum Rudingerum, Camerarii* nostri generum, sed imprimis dignum, qui cognoscatur. Is e terris nostris, cum aliis excellentibus de *Melanchthonis* et *Camerarii* schola viris, expulsus, in Moravia cum praeflet scholae tum *Euanzizii* illustri, scripsit *Psal-morum paraphrasin latinam*, praeposita singulis *προδω-γία*, et subiectis notis satis copiosis, quibus rationem paraphraseos redderet. Ea edita est voluminibus quatuor *Gorlicii*, a. 1580 et sequentibus. Paraphrasis primum est elegante latinitate scripta, quae intelligi ab vnoquoque possit, et sensum hebraicorum verborum, quem ipse crederet esse, planissime exprimit. In *προδωγία* explicat argumentum Psalmi, imprimisque historiam cuiusque sup-peditat, ut ad intelligendum conferri possit, in quo se interdum coniecturam secutum esse non negat: fuitque profecto primus, qui historiam Psalmorum vniuersorum indagare et perscribere instituerit, eoque saltem nomine debebat commemorari. Addidit etiam in fine operis vni-versorum Psalmorum ordinem ac seriem, quam secundum temporis rationesnectere ac constituere tentauit; quod ipsum ad intelligendum non parum profuerit, si recte factum sit. In notis denique, dum rationem paraphraseos reddit, explicat sententias verborum ex hebraei sermonis indole; in quo se dicit usum optimis et veteribus et recentioribus, iis, ut opinor, quos supra proposuimus, interpretibus: vnde quale hoc opus sit, quod a viro, linguarum mortuarum recte et ad bene intelligendum et expli-

candum tractandarum peritissimo, elaboratum sit, facile intelligi potest. Nempe sequitur eam rationem, quam *Chrysostomus*, *Theodoretus* cet. *Melanchthon*, et alii secuti sunt, sed iudicio suo et modo. Veluti, Psalmum XXII. non totum facit Christi vnus, sed ex partibus iis, quae manifeste in eum vnum quadrant, cetera Dauidi communia: plane eo modo, quae super *Veneria* V. Cel. cui hoc opus non ignotum esse conicio: et memini quibusdam doctis Batauis id memorari, nominatim *Alberto* ad *Hesychium*. Similiter facit in aliis psalmis; de quo tum praefatio Voluminis primi p. 12. tum, quae ad Psalmum secundum scripsit, videnda sunt accuratius rem cognoscere volentibus. Et sunt in praefatione multa bene monita, quae prodesse possint bene tractaturis Psalmos. De hebraica lingua eiusque usu, quem ipse fecerit, fatetur, se non esse valde doctum hebraice, nempe ad illam subtilem rationem eorum, qui eius se doctores profitentur et Grammaticos; sed usum esse apparet doctissimorum in eo genere hominum libris, imprimisque se ad intelligendum eius genium adiutum ab *Oncelica Paraphrasi*, itemque *Ionathani*, dicit. Et tamen, quantum nobis iudicare licet, bene interpretatur sententias hebraicas et explicat perspicue, bene latine; quod in Paraphrasi fieri commodius potest, quam in versione, quamvis bona. Itaque et ipsa, et notae plurimum profuerint iis, qui intelligere, non decipi versionibus et interpretationibus hebraeo - latinis velint.

455
Hic lubeat quaerere id, quod supra polliciti sumus, et ad iudicandum profuerit, cum de veteribus quibusdam interpretibus, vt *Theodore*, *Chrysostomo*, *Theodoreto* quaeritur, an hebraice docti fuerint; cum appareat, eos saepe hebraica bene interpretatos esse, et sensum melius affecutos, quam quos hebraice doctos fuisse constet. Credo, vt ab his incipiam, eos vel omnino non calluisse litteras hebraicas, vel admodum tenuiter, nec ad Grammaticorum *αἰγίσβαιν* et copiam. Vtebantur autem Origeniano opere biblico, imprimisque *Aquila* et *Symmachii* versione, quorum ille

ille verba plane secundum etymologiam hebraicam expref-
ferat, hic autem secundum sensum cuique loco aptum be-
ne graece, vt vnusquisque, graece sciens, plane intelligere
posset. Hae autem duae versiones, inter se iunctae, habe-
bant Lexici rationem, in quo primum significatio prima ex
etymologica ratione reperiretur, deinde ex ea ductae aliae,
tum singulorum verborum, tum iunctorum et phrasium :
quod et agnoscit *Vitringa* praef. in *Esaiam* p. 4. Nec huic
tali Lexico comparem vllum nostrorum, in quo verba sin-
gula hebraica latinis hebraizantibus, quae et ipsa pleraque
e versione latina vulgata, aut graeca, aut magistris Iudaeor-
um ducta sunt, explicantur: quorum omnium non pro-
fecto maior esse potest, quam *Aquilas* et *Symmachi* auctori-
tas, immo nequaquam par, cum praesertim res doceat in-
telligentes, quam illi bene docti fuerint. Et illi Graeci Do-
ctores habebant aliquid adiuuenti, quo plerique post carue-
re, qui hebraicas literas tractauere. Nempe etsi Gramma-
ticae hebraicae scientia carebant, quam mechanicam appel-
lare liceat, non illa nimis vtili ad sensus orationis perspi-
ciendos; at erant instructi scientia linguae graecae excellen-
te, et interpretandi artes grammaticas et rhetoricas per
vsum callebant: quarum similitudinem ad hebraica transfe-
rendo, primum generis hebraici discrimen a graeco plane in-
telligebant, cauebantque, ne pro graecis in interpretando
darent hebraica, quae Graecos conturbarent ac deciperent,
dum suae linguae vsu caperent, quae aliter dicta essent; de-
inde, illis Hebraeorum interpretationibus, et Analogia lin-
guarum vniuersa adiuti, reperiabant saepius sensum verum
orationis, quam vel Hebraei plerique possent, destituti ab
illis, quas diximus, artibus. Atque hinc intelligi potest,
quare *Rudinger* graecarum et latinarum literarum et
omnium artium interpretandi peritissimo, in mediocri scien-
tia hebraicae linguae grammatica secundum vulgarem et
mechanicam rationem, felicius res successerit, quam alijs,
nihil admodum praeter hanc ad interpretandum afferenti-
bus, nullum vsum interpretandi ex accuratiori scientia alius

linguae,

linguae, vt graecae et latinae. *Lutherus* aliquo epistolarum loco (*T. I. p. 139. ed. pr.*) ad *Spalatinum* scribit de *Melanchthone*, eum felicius hebraica tractare et libros sacros hebraicos interpretari, quam Professore Linguae hebraicae, qui nuper *Viteberga* abierit *). Eius iudicii quae ratio sit, ex iis, quae diximus, intelligi potest. Nam *Philippus* non erat ita hebraice doctus, vt in literatura hebraica excellere posset; nec hoc egerat: sed quae ad sensus recte eruendos necessaria erant, callebat, et omnibus bene interpretandi artibus, quae omnibus linguis communes sunt, valebat. Sed ad institutum iter redeamus.

Sunt ergo interpretes, de quibus paullo ante diximus, clariores ex illis temporibus, quos nos quidem cognouimus, et quorum in hoc genere, propter nobilitatem ingenii et doctrinae, auctoritas esse aliqua possit. Nec tamen eodem illo seculo prorsus caruit Ecclesia Romana interpretibus eruditis; sed ii sunt pauci, de quibus nobis dicendum videatur. *Vatablum* commemorasse non alienum sit, litterarum hebraicarum excellentem sub *Francisco I.* Professore, quem et Iudaei eruditi admirabantur. Eius Scholia in V. T. in Bibliis *R. Stephani* sunt, etiam in Psalmos separatim edita ab eodem *Stephano*, nuper etiam Halis repetita. Sed quoniam ea, quae ab ipso profecta sunt, excepta videlicet ex eius Lectionibus, interpolata sunt valde e *Caluini* Commentariis, vt, quid ipsius, quid *Caluini* sit, non saepe possit liquido iudicari, eum praetermitteremus. Nec *Genebrardum* morabimur, non indoctum illum hebraice, sed ferocem Euangelicorum aduersarium, et nimis addictum Ecclesiae suae. Vnum ergo *Ant. Agellium*, Episcopum Acer-nensem, commemorabimus, vt per hanc occasionem etiam notior

*) Non piget addere, quod de eodem Hebraeo scribit p. 102. h. *Hebraeus Professor, suo more, caput habet, et id ponderas, quod pondere caret. Nam id, quod nos maximi facimus, facile et libenter tradit: ea, quae nos contemnimus, velut denegaturus, magni facit, i. e. vim literarum et verborum nos curamus, profectum vero minus quaerimus, haud sperantes, futuros nos oratores apud Iudaeos.*

notior fiat studiosis harum literarum. Nam fuit ille hebraice graeceque doctissimus, versatusque excellenter in scriptis Doctorum Ecclesiae veteris, inprimis Graecae, nec modo editis, sed etiam ineditis. Is igitur in plerosque libros Propheticos scripsit Commentarios, quorum maior pars, ut in Esaiam, Daniele, et Prophetas minores; latet inedita in Bibliotheca Pontificia Romae (v. *Le Long* Bibl. S. p. 598) imperfecta, ut opinor. Editos autem habemus quatuor; e quibus nos eos cognouimus habemusque in manibus, qui sunt in Psalmos cum ceteris Canticis, ut Mosis cet., et in Habacucum: sed hic breuior est, eruditus tamen, ille admodum copiosus et eruditus; sine Criticam spectes, quam bene et circumspice tractat, allatis etiam lectionibus Codicum scriptorum, sine interpretationem ipsam. Inprimisque plenus est Excerptis e Commentariis Graecorum ineditis tum, quibusdam et nunc, ut supra, per *Cosmas* occasione et *Eusebii*, monuimus. Dixit de hoc Commentario, quem ignorabat, cum Criticam scriberet, *Simon*. Epist. Sel. p. i. n. 36. sed tantum modum tractandi textum e Grammatica et Critica ratione tradit, magna cum viri laude, id, quod nos hic quaerimus, non attingit. Hic igitur tam doctus Interpretas in hac nostra narratione non praetermitti potest. Est autem in vniuerso quidem genere interpretandi similis illis, de quibus diximus, sed magna cum modestia. Veluti Psalmum secundum mauult et ipse typice intelligi; saltem apparet eam rationem ipsi non displicere. Hebraei, inquit, (p. 25. 6.) de rebus David hunc Psalmum agere putant. - Nostri fere de Christo intelligendum censent, quos in hac parte nos quoque sequimur. - Non negamus tamen, ut fere omnia, quae in V. T. gesta sunt, futurorum imagines fuerunt, sic praecipue David Christi figuram gessisse, ut rerum Christi imago in rebus eius praecesserit cet. In *Pf. XVI*. Christi verba modo facit versus 7. 8. nec tamen admodum aduersatur iis, qui et hos Davidis fecerint, sed hac conditione, ut spes Davidis nitatur filii sui, Christi, resurrectione. At contra *Pf. XL*. non sequi vult eos, qui

qui similiter de v. 8. statuunt, faciantque Psalmum veluti vestem, e diuersis filis contextam. Quid igitur? totum Dauidis vnus esse, sed eum considerandum esse non modo vt hominem et Regem Israelis, sed vt patrem Messiae, qui verba eius vsurpet, quia ex illius carne nasci debebat: in quam sententiam late disputat, p. 215. Psalmum autem XXII. totum Christi et ex eius persona dictum statuit.

His ita expositis, vt propositum erat, in hac dissensione tanta, quae etiamnum duret, et incensa sit etiam recentioribus controuersis, a Grotianis iude temporibus, cum alii nimis raro Christum in propheti. videntur agnoscere, alii nimis saepe; quod in Cocceio, eiusque aemulis reprehendi solet: quid vniuerso statuendum sit, si quia quaerat, et media via quae sit, quam omnes commendent? mihi sic videri non dissimulem: neque enim decet doctorem publicum. Primum igitur arbitror, analogiam vniuersam minimeque dubiam V. T. hoc postulare, vt non valde multis locis prophetias de Christo credamus esse *κατὰ ἔννοιαν* et *κρυφίας* propositas: quasdam esse oportet, quae characteres historicos omninoque tales habeant, per quos de Messia, cum venisset, plane iudicari et ipse agnosci posset, vt supra diximus; quales esse, nemo dubitet, aut negauit vnquam: earum porro oportet esse numerum talem, qui sufficiat, et ad agnoscendum et ad conuincendos aduersarios veritatis. Sed an oportet eas necessario multas esse? Nusquam numerantur argumenta, sed ponderantur. Et nos cum docemus, Messiam venisse, et in Iesu esse characteres Messiae minime dubios, non modico numero prophetiarum defungimur? Enimuero ex altera parte fatendum ac defendendum est, prophetias mysticas esse permultas: nec villo modo canoscerim, eas esse illis, praesertim apud Christianum, leuiiores. Ad Iudaeos quidem conuincendos in principio nihil admodum valeant: sed apud eum tamen, qui iam summam veritatis tenet, prodesse possunt. Nam mysticas et figuratas esse prophetias multas, quomodo mirum aut dubium videri possit,

possit, cum totus cultus Leviticus fuerit figuratus. An agnus paschalis et similia nihil, quod firmum sit habent, quia figuram tantum habet; nihil omnes typi? Immo, ut hi patres sunt et esse debent disertis testimoniis, si non sint ficti ingenio humano, sed a Christo et Apostolis demonstrati; sic et prophetiae, in quibus per figuram modo inest Christus. Totam oeconomiam V. T. reprehendat, et mutet necesse est, qui genus hoc prophetiarum et multitudinem reprehendat; aut ad invidiam interpretis trahat. Omnino oportet in hoc genere non acerbam esse. Vides tu, o! bone, Christum in V. T. ubi alius aut omnino non, aut non ita clare videt, ut tu vel vides, vel videre te putas! Vide eum tibi, et gratias age Deo. Sed fac, ut eum et in cor, cum eius mansuetudine et lenitate, recipias, ne frustra videris. Ille vero alter eum alibi pariter videt, si non ubique in V. T. satis clare, ut dubitet, haereat, per umbram modo; at in N. T. videt in clara luce refulgentem, et pro eius claritatis beneficio gratias agit Deo. Non probo totam *Grotii* rationem: scio, eum deceptum dulcedine historicae interpretationis, aberrasse: at fateor, me indignari, cum propterea pro Iudaico homine et incredulo vituperari audio, qui veritatem religionis Christianae inimitabili libello demonstraverit, et viam munierit aliis, qui post idem argumentum tractare vellent, et adfuefecerit homines talibus demonstrationibus legendis et cognoscendis, cum tempora immiNERENT, quibus cum multis pugnandum esset pro religionis Christianae veritate. Sed definendum tandem est, ut veniamus eo, quo nos res vocat, quam in manibus habemus, quaeque non parvam habet cum ea, quam tractauimus, coniunctionem.

Producemus enim in eum, quem indicimus his literis conuentum solennem, quibus ad summos honores ordinis nostri, ad nomen et iura Doctoris sacrarum literarum, aditum faciamus, quam *Licentiam* appellauit vetus inscitia. Sed

Sed hi sunt viri tales*), quales optabile est dari saepe Doctoribus publicis ornandos. Nec opus est, eos a nobis nunc commendari, qui se satis ipsi commendauerint publice, Lectionibus habendis, partim ad Interpretationem V. T. pertinentibus, partim ad Noii; et illi quidem plane ad voluntatem nostram et veram rationem, qualem supra descripsimus, cuius omni tempore exempla rara fuere, suntque cum maxime: hic ita, vt miraremur, Virum a studiis Academicis dudum abstractum, et multis negotiis illiteratis distractum, per muneris publici rationem, tamen gustum illarum literarum conseruasse per lectiones ad sacrarum literarum studia erudita pertinentes. Sed illis lectionibus in colloquiis, quae de more cum iis habuimus, similes se praestitere: nec abhorrebunt, quae scripsere, quaeque differerent eorum disceptandorum causa. Sed laudibus nostris, apud legentes haec, fidem facere poterunt etiam, quae quisque de vita sua, qua in studiis doctrinae discendo agendoque exacta est, scripsit.

Debebitis hoc, quicumque hic literas vel discitis, vel docetis, vel earum fautores esse haberique vultis, debebitis, inquam, et dignitati talium virorum, et ipsis literis, quod Vos rogare instituimus; vt eorum primum Disputationibus, deinde honoribus faueatis, eumque fauorem frequentia, audientia, aliaque beneuolentia comprobetis: in quo non modo ipsis, sed etiam Ordini nostro, mihi que met ipsi, per quem ornabuntur, honorem habitum existimabo.

*) Erant: *Christianus Guil.*, *Thalemannus* ad aedem D. Nicolai Diaconus, *Io. Aug. Dashi* Lingu. Or. Professor, et *Melchior Traugott Schubarus* Eccl. Haynensis Pastor et Dioceseos Haynensis Superintendens.

DE
LIBERTATE INGENII
IN
CAVSA RELIGIONIS

THE UNIVERSITY OF CHICAGO

THE UNIVERSITY OF CHICAGO
PRESS

DE
LIBERTATE INGENII 468.
IN
CAVSA RELIGIONIS

In die eo, quem insignem et religione publica solennem nobis fecere initia excutiendae seruitutis superstitiosae, et libertatis religiosae repetendae, secundum magnitudinem beneficii, quod in eo misericordia diuina nobis indulsit, nihil est, de quo potius vel cogitare vel dicere debeant, qui praesunt publicae religionis doctrinae, et qui horum aemulantur studia, quam *Lutherus* ipse, cuius feliciter efficaci ministerio Deus in illa tanta re usus est; nec modo grati aduersus eum animi causa, sed etiam, ut in eius virtutes intuendo, ad imitandi studium curamque incendantur et acuantur. Etenim, cum Deus hoc sibi instrumentum suum omnibus ingenii animique bonis, ad rem talem ac tantam necessariis, cumulandis praeparasset, ipse iis ita est usus, ut ab eo virtutum omnium, quae in doctore et assertore religionis esse debeant, exempla peti possint, ab nobis vero etiam debeant, qui nos aemulos doctrinae ab eo restitutae et constitutae profitemur. Sed de vniuersis dicere, voluminis ingentis foret, non huius nostrae disputationis, quae paucarum paginarum angustiis coercetur. Itaque satis erit, vnam demonstrasse, et ad imitandum studiosis commendasse, quae sit et illius felicissimi diei memoriae aptissima, et huic tempori maxime necessaria, libertatem ingenii in caus-

Ernesti Opusc. Theol.

Hh

fa

sa religionis, in sacris literis interpretandis, et in omnibus partibus doctrinae, ita temperatam, ut tantum abesset a licentiae temeritate, quantum ab seruitutis vel stupore vel timore. Nam huius libertatis usurpandae et asserendae initium factum est ea die, qua impiae indulgentiarum superstitioni aduersarium se professus est, propositis loco publico Sententiis (*thesibus*), per quas primum aditum factum esse constat ad repurgandam religionis doctrinam.

Magnum in *Luthero* et acre ingenium fuisse, ne inimici quidem abnuerint: et id admirari solebat *Erasmus*,^{a)} ingeniorum iudex acerrimus. Sed in partibus ingenii excellentis est nouitatis amor et studium, quod, ut in aliis rebus, ita in doctrinarum disciplinis non acquiescit in usitatis, et vulgo probatis, sed meliora aut plura desiderat, et nouas vias patefacere sibi ac munire conatur, vel ad quaerendum, quod lateat, vel ad emendandum, quod in medio sit, vel ad commendandum, quod quaesitum sit ac repertum videatur. Quod si remouemus inuidiam, quam nouitatis verbo adiunxit partim quorundam in nouando inscitia et temeritas, partim imperitorum stupor et tarditas, interdum etiam improborum cupiditas, id studium sine exceptione accusari, et simpliciter repudiari non debet, sed potius in magna ingenii virtute et beneficio diuino censeretur. Etenim, si nulla talis vis insita fuisset ingeniiis humanis, non dicam id, quod est in promptu, nullas artes atque doctrinas inueniri potuisse: omnes certe etiam nunc primam tenuitatem et prope barbariem seruarent.^{b)} Illud quidem perspicuum est, quod pertinet maxime ad institutam disputationem, eo ipso studio Deum esse usum ad emendanda per *Lutherum* sacra, et doctrinam religionis bene constituendam: in qua tanta tamque salubri re impedienda et ad inuidiam vocanda, nihil magis tam solenne fuit ignauis et improbis ingeniiis, quam nouan-

a) Epist. *Erasmi* ad *Petr. Mosellanum*, inter Epp. *Erasmi*. p.

b) vid. *Memoria Sandelii*, inter Opusc. *Orator*. p. 304. ed. sec.

nouandi libidinem ac temeritatem accusare, et nouas sacrorum librorum interpretationes, noua dogmata, ita appellabant, non ferenda clamare.

Enimuero vix alia est ingenii humani pars magis aut aequae anceps et lubrica. Nam et res ipsa declarat, et vsus omnium temporum demonstrat, eam pari momento ad salubritatem et ad noxam, ac prope maiori ad hanc, quam ad illam, trahi, certe saepius in partem inutilem et noxiam ferri, imprimis in religionis doctrina, in qua, et insito quodam naturae vitio, et multiplici alia culpa, irritantur ingenia humana ad male nouandum; vnde oritur illa licentia ingeniorum, quae tot ac tanta religionis mala intulit, et cum maxime inferre conatur. Quo magis videndum est, ut illud naturae bonum ita temperetur ac regatur, ut ad vtilitatem conuertatur, in eiusque vsu cernatur libertas vera, et iusta, et salutaris, qualem nobis *Lutheri* nostri exemplum et demonstrat et commendat. Nam et de hac libertate valet, quod de ciuili dixit et rerum gestarum et prudentiae grauis auctor *Liuius*: *libertas temperata salubris est; nimia, aliis grauis, et ipsis, qui habent, effrenata et praeceps*: quamquam ipsa libertas, quae vere et proprie dicitur, nulla est nimia; sed saepe ac facile sine modo ac lege exercetur: in quo intelligitur id, quod nimium appellamus, eaque proprie est licentia.

Vera libertas, quae sit eius generis, de quo disputare instituimus, h. e. quae cernatur in iudicandis rebus ad religionem pertinentibus, tenetur, si nullius hominis arbitrio ac potestati ita sis obnoxius, ut aut cogi possis dicere ac facere contra rectum sensum et honestam voluntatem tuam, aut non possis dicere ac facere, quae recta, et honesta, et publice priuatimque salutaria et vtilia videantur. Sed haec libertas, ut omnis alia, habet primum certam legem ac normam, ad quam in vtendo dirigatur, deinde modos, a quibus accipiat grauitatem et constantiam, ne vel efferat se inconsultius ac vehementius, magisque

motu feratur, quam iudicio nitatur, nec timescit contrahat se angustius, quam veritas et honestas patiatur.

Vt igitur libertas talis, cum exercetur in rebus ad iudicium rationis pertinentibus, ut in philosophia, in historia, similibusque disciplinis, legem habet ac normam rationis et naturae, h. e. certa principia naturae et rerum, quas in iudicando, nemine impediante, ac iure suo, sequatur: sic in religione, quam nos dicimus, quam divinitus traditam sacris literis habemus, legem unam habet et agnoscere debet ipsas literas sacras: cui legi cum maxime obtemperat ac servit, tum maxime et verissime libertas et est, et appellatur; nec vlla vera libertas in religione agnosci aut probari debet, quae aut non possit ei parere, aut nolit. Nam, cum ab ea traducitur ad normam arbitrii humani, cui per naturam nulla est cum veritate coniunctio, servitus existit; cum cupiditate ac temeritate vinculis eius se eximit, in licentiam abit.

Atque etiam est genus libertatis, huic subiectum et coniunctum natura ac similitudine, quod inest in ipsius legis huius, h. e. sacrarum literarum, iudicio et interpretatione. Nam ut quisque magis in iis interpretandis legi recte interpretandi obedit, solutus vinculis potestatis vel auctoritatis et opinionis humanae, vel denique cupiditatis suae; ita magis libertatem veram retinet. Haec ipsa autem lex est eiusmodi, cuius auctoritatem mens recte et libere iudicans, haud inrita agnoscat, libenterque sequi possit ac debeat. Est enim et ipsa divina: quippe a principiis ducta, quorum originem divinam perspicue intelligere possimus, hoc est, a rebus clare in Scriptura sacra traditis, et verborum divinum indole et natura, notitiis denique insitis divinitus et incorruptis.

Huius autem partis, quam primam et summam censere libertatis illius religiosae debemus, nullum maius atque illustrius, paene dixerim, par, exemplum habet vel omnis, vel recentior certe aetas, quam *Lutheri*. Hic vir fuit, qui in religione omnia scripturis divinis, nihil vel
arbi-

arbitrio vel auctoritati hominis cuiusquam tribuerit, idque vnum initium habuerit et cognoscendae et restituendae veritatis, eandemque causam inuidiae, irarum et vexationum omnium. Omnino fuit in eo viro, quod nec taceri hoc loco, nec satis praedicari potest, fuit, inquam, in eo amor et admiratio Verbi diuini talis, tam et feruens et constans, vt nihil supra. Itaque de Verbo Dei sic loquitur, vt, cum cum audias, ardentem illum pro Evangelio Paullum audire videre, vereque me hoc dicere putem, neminem, post illum Apostolum, ita de Verbo Dei locutum esse: neminem certe tam magnifice, tali cum sensu, dicentem nos vel legisse profitemur, vel audiuisse; vt vel hanc ob causam in manibus haberi scripta eius ac legi a nostris cupiamus, vt illo sensu imbuantur, illo spiritu incendantur. In interpretandis autem literis sacris quid eo liberius fuit, ad illam quidem legem, quam diximus? qui, repudiatis omnibus opinionibus et auctoritatibus humanis, totus penderet ex iis principiis, quae in scripturis ipsis traderentur, et e linguis diligenter tractatis et bene cognitis. Nam sensus scripturarum se profiteretur ipsis comparandis indagasse, et indagare iubet; c) et linguarum instrumento adiutum, certum se in intelligendo, et securum ab errore factum esse. d) Itaque cum scripturarium et literalem et grammaticum interpretem, per contemptum scilicet, appellabant magni Dogmatici, tori barbariae sordibus obliti, tum, quos ipse vocat, Prophetæ noui, ad fanaticam rationem procliuēs, et Spiritum quendam suum iactantes in interpretatione et cognitione religionis, et studia linguarum contemnentes: cum ipse contra assidue et grauiter commendaret, et earum negligentiam castigaret; e) quo etiam potissimum auctore, hortatore apud Principes, et magistratus urbium, defenso-

Hh 3

c) ad Io. 14. cet.

d) Epist. ad Germanos, *de Scholis instit.* T. 2. Opp. ed. Altenb. p. 81.e) *Philippus Mel.* Or. IV. p. 165.

ensore et adiutore, in his terris, et in Ecclesia reuixere. Et erat tanta eius in ea re cura, ut etiam inuidiam caueret, quae iis per caussarum fortuitarum occasionem ab indoctis et ignauis conflare posset, cum multi essent, ut scribit ad *Spalatinum*, de methodo, studiosis Theologiae in sacris literis discendi sequenda, qui omni studio occasionem quaererent ad calumniam bonis literis. f) In quo ille, ut in aliis rebus, multum vidit. Nam haec libertas religiosa, cuius restituendae et vindicandae auctorem habuit Ecclesia *Lutherum*, sine harum literarum studiis non magis teneri et aduersus arbitrii humani libidinem ac fingendi licentiam, quae se nunc vndique ingerit, defendi potest, quam olim reuocari in Ecclesiam potuisset. Nec vero ingenii, exultantis auditate nouitatis, licentia in peruertendis Scripturis, et per eam rationem ipsis religionis capitibus, vel alia re magis corroboratur, quam inscitia et negligentia linguarum, vel certius coercetur, quam earum veluti vinculis iniiciendis et adstringendis. Illa quidem impia licentia Socinianorum, ut saepe in Lectionibus nostris demonstramus, prope tota est vel ab indocta inscitia verborum, vel ab voluntaria negligentia, nec alia ratione certius ac facilius conuincitur, quam tenendis verbis; si iubeas docere, quomodo in verbis Scripturae insit vel inesse possit, quod illi defendant.

Sed in hoc genere saepe exoritur quaedam ambiguitas licentiae et libertatis discernendae: primum in locis scripturarum iis, in quibus Antiquitas et Scholae usus agnoscit argumenta dogmatum, cum ea, interpretandis verbis, per speciem *αμφιβελίας* grammaticae aut dialecticae, alio trahuntur, et eripiuntur consuetudini Scholae in dogmatibus firmandis: deinde in placitis, pertinentibus ad rationem historicam et criticam, ut de literis, de punctis Hebraeorum et accentibus, de lectionis varietate, et rebus similibus: in quibus saepe et licentia inuidiose accusata, et libertas defensa est, vel nomen libertatis

f) Epistol. T. I. p. 47. b.

tis pro clypeo fuit. *Luthero* quidem ipsi in utroque genere crimen licentiae atrociter et assidue intentatum esse ab defensoribus receptae in Ecclesia Romana disciplinae, satis constat, nec unquam ea criminatio aduersus Ecclesiam nostram uniuersam, et Doctores eius, conticuit: et in ipsa quoque Ecclesia nostra saepe quidam talis licentiae rei facti sunt, et cum maxime fiunt, iure interdum, sed interdum etiam iniuria et vitio ingenii humani, non facile patientis eripi sibi sua, et quae diu probauerit et pro certis defenderit, repudiari, praesertim ab iis, quos vel aetate, vel honoribus, vel fama superet, vel his uniuersis. Illud quidem in promptu est, rationem Romanam in hoc genere plane repudiandam esse, quae rem vel ad consuetudinem reuocat, auctoritate veterum nixam, quae non mouenda aut sollicitanda sit, vel ad arbitrium Episcopi Romani, hoc est, hominis, siue, ut honestius faciant, Ecclesiae; quod siue necessitate seruili, et inuidiae inter suos timore, sit, ut a doctioribus, quos multos commemorare inde a *Cano* (*Los. Theol.* 2, 13.) possemus, siue incitiae, et indocta improbaque pertinacia, ut in turba monachorum et scholasticorum rabularum. De quo genere nuper fuit *Laubrußelius*, Loiolita Argentoratensis, acerbissimus in hac causa, ut in aliis, *Luthero* maxime, et omnibus Ecclesiae nostrae Theologis, in explicandis ac defendendis doctrinae Christianae capitibus, scripturae sacrae potius, recte per adiumenta literarum et linguarum explicatae, quam humanam auctoritatem secutis, in libro tertio Operis *de abusu Criticae in Causis religionis*. Sed bene est, quod in ipsa Ecclesia Romana incitiae hominis et impudentia repudiata est, nuper etiam ab *Alemberto*, ingeniosissimo et doctissimo Viro, in principio Disputationis, sub eodem titulo acerrime notata. 5) Nos vere vi-

Hh 4

deamus

- g) *Melanges de literature cer. T. IV. p. 370.* Non alienum fuerit, ex eo libello adscribere locum de Scholis Protestantium in Germania, quod illius laudis origo ducitur ab libertate

deamus et iudicium et exemplum *Lutheri*, in quod intuentes, in neutram partem vehementiores aut acerbissimus, in vtraque modum seruire, et recta via incedere, i. e. veram libertatem et tenere ipsi, et aliis concedere discamus.

Reprehensus, ut hoc potissimum commemorem, ab *Hieronymo Dungershemio*, Theologo in hac Academia tum primario, quod locum Paulli ad *Philipp. II*, locus, quam consuetudo Scholae ferret, et noua ratione explicasset, sic ei rescripsit: ^{b)} „*De secundo loco Philipp. II, quem putas a me, Erasmus secuto, male tractatum; verum etiam tu hic non textum, sed Patrum sententias refers. Primum, mi vir egregie, credo te nosse, hunc versum Psal. CX. Tecum principium in die virtutis tuae, in splendoribus sanctorum ex utero, ante Luciferum genui te, esse de Diuinitate Christi, aduersus Arrium, velut summum, ac inter prima, argumentum agitatam; ut legis in Tripart. et in Augustino, ita ut Graeca et Latina Ecclesia hoc sensu cum Psalmum teneat etiam cantu celebratum in officio diuino: non tamen ob hoc Lyram, Burgensem, imo hebraeam linguam, haeretificabis, ubi legitur, hunc versum non posse quidem de diuinitate intelligi. Quare non semper clavis et aper-*

tate ingeniorum honesta et nullis terroris vinculis constricta : „*On ne peut s'empêcher d'avouer avec affliction la supériorité présente des Universités de la partie Protestante de l'Allemagne sur les Ecoles Catholiques. Elle est si frappante, que les Etrangers, qui voyagent dans ce Pays, et qui passent d'une Université Catholique à une Université Protestante voisine, croient en une heure avoir fait quatre-cens lieues, ou vécu quatre cens ans, avoir passé de Salamanque à Cambridge, ou du siècle de Scot à celui de Newton.*“ Nam quod Vir doctissimus putat, id discrimen non esse ab diuersitate religionis, quod in Franciae et Italiae quibusdam Scholis effloruerint pariter literae: alii Viri doctissimi illarum partium, etiam Theologi, falsi sunt, necessitatem colendarum diligentius literarum a Protestantibus ortam esse. v. *Vernicii Appar. ad Ph. et Theol. II. I. 9.*

n) Epist. T. I. p. 149. b.

apertis auctoritatibus contra haereticos pugnant sancti Patres. Quot auctoritatibus abutitur Hieronymus contra Iovinianum? Augustinus contra Pelagium? et alii contra alios?

Item illud Genesis, Faciamus hominem ad imaginem nostram, quanta fiducia Augustinus pro Trinitatis assertione, et pro imagine, quae est in homine, tractat: cum neutrum ex eo possit probari, quod in hebraeo faciam dicitur, non faciamus. Item illud Exo. III. Ego sum, qui sum, omnes ad substantiam Dei referunt: cum Burgenfis et Hebraei ad effectum auxilii aptari conuincant. Quia dicit, Ero qui ero, in futuro: et infinita his familia. Quid ergo mirum, si et locum Philip. II, ad diuinitatem torserint, qui aptius de humanitate sonat, si verba consideres? Non ergo credo me peccare, si Patribus dissensio in aliquo textu obscuriore. Quid vero vos facitis, omisso textu, tantum in dictis Patrum versantes, nisi quod dubia et incerta relinquitis? In qua re Magister sententiarum pessimum exemplum reliquit, omnia omnium dicta concordare nitens. Ex quibus fit, ut contra haereticos dubiis obscurisque sententiis armati, ludibrium faciamus.“

Hic quis non videt, auctore *Luthero* nostro, primum hanc libertatem discedendi a vulgatis interpretationibus, in explicandis aut defendendis Doctrinae capitibus, concedi: deinde ad linguae rationes bene cognitae adstringi, quae et necessariam interdum faciant discessionem ab vltimis interpretationibus, et honestam: eam porro his finibus coerceri, ut in locis obscuris se contineat, nec loca plana et perspicua tentet ad peruertendam aut sollicitandam doctrinam: denique habere causam hanc, ne in disputatione aduersus haereticos, (addi poterat, cum acutioris ingenii hominibus) frustra laboremus, atque adeo irrideamur, grauem sane, et temporibus iis, quibus studia linguarum vigent, admodum necessariam.

Hac igitur tali de causa, si absit temeritas, inscientia et insolentia, illudens potius veritati, quam succurrens, et

insidias perspicue fruens, non defensionem diligenter parans, appareatque amor et studium veritatis, et doctrinae bene explicandae et accurate defendendae diligentia; non est aequum, licentiam exprobrare, non potius libertatis veritatem agnoscere. Nec est difficile bonorum virorum doctam modestiam, grauitatem et constantiam, discernere ab ceterorum leuitate et libidine. *Aliter catuli olent*, ait illa, *aliter fues*. Prurientis gestus etiam leuiter attendenti obseruantur: scabies vero etiam in oculos incurrit. Atque etiam iniquum foret, lapsus omnes in hoc genere aliquid tentantium referre ad licentiam, et ad infamiam vocare, praesertim si etiam aetatis aliqua excusatio accedat, quae ipsi *Luthero* et usurpata est, et profuit in tali genere. Nec vero nimis duriter sunt tractanda ingenia, praecleara praesertim iuniorum, ne opprimatur insita vis et exstinguatur, quae fouenda potius est, et lenitate admonendi regenda. Etenim aetas illa, nondum longa exercitatione vsa, etiam levis speciei blanditiis capitur, labiturque cupiditate magis, quam prauitate, denique ipso lapsu, si amica manu attollas, fit ad cauendum diligentior. Idque multo magis de altero illo genere, quod proposuimus, valet, quod, quamquam ipsam doctrinam aliqua ex parte attingit, historicum tamen est maxime: in quo etiam *Lutherum* nostrum liberiores, ita liberum fuisse, constat, praesertim vigente aetate, ut vix in alio, etiam sui, satis laturi fuisse videantur: quale est, quod iam tum, cum, propter paucitatem librorum, saltem ambigua res esset; tamen seuerè repudiavit testes in coelo 1 *Io. V.* puncta autem Codicis hebraici sine exceptione ingeniis magistrorum Iudaicorum tribuit, et saepe fallacia constanter pronunciauit. Sed et in his et in aliis generibus ab licentia nobis cauebimus, et libertatis verae et honestae fines conseruabimus, si et leges illas libertatis, quas posuimus, tenebimus pressius, et modum eius exercendae seruabimus, cuius sapientissimos homines auctores, *Lutherum* vero et magistrum

strum et exemplum habemus: de quo nobis aliquid dicendum restat.

Plato in *Dialogo de Scientia*, qui ab sermone *Socratis* cum *Theaeteto*, ingeniosissimo iuvene, *Theaetetus* inscribitur, in perfectis ingeniis, et ad consequendam veram sapientiam, requirit non modo fortitudinem quandam praesentis animi, sed etiam lenitatem, ne, ut *πλοῖα ἀνεμυδιασά, naues non bene sabarratae*, fluctuent, sintque *μανικώτεροι ἢ ἀνδρεώτεροι, furibunda potius quam fortia*, sed *λείως τε καὶ ἀπταίστως καὶ ἀνυσίμως, leniter, ac sine lapsu, et strenue*, in veritatis disquisitione versentur. Quo spectat etiam *Baconis Verulamii*, quamquam in alio genere nouandi, admonitio, iubentis imitari tempus, quod innouat vel maxime, et corrigit, quae non bene habent, sed leniter, tacite, ac prope sine sensu.¹⁾ Et illud quidem in promptu est, in libertate illa nostra, fortitudine quadam opus esse, quae haud dubie praua et vitiosa corrigere, veritati consulere, eam certa ratione cognitam proferre in lucem ac defendere audeat, nec timeat inuidiam in rebus grauioribus, cum salute hominum perspicue coniunctis, ne periculum quidem: cuius fortitudinis nullum aliud maius, immo par exemplum habemus *Luthero* nostro. Sed et in hoc maiori et necessario genere, tamen vera libertas seruare debet modum lenitatis et verecundiae, quam et rerum grauitas, et Ecclesiae reuerentia, iure suo postulat. *Etiam vera loqui cum timore oportet in Ecclesia Dei, Lutherus ad Io. Siluium*, de dogmatibus suis consulentem, scribit. Rectissime. Nam Ecclesia altera nostra in his terris, et bona mater est, quam leniter docere et corrigere pietatis est. Et videmus, quam lenia et placida initia habuerit libertas *Lutheri*, qui dubitantis modo, non iudicantis, contra Indulgentias scribere coepit. Ita ille quidem in caussa tam manifesta, tam graui! Quid fieri debet in minoribus, in minus perspicuis? in quibus iactatio vehementior plus plerumque vanitatis inuitilis

i) in Sermonibus fidel. dignissimis lectu n. XXIV.

inutilis habet, quam verae, et sapientis, et utilis publicae libertatis: insolentior vero, et arrogantior, et petulantior, etiam castiganda est et penitus eiicienda. Itaque omnes, qui salubriter et sapienter uti libertatis bono in rebus talibus velint, oportet animos ad hanc modestiae et lenitatis tranquillitatem componere, in primisque, si qui sunt acrioribus ingeniis, celeriorique natura, et adhuc feruentestate, ut vel expectent, tum in iudicando, tum in iudicio suo proferendo, dum ille feruor resideat, per quem tam facile praecipitantur ingenia optima, bonitate ingenii per luxuriam ante euanescente, quam frugem bonam edere possit, vel identidem se in conatu iudicandi reuocent ad cognoscendi diligentiam et seueritatem, et illum bonae naturae gessientem impetum, velut generosi equi ferociam, in arena diurnae et seuerae exercitationis fatigent, nec velint ante non modo doctores, sed etiam emendatores esse et reformatores, quam ipsi sint, ad veram normam et regulam, multis literis, et diurno literarum, diuinarum maxime, atque etiam humanarum, usu emendati et formati. Aliter veram libertatem non tenebunt, sed ad licentiam nec opinantes ruent. Scio me hanc parum iucundam disciplinam libertatis capeffendae et exercendae sancire ingeniis talibus; sed non est alia vera, et honesta, et salutaris, nec nimis seuerè caueri veritatis diuinæ et religionis securitati potest.

Neque tamen in hac seueritate ita sumus acerbi, ut nihil humanae naturae imbecillitati concedamus, nec condonari quicquam ab hac via aberrantibus velimus. Et enim multis de causis accidere potest, ut de recta via vel declinent, vel etiam depellantur, qui ab licentia opinandi toto animo sunt alieni. Primum nemini, ne doctissimo quidem, ita cautum est ab errore, ut nunquam labatur, etiam si omnia diligenter circumspectat: et interdum specie veri decipiuntur acutissima ingenia. Insidiatur etiam ingeniis praeclaris impatientia morae, in difficultatibus praesertim tollendis. Itaque ab ea interdum oppressi
ad

ad opiniones trahuntur, quibus proferendis audaciae cuiusdam inutilis et periculi aliquid habentis non iniustam suspicionem et inuidiam mouent; praesertim cum irritantur in disputatione ab aduersariorum vel acerbitate vel etiam inscitia et impudentia: in quo genere etiam *Luthero* nostro interdum aliquid humani accidisse, iudicia eius quaedam liberiora, vt de epistola Iacobi et Apocalypsi Iohannea, arguunt. In hoc igitur genere aequum sane iudicamus, videre, quo quisque animo sit, et quo consilio quidque dicatur, vt eius integritati et bonitati condonemus aliquid. Omninoque, vbi improbitas et libido reprehendendi et peruertendi veritatem absit, leniter in viam reuocare errantem, et intra fines verae et iustae libertatis reducere tentemus.

Plura dicere hoc tempore locus hic non patitur: et haec speramus sufficere, iuuentuti inprimis ingeniosae, studia sacrarum literarum aemulanti, ad cauendum, ne sibi indulgeat quis vltra fas in libertate iudicandi de rebus diuinis, aut ἐλευθερίαν ἐπικάλυμμα τῆς κακίας, 1 *Petr.* II, 16. faciat, sed, dum se liberum ab arbitrio et auctoritate hominum ostendere vult, seruum Dei et Verbi diuini probet: ὡς ἐλεύθεροι, ἀλλ' ὡς δέλοι Θεῷ. Hic quoque debet esse omnibus in animo et in ore illud Paulli, μὴ ὑψηλοφρονεῖ, ἀλλὰ φοβῆ, *Rom.* XI, 20. In primisque existimandum est, in hac libertate vsurpanda duce opus esse diuino, et de eo quoque genere verum esse, quod de alio dixit Paullus: ὃ δὲ τὸ πνεῦμα Κυρίου, ἐκεί ἐλευθερεῖ, 2 *Cor.* III, 17. Hoc igitur duce et monitore discamus libertatem ingenii et capeßere et exercere, sequamurque exemplum eius, per quem ea nobis est restituta, Patris nostri communis, *Lutheri*: qui profecto instinctu illius Spiritus Vindicias huius libertatis suscepit, et eiusdem adiumento feliciter peregit, atque ita nos eo dignos probemus. Ceterum huius diei solennitate admoniti, primum cogitemus magnitudinem beneficii, quod in vniuersa libertate religiosa, per *Lutheri* mi-

niste-

nisterium restituta, nobis est tributum, et auctori eius, Deo, gratias dignas decernamus. In quo non modo communibus caussis moueri nos conuenit, sed etiam propriis: quod illa libertas multis modis coniuncta est cum studiis rectis vniuersae doctrinae liberalis. Nam et in illa vindicanda multum valuerunt studia recta linguarum, historiae, philosophiae, etiam scientiae legitimae, nec minus valent in tuenda et conseruanda: ipsa autem incenduntur et augentur illa libertate exercenda, eiusque retinendae et firmandae cura. Et partem quidem beneficij illius diuini eam, quae proprie ad religionem pertinet, in qua est summa salus nostra, commendabunt nobis, qui inter sacra communia Ciuitatis concionabuntur: alteram, nobis propriam, quae coniuncta est cum studiis doctrinae, inter Sacra Eucharistica, quae in aede Paullina hora XII. fient, commendabit *M. Ioannes Friedericus Burscherus*, Philosophiae Professor, Vir doctissimus. Dicet enim *ita de Bono verae libertatis in iudicando*, vt et magnitudinem eius, vimque in studiis doctrinae, demonstrat, et id nobis per emendata *Lutheri* ministerio sacra contigisse doceat.

DE
A V A R I T I A
ECCLESIASTICA
ET
SALVIANI ADV. AVARITIAM
LIBELLO

5^{ta} ed. 8. VIII, p. 373.

DE
AVARITIA ECCLESIASTICA

ET
SALVIANI ADV. AVARITIAM LIBELLO

Doctrinae publicae emendandae initia, nemo nescit facta esse oppugnanda foeda avaritia, quae per lene indulgentiae nomen, non modo in pecunias hominum male credulorum saeuiret, sed etiam disciplinam Ecclesiae, ad coercendam peccandi libidinem vtcunque constitutam, euerteret, denique, quod pessimum erat, ipsam religionis summam corrumperet, hominum animos foeda superstitione oppleret, peccandique licentiam corroboraret atque augeret. Alii ante, aliisque in locis, viri, etiam docti et boni, improbauerant perniciosam illam avaritiam; sed aut tacita modo indignatio fuerat, propter periculi metum, aut, si tamen ausa erat libere loqui, vel omnino caruerat successu conatus, vel ad breue tempus valuerat. Nam et plerique non tam religionis causam egerant, quam suam, Ordinis Monasteriique sui, inuidia magis, quam veritatis et religionis amore, incensi. Principes autem et ipsi aegre tulerant rem, non, quod esset inimica religioni; nam eius plerumque vltima apud eos cura est: sed quod nollent tantam pecuniae vim e finibus suis exportari, quae melius ad se veniret: venerantque interdum in partem praedae, vel adimenda ministris sacrarum exactio-num pecunia, vel talium exactio-num potestate a Pontifice Romano ad vsus aedificandi, belligeran-

Ernesti Opusc. Theol.

li

di

di aliosue sibi impetranda. Sic quondam Praefides provinciarum Romanarum auri Iudaici exportationem non tulerant, ut in Asia Flaccus apud Ciceronem et alii, post Caesares; sed ut ad aerarium Ciuitatis, sed ut ad fiscum Caesaris veniret. Lutherus autem eam auaritiam, cum omnibus rei vniuersae vitiis, vero et integro animo oppugnare instituerat, nihil aut sui priuatim, aut Ordinis sui communiter spectans, nihil denique humani, omnia diuina, et cum veritate doctrinae Euangelicae, cumque salute animarum humanarum coniuncta; idque loquuntur nobiles illae Theses, quibus proponendis bellum auaritiae et superstitioni vniuersae denunciauit. Neque hoc vnum agebat, ut plerisque videmus placere, sed plura etiam et maiora petebat, summam vniuersam rei postmodum actae, i. e. vniuersae tyrannidis Romanae euersionem et doctrinae disciplinaeque publicae emendationem vniuersam. Nam et res ipsa, quae impugnabatur, habebat magnam cum vniuersis Ecclesiae Romanae rationibus copulationem, et ipse, hoc se egisse animo et spectasse, in epistolis ad Spalatinum profitetur. Quo magis Deo viri et consilium et conatus placuit, qui profecto etiam ei et hanc mentem iniecerat, et hanc animi vim inspirauerat, ut tantum onus et suscipere gestiret, et ad extremum usque sustineret. Itaque res habuit illum euentum, quem admirabundi videre maiores, cuius memoriam nos fructumque, si quidem grati sumus, et beneficii magnitudinem capere possumus, laeti celebramus.

Arbitramur, non alienum nos facturos ab hoc cerimoniae craftinae praefandi officio, et ab illius, de qua diximus, rei memoria, si quid de vniuersa auaritia, ut ita dicamus, ecclesiastica, cuius tum partem petiit Lutherus, pauca differamus. Nec abhorret ea disputatio a praesentis temporis rationibus, quibus, in ipsa Ecclesia Romana, multis partibus, praesertim in Francia, in omnium ore est,

est, accusaturque libris palam avaritia vetus Cleri, cum diuitiis, per malas artes quaesitis, ad iuuanda et coloranda consilia circumscribendi et avaritiam illam, et diuitias ipsas, harum etiam, idque maxime, diminuendarum: non ut religioni consulatur eiusque puritati: nihil minus agitur: sed ut noua subsidia potentiae firmandae augendaeque quaerantur aduersus hostes, quibus per veteres et solitas opes pares esse non videantur. Hinc ex altera parte querelae multae et graues eorum, quorum copiae in periculum adducuntur, studiumque defendendi, ut ita dicamus, fines suos^{*)} et opes longos cumulas per annos. Quo pertinebat nuper Viri doctissimi e Benedictinorum inprimis locuplete familia, in *opere nouo diplomatico*, optatum, vix euentum habiturum, ut accurate quis, et sine cupiditate, de origine diuitiarum Ecclesiasticarum scriberet, ad reprimendas vulgatas iam calumnias, quae ad perniciem Ecclesiarum et Monasteriorum spectarent.^{**)} Et sunt profecto in his disputationibus vtriusque partis falsa veris admixta, dum quaeque, nimis fauens causae suae, vel videre se putat, quae nuspiam sunt, vel non vult videre, quae sunt ante oculos perspicuis impressa vestigiis.

Sed in illa causa et quaestione saepe fit, ut vitia cupiditatesque singulorum commisceantur cum auaris institutis et artibus vniuersorum. Nam multos omni tempore fuisse, sicut qui suam magis, quam Christi gloriam spectarent, ita, qui suam vtilitatem primam facerent in sacerdotio administrando, ad eamque doctrina ipsa Christi

li 2

abute-

^{*)} *Traité nouv. Diplom. T. IV. p. 582. Les prétendus sages de notre siècle font des systèmes pour autoriser la destruction des Eglises totale.*

^{**)} *Ibid. p. 581. extr. Un traité historique et exact de l'origine des biens des Monastères seroit indispensable, si l'on vouloit rectifier les fausses idées répandues dans un nombre des Auteurs modernes cet.*

abuterentur, id est ita testatum omnibus diuinis humanisque literis, ut dubitatione careat. Etenim, ut veteris Ecclesiae Iudaicae exempla mittamus, iam Paullus commemorat καπηλεύοντας τὸν λόγον τοῦ Θεοῦ, qui cauponarentur Euangelium, hoc est, quaestum ex Euangelio, tanquam e merce, facerent, et ministerium verbi in negotiationem conuerterent, 2 Cor. II, 17. cf. 1 Thess. II, 5. Tit. I, 11. Et veteris Ecclesiae doctores subinde queruntur de hac peruerfitate quorundam, commemorantque χειρικοπία, et χειρικοπίαν, mercatores et mercaturam Christi et Euangelii. Vnius Hieronymi quam multae eo pertinentes extant querelae, quas etiam in vnum locum congestas hominibus Ecclesiasticis commendat Baronius Ann. ad a. 370. n. 19. f. Nec id aut mirum videri potest, in tanta paucitate hominum, qui veram pietatem sequuntur, ab ipso Christo denunciata, aut ad opprobrium et criminationem ordinis Ecclesiastici aut Euangelii ipsius trahi debet, quod est commune omnium aliorum vitae generum, etsi dolendum in nullo alio magis.

Non igitur aliam auaritiam Ecclesiasticam agnoscere debemus, quam quae sit in institutis callide inuentis ad augendas Ecclesiarum et Monasteriorum diuitias, per speciem religionis, cum noxis priuatis publicisque. Atque ab huius generis labe primum, ut arbitramur, pura debemus pronunciare tempora ea, quae ante Constantini M. aetatem et huic proxima fuere. Etenim superioribus, satis constat, Ecclesias nihil habuisse, quod suum possent dicere, neque in agris, neque in numis, nullas dotes, nulla patrimonia. Nam nec templa erant, ut est a Blondello aliisque demonstratum, quae nostris essent similia, nec Monasteria eius, quae post fuit, aut nunc tenet, formae. Nec aliud habebat coetus Christianorum, i. e. Ecclesia in quaque vrbe, commune, praeter ea, quae ad alendos doctores sine re publicos, et pauperes, vel ipsi contulissent,

sent, per eas, quas oblationes dicerent, vel ex aliis Ecclesiis in vltima necessitate collecta accepissent, de veteri Apostolico more et instituto. Primus Constantinus Ecclesiis in eam quoque partem liberalem se præbuit, ut agros iis donaret, quorum fructibus pauperes, viduae, orbique parentibus alerentur, auctore *Eusebio* Vit. Const. IV, 28. Ab hoc autem initio longius res progressa est: donationes fundorum pecuniarumque factae Ecclesiis, unde certi et perpetui redditus essent, decimae attributae; aliae extra ordinem pecuniae in eas congestae: unde saepe non parum superesset vñibus necessariis: quae late persequuntur, qui de Beneficiis ecclesiasticis et redditibus scripsere. Haëtenus ergo nullum auaritiae vestigium; omnia liberalitatis, etsi interdum stultae et superstitiosae. Nec in eam partem acceperimus studium copias Ecclesiarum augendi parsimonia, dispensationis diligentia, cultu praediorum et vniuersae rei rusticae cura exquisitori; quae plurimum profecto valuit ad diuitias Ecclesiarum, praesertim in regionibus vastis et parum ante cultis, vbi etiam tanto latiores agri assignabantur, quanto minus tum ex iis redibat, velut in Germania nostra; nec minus ad copias ceterorum incolarum, qui nouas artes aliunde allatas imitarentur, in siluis exscindendis, inertibus terris mouendis, in vitibus ferendis, arboreis fructibus mitigandis, vniuersoque cultu hortorum: unde etiam villae multiplicatae, vrbes nouae ortae, cum pluribus iam alendis sufficeret terra, pluresque manus occuparet. Immo in hac parte, nos certe, etiam debemus Ecclesiis et Monasteriis. Fuerint interea aliqui ex iis, qui praeessent rei communi Ecclesiarum, cupidiores augendarum copiarum, et Principum priuatorumque liberalitatem erga Ecclesias vel allegerint blandiendo, vel impudenter mendicando expresserint: ne hoc quidem auaritiae noxiae assignetur. Humana ista sint: et studiis rei communis condonentur. Agnoscamus etiam interdum innocentiam

in iis, quae pro malis artibus avaritiae exprobrantur a multis hodie: quale illud esse arbitramur, quod existimant aliquando, Seculo nono atque decimo, sparsam esse a clericis in populum opinione imminuentis rerum humanarum finis, ut homines, ea opinionem capti, bona sua Ecclesiis et Monasteriis relinquerent. Nam is error, fanaticae similior dementiae quam callidae imposturae, nec toleratus est unquam, ut bene demonstrat *Maillonius*, in Annal. Bened. T. II. p. 672. s. nec hanc vim videtur habere potuisse. Neque enim Ecclesiis plus quam suis se profuturos existimare poterant, qui non sibi magis quam omnibus finem rerum instare crederent.

Sed sint ista et alia his similia, vel honesta ipsa, vel maligne in avaritiae crimen vocata: tamen non vicerint ullis doctrinae antiquae copiis vel moderatissimarum honestissimarumque familiarum sodales, copias Ecclesiarum suasque nihil debere avaritiae artibus non probandis, non decoris Evangelicae professioni, quae copias spernere iubet; quibus etiam usi sint ii, quorum nomina sanctitatis laudes nobilitauere. Exempli causa dicamus de vno, ne longiores simus: quippe librum non scribimus, et per hanc occasionem operis antiqui notitia accurata imperitiam studiosos antiquitatis eruditae, qua vulgo caruere etiam de doctissimis quidam.

In beneficiis haud satis consultae semper liberalitatis erga Ecclesias Constantinus M. etiam hoc iis tribuit lege, Romae in ipsis Quinquennialibus Constantini et Crispi Caesarum proposita, ut quisque Ecclesiis, quicquid vellet, testamento posset relinquere: quae lex etiam nunc extat l. 4. *Cod. Theod. de Episc. Ecclesiis et Clericis*, et l. 1. *Cod. Iust. de SS. Eccl. siue ea prima eius rei ius fecit Ecclesiis, siue ante iam, ab anno inde 312 aliis a Constantino concessum, ad Romanas etiam Ecclesias pertinere voluit, quae eo iure ante caruissent; quae est Gothofre-*

di

di coniectura, non admodum, vt nobis quidem videtur, probabilis: tum, quod non ducitur a testimoniis vel rerum vel scriptorum, tum quod res ipsa non satis videtur conuenire. Nam quae in quinquennialium celebritate factae sunt leges, eae vero, secundum obseruationes ab exemplis haud dubiis ductas, ad vniuersitatem Imperii pertinere: de quo adeundus *Pagius* in *Dissertatione Hypatica* P. II. c. 3. 4. cet. Erat autem tum in Occidente Constantinus, occupatus bello Sarmatico per Pannoniam Daciamque, quod anno 319 coeptum ad 322 vsque durauit; vnde, id quod aliis exemplis constat, edita, non modo, quae ad Romanos proprie, sed quae ad Imperium pertinerent, misit, publicanda in antiqua Imperii sede. Nec intelligi potest, quare, quod ceteris Ecclesiis dudum concessum esset, eo Ecclesiae vrbis. Romanae solae caruerint, et quomodo id passi sint Episcopi Romani, Melchiades et Siluester, hic per annos octo, homo alias non immemor vtilitatis suae vel Ecclesiarum suarum.

Nec vero ad legem hanc vel abolendam, vel eius beneficium circumscribendum, aut Ecclesiarum inde crescentes in dies copias minuendas, pertinuit lex Valentianiani maioris *Cod. Th.* l. 20. de Episc. cet. vt video placere *E. S. Cypriano*, in aureo et ediscendo penitus libello de Papatus Origine et Incrementis 18, 3. Non ad Ecclesias illa lex pertinet, sed ad Clericos hereditetas, qui irreperent in domos priuatas adque mulierculas superstitionas, viduas inprimis et pupillas, et earum imbecillitate captanda in testamenta ipsi priuatim venire tentarent. Nec *Hieronymi* de ea lege querela Epist. 2. ad Nepotianum, pertinet ad Ecclesias, quarum commodis obstarat, sed ad Clericos et monachos, quorum improbitas eam legem expressisset, sibi potius quam Ecclesiae quaerens copias: *Non de lege, inquit, conqueror, sed doleo, cur*

meruerimus hanc — Sit heres, sed mater filiorum, i. e. gregis tui, Ecclesia, quae illos genuit, nutriuit et pascit. Quid nos inferimus inter matrem et liberos? Itaque etiam post illam Valentiniani, legem testamenta, quae Ecclesias heredes scripsissent, rata fuere. Sed hoc obiter admonuimus.

Sed illa Constantiniana lege fontem diuitiarum Ecclesiasticarum perennem atque vberimum patefactum, ab illiusque vbertate immensas diuitias in Ecclesias, maiorum praesertim urbium, fluxisse, fatentur omnes, etiam in Ecclesia Romana, allatis etiam veterum testimoniis, ut *Pagius* in Crit. ad a. 321. sine haesitatione secutus *Gothofredum* ad *Cod. Theod.* l. c. e quo sua descripsit. Nam in recentis tum vel Christianismi modo suscepti, vel laetitiae et pace Ecclesiae per Constantinum reddita ardore, cum contemptum rerum humanarum, et benignitatem erga pauperes imprimis, publica Ecclesiae cura alendos, demonstrare plerique vellent enixius, fecerunt simile quid iis, qui Apostolorum ministerio primum ad Christi fidem adducti, superabundante gaudio, etiam omnia sua Apostolis permiscere, ut cum pauperibus communiter alerentur, nec quicquam haberent ab ea parte praecipui. Itaque multi aut viui amplis donationibus ad Ecclesias contulere magnam bonorum suorum partem, aut testamentis, per quae etiam copiosius et libentius post illam legem dabant, quod usum rerum et fructum viui retinebant.

Iam in hac repentina liberalitate saepe aliquid superstitionis intercessisse, etiam iniurias in coniuges, liberos et cognatos, facile intelligi potest: et extant super ea re priorum querelae. Nec abnuerimus, a Clericis interdum impulsos esse homines in hanc fraudem, cum cohortarentur diuites, ne beneficium legis irritum facerent amore intemperante vel suorum vel pecuniarum ipsarum. Omnia tempora, etiam nostra, et huic aetati proxima, talis

talís iniuriæ. et talis intemperantiæ, in instituti religiosi nouitate vel commendanda locupletibus, vel prosequenda largitionibus, exempla tulere. Auaritiam quidem nondum exprobrabimus iis, qui etiam fortasse intemperantius hoc tormento expugnandæ vel pietatis in suos, vel avaritiæ sunt vsi. At hanc tamen sine dubitatione impudentem impiamque avaritiam et artem pessimam augendarum ecclesiasticarum diuitiarum agnoscemus, quæ pro parte necessaria religionis, et in conditione sperandæ remissionis peccatorum obtrudere Christianis ausa est largitiones testamentarias, sub pauperum nomine, Ecclesiis faciendas, et per eas, coniugibus liberisque alimenta sua eripienda, quibus prospicere et consulere iussit diuina auctoritas. Hoc vero genus avaritiæ extitisse post illam legem et usurpatum esse etiam ab iis, qui in laude doctrinæ et pietatis versarentur, insigni et commemorando exemplo planum faciemus, enarrando argumento libri veteris, quod, sub tractatus siue epistolæ nomine *aduersus Auaritiam*, existat, et vulgo commemoratur inter *Saluiani Massiliensis* opuscula; quem sanctum Virum *Eucherius* Episcopus Lugd. *Baluzius* autem *Orbis Christiani magistrum* appellare non dubitat.

Opus id habere auctorem *Saluianum* nemo hodie, ut opinor, dubitat, etsi nomen eius in Codicibus scriptis non habet, sed *Timothei*; estque primum a *Sichardo* in *Antidoto*, deinde *Heroldo* in *Haeresiologia* editum, sub titulo *aduersus Auaritiam*, non constat, an quia in scriptis exemplis sic repertum esset, cum ii, quos *Baluzius* vidit, eum titulum non haberent, sed *ad Ecclesiam Catholicam*. Credibile est, secutos esse *Gennadii Massiliensis* auctoritatem, qui eum titulum operis habet, suntum, ut opinor, e præfatione ad Salonium. Sed hic titulus decepit homines doctos, qui opus ipsum non legissent, et argumentum libri e titulo hoc iudicarent, fortasse, quia hanc ipsum

ob causam legere non dignati essent, putarentque, nihil inesse aliud, quam declamationem aduersus auaritiam vulgarem. *Caveus* quidem, cum illam epistolam legisset, in qua auaritia etiam Clericos inuasisse dicitur, libri ipsius argumentum inde finxit, et sic expressit: *aduersus auaritiam, praesertim Clericorum et Sacerdotum*: quod longe abhorret ab veritate. Non dubitem, lectum esse opus a *Tillemontio*, fortasse et *Dupinio*, nisi illius auctoritatem est secutus, libro non lecto: solet enim magis ab aliis tradita repetere, quam suis oculis cernere: at, verum, ut opinor, dicere non ausi, nil aliud reprehendunt aut memorant, quam quod interdum videatur durius dicere de bonis per testamenta relinquendis pauperibus ad salutem animae, et ita liberis patrimonio fraudandis; sed ea loca esse rara: idque sequuntur *Auctores Historiae literariae Francicae* T. II. p. 525. *Baluzius* autem, cui optimam *Saluiani* operum editionem debemus, rem totam ne attingit quidem. Nostrae aetatis duos omnino reperi, qui aliud in his libris agi notarent, quam titulus habere videretur; alterum nostratem, *Heumannum* in *Possile*, L. II. p. 337. alterum Auctorem libri nuper Parisiis editi, *de l'Autorité du Clergé du Pouvoir du Magistrat politique* T. II. p. 233.

Et si negari non potest, in iis libris esse quasdam de auaritia vniuersa sententias, easque saepe bellas et argutas, reprehensionem etiam Clericorum et Monachorum L. II. et IV. qui diuitias seruent, nec vel viui vel moribundi Deo tradant, inprimisque locum egregium aduersus hereditatum captatores, in libri tertii fine, tamen, si quis argumentum, quod proprie per vniuersum opus tractatur, exprimere, et inde titulum verum operi facere velit, rectissime, *Pro auaritia Ecclesiastica*, inscribat. Nam omnia, a principio ad finem, eo spectant, ut omnes omnium pecuniae per donationem

nationes et testamenta, verbo ad pauperes, re vera ad Ecclesias et Monasteria confluant. Vult enim heredes scribi Ecclesias, non liberos, non fratres et amicos: atque id dicit *reddere Deo sua, et redimere peccata*. Hoc ille inculcat, centies repetit: durum videri fatetur: et tamen necessarium esse defendit, ut vnum remedium peccatorum, quod morituro reliquum sit, vnum, in quo aliqua salutis spes sit, vnum, quo etiam sancti redimere reliquias peccatorum possint.

Initium totius operis, Libro primo, ducitur ab querela graui, quod Christiani non satis habeant, bona ad *opus sanctum* a Deo data, sine fructu misericordiae retinere, sed etiam auaritiam illam, i. e. idololatriae seruitutem, in *futura post mortem tempora* extendant. In eo numero esse paene omnes. Nam non imitari quemquam illos Christianos primos, qui *universi* facultates rerum caducarum ad coelestium possessionum opes contulerint, et immortales diuitias praesenti paupertatis ambitu emerint: sed potius laborare in re facienda per causam amoris aduersus liberos; quasi ipsis essent necessariae copiae, et non satis sit pietas, quae ad omnia utilis sit, et non amor liberorum potius sit in eo, si eos ad pietatem adducamus. Tum vero, cum in ea re se peccare non putent, atque etiam ad mortem cuncta seruent; nec in morte sibi consulere *per dispensationem substantiae*, i. e. bonorum suorum. Iubet ergo morientes offerre, ad liberandam de perennibus poenis animam, quia iam aliud non possint, saltem substantiam suam, sed cum compunctione cet. et eam quidem totam. Nam hoc ipsum totum esse parum. Atque haec quidem pertinent ad homines vitae male actae sibi conscios.

In libro secundo oratio confertur ad melius hominum genus, et verae sanctitatis studiosos. Hos fortasse

tasse ab illa necessitate relinquendi sua Ecclesiis libera-
bit, qui, ut ipse ait, non habent, quod necesse sit redi-
mere largitate? Immo vero eidem necessitati subii-
cit. Primum neminem esse, ita sanctum, ut non saepe
labatur et delinquat, eamque ob causam necesse
habeat futuri examinis tremendam necessitatem metue-
re. Itaque nihil esse, *cur non totis substantiae suae vi-*
ribus ad id nitatur, ut vel mortis deuotione redimat,
quicquid vitae offensione contraxerit. Deinde, etiamsi
praeterita peccata non sint, *quae oporteat rebus cunctis*
redimere; esse tamen perennia bona, exspectanda scili-
cet in vita altera, *quae magno oporteat comparare,* nec
villas diuitias esse tantas, quae non longe exsuperen-
tur diuitiarum coelestium magnitudine: quo minus
dubitare quemquam debere, eas vniuersas pro iis pro-
fundere.

Liber porro tertius versatur in diluendis iis, quae
cum specie aliqua dici contra possint: in primis, quod
ista philosophia pugnet cum pietate aduersus liberos.
Cui rei ita occurrit homo hypocriticus, ut dicat, in iis
esse umbram excusatiunculae, dantem reo deprecationi-
culae speciem, non reatus securitatem: Dei amorem
etiam liberorum amor praeposendum esse de prae-
cepto Christi: deinde sui quemque ipsius rationem de-
bere potius ducere, quam liberorum aut cognato-
rum amicorumque, nec tam curare, ut alii bene post
se viuant, sed quam male moriturus ipse sit: tolera-
bilius esse, si quid filiis hic desit, quam si parentibus
in futuro, si illi sint hic in tenuitate, quam si parentes
in aeterna non modo paupertate, sed etiam poena.
Haec ubi declamauit, inuehitur in parentes eos, qui
testamentis plus relinquunt filiis civilem vitam sequen-
tibus, quam qui monasticam amplexi sint, his etiam
interdum usum tantum partis destinatae, non ipsam.

In

In qua longa declamatione multis modis prodit animus: ut in his: *eligi debere paupertatem ab his, qui monachi fiant, non sustineri: mollem vero et facilem paupertatem, quae nomine tenus suscipiatur, non re! si tamen sustineant, deuotione tolerare debere, non damnatione pati: plus etiam debere monachis relinquere, quam ceteris liberis, ut facultatum aliquid saltem per filios ad Deum veniat: in usu rerum habere eos aliquam tantum imaginem opum, conscientiam non habere: et multis aliis similibus.*

In libro quarto, repetita sententia, aliis porro defensionibus occurrere conatur eorum, qui recte se putent posse sua suis relinquere: ut cum dicant, se id facere non propterea, quod eos plus ament Deo, aut Deum vilem putent, sed quod ament suos. Id vero ipsum, ait, incuriam Dei et contemptum arguere. Nam si hoc sit, amare suos et honore afficere, si iis tua relinquant; planum esse, non amari sed contemni Deum, si ei non relinquant, eique praeferrari in amore et honore homines. — Deus munificentia hominis non indiget. — Immo eget, sed in pauperibus, in suis. Inde delabitur ad eam, quam supra indicauimus, accusationem religiosorum, quae ad finem usque operis continuatur.

Hac e summa arbitramur satis intelligi, quo pertineat consilium operis totius, et sub nomine Dei, Christi, pauperum, latere auaritiam illam, de qua diximus, quae opes Ecclesijs petat, ad potentiam, ad magnificentiam substructionum, splendoremque templorum et monasteriorum inutilem; de quo etiam sancti saepe viri, in his *Bernhardus*, in clara ad *Guilelmum* S. Theoderici Abbatem Epistola, questi sunt. Sed haec de eo, quod proposuimus, dicta sunt.

Gra.

Gratias debemus Deo, qui per ministerium Lutheri Ecclesiam ab ista avaritia liberauit, ceteraque superstitione, quae et fidem Christianam et vitam foede corruerat, in lucemque restituit veram doctrinam Euangelii, quae omnem spem salutis ad ipsius misericordiam et filium eius Iesum Christum pro nobis mortuum reuocat, commendatque beneficentiam, sed veram, liberam, et sine cuiusquam iniuria copiosam. Has gratias publice agamus, primum cum toto fidelium coetu in diei crastini celebritate, deinde etiam proprie in aede Paullina ab hora XII. cum precibus religiosis, vt hoc tanto beneficio et nobis et seris nepotibus conseruando suam filiiue sui Iesu Christi gloriam illustret.



DE
THEOLOGIAE
HISTORICAE ET DOGMATICAE
CONIVNGENDAE
NECESSITATE
ET
MODO VNIVERSO

DE
THEOLOGIAE
HISTORICAE ET DOGMATICAE
CONIVNGENDAE
NECESSITATE ET MODO
VNIVERSO

Scientia, quam profitentur ii, qui Theologi dici habereque volunt, duabus rebus constat: quarum altera est in materia, quam iis literae sacrae et Ecclesiae monumenta praebent tractandam ingenio, et elaborandam arte ac veluti fingendam: altera autem cernitur in ratione earum rerum, quas ingenio suppeditatae sint, tractandarum. Itaque nec qui bonam materiam e suis locis quamvis diligenter congestam tenet, perfectam Theologiae scientiam habet, nisi rationis et artis subtilitas accesserit, nec qui, in rerum tractandarum subtilitate, bona materia caret. Vt non statim Physicus est, qui, quicquid in rerum natura vel est, vel accidit, curiosa lectione vel observatione didicit ac tenet, nec bonus Physicus potest haberi, qui in rerum natura causisque subtiliter indagandis et explicandis acutum se praebet, sine naturae vera historia: nam in illo tantum historia naturae est, non scientia, in hoc fabulosae et commentitiae potius, quam verae naturae interpretatio: sic nec Theologus perfectus esse potest, qui quicquid est in literis sacris et monumentis Ecclesiae, perceptum ingenio, et comprehensum memoria tenet: nec bonus Theologus, qui in rebus divinis li-

Ernesti Opusc. Theol.

Kk

teris

teris vel voce tradendis, subtilitate vititur, quae sit destituta sacrarum et ecclesiasticarum apparatu et instrumento literarum. Nam in illo est historica modo rerum sacrarum eruditio, praeclara illa quidem et utilissima, et, si alterutra pars omittenda sit, haud dubie illi alteri longissime praeferenda, sed tamen non scientia digna Theologi perfecti nomine, in hoc inane differendi artificium, *τεχνολογία*, ut *Gregorius Nazianzenus* ait, non *θεολογία*, umbra Theologiae scientiae, non vera et expressa imago, aedificium bene descriptum atque exstructum, sed e parum bona vitiosaeque materia, e stipulis, foenoque, (1 Cor. III.) in quo nemo prudens habitare vel cupiat, vel audeat. Quod si utrumque apte coniungitur, si ad rerum veritatem et copiam accedit docendi ac differendi elegantia et subtilitas, tum vero existit is, quem vere possimus Theologum perfectum appellare. Haec praefatus et vberius differemus.

Est igitur duplex Theologia (imitemur enim praeclaros viros, quamquam una tantum est, si subtiliter loqui velimus) historica altera, altera dogmatica, siue scholastica, aut Academica potius. Nam dogmatica proprie est illius ipsius historicae Theologiae pars, de placitis et opinionibus Theologorum, quae sunt proprie dogmata, nostraque demum aetate, a nostratibus quibusdam, ita appellari coepit ea, quae olim scholastica, post, propter invidiam verbi, acroamatica dicebatur. Sed historica Theologia omnis versatur in indagandis rebus, quas altera illa tractet subtilius, easque haurit e libris primum divinis, a quibus omnis vera et certa rerum diuinarum scientia ducitur, deinde vero etiam ex humanis Conciliorum, Symbolorum, publicis, et Ecclesiae doctorum privatis: non quo ex his veri iudicium petatur, quod solis scripturis divinis convenit, sed ut intelligatur, quae publica quibusvis temporibus fides fuerit, quid magni viri de unaquaque quaestione, inprimis difficili aut obscura, senserint, quaeque opiniones fuerint, quibus argumentis rationi-

tionibusque veritatem stabiluerint, erroresque refellerint, qui errores per haereticos irreperierint, a quibus fontibus fluxerint, quibusque argumentis speciem acceperint. In his porro indagandis et congerendis, utitur instrumento literarum hebraicarum, graecarum et latinarum, etiam historiae, cum vniuersae, tum etiam philosophicae, sine qua dogmata doctorum Ecclesiae saepe intelligi et explicari non possunt. Acroamatica autem siue dogmatica Theologia res, per libros sacros sparsas ac dissipatas, primum ad certa capita congregat, deinde subtiliter ac perspicue definit, varietatem verborum (synonyma) ad significationis unitatem reuocat, ambigua distinguit, genera in suas partes tribuit, veritatem rerum idoneis argumentis demonstrat, quid ex quoque consequatur, quomodo quaeque apta inter se sint ac nexa, ostendit, dubitationes vndecunque ortas tollit, denique errores et falsas opiniones acute et accurate refellit. Iam qui illam, quam historicam diximus, Theologiam, ex istis fontibus, per ea, quae diximus, instrumenta ductam, etiam virorum, qui in eo genere elaborarunt feliciter, qui sunt multi et magni, observationibus ac disputationibus ornatam et illustratam, teneat, is quin pulcherrimam scientiam sibi comparauerit, sitque in magnis viris ac Theologis numerandus, dubitare ac negare profecto nemo potest, nisi qui se ita angusto ingenio et obscuro velit ostendere, ut illius tantae, tam eruditae, tam copiosae, tam multarum artium comitatu circumfusae scientiae splendorem adspicere et capere non possit. Enimuero, nisi ad huius tam praeclaras copias accedat alterius subtilitas, existunt facile, etiam in magnis ingeniis, incommoda et vitia multa et magna.

Atque ut mittam, in illa rerum quamuis bonarum copia non esse, quae proprie in scholis atque in arte dicitur, et esse in Theologo debet, scientiam: maximum et primum vitium illius rationis est hoc, quod notiones rerum facile suscipit parum vel plenas, vel circumscriptas: quae

non sufficiant ad res accurate intelligendas, iudicandas, et explicandas defendendasque, et confundendis rebus natura sua diuersis locum faciant: unde errores, logomachiae, et inanes, saepe etiam noxae, concertationes nascuntur. Inprimisque facile conturbatur in ambiguis, hoc est, vel notione, vel nomine similibus, et quibus communis est appellatio, cum diuersa ipsa sint. Nam etsi diuersitatem significationum non ignorant, tamen, cum exercitationibus crebris et diligentibus in scholis philosophorum non didicerunt, discrimina rerum, in communitate verborum, accurate tenere, et in legendo ac iudicando semper in oculis atque in animo habere, obliuiscuntur repente discriminis, praesertim si qua cupiditas intercesserit. *Petaui* quidem, ut de aliis taceam, in praeclaro dogmatum theologicorum opere, hoc subinde accidisse, eumque, hac quoque de causa, nec suis, nec ceteris satisfecisse reperio: ab eoque deceptos alios, qui suis oculis videre in iis rebus vel non possent, vel non curarent, ut opinionis suae amore adhaerescerent ad id, quod ipse iudicarat negligenter ac parum subtiliter, atque etiam defenderent: in his *Curcellaeum*, elegantis alias ingenii et doctrinae virum (*praef. ad Episcop opp. n. VI. et Quatern. Dispp. Th. p. 852. Opp.*) in ὁμοσίᾳ notione, quam ille, arrepto *Petaui* loco (*I, 4. 15.*) contendebat, ab antiquis Ecclesiae doctoribus, iisque orthodoxis, poni in essentia, non numero, sed specie eadem, nec modo in quaestione de Christo Θεανθρώπῳ, quem ex altera parte ac natura nobis ὁμοῦσιον dicebant, sed etiam in quaestione de trinitate, et λόγῳ s. filio Dei. Quod si ea res obest in ipsa dogmatum historia, e libris humanis eruenda, quantum inde putamus mali nasci posse in notionibus, quae ex ipsis libris sacris hauriri et accurate definiri debent. *Plato* solebat Dialecticam vocare Σειρήνδς, quandam quasi saepem doctrinarum omnium, *Cicero*, leuiter mutato tropo, *valium*. Id rectissime ad Theologiam transtulere doctissimi et elegantissimi Ecclesiae graecae et

et latinae scriptores, quoties Dialecticam laudant, *sepen Theologiae* appellantes. Quae ei laus profecto, omnium disciplinarum nomine, debetur etiam hac de causa, quod actiones rerum e dictis, factis, rebus quibusque, acute et plene colligere, et definiendo, distribuendoque ac distinguendo, circumscribere, et circumscriptas, exercitatione assidua, sine confusione cum aliis, tenere, et ad quamque disputationem accommodare docet, nec finit res diuersas, quamuis communia et ambigua nomina habentes, permisceri. Nam non vniuersum modo alicuius urbis territorium habet suos terminos, quibus a vicinis territoriis distinguitur, sed etiam agri singulorum, prata atque horti, habent suos limites, macerias atque sepes, quibus cuiuscunque possessio circumscribitur, et cauetur iniuria.

Alterum, nec multo minus vitium illius rationis cerpitur in iudicio et defectu argumentorum, quibus in quaestionibus theologicis, vel firmatur veritas, vel error revincitur. Nam, ut nihil dicam de recentioribus Theologis, qui profecto non semper optimis et satis certis argumentis utuntur, veteris Ecclesiae doctores, quorum in scriptis eas quaestiones tractatas reperimus, cum Philosophorum scholis, vel e Rhetorum et Oratorum officinis profecti essent, in disputando vsi sunt ratione differenti Philosophis vsitata, oratoriaeque consuetudini simillima*). Ea qualis fuerit, si non ex ipsis eorum scriptis intelligeremus, Cicero doceret, qui Philosophorum hunc morem esse dicit, (*Tusc. V. 7.*) ut, quamcumque rem habeant in manibus, in eam, quae conveniunt, conge-

Kk 3

rant

*) *Dallaeus* quoque (*de Vsa PP.*) hinc ducit causam obscuritatis, et ambiguitatis in cognoscendis ac iudicandis PP. sententiis et argumentis: sed eum locum admodum ieiune tractat, nec modo de Rhetoricis artibus, quas ponit prope totas in tropicis et hyperbolicis loquendi modis, sed multo magis de Dialecticis, (*p. 146*) quas omnes videretur ponere in nimia contentione vincendi, per quam in contrarium ei, quem oppugnet, errorem incidunt saepenumero.

rant omnia: eamque ipse perfectam philosophiam semper se iudicasse profitetur (*Tusc. I, 4.*) quae de maximis quaestionibus copiose posset ornatè dicere. Itaque ad eam veluti legem in explicandis quaestionibus congeruntur omnia, quae in mentem venerant, vel ab aliis accepta, vel suoapte ingenio excogitata, nec modo quae certitudinem adferant, sed etiam, quae utcumque probabilem speciem habeant. Quod etsi in eo genere disputationis non est admodum vituperandum, nec omnino displicet ille *Melch. Cani* praeceptor *Fr. Vittoria*, qui nulum argumentum esse negligendum aiebat, in quo aliqua significatio veritatis appareret: tamen iis cognoscendis facile conturbantur ingenia expertia subtilitatis dialecticae, nec possunt ab infirmis firma, quae sola in scholae doctrina sunt usurpanda, discernere. Vnde et ipsi saepe, ubi firmiter consistant, non habent, et in docendo vel non possunt ad ἀκριβειαν et certitudinem adducere discipulos, aut etiam ingenia felicia, quae infirmitatem argumentorum sentiunt naturali quadam solertia et ἀγχινοία, ad scepticismi inconstantiam faciunt procliuia. *Huetius* quidem sibi hoc accidisse iuueni narrat (in *Comment. de rebus suis* p. 29.) e lectione Petauiani operis de dogmatibus theologicis, ut, argumentorum imbecillitate animaduersa, res ipsas incertas existimaret. Quamquam ea quoque res suum habet modum, nec ad contemptum veterum Ecclesiae doctorum trahi debet, ut faciunt vulgo, qui vel effugere molestiam ex auctoritate Patrum, in disputatione cum aduersariis oblatam, vel excusationem neglectae lectionis Patrum quaerunt. *Huetius* quidem ille natura procliuius ad scepticismum fuit, et illam propensionem ad extremum, id quod satis constat, seruauit: et erat tum ea aetate, ut satis acute de illis rebus fortasse iudicare non posset. Omnino in illo ipso iudicio de argumentis et demonstrationibus veterum doctorum solet non vno modo peccari. Atque ego non dicam, permultos, qui de iis iudicare audent, non esse satis peritos linguae, non modo

de graecae, cogique e versionibus sapere, quae sunt in nullo alio genere scriptorum fallaciores, praesertim si a Pontificiis factae sunt, in quibus ad imperitiam etiam accedit partium studium, sed etiam latinae: ex quo difficultas intelligendi oritur, si non tanta, quantam *Dallaeus*, feruens causae, iactat (*de Vsu Patr.* 1, 5. p. 139.) quippe in exemplis ab eo prolatis ne mediocriter quidem graecae docto insuperabilis difficultas obicitur, et magna tamen, ut in omni genere scriptorum veterum de quocunque genere doctrinae. Grauior est in hac re Rhetoricarum et Dialecticarum artium ignorantia; nec modo illa, quae ab incitia praeceptorum oritur eorum, quae in novitiis inprimis libris Rhetoricis et Dialecticis traduntur, sed etiam, et multo quidem magis ea, quae est in omnibus, usus et exercitationis in legendis et interpretandis oratoribus et philosophis antiquis, et in dicendo differendoque, expertibus. Nam ea saepe facit, ut homines nec argumenta ipsa interpretando intelligere, nec vim eorum recte aestimare possint. Itaque saepe mihi tacitus risus exoritur, cum audio, homines, ab istis praesidiis rudes, de Patrum disputationibus tamen iudicare, easque magna confidentia contemnere, cum interim fateri necesse habeant, se eas nunquam cognovisse. *Dallaus* hic paullo durius loqui fortasse licuit, et venia datur, quia ipse legerat, et homines, obscuros scilicet, intelligebat, et eorum testimoniis ad debellandos Ecclesiae Rom. doctores egregie utebatur: illis non item. Sed hoc, ut non admodum pertinens ad institutam disputationem, leviter tetigisse, et obiter admonuisse studiosos, satis est. Nec illud leve incommodum est, quod haec ratio in disputationibus iis, in quibus argumenta ducuntur e rerum natura, vel ad confirmandam veritatem, vel ad concilianda inter se dogmata et consocianda, vel denique ad refellendas dubitationes e natura rerum, nisi felicissimum a natura et acutissimum ingenium contigerit, vix bene et constanter versari potest, sed vagatur et fluctuat, multo

verborum flumine obscurans veritatem, nihilque vel breviter argumentando, vel subtiliter distinguendo, vel e contraria parte opponendo efficere potest. Vnde fit, ut ab acuto et subtili disputatore facile in angustias redigatur, atque in laqueos coniciatur eos, e quibus se expedire vix possit: qua re debilitantur ingenia imperitiorum, qui de veritate causae solent e victoria disputationis iudicare. Itaque mihi inprimis semper placuit instructissimae illius *Panstratiae* auctor, *Chamierius*, qui controversas, quae cum Pontificiis intercedunt Protestantibus, ita tractat, ut utriusque partis rationes ad Dialecticas formulas redigat, et: quid iis vel confirmandis, vel frangendis ac dissolvendis faciendum sit, ostendat, et tum demum copias sacrarum literarum, et scriptorum ecclesiasticorum, adpersis observationibus hermeneuticis, criticis, historicis, adducat ad pugnandum: quae res iudicium in utramque partem facilius facit,

Sed non minus, atque adeo multo magis vitiosa est Theologia dogmatica, quae careat historicae, quam ante descripsimus, copiis atque subsidiis. Ac primum saepissime vitiosa est in definitionibus, quarum vitium saepe quodam quasi contagio inquinat totas de rebus gravissimas disputationes: quod nihil bene procedere potest in disserendo, si disputatio a vitioso definiendi principio proficiscatur. Etenim, qui in Theologia confidunt subtilitati philosophicae, sine literis plurimis et historia, vel coguntur sequi versiones et sacrarum et ecclesiasticorum librorum, quae sunt parum certae, saepissime etiam valde vitiosae, in posteriori in primis genere, ut ante diximus, vel, si ex authentico hauriunt, quod hodie fere volunt videri, tamen verba e lexicis vulgaribus coguntur interpretari, quae saepissime fallunt; non modo suo vitio, quod plerumque etymologiam modo verborum utcumque exprimunt, aut verbo non satis respondente alterius, quod erat interpretandum, significationi, aut formas dicendi ad verbum vertunt, sed etiam eorum, a quibus consuluntur,

tur, cum verba latina e consuetudine puerili germanicè vertendi, aut sectae philosophicae, cui addicti sunt, accipiunt. Vnde vix dici potest, quot inanes verborum concertationes, quam multa etiam maiora mala omni tempore nata sint. Alio loco ostendi (*Antimurator. p. 25. sqq.*) praedestinationis Calvinianae, et transubstantiationis monstra nata esse e verborum definitionibus, quae non ex obseruationibus grammaticis, et historicis collectae essent sed ex etymologia, eaque parum intellecta, et e nouitiis linguis aestimata, vnde conclusiones ducerentur alienissimae a vera rerum natura, et perabsurdae atque impiae. Quicquid propemodum est errorum Pontificiorum in loco de Poenitentia, id haud dubie natum est ex tali fonte: cum Latini de ea philosopharentur e vocabulo latino, quod in versione N. T. latina est, eiusque etymologia, ignorato et neglecto *μετανοίας* verbo, in quo plus inest, quam poenitentia latine accepta, i. e. dolor e male facto: nec vilo modo potuisset accidere, vt aut poenitentiae summa poneretur in contritione, aut poenitentia pro poena haberetur, vt alia mittam, nisi falsa notio e poenitentiae verbo suscepta fuisset. *Augustinus*, qui saepissime ad hoc saxum impexit, (*ep. LIV. et alibi*) poenitentiam, dixerat, habere nomen a puniendo, et esse quasi punitentiam, per quam se quis ipse puniat. Huius auctoritatem secuti doctores Ecclesiae latinae, qui fere omnes ex *Augustino* pendent, ad extremum Sententiis intulit *Lombardus*, sequente omni Scholasticorum grege, vt bene docet *Morinus* (*de Poenit. I, 1.*) Hinc mali initia omnia. Eodemque modo orti errores de Confessione, et de Satisfactionibus, quarum frequens apud Patres mentio, sed sensu bono et probando, vt *Chemnitius*, *Dallaeus*, et multi alii demonstrant. Mitto dicere de Consecrationibus, de Ordinationibus, de Sacramentis, de Oblationibus, et aliis, quae plena sunt apud Pontificios ineptiis: quas subinde agnouere, indignantibus suis, inter ipsos Theologi literati, qui historicam Theologiam

logiam cum dogmatica coniungerent; imprimis is, quem ante commemoravi, *Io. Morinus*.*) Atque hoc ab initio repurgandorum sacrorum perspexere magni viri, in his *Philippus Melancthon*, qui multis locis hoc monet, omnem propemodum deprauationem doctrinae ortam semper esse a deprauatione verborum, et definitionibus eorum constitutis sine literarum et historiae scientia, imprimisque, cum verba popularia definirentur e philosophorum consuetudine loquendi, atque ex illis definitionibus disputaretur: quo in genere saepe peccare *Augustinum*, et mirifice se torquere subinde. v. *Tr. de Ecclesia et auctoritate verbi Dei*. (T. II. Opp. p. 122.) ubi etiam exempla commemorantur.

Atque etiam solent arrogantia sua molesti esse aliis, qui ita tractant Theologiam, ut vna philosophiae subtilitate, sine multis literis et historia, nitantur: primum in eo, quod se putant saepe res novas, aliis indictas, excogitasse ac protulisse, idque persuasum capiunt hominibus: cum nouitas sit in solis verbis, non in rebus. Nam cum verba noua ratione definiunt, h. e. male, decepti ab inscitia literarum, e noua definitione colligunt multa, quae sub eò nomine sane nemo ante dixit: sed quae vel falsa sunt cum ipsa definitione, vel vera quidem, sed ita, si nomen rei mutes, de qua disputant. Sed insolentius illud

*) Vitae *Io. Morini* auctor, qui putatur esse *R. Simonius*, praemissae *Antiquitatibus Oriental. Eccles.* p. 75. tradit historiam Operis de Poenitentia, valdeque laudat et commendat, ut non scriptum ad modum Theologorum, e schola, sed prope totum historicum, i. e. ab literarum sacrarum interpretatione et antiquitate ductum: sed *Morinum* coactum esse, narrat, quaedam emollire in praefatione, atque etiam retractare, quod essent aduersa Dogmaticorum decretis, quod fecit maxime in fine praefationis: *Forſitan*, inquit inter alia, *antiqui moris circumſtantias particulisim diſcantiens, conſequentia quaedam eruiimus, quae doctrinae in Ecclesia vulgatae et approbatae principia laedunt: hoc toto animo exhorteſcimus* cet. Sed ſimilia ei acciderunt in alterius Operis praeclari, de *Ordinationibus*, P. III.

illud est, quod nimis sunt proclites ad hanc opinionem, ut credant, se solos esse subtile Dogmaticos atque adeo Theologos, ceteros tantum plebeios concionatores esse, aut verba et historias tenere: a quo errore vel ipsi sunt, si potest fieri, liberandi, vel iuvenes, ut sibi caueant, monendi. Atque nos quidem et ipsi supra diximus, Theologo perfecto necessariam esse subtilitatem philosophicam, imprimisque dialecticam: sed in eius praecepti intelligentia cauendum est, ne quis erret: errant autem plerique. Nam putant, si vulgata praecepta Dialectica perceperint audiendo bono magistro, aut ea multis annis decantauert in scholis, se bonos Dialecticos esse. Quod abest longissime. Sunt fortasse Dialectici, sed in praeceptorum intelligentia et scientia, non statim in usu, et cum praecepta conferenda sunt in aliquo genere doctrinae ad definiendum et demonstrandum. Namque, ut maneamus in eo vno, de quo coepimus dicere, perfecto usus et in me, et in aliis multis me docuit, nec aliter esse potest, in verbis definiendis, quae non sensibiles res exprimant, quales sunt figurae mathematicorum, et res physicae, aut sensu interno contuendas, sed eas, de quibus aliunde, nisi e libris antiquis, iisque lingua scriptis mortuas, cognosci non possit, in his igitur verbis definiendis, neminem, quamuis tritum in dialecticis praeceptis, bonum Dialecticum esse posse, qui non sit idem bonus Grammaticus, hoc est, in studiis linguarum, et historiarum antiquarum, valde exercitatus. Nam sicut definitiones rerum physicarum ducuntur ex observationibus physicis, sic illae ducuntur ex observationibus grammaticis et historicis, diligenter institutis: quae si desint, frustra tu Dialecticorum praecepta definiendi vniuersa calleas, aberresque necessario a vera notione, ut videmus accidisse Doctoribus Ecclesiae latinae et Scholasticis. Quod si quis putat, se illis suis praeceptis definiendi plus posse altero illo, in quo sit scientia literarum, similis sit ei, qui libros Musicorum legerit, et praecepta eorum

eorum teneat, et in hac scientia, ab ipsa exercitatione canendi seiuncta, contemnat eos, qui canendo exercentur, seque dicat Musicum esse, illos nil nisi sonos et instrumenta musica tenere. Ex quo fit, ut nullo modo in Theologicis, quae omnia e libris antiquis, hebraicis, graecis, latinis ducuntur, possit aliquis bene in definiendo versari, et a peccatis multis et magnis sibi cauere, nisi literas et historiam assumat.

Sed non minus magna, atque etiam plura, vitia oriuntur in argumentis, vel ad confirmandam veritatem, vel ad refellendos errores, si historica Theologia absit. In quibus primum et maximum est, quod argumenta colliguntur e verbis male intellectis, non e consuetudine antiqua, quam historia docet atque illustrat. Vnde nascitur Philosophia potius (si tamen dignae sunt hoc nomine ratioeinationes et disputationes inanes, a falso principio ductae) quam Theologia. Hoc vitium illud est, quod dominatur in Scholasticis, qui Theologiam tractabant sine historia et literis: per quod vniuersa Theologia misere contaminata et corrupta est. Fatentur omnes, qui eorum, praesertim celebriorum, scripta attigerunt, magna in iis ingenia, et subtilissima fuisse: nec minus fatendum est, eos, inprimis *Thomam Aquinatem*, in rebus iis, quae vel e versione S. librorum et PP. graecorum; vel e latinis PP. cognosci possent, sine accurata scientia linguarum et historia, quae sunt sane non pauca, itemque, cum res mere intelligibiles tractant, quae historiae lumen non desiderant, acutissimos et eruditissimos se praebuisse: sed cum primum incidunt verba et res, quarum intelligentia constat observatione consuetudinis antiquae et historia, quae erant destituti, non eos deserit acumen, sed sunt tamen stultissimi, rebusque commentitis replent omnia: quod necesse est fieri saepissime, cum rerum theologicarum maxima pars ducatur a factis, quae sola historia seruantur. Atque eodem vitio laborant recentiores controuersiarum scriptores, cum alii, tum maxime Pontificii superiores, in his *Bellarminus*, in quo refellendo

nus-

nusquam feliciores sunt aduersarii eius, *Whirakerus*, quem *Bellarminus* ipse admirabatur, *Chamierius*, et e nostris *Gerhardus*, quam cum in talibus rebus cum eo pugnam conferunt. Atque id agnouere ex ipsis Pontificiis Theologis eruditiores. *Launoius* quidem etiam accusat *Bellarminum* pluribus locis, (vt *Epp. VI, 1. VII, 8.*) quod in controuersis vtatur argumentis philosophicis potius, quam theologicis, e scripturis recte intellectis, et historia ductis, agnoscatque, talibus nil effici in controuersis, quae pæne omnes ex interpretatione et historia pendeant. Nec aliter de antiquioribus, et his, qui *Lutheri* temporibus fuere, Theologis, et superstitionis Romanae defensoribus, iudicat disertissimus locorum theologicorum scriptor, *Melch. Canus*; (IX, 1.) Quo tempore, inquit, aduersus ingruentes e Germania hæreses oportebat scholas theologos optimis esse armis instructos, eo nullas prorsus habebant, nisi arundines longas, arma videlicet leuia puerorum. Ita irrisi sunt a plerisque, et merito irrisi, quoniam verae Theologiae solidam effigiem nullam tenebant, umbris utebantur. -- Quocirca homines, verbotenus in Theologia magistri, pugnauere illi quidem aduersus Ecclesiae inimicos, sed valde tamen infelicitur -- Errabant autem a principio statim studiorum suorum. Cum enim facultates eas, quae linguam expoliunt mirum in modum, neglexissent, cumque sese in sophistica arte torfissent diutius, tum demum ad Theologiam aggressi, non Theologiam, sed fumum Theologiae sequebantur cet. Et huius generis confessiones plures licet reperire in scriptis eruditiorum Theologorum Pontificiorum, *Petauii*, *Natalis Alexandri*, *Dupinii*, et scriptoris nuperi *Verneii*, *Lustiani*, quas cum legas, nihil aliud facere iudices, quam, vt suo calculo probent, quae olim *Lutherus*, *Melanchthon*, de Theologis mere philosophicis, siue scholasticis, iudicauere.

Atque etiam hoc genus Theologiae philosophicae solet esse parcum ac tenue in ipsis argumentis. Habere enim solet rata quaedam argumenta verborum ac rerum,

in

in quibus acquiescit magister cum discipulis, ut ex iis, velut tesseris quibusdam, possis scholam quamque agnoscere. Quodsi ferri potest, aut satis est in catechesi tiro-num, in Theologia viri, qui eam scientiam profiteatur, mera paupertas est, quae se facile deinde conspicuam facit, cum aut subtiliter in libris, aut populariter in templis, capita doctrinae sunt explicanda. Atque in eo quoque bene agitur, si ita feliciter res cadit, ut argumenta sint proba, ut testimoniis insit, cuius causa proferuntur. Sed huic generi omni memoria accidit saepe, ut, quia testimonia plerumque iudicant e versionibus, quibus sunt aduerti a pueris, aut e textu authentico ad verbum a se verso, et inde argumenta ducunt, ad probandum ponant id, in quo, verbis bene intellectis, vis probandi nulla inest. Itaque, si quis eos in viam reducere vult, irascuntur, et imitantes Pontificios Sophistas tempore *Lutheri*, novitates interpretationum exprobrant, et res ipsas negari, aut in dubium vocari, invidiae causa clamant, atque etiam propterea, quod auctoritatem Dogmaticae suae labefactari vident, nec sibi honestum putant, si non intellexisse videantur, quae tot per annos dictauerint. Nulla profecto alia causa fuit, ut hoc vtar, clamorum contra *Tarnouium*, a multis Theologis, in his etiam terris, sublato-rum, (v. *praef. Exercit. bibl.*) qui mortuis iis, qui pro sua auctoritate dimicarent, non modo conquieverunt, sed etiam in laudes sunt conuersi. Quodsi omnia bene se habent, tamen illa tenuitas non est laudanda. Dominus noster *Iesus Christus*, et Prophetae, Apostolique, in quibus fuit *I. C.* spiritus, inprimis *Paullus*, quam saepe, quam varie, quam multis et variis rationibus proferendis, magna doctrinae capita tractant? Non hoc erat imitandum? In rebus diuinis et humanis semper latet argumentorum quaedam copia et varietas, apta humanorum ingeniorum varietati; nec ibi sunt, ut in Mathematicis, itemque in Metaphysicis, ratae ac fixae demonstrationes, in quibus rerum tenuitas ab simplicitate, s. abstra-

ctioni-

tionibus, ortu, non praebeet copias tales, quales sunt in rebus, attributorum, modorum atque relationum multitudine meritis. Ea opportunitate vtendum est Theologo: praesertim, cum in talibus rebus aliud alii ingenio aptius, id est, ad intelligendum et percipiendum sit accommodatius: cum Theologus verba faciens ad populum, vbi aures animosque celeriter transfilit oratio, praesertim volubilis et celeriter labens, qualem aures plebs inprimis desiderant, etiam immorari debeat rebus, inprimis, quibus causa continetur, et huc illuc eas versare argumentando, vt non possint non percipi, atque insidere animis audientium. In quo quis non videt etiam vtendum esse inuentis aliorum, inprimis doctorum veteris Ecclesiae, in quibus magnos, et acutos, et disertos viros fuisse, impudentia et ignorantia sit negare. At eorum argumenta interdum, immo, si quis ita malit, qui non legit, saepe non sunt satis firma. Scio. An veronouitiorum doctorum argumenta habent hoc diuinitus, vt omnia, aut pleraque firma sint? Quodsi haec sunt cognoscenda, si forte boni quid insit: quidni illorum eruditissimorum virorum? An vero, qui horum recentiorum commentarios quosdam legerit, imbiberit, is Theologus, etiam bonus erit: qui veterum libros meliores, et illustriores eorumque interpretes atque enarratores, non erit? Non hoc est simile stultitiae eorum, qui philosophum agnoscunt hunc, qui primum aliquod compendium Philosophiae vel scripserit, vel enarrauerit subinde, ac de vno et item altero capite iuuenile opusculum ediderit: eum autem, qui instructus graecis et latinis literis, *Platonem, Aristotelem, Xenophontem, Simplicium, Ciceronem, Senecam*, aliosque assidua et curiosa lectione cognouerit, literatorem, non philosophum volunt haberi. Quid? quod mihi etiam videtur turpis esse Theologo, certe interdum rebus non honestis locum facere, ignoratio eorum, quae illi antiquae Ecclesiae doctores ad illustrandas literas sacras, et doctrinae capita vel firmanda, vel

vel ornanda contulerunt. Vidi interpretationes sacrarum literarum, et argumenta rerum verissimarum, non modo repudiari, quod erat ferendum, si salua veritas ipsa relinqueretur, et aliis siue locis scripturae, siue argumentis firmaretur, non in dubium vocaretur, sed etiam suspicionibus inuidiosis vexari et infamari, quae magno consensu summis Ecclesiae veteris doctoribus probata essent: quod profecto in hos iniquum est, et non decorum exprobrantibus. Quod etiam transferendum est ad opiniones de quaestionibus theologicis, de quibus vel non perspicue in sacris libris traditur, vel nihil euidenter conclusionibus e locis scripturae sacrae colligi potest.

Omnino tenendum est hoc omnibus, qui in Theologia feliciter velint versari, eam non esse disciplinam rationis et ingenii humani, quae tota subtilitate dialectica teneri possit, sed a fide duci, hoc est, ab auctoritate Dei, res occultas rationi tradentis, et a factis, quae sacris literis tradita teneamus. Hic, clarum est, omnia esse in vera intelligentia verborum et historiarum. Quae vero etiam solet, quid Ecclesia de fidei capitibus statuerit, qui cultus publicus fuerit: non ut certior fiat fides, aut ut iudicium veritatis Ecclesiae et doctoribus eius permittatur, sed ut testem habeamus non repudiandam veritatis: idque non modo quaeri coepit recentioribus temporibus ad reprimendos inprimis Pontificios, qui a scripturis reiecti, in illa veluti subsidia se coniecere, sed semper quaesitum est, ut multis magnorum veteris Ecclesiae doctorum locis constat, inprimisque docetur inductione plurium seculorum a *Facundo Hermianensi*, in libro multarum bonarum observationum, et propterea lectu dignissimo, *de tribus Capitulis*, qui totus prope nititur hac consuetudine. Quis autem hic rursus non videt, omnia esse historica. Inter haec duo aliquid loci datur dialecticae subtilitati, sed, ut supra dixi, haecenus, ut illis rebus bene utatur, non modo via quadam et ratione edifferendo, sed etiam ex iis, quae accepit, argumentando, ambigua distin-

distinguendo, pugnantia ad concordiam revocando. Sed illa ratio velut honoris causa recepta, non debet dominari, non sui arbitrii esse, sed alieni, sed ministrare tantum literis et historiae. Si contra sit, sique, quod peius est, literis et historiae vicaria substituatur subtilitas rationis et Philosophiae, commentitiis rebus locus fit, quae a falsis principiis ductae sunt, coniecturis mere possibilibus, i. e. nullo fundamento idoneo literarum et historiae nixis, replentur omnia, et ita Theologia redditur incerta: quod in rebus divinis nihil certi esse potest, nisi quod ab infallibili Dei testimonio, in scripturis edito, profisciscitur, cuius vim recte intelligendis verbis prophetarum et Apostolorum percipimus: similiterque cetera omnia fiunt incerta, quae etiam ex humanis libris sunt haurienda. Ex quo quis non videt, quantum incommodi sit in hac philosophica Theologia, quae parum sit ab historica illa instructa.

Atque ego nondum dixi, eam rationem, a bonis ingenii usurpatam, ducere ad quaestiones inutiles, quae fere versantur in metaphysica possibilitate, et indagatione causarum non necessariarum, aut nituntur ideis mere abstractis Metaphysicorum, nec ullam lucem adfundunt veritati Christianae: velut, an Deus ab aeterno potuerit creare mundum, et, si potuerit, cur non crearet: an incarnatio Dei saltem ut possibilis possit naturaliter cognosci: an *ὁ λόγος* personam hominis potuerit assumere: et cur humanam naturam sine propria subsistentia assumeret: an unio personalis differat realiter ab extremis cet. cuius generis quaestionibus pleni sunt Theologorum metaphysicorum libri. Nempe res ita se habet. Ingenium humanum, imprimis magnum et vividum, impatiens est otii, semperque aliquid anquirat, in quo agitare se, et vim suam exercere possit. Itaque cum ad Theologiam se applicans, non per literas indagat veritatem in scripturis, eiusque vel illustrandae apparatus, vel defendendae copias, non sumit e graecis et la-

Ernesti Opusc. Theol.

Ll

tinis

tinis monumentis Ecclesiae, ipsum conatur gignere, quod tractet ornetque. Sed cum eius rei causa sit inscitia literarum et historiae, sine quibus etiam rudia semper et inuenusta sunt ingenia humana, et in cogitando, et in scribendo ac differendo, necessario incidit in subtilitates et nugae metaphysicas, et abstractiones inanes, quas etiam nugaciore et insaniore facit verbis barbaris et obscuris. Quod ita esse docet historia temporum superiorum. Nam barbaram et inscitam Theologiam Scholasticorum, satis constat, natam esse eo tempore, quo linguarum antiquarum, quibus sacrae scripturae et monumenta Ecclesiae consignata sunt, scientia defecerat. Ea autem tum demum coepit contemni ac repudiari, omninoque Theologia repurgari, cum studiis linguarum et historiae reuocatis, Theologia historica a *Luthero*, *Melanchthone*, et eorum asseclis ac discipulis, studiose ac diligenter coli et tractari coepisset. Et hoc vitium nascitur, si a Theologiae acroamaticae studio absit altera illa, quam historicam vocamus, in ingeniis acribus et magnis. Quid? ceteris nihil noxae affert? Immo cum alias, tum ignauiam, quae etiam bona ingenia debilitat, mediocritate vero et tenuia plane extinguit. Nam acquiescunt in eo compendio et systemate, ex quo tirocinia didicerunt, et in dictatis magistrorum ad id compendium illuminandum, nec aliquid desiderant amplius; quod satis se habere putant, et fortasse etiam aliis credunt, ad munus in Ecclesia aut Academia rite obeundum. Et quidni satis sit, si alterum illud genus Theologiae non est necessarium ad veram et iustam Theologiae scientiam? Cur enim se vident homines discendis rebus non necessariis, quarum nihil admodum in ipsis praeclaris magistris esse cognouerint? Vnde quanta fundo Theologico et Ecclesiae calamitas inferatur, quis non videt? Neque enim alia magis causa est querimoniae, quae indies frequentius auditur, de mira paucitate eorum, qui muneribus in Academiis et Ecclesia maioribus satis honeste adiuuari possint.

Qui-

Quibus omnibus de caussis, atque etiam aliis, quas praetermittimus, ne longiores simus, necessaria debet iudicari historicae et dogmaticae Theologiae coniunctio. In quo duces et auctores habemus magnos Viros, quos instauratores et defensores purioris Evangelicae doctrinae habemus. Nam initia emendandorum sacrorum facta sunt maxime a contemptu et repudiatione Theologiae dogmaticae, quae ab historica esset seiuncta, quam *Lutherus* ignorantiam veritatis inanemque fallaciam, in libro adu. *Latomum* vocat, et instauratione alterius, quae nihil, nisi quod in sacris libris esset, et monumentis veteris Ecclesiae integrae atque incorruptae, per studia linguarum et historiae cognitum traderet, sine artificio dialectico dogmaticorum. Ab hac instructi cum pugnarent cum Pontificiis Theologis, quamvis Dialecticis, facile victores discedebant, fauentibus omnibus, qui bonas literas amarent, quorum tum magna, inter nobiles inprimis, multitudo erat. Primus *Melanchthon*, vir ad fundandas et constituendas disciplinas factus et natus, Theologiam illam, quae interpretandis libris sacris, et capitibus doctrinae singulis, lata et copiosa disputatione explicandis, tradebatur, cum dogmatica coniungere instituit, et in modicum corpus redigendo vtramque, editis *locis Theologicis*, ad formam disciplinae scholasticae revocavit: idque institutum *Luthero* ita placuit, vt eum librum non modo immortalitate, sed etiam canone dignum iudicaret: in eademque laudes omnes, qui tum et paullo post fuere, magni Ecclesiae nostrae Theologi iuerunt. Quoad igitur lectiones in hunc librum factae sunt in Academiis, quarum specimen habemus *Chemnitii*, laudatum pluribus, quam lectum Commentarium in illos Locos, tamdiu mansit illa vtriusque Theologiae coniunctio. Sed cum ille ardor discendarum linguarum et literarum paullatim refrixisset, de quo iam *Ioach. Cameraarius* queritur saepe, magis etiam magisque declinatum est a plerisque in eam partem, vt boni magis Dialectici

et Metaphysici esse haberique vellent in Theologia tradenda, quam in sacris literis et monumentis Ecclesiae versati: quod esse non potest, nisi qui sit magna linguarum veterum et historiarum scientia praeditus, nedum, qui eas etiam contemnit, et ab earum studio homines deterret, cuius dementiae multos reos fuisse accepimus. Cuius rei post fata fructum tulerunt hunc, ut ipsorum libri a nemine propemodum legerentur: praesertim nunc, cum etiam intelligi vulgo desierunt. Id iis incommodum accidit, unde omnium minime timuerant, hoc est, ab ipsa philosophia, sed ea, quae a barbarie pristina, in scholas reuocata, per praeclaros viros liberata esset, quae res potius, quam verba nugacia et barbara curaret. Haec ergo illius Theologiae Metaphysico-barbarae, cuius, quamquam castior erat vetere scholastica, tamen pudere debebat *Lutheri* sectatores, contemptum attulit, et suam puritatem ab talibus spinis ac sordibus cum Theologia communicare tentavit. Sed in illis ipsis, qui hac nova philosophandi ratione in Theologia uterentur, extiterunt, qui cum aliis in rebus peccarent, de quibus hic dicere non est necesse, tum in eo, quod Philosophia uterentur, cum contemptu Theologiae historicae, et earum literarum atque artium, quibus ea continetur, Theologiam replerent notionibus et opinionibus sectae eius, ad quam in iuventute essent temere delati, haberentque non Theologiam Philosophiae subtilitate bene digestam, et illuminatam, sed Philosophiam dictis biblicis utcumque, et prope tantum honoris causa, distinctam, et his ipsis saepe propterea male intellectis, quia scientia literarum iusta deerat, et versionibus magis et lexicis vulgaribus, quam idoneo usu interpretandi utebantur. In qua ratione etiam solent contempni doctores Ecclesiae veteres, velut Philosophiae expertes, et inanes disputatores, negligitur scientia librorum, qui capita Theologiae maxima, et controuersias clarissimas eruditae disputationibus, criticis, historicis, et dogmaticis illuminarunt, verbo nihil, nisi

nisi suum cuiusque, et tenetur, et traditur aliis ac commendatur. Quae res hoo magis periculosa est nostris temporibus, cum in aduersariis Ecclesiae nostrae iis, qui maxime nobis timendi sunt, et fuerunt, et sunt etiamnum Theologi, qui longe aliter, ac temporibus pristinis, Theologiam et controuersias theologicas tractant, hoc est, qui literas et historiam adhibent, et per ea arma nos oppugnare conantur, per quae olim a nostris erant victi maiores eorum: quibus adeo resistere illa philosophica ratione non satis possumus. Neque est, quod quis dicat, controuersias, quas cum Pontificiis et Calvinianis habeamus, in quibus maxime vsus est historicae Theologiae, excusas esse penitus, et exhausta omnia cum puluisculo: nihil esse, quod hic agamus, post *Chemnitios, Gerhardos, Flacios, Dallacos, Mornacos, Blondellos, Forbesios, Chamierios*, et alios. Etenim, vt non dicam, in illis nostris multa esse, quibus hodie vti non possumus, ducta e libris supposititiis, qui tum pro genuinis ferebantur, aut tum non satis intellecta, nondum ad hanc praesentis temporis perfectionem adducta Critica, et scientia linguarum et historiarum: post illos praeclaros scriptores extiterunt, et subinde existunt, vt non ignorant harum rerum curiosi, qui refellere illos *Dallacos, Blondellos*, aliosque magno apparatus doctrinae conentur, locis scripturae et SS. PP. interpretatione callida peruertendis: qui nouis artibus, testimoniis, e libris antea non editis, et e puluere bibliothecarum nuper protractis, vtantur. Nullus prope est e Dallacanis libris Anti-Pontificiis, quem non refellere integris et copiosis disputationibus conatus sit vnus *Natalis Alexander*, in Historiae Ecclesiasticae claro opere, vt de aliis taceam. Horum scripta profecto non ignorare doctus Theologus, sed eorum argumentis occurrere posse debet, ne in fraudem inducantur imperitiores, aut illi, quod fieri vidi, os nobis se obturasse, et victoriam a nobis reportasse iactent. Et est longe difficilior hodie certamen, quam in principiis reformandae doctrinae fuit,

vbi mediocris talium rerum scientia fufficiebat aduerfus plane rudes literarum et elegantis doctrinae, vt vidimus supra e testimonio *Canis*, fateturque *Natalis Alexander* Hist. Eccl. T. VIII. c. II. art. 10. cum nunc refellendi sint admodum docti, et in his literis versati. Quodsi maxime nihil superesset indictum aliis, nihil noui, nihil melius accuratiusque inueniri ac dici posset: tamen, quae ab tam multis praeclaris viris bene scripta sunt, cognoscenda, et optima quaeque, ac maxime necessaria tradenda essent studiosis, vt mature imbuerentur etiam amore talis doctrinae, quo perfacile incenduntur ingenia erectiora et liberaliora.

Sed de necessitate Theologiae dogmaticae et historicae, et in docendo et in discendo coniungendae, fatis diximus. Destinatum erat autem nobis, adiungere partem alteram, de ratione et modo huius coniunctionis in Scholis. Sed longior multo futura erat disputatio, quam fineret disputationis huius modus: quem sic quoque excessisse videri possumus. Itaque eam ad aliam occasionem differre cogimur, cum de institutis nostris in Theologia docenda, et eius disciplina cum eloquentiae et humaniorum literarum doctrina coniungenda, dicemus. Et fortasse melius est, agendo ostendere, quem huius coniunctionis modum putemus, quam scribendo. Nam illud quidem ex superiori disputatione satis perspicuum esse arbitramur, quod non ignorari interest nostra, h. e. quam nos quidem rationem Theologiae tractandae probemus, et quo genere disciplinae utamur.

DE
VESTIGIIIS
PROVIDENTIAE
DIVINAE
IN BELLO

L14

DE
VESTIGIIIS
PROVIDENTIAE DIVINAE
IN BELLO

Defuncti ergo sumus bello misero atque calamitoso, et, auditis tandem votis nostris, annuit misericordia diuina pacem plurimis et maximis de causis laetabilem, et omni praedicatione nostra et gratulatione superiorem! Itaque et ipsi vidimus, et saepe audiuius, primum eius nuncium ita repente alienasse ab omni malorum etiamnum praesentium sensu animos, tam enixi favore omnibus in locis, tam effuso in laetitiam studio exceptum esse, ut capere laetitiam homines non posse viderentur. Quae enim tum significationes factae! quae voces auditae gratias Deo, gratias Patri Communi Patriae agentium, gratulantium inter se, sibi, suis, patriae, manantibus etiam subinde lacrimis, omni alia significatione et dulcioribus et verioribus. Nam in ceteris fere impetus est hominum repentino motu elatorum, ad diuturnitatem parum ille constans; hae molli et intimo pectoris motu cientur, suntque tacitae, sed verissimae animi vere constanterque lactantis voces.

Sed posteaquam primus gratulationis ardor resedit, et ita recepti sunt animi ab illa prope alienatione, ut religiose ac pie, sapienter ac vere gaudere, et sancto ac certo gaudio inconsti, veras et dignas Deo, dignas Patre Patriae, gratias agere possimus, quid prius quam publice

gratulationem facere debemus, vt sit ab nouitate tanti boni laetior atque efficacior? quid porro diligentius ac religiosius, vt decora sit professioni nostrae Christianorum, decora vero etiam sapientiae, cuius nomine ac studiis censemur: nec modo communiter cum patria vniuersa, sed etiam proprie: tanto magis proprie, *Ciues*, quanto magis proprias laetandi et gratiarum agendarum causas habemus.

Enimuero plurimum refert, animo ab sensu et cogitatione rerum ad praesentem temporis rationem pertinentium rite praeparato et instructo accedere ad officium persoluendum. Nec enim aliter ei tam veritas et sapientia constare potest, quam religio et sanctitas. Sed quae proprie religionis et sanctitatis in ea re partes sunt, eae in concionibus ad populum, et nuper, per supplicationum opportunitatem, demonstratae sunt, et in ipsa gratulationis solennis die inter sacra Ciuitatis communia demonstrabuntur a multis: nobis autem quoniam oratio proprie ad eruditos homines est suscepta, floremque iuventutis literarum et sapientiae studia aemulantis, non abhorrebit ab consilio huius instituti nostri, mentes vestras in eam partem rerum deducere, quae sit coniunctior rationibus vitae nostrae, nec tamen aliena a pietate ac religione. In quo nos aliquamdiu tenuit dubitatio, coniunctene mallems cum bello superiori pacem nouam officii rationibus accommodare, an omnem tanti mali mentionem secludere, ne temporis huius gaudium contaminarems illius acerbitatis cogitatione, quae in recenti adhuc pace horrorem animo offundat, qualis vix elapsos magnum periculum, etiam in tuto, stringit. Sed nos non ita spectabimus, quae retro sunt, vt terribilis aliqua species occurrat animo, qualis Annibali per somnium oblata traditur, contra ducis monitum respicienti (Liv. XXI, 22.) sed vt vestigiis diuinae providentiae persequendis deducamur ad eius maiestatem admirandam, quae se in nullo

nullo alio rerum humanarum genere maioribus et luculentioribus documentis spectandam praebet.

Historicorum veterum praestantissimos studium suum ita ad scribendum videmus contulisse, ut vel sola bella magna amplecterentur, vel ea in perpetuis historiis ita persequerentur, ut ceteras res prope tantum ad seriem temporum vel nescendam vel explendam adiecisse videantur. Qui primus historiae ad usum vitae et prudentiae disciplinam accommodatae exemplum prodidit, Thucydides, unius, sed, cuius memoria esset, maximi belli, nec eius totius res complexus est: cuius exemplum imitatus est alter, proximus ei, Xenophon, extremis belli eiusdem persequendis, et Cyri Iunioris bello, rebusque ab Graecis Cyri sociis, maxime se duce gestis, tradendis. Iam Polybii, quam catholicam vocat historiam suam, tota est fuitque maximorum, quae ab Romanis gesta sunt, bellorum; et quae separatim scripsit ex historico genere, pariter ad bellicam rationem pertinere. De Caesare et Sallustio tituli operum ipsi loquuntur: Livius autem in continua historia Romana ita in bellis maioribus, inde a Punico primo gestis, Punico secundo, Macedonicis, Syriaco elaborat, ut cetera *παράγῃς* loco, et Annalium contextendorum causa, scripsisse videatur, et has partes cognoscere debeat, qui Livium penitus cognoscere velit. Nam Tacitus, ut opinor, quia deerant bella magna, in quibus experiretur ingenium et prudentiam, historias fallere, insidiari, dominari, omninoque peccare magis, quam recte facere docentes, scripsit: ceteri autem prope non numerantur in historicis, varietati doctrinae aptiores, quam historiae, quae proprie dicitur, ad usum apte cognoscendae. In quo illi sane opportunitatem ingenii prudentiaeque proferendae spectare potuerunt. Etenim ea est in nullo alio genere rerum gestarum maior, aut par: et ut hominum in gerendo bello, auctore apud Homerum Idomeneo, (Il. N. 277) sic historicorum in scribendo *μάλισ' ἀρετὴ διασώζεται*, virtus maxime inspicitur: tanta

tanta est rerum varietas, vbertas, et ad bene explicandum difficultas! Sed profecto nullae res sunt, et per se, et euentu, et tum ad hominum singulorum, tum populorum vniuersorum, vel salutem vel perniciem maiores, et cognitione digniores, nec aliae vllae tantum habent theatrum spectandae et naturae humanae cum omnibus virtutibus et vitiis suis, et diuinæ in rebus humanis potestatis ad arbitrium omnia gubernantis, et contra consilia, vim, et opinionem humanam, leuissimo momento, quocunque vult, impellentis.

Quo tempore, et quibus in rebus, magis perspicitur vis ingenii, consilii, industriae, fortitudinis, vigilantiae, adde patientiae humanae, cuius maximam disciplinam in bello esse, et Polybius iudicat, et nos experti sumus; magnitudine praemiorum pariter et periculorum, inprimisque acerrima necessitate vrgente et cogente contendere neruos mentis et corporis omnes, vel supra vires? Hic veritas prudentiae, fortitudinis, industriae, potentiae, virtutum omnium velut igni spectatur: eliciuntur sensus, consilia habitusque animorum, per prauis fauoris licentiam, nudanturque rebus et secundis et aduersis vitia Ciuitatum publica et hominum priuata, quae per pacis tranquillitatem vel tolerantur facilius, *) vel obscurantur felicitate ac teguntur, vel pudore, legibus, coërcentur, vel denique languidius irritantur; cum belli vis ea protrahat in lucem, tempestate fortunae vtriusque, acerrimis lucri, damni, doloris, voluptatis, spei, timoris irritamentis et paene tormentis agitata et expressa. Vbi porro maiores et crebriores rerum conuersiones, publicarum priuatarumque, futurae fortunae in longum tempus, saepe in saecula, momentum in vtramque partem facturae? Quae sunt magna omnia, et ad cognitionem et ad vsum; et sunt his alia similia.

Sed in omni bellica re nihil admirabilius est documentis potestatis et gubernationis diuinæ, quae se in bel-

lis

*) Demosth. Or. Olynth. II. p. 34. Epist. ad Philipp. p. 118.

lis ita praesentem exhibet; vt prope oculis cerni possit. Primum, non alio in genere rerum crebrius et manifestius apparet, quam non sint in rebus maximis euentus consiliorum et actionum in potestate humana; cum in consiliis solertissime excogitatis, et rationibus ad rem gerendam prudentissime dispositis, et expromta omni in agenda contentione industriaque, in perseverandoque constantia, tamen euentus saepe non respondeat, semperque incerta spe expectetur: ita moderante rem ac temperante sapientia diuina, vt modo successus consiliis et actionibus annuat, qui sequi debere videantur, ne ad ignauiam et socordiam prolabatur ingenium humanum, tollaturque discrimen sapientiae et stultitiae, temeritatis et prudentiae, vigilantiae et somni, laboris et inertiae, modo omnia alia euenire iubeat, disturbatis leui motu rationibus omnibus; vt suam quoque vim intercedere sentiant homines, suumque imperium humano maius agnoscant. Neque enim negligere potest ius suum Maiestas diuina, et non curare, vtrum Dominum se mundi sui, cuius scilicet auctor est conseruatorque, credant ferantque coloni sui, nec ne. In quo miseranda est coecitas veterum historicorum, qui varietatem hanc tantam ad fortunae cuiusdam vanitatem referre maluerunt, quam ad diuinae potestatis veritatem, in his Polybius, haud paullo deterior religionis quam prudentiae auctor, qui Fortunam *brabeutam euentorum bellicorum* constituit, (I, 58) in rebus maximis, contra consilia, apparatus, molitiones, et spem hominum, exeuntibus, etiam *lusus* eius videt. Sed illi commentitiis suis Diis res tantas attribuere non ausi, dum incertis viis causas rerum indagant, ad nomen inane deducti sunt. Quanto sapientior Iosephus, Polybii alias admirator et imitator, qui *ταῖς πάλαις ἐποαῖς τῶ θεοῦ βεβαβύσθηται*, a Deo gubernari ac dispensari belli inclinationes euentusque monet. *)

Iam quod sacrarum literarum praeceptis edocti tenemus, diuinam vim eripere mentem hominibus consilium-

que,

*) B. I. I. 10. A. I. XIV. 9.

que, ut aut, in magna et non inficienda prudentia, tamen non videant, quod verum et salutare est, ipsosque ante oculos atque in promptu, aut, cum videant, tamen ab eo repente demoveant oculos, sibi que elabi suum consilium sinant; quo alio tempore saepius, vel legimus, vel ipsi audiimus ac vidimus, magnis et manifestis in rebus fieri? Pompeii, ut hoc utamur, ingressi bellum cum Caesare, omne consilium Themistocleum erat. *) Existimabat, qui mare teneret, cum necessario rerum potiri. Nec dubitant rerum periti, quin saltem attriturus fuisset Caesarem et fatigaturus, si consilium id tenuisset. **) Victoria utendum esse, vrgendis victis, nec vlla parte quietis concedenda, si quisquam alius, sciebat. Quis enim ignorat? quis non vel indignatur, vel ridet, ubi secus factum est, etiamsi nunquam rem bellicam attigit? Et saepe ante, victis piratarum classibus, in Mithridate, bene usus erat. Quid ergo? quas res eum repente de consilio ac mente deduxit? Profecto vis diuina intercessit, commutatura per Caesarem imperium Romanum, et nouam rerum formam inductura, quae esset ipsius consiliis, temporibusque Christi aetati vicinis aptior.

Et quoniam huc delapsa est oratio, magnas illas rerum conuersiones, per quas imperia commutantur, transferuntur, augentur ac minuuntur, opes vel franguntur, vel provehuntur, diuitiarum porro paupertatisque celeriores vicissitudines, quae in Scripturis attribuuntur numini ac potestati diuinae, omni memoria reperimus belli maxime motu factas esse; ut appareat, instrumenti vim diuini esse in bellis, per quod Deus res maximas in terris agat, et sui numinis potestatem inprimis demonstret, et prope ingerat sensibus nostris. Ad nos quidem, si priscarum rerum memoriam tenemus, humanitatem, literas, religionem ipsam, primum velut alis belli delatas, intelligemus. In quo nihil temere, nihil sine Deo factum, omnia diuini consilii et operis fuisse, libenter, ut opinor, fatebimur.

Et

*) Cic. ad Att. X, 8.

**) Baco de Augm. Sc. VIII, 3.

Et sunt multa alia eiusmodi in bellorum indole ac natura, quae ad hanc rationem duci possint, imprimis digna cogitatione nostra: neque enim aliae vllae cogitationes aut ad patientiam in malis belli et aduerso euentu, aut ad modestiam in secundo, potentiores ac maiores aut sunt, aut intelligi possunt: sed omnia commemorare nec necesse est, nec conuenit huic instituto nostro, praesertim quae sunt coniunctiora cum iis, quae ipsi sensimus, quibus commemorandis reficere dolorem, parum aptum foret laetitiae temporis: et festinamus ad pacis commemorationem.

Ceterum, ut ea, quae commemorata sunt, hanc volumus habere vim, ut deducant animos Veströs, *Ciues*, ad vtilem et iucundam cogitationem, quae, in omnibus rerum humanarum euentis, debet esse prima, hoc est, quae habeat admirationem ac venerationem prouidentiae et potestatis diuinæ, quae se etiam in nupero bello multis modis et magnis euentis, et, inter ipsas miseras nostras, plurimis malorum lenimentis, et ferendorum onerum adiumentis suppeditandis, conspicuam fecit; ita et cetera, quae sensum acerbum in experiendo habuere, accommodari ad hanc rationem poterunt, ut, quicquid est ex eo sensu reliquum doloris, obscuretur paulatim sancto hoc et sapienti remedio, et extinguatur.

In quo nos plurimum adiuuabit pacis restitutae tranquillitas, praesertim cum ea habeat multas et magnas commendationes, multa, quae dolorem nostrum consolari debeant, et spem bonam in posterum facere possint. Atque primum in ea donum Dei, miserti miseriae nostrae, quis non agnoscit, quod, desperata omni humana ope, maxime necessario tempore, cum maximus vltimi mali timor esset, spes pacis et salutis prope nulla, via ita breui contigerit, ut velut coelo demissum videretur. Non ille externas et humanas opes in societatem tribuendi beneficii venire voluit, ut suae vnus curae, misericordiae, benignitati deberemus, cui etiam libentius deberemus. Vnum

Augu.

Augustum, Patrem Patriae, et potestatis suae inter nos Vicarium, in tantî operis, tamque amabilis muneris societatem adsciuit, ut etiam commendatius nobis esset, habetque gratiam maiorem. Et hic diuinitus ad rem tantam excitatus, incensusque verissimo suorum amore, magno animo aggressus est opus tam nobis exoptatum, concessitque in conditiones, ut nobis consuleret, redderetque se heu nimium diu! orbae Patriae; quae fideli antea, nunc etiam laeto incensa desiderio, festinat occurrere Patri, et hunc primum et dulcissimum capere gestit fructum pacis novae, ut videat ipsum, ruatque in amplexus paternos, exsatiatura longum desiderium. Nam profecto tum demum plenam pacem habere videbimur, tum solidum gaudium gaudebimus, cum hic tantus cumulus ad laetitiam nostram accesserit. Et iam nunc praecipimus animis illius diei laetitiam, cum intranti hanc Urbem obuiam ruet, si tamen intra moenia contineri se patietur cupiditas, omnis aetas, adulti, senes, veluti primum visuri, quem toties viderunt, pueri in primis, haerentes parentibus, eosque amabili impatientia visendi fatigantes, denique sine demonstratione noscitantess Patrem Commune, propria maiestate oris, mixtaque maiestati lenitate et comitate; cum omnes certabimus adire, dextram contingere, dictis, factis omnibus, amorem et pietatem proferre, quam aduersa fortuna etiam magis inflammauerit, quam res secundissimae aliorum Principum apud suos accendere posse videantur.

Sed ut ad pacem redeamus, quantam gratiae accessionem habet hoc, quod id tantum diuinum regiumque donum accepimus de manibus serenissimi filii heredis, cuius patrius in Ciues animus, maxime duris in rebus, quot et quantis documentis spectatus sit, sciunt omnes, praesertim nos, Cives, qui etiam propriis, nec modo veteribus illis, sed recentibus de causis beneficiorum, praecipua gratia excipere debemus, immo excipimus, quae ipsius manus dederit. Atque etiam magnum omen ex ea re capimus pacis, quae literis in primis, et sapientiae studiis, et Aca-

demiae

demiae nostrae, laeta et frugifera sit, cum hoc, tam prolixè fauente his studiis atque rebus nostris, Principe interprete et velut auspice, perfecta sit.

Sed sunt alia plura, bene de pace noua sperandi argumenta et pignora, misericordia inprimis et benignitas in has terras diuina, a multis seculis cognita, quae se etiam inter ipsa tanta belli mala haud dubiis rebus ostendit, vbertate agrorum continua, et aliis copiis largiendis, per quas supra fidem et spem sustinuimus onera belli, Urbis ipsius inter tantas tot periculorum minas, et Academiae in magnis rerum angustiis, incolumitate. Et sicut tranquilla serenitas coeli a praegressa tempestate, ita, quae benignitas diuina suppeditabit bona, eam suauitatis commendationem ab ipsa superiorum malorum acerbitate accipient, ut ea nos ad verio rem et acriorem bonorum diuinorum sensum acuisse videatur. Multa sane sunt a belli tanti motu, et iactatione labefactata et conuulsa, multa velut longa valetudine debilitata et aegra, multa denique iacturis tot ac tantis minuta et accisa: sed ea fouebit tranquilla moderatio patris patriae, in qua est fomentum omnium malorum publicorum ut maxime amabile, ita potentissimum, ut conualescant paullatim, roborentur ad pristinam firmitatem, et res nostrae benigne nutriendo velut a stirpibus adolescant ad laetam vbertatem; si modo ipsi intra animum mederi malis occultis, et vulnera nostra praebere curanda velimus, nec per vitia nostra et cupiditates aduersumur medentium curae et manibus. Quare capeffamus spem ad pellendas curas et tristitiam alienam ab huius temporis gratulatione tanta, inprimisque animum dignum tanto beneficio Dei, beneficio Principis, eumque perpetuo conseruemus.

Atque huius talis animi primum documentum, agite, demus, adeundis caste sacris, quae in diem Lunae proximum indicta sunt, gratisque Deo, salutis nostrae auctori, enixò studio actis, oremus Patrem Domini nostri Iesu Christi, ut primum *Augustum* Regem, Patriae Patrem Optimum, ad suos, ad nos reductum, *Fridericum* deinde *Christianum*, *Ernesti* Opusc. Theol. Mm filium

filium heredem, Principem Serenissimum, cum celsissima coniugē, et sobole celsissima, totamque Regiam Domum potenti et perpetua tutela, et proluxa benignitate completatur, deletisque omnibus superioris temporis malorum vestigiis, secundis rebus omnibus florentissimam reddat: tum, ut illustrissimos potestatis regiae administratos, post exhaustas tot ac tantas inter belli mala curas et molestias, vita longa, tranquilla, et omni ex parte felici, exhilaret, iis consilia, verissimae eorum bene Patriae rebus consulendi voluntati paria, consiliisque optimis parem euentum annuat; denique ut totam, cum hac Vrbe, Patriam hac pacis tranquillitate, pie, sapienter et diutissime frui sinat.

Enimuero ea vota faciemus etiam efficacius, si addiderimus sacrificia eleemosynarum, digna et boni diuinitus accepti et laetitiae nostrae magnitudine: praesertim cum destinentur Urbibus iis, quae tantopere afflictæ sunt belli vi et ruinis, ut nostra cum iis comparata, etiam libera ab omni belli iniuria fuisse videatur; in his primum Dresdæ, e qua quotusquisque nostrum, Ciues, non aut accepit, aut sperat fortunas suas; deinde Vitebergæ, Ecclesiarum nostrarum Matri, a qua prima certissimum benignitatis diuinæ et felicitatis suae pignus accepit Patria nostra; in quas adeo nulla satis magna liberalitas videri potest. Itaque omnes hic vel temporis vel necessitatis nostrae excusationes penitus exclusas putemus, demusque ita, ut et sentire possint, qui accipient, et nosmet ipsi sentiamus, qui dedimus; meminerimusque, eam esse Deo gratissimam liberalitatem, quae temporibus et rebus angustis ita fiat, ut poenitentiae et minuendae cupiditatis exercitationem habeat, qua nulum ad tempora futura bene traducenda vberius ac magis necessarium veluti viaticum existimare debemus.



DE

DE
METV SPECTRORVM
PER
L V T H E R V M
SVBLATO

DE
METV SPECTRORVM
PER L V T H E R V M
SVBLATO

Cum ad grati animi pietatem nihil magis aut necessarium aut efficax sit, quam beneficiorum acceptorum ita meminisse, ut eorum et veritas, et magnitudo diligenter ponderetur: nihil profecto a nobis memoriam beneficiorum a Deo nobis, communique Patriae et Ecclesiae vniuersae, per Lutheri ministerium tributorum solenni religione celebraturis, magis ac diligentius faciendum est, quam ut eorum et multitudinem et magnitudinem cogitemus; quae res etiam hanc vim potest habere, ut de iis conservandis ac tuendis, quantum in nobis est, laboremus, nec ea sinamus vel nostra negligentia nobis perire, vel aliena fraude iis nos priuari. Sed in illis bonis merito numeratur et hoc, quod et religio, et vita communis a seruitute superstitionis liberari coepit per Lutherum superstitione foeda et perniciofa, qua ante illum utraque premebatur. In generibus autem superstitionis illius etiam hoc imprimis grassabatur olim, quod daemonum operibus spectris, in his mortuorum, in aspectum venientium et loquentium, terriculamentis apud male credulos homines vteretur; de quo Lutherum ipsum saepe questum esse reperimus, in libello de Missis et alibi. Nam his quam

multae falsae, etiam de rebus sacris, opiniones inductae sint, satis constat et historia loquitur. Et cum omne genus superstitionis fallax sit apud homines imbecilli iudicii, tum multo maxime hoc est, quod rebus mirabilibus utitur, quibus facillime capiuntur animi, praesertim, si accedant artificia iis solemnia, qui talibus fraudibus utuntur, simulatio sanctitatis et religionis exquisitae species, per verba religiosa, cum semper in ore est Deus et Dominus Iesus Christus. Enimuero ut ab aliis generibus sic etiam ab hoc liberatam esse Ecclesiam nostram, tum omnino Germaniam per Lutherum et res testatur atque etiam falsi sunt eius aduersarii. Delrio quidem, alienus ille ab eius disciplina, et infestissimus nomini eius, agnovit hunc disciplinae Lutheri fructum, cum in *Disquis. Magicis*, ait: *ante annos centum, quo tempore Lutheri haerese nata est, Germania Daemonum manifesta et trebra infestatione plenissima fuit; et ille omnino saepe Germaniae superstitionem exprobrat. Nam quae causa est, quare post Lutherum Germania minus obnoxia fuerit huic tanto malo, nisi, quod per Lutherum et eius discipulos illa superstitio imminuta, et ex plerisque regionibus prope tota expulsa est. Atque id Lutherus ita egerat, ut nihil potestati Diaboli detraheret, quod solent superstitiosi homines exprobrare iis, qui ab illo genere superstitionis sunt alieni; immo etiam ab aduersariis haud paulo plus iusto ei tribuere putabatur; quo nomine eum valde accusat idem ille Delrio in Disqq. m. L. III. P. I. qu. 3. sect. 2, p. 426. Nempe omnia ille tribuebat verbo diuino recte cognito et ei obediendi studio atque animo; eo omnis superstitio excluditur. Sed adiuuabatur etiam ab sociis operis sui, Philippo et aliis, tum a doctoribus ceteris bonarum literarum, qui cum in libris graecis et latinis enarrandis in aliquod genus superstitionis paganicae, in oracula, vexulas cet. incidissent, stultitiam, vanitatem, et frau-*

fraudes earum rerum demonstrabant, et ad risum conuertebant; denique ab philosophis, qui rerum naturam planius explicare coeperant. Accessit etiam Principum prudentia, qui legum seueritate homines vel deterrebant ab malis superstitionis artibus, vel coërcebant eos, qui iis vti auderent: quibus rebus etiam reliquiae veteris superstitionis paulatim, praesertim hoc nostro Seculo, cognitae etiam saepe fraudibus improborum, sunt prope prorsus sublatae. Atque ea patriae nostrae gloria communicata est etiam cum aliis populis, qui in communionem emendatae per Lutherum Ecclesiae venissent: in quibus etiam passim extiterunt, qui superstitionis opiniones vulgi impugnarent. Sed cum tamen aliquid reliquiarum remansisset: neque enim imbecillitas humana finit se prorsus ab vitiis suis liberari, eae non otiosae latuere, sed saepe per occasiones oblatas exserere se coepere. Atque profecto dolendum est, hac nostra aetate, quae superioribus etiam temporibus magis sapere creditur, eoque nomine gloriatur, et proximo tempore id saepius accidisse. In Batauis *Swedenborgii* fabulae coelestes, et iactata cum mortuis commercia et colloquia per multis, vt audiuius et cognouimus, probatae sunt. Lohmanniae Daemon a quam multis agnitus est, Dessauiae tandem a medico pulueris rhabbarbarini quasi tormento expugnatus et eiectus. Quid cum magno dolore prudentium Hannouerae nuper factum sit, constat. Nec illi recentissimo apud nos impostori, dignum suo furore exitum nato, qui animas mortuorum et de coelo deducere, et ex orco euocare se et in conspectum volentium adducere iactabat, defuere, qui eius praestigiis, et malis artibus se decipi paterentur, et ei temere crederent. Quibus rebus profecto magna labes ad-

Mm 4

sperfa

spersa est aetati nostrae, posteris etiam miraturis, tantam fraudem in eam cadere potuisse. Quo magis hoc et magistratibus et Ecclesiarum Scholarumque doctoribus est agendum, vt a talibus fraudibus populo caueatur in posterum, et superstitioni tam foedae vel aditus omnis praecludatur, vel si extiterint eius auctores, ii quam celerrime amoueantur. Ita se dignos Lutheri disciplina probabunt, et beneficium a Deo per eam patriae nostrae traditum conseruabunt. Sed nobis cum doctrinae publicae magistris res esse debet: itaque eorum de officio in hac re planius praeciendum videtur.

Ac primum, quia facile prauis huiusmodi opinionibus capiuntur teneri animi, quae cum semel acceptae sunt, ita alte insident, vt non modo faciles ad credendum fiant, sed etiam appetant tales nugae, iisque delectentur; inprimis tum a parentibus cauere debet, ne narrationibus talium rerum aures puerorum imbuantur, tum a magistris mature monendi sunt, per occasiones datas, ne iis temere credant, sed certe eas semper suspectas habeant, et in iis a fraudibus sibi diligenter cauendum putent. Magistrum scholae doctissimum, postea eximium Ecclesiae doctorem, vidimus, qui monere soleret discipulos, vt orarent Deum, ne sineret sibi spectra offerri. Etenim, aiebat, qui spectra vident, aut corporis aut mentis graui vitio laborant: quod si tamen acciderit, vt, quamquam sani, mente et corpore, spectrum videre videamini, memores praecepti Iesu, *Luc. 24.* festinate id contrahere manibus, vt videatis, an carnem et ossa habeat, ne decipiarni et noxam accipiat. Bene profecto et sapienter. Doctores autem populi diligenter curare debent, primum, vt aduersus tum
omnia

omnia superstitionis genera; tum et hoc muniant eius animos; deinde, si qua talium rerum fama extiterit, ne inuidiae et odii metu taceant, sed eam suspectam faciant, ne ei temere credatur, sed exitus rei expectetur, qui ut plerumque fraudem patefecerit, ita et in ea re sit patefacturus. Neque enim vlla fraus tam sollers est et callida, ut veritatem plane opprimere possit, nec relinquat quasdam eius veluti ansas, per quas deprehendi et in lucem protrahi possit. Atque etiam saepe emergit sua sponte, etsi interdum tardius, et cautos homines in posterum facit, si modo possint sapere: nam nonnulli ita tales opiniones adamauere, ut ne exemplis quidem luculentis ab iis se abstrahi sinant, sed, quanquam saepe decepti, tamen semper se credulos fabulis talibus praebeant. In quo illos magistratuum diligentia et prudentia poterit, ut debet, adiuuare, fraude celeriter et solerter indaganda, et fabularum auctoribus amouendis, ne latius spargere nugas suas, et in fraudem multos possint inducere.

Ad hanc talem disciplinam praeparabitur a Doctoribus Academicarum iuuentus, quae se Ecclesiae destinavit, si eam de rebus iis, quae ad spirituum vtriusque generis naturam, conditionem et actiones pertinent, ita docebunt sentire, ut libris sacris eorumque auctoritate acquiescant, nec ingeniorum humanorum inuenta vel somnia iis admisceant et pro necessariis religionis partibus commendent, per quas deinde omnes illae supersticiosae fabulae explicari ac defendi possint: in quam partem saepe procliuiores fuisse etiam bonos alios et doctos viros reperimus, atque ita superstitionis plebeiae patrocinium suscepisse, cum magno saepe detrimento religionis verae ac purae. A qua labe puram Deus seruet doctrinam publi-

Mm 5

cam

eam scholarum nostrarum, atque ita etiam illud, quod commemorauimus, datum olim patriae et Ecclesiae per Lutheri operam bonum cum ceteris omnibus eiusdem ministerio paratis. Pro qua re nobis etiam inter gratiarum actiones supplicandum est Deo, idque cum communiter faciemus cum vniuerso populo Lipfensi, proximo die Lunae, tum proprie in aede Paullina ab hora XII. inter quae sacra etiam verba faciet Io. Augustus Wolfius, Philosophiae et artium Magister, vir doctissimus, recitanda oratione diserta et elegante *de persequendis Lutheri vestigiis in emendatione sacrorum conseruanda. ect.*

DE
SATISFACTIONE
CHRISTI

DE
SATISFACTIONE
CHRISTI

Instat dies festus, omnium totius anni laetissimus, et praecipua religione celebrandus. Nam sacratus est memoriae rei omnium laetissimae, hoc est, reditus I. C. Servatoris nostri in vitam, quo opus eius, ad quod peragendum natus erat, est absolutum, et salus adeo hominibus vere restituta. Etenim ille reditus in vitam habebat argumentum certissimum, eum esse filium Dei Rom. I, 3, cuius opus Deo patri non posset non gratum et probatum esse, et satisfactionem eius pro peccatis hominum a Deo esse acceptam, et velut sigillo impresso firmatam et ratam factam. Itaque Paullus ait, si Christus non redisset in vitam, fidem et spem nostram inanem esse, nec esse nos a peccatorum poenis liberatos, 1 Cor. XV, 17. Nam ut ille propter peccata nostra mortuus esset, sic propter salutem esse in vitam restitutum Rom. IV, 25. quo et illud Petri pertinet, cum dicit 1 Petr. I, 3 nobis per eius reditum in vitam redditam esse spem certam salutis, aeternaeque in coelo beatitudinis. Ut ergo haec duo, mors Christi et reditus in vitam, necessariam habuerunt coniunctionem ad salutem nostram, sic et in animis nostris coniungi cogitatione ac fide debent, si recte et salubriter celebrare memoriam absoluti operis Christi, et dies hos festos peragere volumus. Quid igitur aptius facere possumus praeparandis animis vestris ad eam religionem,

gionem, quam si vtriusque rei intelligendae et cogitandae modum ad eam accommodate demonstramus, docemusque, quomodo intelligendum sit id, quod Paulus ait, Christum propter peccata nostra traditum esse morti, et propter salutem restitutum in vitam. Et in illo quidem summa rei redibit huc: ut sententiam Ecclesiae nostrae de satisfactione pro peccatis nostris Deo facta a Christo asseramus accurata et perspicua, et ad cuiusque captum accommodata demonstratione. In quo nos etiam speramus rem facturos aptam temporibus nostris, quibus plures sunt, qui hac sententia videantur offendi, aut eam esse tam difficilem existiment, ut captum populi superet, eamque ob causam a doctrina publica in templis amouenda videatur. Atque ita faciemus id, quod nos diximus posse, (Bibl. Theol. nouiss. P. II. p. 634.) ut eam rem tam clavis librorum sacrorum testimoniis demonstramus, quae refelli legitima ratione, h. e. salvis regulis veris interpretandi, nullo modo possint.

Iam verbum quidem *Satisfactionis* in libris sacris non est, nec esse potuit; quod nec hebraica nec graeca lingua habet verbum, quod ei grammaticae, s. etymologia et sensu, respondeat: sed id nil causae obest, satis est, si res eo verbo significata inest. Sunt autem multae loquendi formae in libris sacris ad hanc causam pertinentes, quibus latinum illud verbum respondet. Eae vero cum vel partem tantum operis illius Christi, quo satisfactionem peractam dicimus, exprimant, vel tropicae sint, nec habeant adeo subtilitatem, aptam rei via et ratione explicandae, quae in scholis requiritur, faciantque locum ambiguitati, et calumniis interpretandi, ut sub iis occultare se possint, qui peruersae de re ipsa sentiant: doctores ecclesiae latinae mature instituerunt eam verborum varietatem et figuras revocare ad verbi proprii unitatem. Eius rei auctor fuit,

fuit, quod quidem scire possimus, *Tertullianus*, qui id verbum e iure et foro, in quo ille versatus erat, sumtum, ad illum usum accommodaret. Eum secuti sunt ceteri doctores latini, *Cyprianus*, *Augustinus*, qui et ipsi in foro fuerant versati; post ii, qui doctrinam sacram ad scholae subtilitatem tractare et explicare instituerant, in usus illi eorum, qui doctores idonei religionis fieri vellent, ut omnium rerum distinctas et accuratas notiones haberent, et eas iusta perspicuitate explicare ad cuiusque captum, et verbis certae et notae significationis exprimere possent, quo totum illud subtilioris et scholasticae theologiae institutum spectabat, et spectare debet. Atque eum verbi delictum elegantem et probandum esse, fidem facit hoc, quod omnia verba librorum sacrorum, quibus opus I. C. salutare vel totum vel per partes exprimitur, a Latinis verbo satisfactionis exprimuntur.

Sed satisfactio haec a Christo praestita est iustitiae divinae, per eamque huic reddita sunt iura sua. Est autem ius eius duplex: alterum, ut legibus eius obedientia perfecta praestetur, earumque adeo auctoritas salva relinquatur; alterum, ut, iis violatis, solvantur poenae propositae. Vtrumque igitur ius redditum a Christo iustitiae divinae dicimus, eum ab eo satisfactum esse Deo eiusque iustitiae defendimus, atque ea re effectum, ut benignitas divina posset condonare hominibus peccata, cum iisque ita agere, tanquam nulla re leges diuinas violassent, sed eas omni ex parte seruassent, salva iustitia sua: auctore Paulo, qui Rom. III, 26. remittendorum hominibus peccatorum causam ita institutam a Deo esse ait, ut ipse esset, maneret et appareret, iustus, et tamen ut iustum, innocentem et sanctum tractaret peccatorem, propter fidem in Christum. Sed haec talis satisfactio an vere insit literis sacris, id vero quaeritur, eius demonstra-

monstratio euidens requiritur, inprimis qua partem alteram, quae est in poenis peccatorum pro genere humano subeundis: nam Christum legem diuinam perfecte seruasse, de eo non est aut esse potest homini Christiano dubitatio: etsi sunt, qui dubitent, an ea obedientia hominibus ad salutem proffit et in satisfactione pro hominibus eius ratio haberi debeat. Itaque de illo maxime et primo loco videamus.

Id autem cum multis perspicuis testimoniis doceri possit, nos nunc duobus eorum generibus erimus contenti, quibus recte intellectis (possunt autem ab unoquoque intelligi leuiter admonito, tanta est euidencia) tota res est ἀναρτιότης confecta. Primum ergo inest in iis locis, ubi *Christus peccata hominum in se suscepisse ac tulisse* dicitur: quorum principes sunt Ies. LIII, 11. et Io. I, 29. in quorum altero multis dicitur iustitiam et salutem paraturus, quod eorum peccata tulerit: in altero autem totius generis humani (mundi) peccata in se suscepta ferre (vel laturus esse.) Quid ergo est ferre hominum peccata, aut quid esse potest? nihil hic est obscure aut ambigui; nam usus loquendi Hebraeorum clarus est minimeque ambiguus in hac loquendi forma: secundum quem is alterius peccatum ferre dicitur, qui eius loco punitur, et poenam pro altero dat: Quis enim vel puer nescit illud praeceptum diuinum, *filius non debet ferre peccatum patris, nec pater filii*, aut eius sensum esse eum, quem diximus.

Alterum genus suppetit nobis Paullus, inprimis ille diligens et frequens atque etiam perspicuus in ea re tradenda et asserenda: quippe qui hoc sibi docendum traditum esse a Deo inprimis, profitetur. Sed nihil liquidius est loco eo, in quo dicit, Deum genus humanum secum reconciliasse, atque placatum ei se reddidisse per Christum. Quomodo? nam eum, cum
purus

purus esset ab omni peccato, nihilque vnquam peccasset, tamen hominum causa *factum esse ab eo peccatum*, vt homines per eum iusti fieri possent. Quid est, *factum esse a Deo peccatum*? nempe peccatorem dicendum erat. Nam manifeste in vtroque membro abstractum est pro concreto: sed Paulus durius esse putavit, eum, quem purum omnis peccati dixerat, peccatorem appellare. Sed si ita dixisset, num aliud esset, aut esse posset, quam, vt peccatorem tractauit, poenis peccatorum, ab hominibus scilicet perpetratorum, ab eo, hominum causa, et loco, exigendis? idque fecit propterea, vr homines fieri possent *iusti Dei*, scil. iustitia a Deo accipienda: nam *δικαιοσύνη* *Θεοῦ* est, quae est *ἐκ Θεοῦ*, donum Dei, vt Ies. LI, 5. Rom. I, 17. comparato loco Phil. III, 9. vbi est plane *δικαιοσύνη ἐκ Θεοῦ*.

Quid? an aliquid desiderari potest amplius ad perspicuitatem rei? Profecto qui hic non videt lucem, plane coecus sit oportet: nec magis aliquid deest, quam minus res certa sit sacrorum librorum auctoritate. Sed obedientia legi a Christo praestita, an etiam ad satisfactionem pertinet, estque nostro loco et causa nostra praestita? de quo nuperrime est in partem vtramque disputatum, re in dubium a nonnullis adducta, qui in altero genere nobiscum sentirent. Nobis quidem persuasum est, eam dubitationem tolli ab eodem Paulo, qui obedientiam Christi ita valere ait ad vitam et salutem nostram, vt primi hominis violationem legis ad mortem et poenam. Quis autem dubitet, id, quod nobis imputetur a Deo ad salutem, in eo esse partem satisfactionis pro nobis? et, si illud ius diuinum, quod est in poenis peccatorum reddendum erat satisfactione; quidni alterum, quod est in legum diuinarum sanctitate et auctoritate conseruanda; quod nobis etiam maius, et commune sanctitati, sapientiae et bonitati videtur.

Ernesti Opusc. Theol.

Nn

Ita

Ita autem re constituta et firmata per manifestam librorum diuinorum auctoritatem, nihil dubitationis reliquum esse potest his, qui illis bona fide et religiose credere consueuere, aut credendum esse didicerunt. Nam in ipsis libris illis profecto nihil est, nec ex iis allatum reperimus, quoad meminimus, e quo dubitationis aliquid posset existere. Quicquid allatum est contra illam rationem ac sententiam dubitationis, id natura omne fuit ab ingenii humani temeritate et leuitate. Quo minus necessarium est, dubitationes et quaestiones inde ortas, de necessitate et aequitate rei, consensuque cum bonitate diuina, curare, et in iis soluendis laborare. Quid enim? quod diuino consilio factum esset, in eo quaerere opus est, id an necessarium et dignum Deo sit, consentiensque cum eius perfectione vniuersa? cum et ratio hoc doceat, et libri sacri firment, nihil a Deo nec decerni nec fieri posse, quod secus sit: quicquid autem ab eo factum sit, id eo dignum esse necessario et ad illustrandam eius perfectionem susceptum et factum. Sed quoniam videmus, multos hodie bonitatis diuinae magnitudine conturbari, eaque ad varias dubitationes adduci, per quas vel necessitas rei labefactetur vel dignitas; pauca in eam partem adiungamus.

Ac necessitatis quidem argumentum habemus maxime hoc, ipsi *Crelkio* Socinianorum, satisfactioni Christi aduersantium, facile acutissimo, agnitum de Ver. Relig. I, 28. quod Deus se dicit *poenis peccatorum sanctificari*, Leuit. X, 3. i. e. sanctum apparere. Minus autem necessarium esse ac dignum Deo putamus, sanctitatem suam demonstrare, vt res ferant, quam benignitatem? Quid? illud quale est, quod Deus saepe testatus est, se laetari puniendo Ies. I, 24. Hos X, 10, inprimisque Deuter. XXVIII, 63. vbi se dicit non minus laetaturum puniendo Israelitas ob malefacta et perdendo, quam laetatus fuerit, cum eos a per-

nitie

nicie seruasset et beneficiis adfecisset: non quo doloribus et cruciatibus hominum ac perniciē laetetur, sed quod ipsa actio puniendi peccantes iucunda ipsi sit, propter iustitiam et sanctitatem suam, cuius opus in poenis infligendis est atque cernitur, quaeque ipsi non minus cara sit necesse est, quam benignitas. Nempe Deus beatissimus est: eius autem infinita beatitudo est in conscientia ac sensu intimo perfectionis ac virtutis suae vniuersae. Itaque necesse est eum non alio sensu moueri in operibus iustitiae, quam bonitatis, sapientiae, potentiae.

Atque hoc quidem diuinum iustitiae opus, quod in satisfactione a filio Dei I. C. ipsa volente et optante exigenda, et poenis humani generis ab eo sumendis, peractum est, quanto laetius Deo fuisse existimemus, cum id esset cum longe etiam maiori benignitatis suae opere coniunctum, totumque ad bonitatis demonstrandae rationem comparatum. Nam profecto iustitia Dei, exigens illas hominum a Christo poenas, bonitati eius pro instrumento fuit, genus humanum a peccati seruitute et perniciē vindicare et asserere in libertatem et felicitatem cupienti. Quo magis est hominis Christiani, qui se beneficio diuino per Christum nobis destinato et parato non indignum praestare velit, hoc tantum opus diuinum agnoscere, eius magnitudinem et praestantiam rite ponderare, vt id iusta admiratione et gratia prosequi, et voluptatem ex eo percipere possit, quae animum tranquillet, ac beet.

Ei autem rei quod tempus aptius est, quam hoc paschale: ad quod recentes a spectaculo Christi patientis, et pleni cogitatione illius operis Christi venimus, per quod maxime satisfactum est Deo pro peccatis nostris; et quo tempore primum illius operis fructum in ipso Christo, carissimo Seruatore nostro, videmus, in cuius societatem etiam nos venimus. Nam cum illum reuersum a morte viuumque videmus, etiam deposita

vitae superioris humilitate et imbecillitate, qui dubitare possumus, Deo patri acceptissimam fuisse satisfactionem, pro nobis praestitam, nosque adeo poenis peccatorum nostrorum esse liberatos, si modo accipere hoc tantum bonum, eoque recte uti velimus, h. e. sic, ut, sicut Christus, per solutis poenis nostris, a morte in vitam restitutus, iam perpetuo vivit ita, ut gloriae et maiestati patris inseruiat omni ratione, item nos toti Dei sumus, omnes nostros sensus, studia, actionesque ad maiestatis divinae cultum dirigamus, atque ita non tam nobis, quam ipsi viuamus, qui per filium suum nos servauit a pernicie, atque etiam filio ipsi, qui nostra causa et mortuus est et in vitam rediit. Hoc igitur agamus, o! carissima capita, et in eo cogitando et agendo hoc tempus festum consumamus. Non neque rectius, neque suavius agere id possumus, nec nomine nostro Christianorum dignius.

DOGMA

DOGMA
DE TRINITATE
ADVERSVS IVLIANI
CALVMNIAM
VINDICATVM

AND
THE
HISTORY OF
THE
INDEPENDENT
STATE OF
THE
MOUNTAIN
PEOPLE

DOGMA
DE
TRINITATE ADVERSUS
IULIANI CALVMNIAM
VINDICATVM

In calumniis, quibus Iulianus religionem Christianam, et eius fontes, libros sacros queravit, etiam haec fuit, quod eam diceret repugnantia docere; in quibus imprimis ponebat hoc ap. Cyrill. c. Iulianum L. IX, p. 291. quod cum vnum Deum, eumque solum colendum et adorandum diceret, Iesus tamen homines iusserit baptizari, in nomen Patris, Filii et Spiritus S. vnde consequens fuerit, vt ipsum quoque Christiani adorarent, et Filium ita, vt Patrem, Deum esse statuerent; ἀκόλῃθ᾽ αὐτοῖς διανοόμενοι, μετὰ τῷ πατρὶ θεολογεῖν τὸν υἱόν. Cyril- lus ad hoc respondens, hoc tantum agit, vt in eo nihil sit, quod repugnet vnitati diuinae naturae, aut in quo Christi praeceptum pugnet cum Mosaico itemque Chri- sti ipsius de vno Deo, eoque solo colendo: sed ad vsum temporum nostrorum profuerit etiam alio modo hanc calumniam tractare, et ad firmandum dogma de pluri- bus personis diuinis, salua vnitae Dei naturaeque diui- nae, conferre: quod facere consentaneum est huic tem- pori, quo Spiritum S. eiusque beneficia publica religione celebrare mos est.

Iulianus igitur agnouit, in illo Christi praecepto tres personas esse: deinde iis diuinitatem ex aequo tribui, atque idem et alii de aduersariis christianae religionis agnouere, et ad calumniandum contulere, sic ut et ii, qui Tritheitae sunt appellati, ad errorem suum firmandum abusi sunt. Vtrumque prodest ad verum videndum atque defendendum. Res tota nititur sensu vero verborum, primum ut quales illi tres intelligendi sint, recte videamus, deinde quid iis tribuatur, ut qui sint, intelligamus.

Iam primum cum, quicunque olim haec verba baptismi legerent, nulla antecapta opinione imbuti, in iis senserint tres personas commemorari diuersis nominibus, in eo est magnum argumentum, cum esse verum istorum verborum sensum. Nam ita apparet, sensum communem hoc probare, ac postulare, ut ita statuamus, deinde hanc interpretationem habere characterem simplicitatis et facilitatis, in qua est signum bonae ac verae interpretationis euidentissimum atque certissimum. Itaque in hoc verborum sensu consensere omnes primae Ecclesiae doctores, donec philosophari super dogmatibus Ecclesiae coeptum est: unde plures falsae opiniones extitere, ut in aliis capitibus doctrinae christianae: cum non videret hoc genus hominum, philosophari nos quidem super res sacris literis traditas posse, sed ita, ut ne eius causa sensus verborum sacrorum simplex et euidentis torqueatur aut relinquatur; sed ubi ille in promptu certusque sit, in eo acquiescamus, nec vlla ratione nos ab eo deduci finamus. Vnde autem est illa euidentia in hoc loco? Nempe ex eo, quod *nominis* verbum, ita ut h. l. positum, cum aliquid dicitur fieri aut factum est *in nomine* vel *in nomen alicuius*, semper personam et subiectum intelligens significat, nec aliter intelligi potest, absurdumque est, in ea re, cuius nomen sic commemoratur,

moratur, qualitatem aliquam aut modum cogitare. Hunc igitur primum calumniae Iulianae usum teneamus: veniamus ad alterum.

Est profecto clarum, Iulianum agnouisse, his ipsis verbis Christi omnibus tribus illis, qui in iis nominantur, diuinitatem tribui, vnde necessitas adorationis consequatur. Nam quod ille de filio Dei, Christo, dicit, id pariter in Spiritum Sanctum conuenit. Quomodo ergo hoc intelligitur ex istis verbis: *βαπτίζετε οὖν αὐτοὺς τινος*? quid ea sonant? Non profecto, vt vulgo dicunt, iussu et auctoritate alicuius, quamquam res est vera, sed ex eo nil tale perspicue satis sequitur. *ὅτι* per periphrasin additur personis, inque *nomen alicuius*, est *in aliquem baptizare*. Quid id est? Profecto in baptismo nihil aliud, quam alicuius religionem ei adstringere, vt ei credere, ei obedire, eum colere religiose necesse sit. Cui autem religio adstringi potest, nisi vni et soli Deo: nam alii, non Deo, adstringi idololatria fuerit. Sed Israëlitaë dicuntur in Moysen baptizati esse 1 Cor. X, 2. idque nil aliud est, nisi Moysen Ducem nacti sunt eique se crediderunt. Sed ibi non est sermo de religione, nec ille baptismus proprie dicitur a Paulo, sed tantum per allusionem ad baptismum Christianorum. At in illo baptismo, qui proprie dicitur, estque sacramentum religionis christianae, alia et maior vis esse debet, nempe illa ipsa, quam diximus. Quo constituto, clarum est id, quod Iulianus dicit, his verbis esse consentaneum, vt Deus sit filius Dei, sicut Pater: ad eundemque modum etiam de Spiritu Sancto indicari in his verbis debet. Vnde planissimum est, in illa baptismi formula esse clarissimum et inuictum argumentum dogmatis Ecclesiae nostrae, quod tres personas diuinas statuit, quae pari religione sint colendae et adorandae: idque adeo tenendum sit Christianis, etiamsi, quomodo id consentiat

cum unitate Dei naturaeque diuinae, intelligere nullo modo possimus; nam consentire cum ea quidem non dubitari potest, quoniam vtrumque ita clare literis sacris traditum est, nec vlllo modo repugnantia tradi diuinitus possunt: cum contra in hac imbecillitate ingenii humani, non modo mirum non sit, sed etiam necessarium, in diuinis, quae immensum a nostris notionibus absunt, quippe nihil cum sensibus commune habentes, vt multa nec per se intelligere satis perspicue, nec quomodo sibi consentiant, assequi ratiocinando possimus.

Nec vero alterum non animaduersione dignum est, quod Iulianus ex hac ipsa formula adorationem filii Dei, Iesu Christi, ortam putat, cui ea consentanea sit. Recte iudicat. Nam si religio nostra Christianorum vniuersa adstricta est filio Dei, estque adeo ille religionis obiectum, necessitas adorationis clare intelligitur: eodemque adeo modo de Spiritu S. iudicari debet. Nam sicut ex adorationis cultu diuinitatem colligimus eius, cui illa conuenit, sic vicissim ex hac illius necessitas existit, etiam sine diserto eius in libris sacris praecepto aut exemplo. Quod cum sit ita in promptu, vt paene in oculos occurrat; mirandum est fuisse, qui eam non agnouerint aut de ea dubitauerint, quia nec praeceptum nec exemplum in libris sacris extaret. Talem ante annos non multos fuisse in Britannia reperimus quendam Tomkinsium, qui tamen rem non eo traxit, vt Spiritum S. esse Deum, aut distinctam a Patre et filio personam negaret: sed modo eo valere voluit, vt adoratio et preces ad Spiritum Sanctum non essent in partibus cultus religiosi necessariis numerandae. In quo sane ille nihil vidit. Nam cum certum sit, Deum adorandum esse et precibus ab eo petenda esse, quibus nobis ad salutem opus sit: quomodo vlllo modo obscurum aut dubium esse possit, id

• id etiam Spiritui Sancto tribuendum esse, si hoc constet, eum esse Deum. Itaque recte Theologi quidam in testimonius iis, quibus adoratio Spiritus Sancti intelligeretur, hunc ipsum locum posuere, qui formulam baptismi usurpandi habet, etsi vim argumenti ferre non ostenderunt. Ceterum mirandum videtur, quomodo exempla talium precum non viderit ille Britannus in locis Apostolicorum librorum iis, in quibus vota sunt pro salute Christianorum diserta, cum Spiritus Sancti mentione, illisque parem fere vim habet ille Paullinus, in quo per Spiritum Sanctum iuratur. *Rom. IX, 1.* *ut per Christum* ibidem, *ἐν Χριστῷ* et *ἐν Πνεύματι ἁγίῳ*, vtrumque illud ad asseuerationem ἀληθῆσαι λόγῳ, ἢ ψεύδομαι referendum: diciturque hebraico more, vt Graecis *τῇ τὸν Χριστὸν, τῇ τὸ Πνεῦμα ἅγιον*.

Nec vero praetermitteremus hunc calumniae illius Iuliani vsum, quem habere potest aduersus eos, qui in veteri Ecclesia diuinitatem Spiritus Sancti ignotam fuisse defendunt. Nam si, secundum Iulianum e verbis baptismi adoratio filii Dei nata, atque inde diuinitatis argumentum vulgo ductum est; qua specie poterit dici, non idem Spiritus S. in ea formula mentionem effecisse. Et contrarium docet Iustinus, qui in Apologia clare dicit, Christianos *σέβασθαι καὶ προσκυνεῖν τὸ Πνεῦμα προφητικόν*, *colere et adorare Spiritum, qui locutus est per prophetas*.

Hunc ergo Spiritum S. nos quoque vt personam diuinam adorabimus atque colemus religiose, primum sic, vt, cum Dei nomen in precibus appellamus, et ipsum, cum patre et filio cogitemus, deinde vt etiam proprie ad ipsum et nominatim dirigamus preces et pro nobismet ipsis et pro aliis ad impetranda bona spiritualia, id est, ea omnia, quibus nobis ad accipiendam salutem a Christo partam opus est, et auxilium eius in consequenda vera sanctitate et conseruandis officiiis

ficiis vniuersis. Hoc autem tempore, et in sacris his pentecostalibus, ad quae peragenda nos paramus, imprimis etiam ei laudes et gratias agamus pro diuino illo opere, quod hac olim die pentecostes Hierosolymis peregit, ad illustrandum Iesum Christum filium Dei, non modo illo in loco ac tempore, sed etiam post, donis illis diuinis impertiendis, per omnem orbem terrarum. De quo genere donorum Spiritus S. inter sacra nostra publica in aede Paulina dicit *M. Io. Godefredus Beyerus*, Halsbruccio Misnicus V. D. vt eorum causa non inuidendum esse primis Christianis, siue qui ea ipsi nati essent, siue ea spectassent admirabundi. cot.

DE
SCHOLIS
ET
DOCTORIBVS VETERVM
I V D A E O R V M
ET
CHRISTIANORVM

DE
SCHOLIS
ET
DOCTORIBVS VETERVM
I V D A E O R V M
ET
CHRISTIANORVM

Antiquissimum est Doctorum in scientiae generibus omnibus, scholarumque nomen, sed non eadem vis, non idem vsus. Qui nunc quidem tenet, ita ab antiquiori quoque discrepat, vt nihil prope cum eo simile habeat. Quod cum vulgo non satis cognitum sit, non modo plerisque obscura sunt multa apud veteres, etiam proxime superiorum seculorum, scriptores, sed etiam alia incommoda nascuntur, quibus cum maxime laborare rem literarum publicam dolemus, atque etiam maiora videntur timenda. De quo non alienum videtur, hoc tempore dicere, quantum sine inuidia liceat, nec alienum nec inutile existimauius.

Initium faciemus a Iudaeis, apud quos antiquissima est Doctorum scholarumque mentio in libris ipsis sacris. Sed in iis, vt in aliis, error magnus exortus est ex eo, quod nomina illa ad nostram consuetudinem relata, doctoresque et scholae nostris similes haberi coepere. Antiquissimi doctores ante Christi tempora fuere prophetae, antiquissimaeque Prophetarum scholae, quorum et discipuli

puli commemorantur: Prophetarum filii dicuntur. Sed hi fuere, qui Prophetas sectarentur, eos consulerent super rebus diuinis, audirent; cum de iis differerent, non certis locis atque horis, sed quoties eius rei facultas et occasio daretur. Sed cum Prophetæ defecissent, exorti sunt inter Iudaeos, qui priuatim, suo ducti studio rerum diuinarum accurate cognoscendarum, scriptores ad intelligendum scrutarentur, et rerum diuinarum in scripturis traditarum vim et rationem modumque, vt eas alii, qui cuperent, perspicue explicare possent; vnde quaedam philosophia religionis vel theologia exorta est, et appellata a Iudæis graece loquentibus. In qua cum non idem iudicaret omnes, sectæ diuersæ Iudaicae, siue theologicæ natae sunt, quæ in libris sacris commemorantur, Phariseorum et Sadduceorum. In quibus cum essent, qui aliis suas sententias opinionesque traderent, qui vellent, ii doctores sunt appellati, hique sunt, qui in libris N. T. νομοδιδάσκαλοι, imprimis et γραμματεῖς dicuntur: illi quidem a re, i. e. religione, hi a libris sacris, e quibus religionis cognitio ducitur. Nam hos esse eosdem, et res docet, et vsus horum verborum in libris sacris. Etenim νόμος verbum per hebraïsmum de religione vniuersa, ex vsu verbi מִצְוָה, et in V. T. et in N. vsurpatur, quanquam et γράμματα, vt apud latinos *literae*, pro doctrina, dicta videri possunt, vt Io. VII, 15. vbi eidem διδασχῇ substituitur et illa nomina permutantur. Marci quidem c. II, 6; et Luc. V, 17. in eadem re illis γραμματεῖς, hic νομοδιδάσκαλοι sunt. Lucas XX, 46. de γραμματεῦσι dicit, quod alibi de νομικοῖς et Φαρισαίοις, i. e. qui pharisaica placita sequebantur.

His autem quomodo scholæ tribuuntur? non aliter profecto, quam apud Graecos, philosophis, qui in foro, in porticibus gymnasiorum, in officinis artificum et tabernis mercatorum versari, et cum iis, qui ad se accessissent consulendi et audiendi causa, in conuiujs item, similibusque conuentibus, de rebus philosophicis differebant.

Nam

Nam similiter discipuli Iesu dicuntur, qui cum solerent comitari atque sectari audiendi causa et consulendi, Io. VI, 66: *οἱ μὲν αὐτοῦ ἠκολούθησαν*. Solebant autem doctores illi ire in loca publica, quo tempore eo homines frequentes conuenirent, h. e. Hierosolymis quidem maxime in templum, tempore precum publicarum; ibi in porticibus considerare, et si qui accessissent, vel sponte differere de aliquo capite religionis, vel de quo visum esset, vt ap. Lucam VIII, 2. Iesus ingreditur templum et ibi confidet, cum ad eum accessissent homines, Io. VIII, 33. populus, i. e. quidam de populo, eum interrogat, vt X, 23. s. XII, 34. quod saepe inter differendum faciebant, cum aut aliquid non intelligerent, aut aliquid dubitationis in mentem venisset. Ibi tum vero ii, qui assidue sectari solerent doctorem, inprimis, si et ipsi doctores fieri cuperent, considerare prope doctorem solebant; vnde Paulus se dicit apud Gamaliele, qui erat e genere *γραμματίων*, confedis, quod idem de Maria assidue et studiose audiente sermones Iesu dicitur Luc. X, 39. In aliis autem vrbibus ea fiebant in Synagogis, vt multis locis librorum sacrorum, praesertim in Actis patet.

Sed quodnam erat genus hominum illud *γραμματίων* et *νομικῶν* s. doctorem? an simile nostris? Nequaquam. Erant ex omni genere vitae, nec publice constituti. Paullus quidem, qui disciplina Gamalielis Doctor erat futurus, vt Apollo, vir *δυνατός ἐν ταῖς γραφαῖς*, id est sine dubio *γραμματικός*, extrinsecum didicerat ad quaerenda vitae subsidia, eamque artem, Apostolicum iam munus sustinens et faciens, exercebat, vt inde viueret: nec dubium est, ceteros similes in hoc eis fuisse. Honoris et vtilitatis publicae causa docendi facultatem appetebant, atque exercebant. Praemium laboris et scientiae erat locus in Synedrio, cum in numerum presbyterorum, i. e. senatorum, lecti essent. Exempli plura sunt in libris Sacris. Nicodemus *ἀρχὼν* dicitur; quod est

Ernesti Opus. Theol. O o nomen

nomen eorum, qui in illo Synedrio sunt, adeoque senatoris: sed eum *doctorem populi* appellat Iesus Io. III, 10. Non ergo sacerdotes sunt intelligendi, etsi inter eos quoque esse doctores potuere, si qui supra munus illud caerimoniarum sacrarum peragendarum se attollere voluisset, et scientiam rerum diuinarum consecutus esset eiusmodi, vt docere posset. Atque hinc intelligitur, quae in mentione Synedrii saepe cum Pontifice, aut pontificibus, h. e. qui e gente Aaronitica essent (*γᾱνους ἀρχιεργασμοῦ*) iunguntur, sicuti et Pharisei et Sadducae. Suntque iis in locis intelligendi Senatores, qui essent iidem doctores, iique vel e Pharisaica, vel Sadducaeorum secta. Itaque interdum totum Synedrium per Pontifices et hos doctores exprimitur, praesertim si de re est sermo, quae ad doctrinam et intelligentiam literarum sacrarum pertineat, vt Matth. II, 4. Ceterum Scholae nomen illis temporibus non reperitur, post demum de doctoribus vsurpari coeptum: nam synagogarum nomen, quod in nostra lingua eo verbo exprimitur, plerumque aliud est, locus publicus precum potius, quam doctrinae publicae: nec eae certos doctores habuere, sed qui se ipsi praeberent. Post illa tempora memorantur scholae Iudaicae, Tiberiade et Babyloae inprimis; sed ne hae quidem e nostra consuetudine sunt capiendae. Neque enim ad eos doctores veniebant, qui adhuc tirones essent, sed iam prouecti in literarum sacrarum scientia, saepe ipsi iam doctores, vt cum iis conuersando, super difficiliore quaeestiones disserendo, ad perfectionem scientiae peruenirent et ad eorum gloriam possent contendere.

Atque haec ratio a Iudaeis ad Christianos et primum Graecos est propagata, inter quos philosophorum scholae illis Iudaicis similes fuerant. Primos quidem doctores tales apud Alexandrinos reperimus, apud quos ante iam philosophorum scholae tales extiterant, in his clara in primis Eclectica illa, a Pantaeo orta, vt satis notum est.

In

In his omnium primus fuit *Clemens Catecheta* dictus, a quo *Schola Alexandrina* Christiana originem duxit. Nam Gatechetæ nomen non ad nostram consuetudinem in hoc verbo deprimendum est, ut vulgo fecere, faciuntque parum periti, qui et *Scholam Catechetikam* finxere, quæ esset *Schola Scholastica*: quo nihil ineptius dici potest. Catecheta est doctor quilibet etiam ex usu Paullino. Et illi Catechetæ Alexandrini omne genus literarum profitabantur, ut in Clemente et Origine videmus et ab Eusebio traditur. Nec vero illi elementa doctrinæ Christianæ tradebant, sed doctrinam religionis, per interpretationem accuratam e libris Sacris haustam, philosophorum more tractabant, ut eam via et ratione traderent volentibus; atque inde illa theologia Scholastica, hoc est, subtilior et eruditior nata est; idque nomen tum et pluribus deinceps seculis in laude fuit, ut debuit, sero demum per barbaram inscitiam linguarum inquinata, et ad invidiam contemptumque eum, in quo nunc vulgo nomen eius est, vocata. Ad hos igitur Doctores non iuvenes et tirones ibant: supra eorum captum erat illorum disciplina; sed viri iam elementa dudum docti, qui iam muneribus in Ecclesia fungerentur, ut presbyteri et quicumque ad altiorem in Ecclesia gradum pervenire, et omnino Ecclesiæ doctrinæ accuratæ maioribus copiis prodesse cuperent. Neque illi Catechetæ iidem Ecclesiæ doctores erant. *Clemens* quidem et Origenes presbyteri sunt creati, sed hic ne in Alexandrina quidem Ecclesia: nimis inuidebant eius doctrinæ et gloriæ, ut sit, illius Ecclesiæ ministri; verum ab Hierosolymitano Episcopo, cum ibi versaretur, eiusque doctrina sanctitasque esset in oculis, hoc honore est affectus, quod et aliis tributum est, non ut in ecclesia docerent, sed ut eorum doctrina et virtus ornaretur eo nomine. Nam omnino illorum Ecclesiasticorum munerum ratio non, ut nunc, proprie ad docendi munus pertinebat, ut vulgo existimant. Bene erat, si possent docere populum: sed non

poterant omnes; vnde et postea, cum iam plures essent, qui possent, hi *presbyteri doctores* sunt appellati, vt a ceteris distinguerentur, qui tantum disciplinam Ecclesiae et externa curarent, de quo genere Dodwelli extat ad Cyprianum disputatio, quae de *presbyteris doctores* inscribitur. Etenim quam doctos, quam idoneos ad docendum putamus eos presbyteros fuisse, qui repente facti essent e decurionibus oppidorum, ex operis aulicis, ad auri lustralis collationem vitandam, quod frequens fuit post Constantini M. tempora? Quid in agris, cum esset ita constitutum publice, vt presbyteri ex ipsis pagis sumerentur, non aliunde peterentur: an hos doctores agere in Ecclesia potuisse censemus? Ne Episcopi quidem, postquam a presbyteris distincti sunt, semper tales lecti sunt, qui Doctores theologiae dies haberique possent: vnde cum ad concilia mitterentur, sibi socium adseuerunt, si quem habebant inter presbyteros vel diaconos, qui doctor esset; quales intelligendi sunt presbyteri et diaconi, qui in subscriptionibus Conciliorum reperiuntur. Nam saepe creati sunt ii, qui ciuilibus muneribus fungerentur, vt Ambrosius, qui Praefectus Praetorii erat, cum crearetur Episcopus; ceterum cum in iis doctrina et virtus spectata esset, studiumque ii suum ad res sacras contulissent, facti sunt doctores, qualem ipsum Ambrosium videmus: itemque in Presbyteris extiterunt Theologi, si ad id munus multum eruditionis attulissent, quales Tertullianum, Cyprianum, Augustinum, et plures alios fuisse scimus. Venerant illi ad Ecclesiam e foro, vt plures alii, in quo causas egerant; quod bene facere vt possent, non modo iuris scientiae, sed etiam eloquentiae operam dederant; cuius comparandae causa, e praecepto Ciceronis de Oratore, omne genus doctrinae didicerant et exercuerant: vt deinde, ad quodcunque genus doctrinae se contulissent, in eo facile proficere et excellere possent. Ad horum talium igitur veluti scholas se contulere, viri ingenui et liberales, ex ipso ordine eccle-

ecclesiastico fere, quā ab aliis discerent; sed eo, quo supra dictum est, modo, ut ad Diodorum Tarsensem Episcopum. Simile quid accidit in monasteriis: in quibus cum interdum esset aliquis excellenti doctrina praeditus, in ea venire aliunde, qui et ipsi eam laudem appeterent, ut eius consiliis, et consuetudine adiuti, longius progredirentur in scientia rerum diuinarum.

Iam media, quam dicimus, aetate tales doctores multis locis, subinde et in monasteriis fuere, ut in Beccensi *Anselmus*, in Feldensi *Rhabanus Maurus*, et alii. Eadem aetate cum in Hispania inter Arabes philosophiae et matheseos, itemque medicinae studia florere, essentque plures ex istis generibus clari scientiae magnitudine et subtilitate, doctorum nomine sunt celebrati cum eorum Scholis; sed non elementa triones docebant, sed hominum eruditorum iam magistri erant. Itaque cum ex omnibus fere regionibus eo venisse homines discendi causa dicuntur, viri fere intelligendi sunt, qui longius progredi scientia alicuius generis cuperent: qualem scimus *Gerbertum*, illum Ottonis III. praceptorum, fuisse, qui cum iam Abbas Bobiensi esset, in Hispaniam profectus est, ad doctores matheseos et philosophiae audientes. Similiterque alios pluribus saeculis reperimus, qui cum muneribus publicis fungerentur, talia itinera eodem consilio susceperunt. Nec alius generis fuere doctores Iuris eorumque discipuli in Italiae Scholis, Bononiensi et aliis, et Scholae iuris institutae, non ad elementorum filiae tenuitatem, sed ad perfectionem scientiae comparatae. Nam ad eas Scholas iuisse traduntur, qui iam in aula Imperatorum et Principum munera magna tenebant. Nec alia ratio fuit Scholarum philosophicarum et theologicarum, ut *Abelardi*, *Scoi* et similibus: seroque demum haec ratio inualuit, ut in scholis publicis elementa doctrinarum traderentur: quanquam olim ne in illis quidem acquieverunt, nec doctores, nec discipuli; sed post illa uberioris et subtilioris doctrinae copiam

illi fecere, hi expetiuere. Nec verò in scholis publicis modo fuere doctores, sed etiam aliis pluribusque locis exorti sunt, qui studio scientiae suae cum aliis communicandae, et eo ipso augendi suae scientiae subtilitatem, eius copiam facerent volentibus: in eoque se facere putabant, quo bene mererentur de Ecclesia et republica, et nominis famam late spargerent, ad posterosque propagarent.

Cum deinde paullatim exortae essent in quibusdam Civitatibus maioribus et illustribus per multitudinem talium in omni genere doctrinae virorum, ut Parisiensi, scholae publicae, quales nunc sunt Academiae, et nomen doctoris factum esset etiam nomen dignitatis, multaque illam dignitatem appeterent, multum ea res valuit ad incitanda studia doctrinae subtilioris, praesertim, cum institutum esset saluberrimo consilio, ut hoc nomen, omninoque potestas docendi praeter eos, qui publice ad docendum essent constituti, etiam aliis tribueretur, sed tantum his, qui per certa et idonea specimina se dignos eo nomine atque honore probassent: ex quibus deinde ad munera ecclesiastica maiora multi vocati sunt, plures etiam, qui talia munera sustinerent, nomen doctoris expetuerunt, atque etiam, doctores in suis sedibus egerunt: quod etiam in hac patria nostra olim frequens fuit. Atque etiam hoc reperimus a maioribus nostris fuisse salubriter institutum, ut iis, qui in urbibus maioribus, in primis, ubi Ecclesiae Cathedrales essent, Antistites sacrorum essent, doctoris nomen legitime caperent. Nam ea res habebat hanc vim, ut non appeterent talia loca, nisi qui confidere possent, se illud cum dignitate capere posse: iuvenes autem, qui se ad studia sacra contulissent, et altiora spectarent, ut fere fit in ingeniis melioribus et erectioribus, eo acrius ad comparandam doctrinam maiorem et perfectam incitarentur: denique in primis, ut per tales Antistites veluti scholae fierent theologiae, in quibus partim exercerentur ii, qui, absoluto academico cursu,

curfu, expectarent munera ecclesiastica, ad retinendam et confirmandam scientiam, quam ex Academia depotassent, partim etiam augeri scientia possent. Cuius generis plura exempla egregia reperiuntur et in patria nostra et extra eam. Inprimis est dignum commemoratu Io. Olearii, Antistitis Sacrorum Halensis extremo seculo superiori, exemplum, cuius schola theologica ita clara fuit illo tempore, ut permulti doctrinae vberioris cupidi, cum Academiam reliquissent, Halam irent, ut ab eo discerent, praesertim cum constaret, eum in scientia interpretandorum librorum sacrorum ipsos Academicos doctores fere superare. Et satis certum est, ei incrementa eius scientiae ac studii in hac nostra Academia maxime deberi. Legimus epistolam Stokmanni, qui Alstadii in Thuringia Praeful sacrorum fuit, viri doctissimi, doctissimorumque filiorum patris, nisi fallimur, in capite libelli de Peste, in qua scribit amico, iucundam sibi esse memoriam amicitiae cum eo contractae Halis, in schola Oleariana, ad quam ex Academia Lipsiensi olim venissent, dicitque octoginta amplius se sodales studiorum in ea schola habuisse, qui emensi curriculum Academicum venissent Halas, eo, quo ipse, consilio, ut in illa schola augerent et perficerent scientiam rerum sacrarum, cuius fundamenta in Academia iecissent. Quo magis optandum est, ut et institutum illud priscum maneat, et intelligatur illos honores non ad vanitatem comparatos esse, aut ad quaestum Academicorum doctorum, sed ad utilitatem ecclesiae, et ut multi hos honores capebant, nec eos, sumtus vitandi causa, ut sit, declinent. Videmus et praedicimus, si ille, qui nunc inualuit plerisque in Academiis et regionibus contemptus honorum Academicorum, porro valeat studia doctrinae in dies magis magisque lapsura, et breui tempore defuturos, qui doctores publici Sacrarum literarum in Academiis fieri possint: qua inopia iam nunc pleraeque Academiae incipiunt laborare, et in hac festinatione doctrinae Academicae, quae quibusdam in lo-

cis insulavit, ad alliciendos illa homines, per spem brevioris sanitas comparata, magis in dies liberabant, nisi creverat. Sed ablit euentus omnis a terris nostris, redestque doctorum copia, quae superioribus temporibus fuit: ut, cum pater noster, ex lege et conditione, quam ei delata erat Tensladensis tum Diocessos Ephoria, doctoris honores Vitebergae cepit, vnaque B. Deylingius et octo alii, omnes e terris nostris. Iuvenes autem, qui se studiis sacris addidit, hortamur, ut sibi hos honores animo proponant, atque eos sibi omni ingenii studiiq. vi et impetu contendendam putent: promissionesque si, quicumque entis spei fuerit, nunquam fore, ut eos possint. cot.

DE
EMENDATIONE
S C H O L A R V M
PER
LV T H E R V M 1801. N.
Opus. Philolog. 272

eis inualuit, ad alliciendos illa homines, per spem breuior-
 ris sumtus comparata, magis in dies laborabunt, nisi ca-
 vestur. Sed absit euentus ominus a terris nostris, re-
 deatque doctorum copia, quæ superioribus temporibus
 fuit: vt, cum pater noster, ex lege et conditione, qua
 ei delata erat Fomstadiensis tum Dioeceseos Ephoria, do-
 ctoris honores Vitebergæ cepit, vnaque B. Deylingius
 et octo alii, omnes e terris nostris. Iuuenes autem, qui
 se studiis sacris addirere, hortamur, vt sibi hos honores
 animo proponant, atque eos sibi orani ingenii studii que
 vi et impetu contendendum putent: promittimusque iis,
 quicumque exitus spei fuerit, nunquam fore, vt eos poe-
 niteat. cet.

DE
EMENDATIONE
S C H O L A R V M
PER
L V T H E R V M 1535
Opus. Philolog. 223

THE
FIVE
SIN
OF THE
FIVE
SIN

DE
EMENDATIONE
S C H O L A R V M
PER
L V T H E R V M

Instat dies festus nobis, *Cuius optimi atque carissimi*, coeptae in his terris sacrorum emendationis, et Lutheri, viri diuini, memoria. Eam ut pro dignitate et beneficii diuini, ea re nobis tributi, et Lutheri, cuius opera in hoc beneficio nobis parando usus est Deus, celebremus, faciendum est, ut eius in ecclesiam atque etiam rempublicam merita, eorumque magnitudinem cognoscamus, praesertim ea, quae habent cum illis bonis coniunctionem. In horum autem numero hoc etiam ponendum est, quod eo auctore scholae sunt per omnes Germaniae urbes institutae, in quibus iuuentus et ad religionis verae cognitionem, et ad artium liberalium, inprimisque linguarum veterum, latinae, graecae et hebraicae scientiam accuratam per idoneos magistros adduceretur, scripta ad magistratus urbicos luculenta epistola, qua eius rei necessitatem et utilitatem demonstraret, et opiniones refelleret eorum, qui linguarum illarum studium contemnerent. Etenim erant tum multi, in quorum ore essent sermones, quales hodie saepe cum dolore audimus: Quid opus est linguarum studio ac scientia? res curemus, non verba: res e libris Germanicis, ipsius religionis scientia e versione librorum sacrorum germanica disci et germanice doceri possunt. Hos ille sermo-

nes

nes in illa epistola grauiſſe reprehendit atque reſellit. Scio, reſpondet, *Germanos eſſe bruta et feras beſtias, vt et ab vicinis populis iure meritoque appellamur.* Tum vero praeclare demonſtrat, tantam eſſe linguarum cum religione vera, et cum republica coniunctionem, vt ſine iis nec illa conſeruari incorrupta, nec haec bene admiſiſtrari poſſit. Itaque quam carum nobis Euangelium ſit, et reipublicae felicitas, tam caras nobis eſſe debere linguas et earum ſcientiam, quarum etiam cum ſtudijs reſtitutum eſſe Euangelium terris noſtris: vt non dubitandum ſit, quin, cum iis etiam paulatim peritura ſit eius vera et accurata cognitio, et priſtinae tenebrae ignorantiae, ſuperſtitionis et barbariae rediturae; defuturis ſcil. qui libros ſacros bene interpretentur, et doctrinam inde recte hauſtam bene tradere aliis, et artes reipublicae bene gerendae calleant, et exercere poſſint, in quo ſcientia linguarum plurimum proſit. Haec mira multis vereor ne videantur, atque etiam falſa: ſed omnia veriſſime dicta eſſe, facile doceri poteſt.

Et de hebraicae quidem linguae cognoscendae neceſſitate, non eſt, ſpero, qui dubitet: at de graecae et latinae dubitant multi; fruſtra tamen et imperite. Socrates dicebat, vt eſt apud Platonem et Xenophontem, vſum rationis vnde vſu ſermonis, et eum eius facultate augeri. Id ſi ita eſt, intelligitur, linguam quamque hoc plus ad acutendum ingenium valere, vt eſt ipſa melior, hoc eſt, ad accurate exprimendos ſenſus animi aptior et elegantior. Cum igitur graeca et latina in hoc ceteris omnibus ſint meliores, quis de earum praecipua vtilitate ad ingenia fingenda et acuenda dubitare poſſit. Viderunt hoc olim Romani, quorum lingua etſi a graeca orta eſſet et multa bona haberet: tamen cum intelligerent, eam abeſſe a linguae graecae perfectione, quam ei et ingenium Graecorum excellentius, et philoſophi oratoresque praecelſi addidiſſent, ad eam diſcendam filios ſuos adduxere: et quicumque cuperent reipublicae gerendae ſe applicare, ii in Graeciam abierunt, vt linguam graecam accuratius diſcerent, in ſcholis philoſophorum et rhetorum,

teram, atque audiendis eorum oratoribus; itemque eorum libris assidue legendis; qua via et Ciceronem ad summam eloquentiam peruenisse constat. Cum vero exorti essent, qui Romae artem dicendi lingua vernacula docerent. Rhetores latini dicti, adeo non probarunt eam rem viri sapientes, ut eos etiam Edicto ex urbe emouerent, ne eloquentiae verae obessent: nec tam quisquam dixit: quid opus est libris graecis, cum nos non graece sed latine dicamus, quod profecto risissent omnes: cur ergo et nos non rideamus nostros, cum negant latina lingua nostris hominibus, in his doctoribus publicis religionis opus esse, cum his non latine, sed germanice ad populum dicendum sit.

Illud vero pluribus magis admirandum, atque adeo ridendum videatur, quod Lutherus linguarum illarum scientiam cum reipublicae administratione coniungat, praesertim cum hodie in rebus publicis nihil latine scribatur. Sed hi linguarum illarum usum tantum ad dicendum referunt. Lutherus autem plus vidit sine dubio in vsuearum. Ac primum quis nescit, in republica gerenda multa saepe scribenda esse, leges, constitutiones, decreta, pacta et alia: in quibus opus est facultate res accurate conceptas mente, ita accurate enunciare verbis, ut nihil obscuritatis aut ambiguitatis insit, vnde pravae interpretationes, et calumniae nasci possint, saepe multum incommoditatis allaturae etiam reipublicae. Id vero quam difficile sit, intelligunt omnes, qui in eo genere aliquem usum habent. Vere Cicero dixit, non semper, qui res bene cogitet, easdem bene oratione exprimere posse. Vnde autem melius eius rei facultatem comparare sibi poterit, qui ad rem publicam accedere in animo habeat, quam linguae graecae et latinae scientia e libris antiquis graecis et latinis legendo hausta et exercitatione scribendi et loquendi ad illorum *ἀνεξέβητος* dirigenda. Tum vero artium civilium scientia et prudentia politica vnde rectius petetur, quam e libris veteribus graecis et latinis, scriptis illis a viris politicis, et diu in republica gerenda versatis, qui consulto libros suos, praesertim historicos, ita scripserunt, ut lecto-

lectores suos ad res bene gerendas pace belloque praepararent: vnde pragmatici dicti sunt, velut Thucydides, qui primus historiae pragmaticae exemplum proposuit, Xenophon, Polybius, Liuius, Tacitus et alii. Sed quis hos bene et cum fructu legere potest, si linguae graecae et latinae scientia accurata careat. Atque satis constat, seculo Lutheri, et paullo post fuisse viros doctos, qui in hoc genere literarum excellerent, in his primo *Philippum Melancthonem* et *Ioach. Camerarium*, vt etiam saepe a Principibus, Philippus in primis ab Augusto Electore, in rebus maximis ad rempublicam pertinentibus consulerebatur, et ab iis laudem prudentissimorum consiliorum ferrent, cum magna inuidia eorum, qui proprie in republica administranda versarentur, sibiue et dignitati suae et ordini suo officere putabant, si magistris graecis et latinis hoc tribueretur.

Quod si ea, quae Lutherus commendandis literis graecis et latinis, et veterum linguarum studiis scripsit, vera sunt, habuitne illa eius epistola hanc vim apud Magistratus Germaniae, quam debebat, Lutherusque sperabat? Habuit sane; omnibus in vrribus enim ab eo inde tempore scholae, quales volebat, institutae sunt, et bonis magistris, fere e disciplina *Melancthonis* et *Camerarii*, regendae traditae, vnde literae illae coeperunt feliciter per Germaniam et in primis his nostris in terris efflorescere; eaque felicitas Germaniae per totum illud seculum durauit, atque hinc etiam cum vicinis regionibus communicata est. In fine seculi imminuta est per inimicos *Melancthonis* et *Camerarii*, idque malum per totum paene seculum sequens durauit: sed mansere tamen reliquiae quaedam recti de literis sensus earumque studii, vt illae tandem velut ad vitam redirent, praesertim in nostra Academia, vnde illa coepit esse mansitque seminarium bonorum magistrorum Academicorum et scholasticorum in omni genere doctrinae, vnde alii eos peterent, cum iis opus esset.

Sed hoc tantum bonum patriae per Lutherum paratum vt conseruetur, omni modo laborandum est, primum a magistrati-

gistratibus curatoribusque Scholarum publicarum, magistris legendis, qui linguarum idonea scientia sint instructi; curandoque, vt eas recte ac diligenter doceant; deinde ab iis, qui tum in minoribus, tum in maioribus vniuersarum artium, doctrinarum et literarum scholis doctorum munus sustinent. Commendemus discipulis assidue studium linguarum et verbis et factis, vt ex ipsa docendi ratione pretium et vsum linguarum in quocunque genere artis ac doctrinae intelligant, et ea re ad earum studium incitentur. Caueamus, ne vel ipsi vel alii, inprimis parentes puerorum, fallacibus scholarum realium, Philanthropinorum, (immo Misanthropinorum) nominibus decipiantur, quae fere a contemptu linguarum veterum et quaestus studio originem duxere; et omni modo resistamus iis, qui eas vel ipsi propter ignorantiam contemnunt, vel earum negligentiam inducere student. Ita nos dignos Lutheri discipulos, et imitatores praestabimus, et veterem tum patriae, tum Academiae nostrae gloriam tuebimur.

Vos vero, iuuenes optimi atque carissimi, qui in hac Academia studia doctrinarum tractatis, si huc instructi linguarum doctorum scientia venistis, sperate felicem in omni genere doctrinae successum. Bergerus Ictus Vitebergensis, olim clarissimus, post in Consilio Imperii Germanici aulico Vindobonae Consiliarius perillustis, solebat dicere, vt narrare audiui B. Wernsdorfium: qui scientiam linguae latinae et graecae in Academiam attulerit, is, ad quodcunque genus se doctrinae contulerit, in eo bene proficiet, et bene doctus ex Academia discedet: qui earum rudis venerit, is nihil efficiet (*der wird sein Lebetage ein Stümper bleiben*). At nolite studium illud linguarum remittere aut abicere, sed continue assidue. Habetis vos, qui ad theologiam vos contulistis, auctorem illius studii Lutherum, dignum sane quem sequamini et imitemini, tum omnes primum inter veteres Ecclesiae doctores et recentiores, qui post Lutherum inclaruerunt, quorum libros dignos lectu ne quidem intelligere, sine linguarum, inprimis latinae, scientia poteritis. Vos autem, qui

quisus discere institutis Romanum vetus, quomodo intelligere sine multis literis latinis poteritis, cum totum e libris latinis hauriatur: et videtis, omnes, qui iuris veteris scientia clauerunt, *Pithoei, Cuiatii, Gothofredi*, et alii, quam fuerint versati in libris veterum scriptorum graecorum et latinorum, et ad illam tantam scientiam et nominis gloriam maxime linguarum veterum cognitione eccellente peruenisse. De medicae artis studiofis quid dicam? Primum hodie fere consentiunt doctores artis medicae clarissimi cum Boerha-
vio, Hippocratem esse optimam medicae doctrinae autorem, et omnis recentioris aetatis claros doctores eius artis e graecis medicis profecisse, omninoque multos ex iis, literis graecis multum studii tribuisse: estque haec laus medici ordinis, quod in eo permulti etiam de graecis literis bene meruerint. Quam multi porro fuere, qui linguam latinam adeo praeclare callerent, vt etiam in scribendo se praeclaros Ciceronis et Celsi imitatores praestarent. Quid enim elegantius oratione *Fracastorii* et *Fernelii*, quem cum legere coepi, Ciceronis librum aliquem mihi legere visus sum, vt alios taceam. Horum igitur talium virorum exemplum imitami, si et ad scientiam doctrinae vestrae praeclaram et gloriam nominis peruenire cupiatis.

Haec si vobis persuaderi sinitis, credetis etiam, magnum beneficium a Deo per Lutherum etiam per hoc eius de scholis et linguis veteribus meritum esse tributum; et bene vos ac pio facturos, si solemnia illa sacra pridie Kal. Nou. futura obieritis animo pio et grato, nec modo ea, quae in aliis templis peragentur, sed etiam ea, quae in aede Paullina ab hora XII fient: inter quae etiam audietis orationem eruditam et disertam *Henr. Christiani Gehe*, Dresd. A. M. et ad aedem D. Petri Catecheticae, de insigni bono libertatis verae in causis religionis iudicandis, per Lutherum nobis restituta. Ita ergo facite ac bene valete.



DE
VOC. KATAΛΥΜΑ ET ΑΥΛΗ
AD LVC. II, 7.

Ernesti Opuscul. Theol.

P p

THE UNIVERSITY OF CHICAGO

DE
VOC. ΚΑΤΑΛΥΜΑ ET ΑΥΛΗ

AD LVC. II, 7.

Est hoc insitum animo ac sensu nostro, ut ait Cicero de Legg. II, 2. ut delectemur locis iis, in quibus sunt eorum, quos diligimus et admiramur, vestigia, ubi nati et educati sunt, ubi vitam egere, res magnas fecere, etiam ubi sepulti sunt. Itaque Atticus ibi dicit, se, Athenis cum esset, non tam magnificis operibus illius urbis delectari, quam recordatione summorum virorum, ubi quisque habitare, ubi sedere, ubi disputare sit solitus, studiosque se etiam sepulcra eorum contemplari. In hoc tali sensu humano, non est mirandum, veteres Christianos frequentasse loca ea, ubi Christi Seruatoris veluti vestigia se putarent spectare, locum inprimis natalem, sepulcrum et alia. Sed in iis saepe famam et opinionem incertam sequebantur, ut in eo, in quo Christus recens natus a matre repositus fuisset, quem, quia in narratione Lucae praesepis mentio fit, in stabulo pecorum, nostris simili, aut, quae multorum antiquorum traditio est, in spelunca saxea, Bethlehemo propinqua, ponebant, ad eamque opinionem torquebant Lucae narrationem, quos et recentiores plerique sunt secuti; v. *Grotium* ad Luc. II, 7. et *Casaub.* Exerc. Baron. II, 1. seqq. et alia librorum sacrorum loca; quae nos et rem ipsam ex antiquitate incorrupta cognitam, breuiter explicare tentabimus.

Incipiamus ab loco, in quo Iosephus et Maria versabantur, cum natalis Iesu Christi dies aderat. Lucas *κατάλυμα* vocat: in quo non, ut vulgo fit, deuersorium, simile nostris, intelligendum, promiscuis illis, et omni peregrinanti patentibus: qua opinione decepti veteres

P p 2

quidam

quidam id deuersorium extra urbem posuere, ut scilicet propinquum esset speluncis extra oppidum, in quarum vna, ut stabulo pecoris, hospitium infantis Iesu collocarent: veterum opinionem etiam recentiores quidam viri docti sunt secuti. Talia deuersoria tum non erant, omnium minime in oppidulo, quale Bethlehemum erat; post forte frequentia Christianorum eo venientium visendi causa, locum tali deuersorio struendo fecit, quod post pro eo habitum est, in quo Christus natus, et vicina spelunca pro stabulo, in quo repositus fuisset. Sed peregrinantes tum deuersabantur apud cognatos, quos ibi plures habuisse Iosephum et Mariam e familia Davidis credibile est, etiam amicos, a quibus hospitio recipiebantur, in cuius rei facilitate etiam virtus ponebatur, saepe illa et in sacris litteris commendata. Atque tale hospitium *κατάλυμα* est apud Lucam, intelligendaque vel tota domus hospitis, vel pars ea, cuius usus peregrino est concessus, ut *Marc. XIV, 14*. vbi de trielinio dicitur, quod ad agendas epulas paschales petebatur. Sed infanti recens nato Iesu cum locus quaereretur, vbi reponi curarique posset, vel propter multitudinem hospitem eodem hospitio utentium, vel propter angustias eius partis, quae parentum vsum erat concessa, non reperiebatur. Qua re coacti sunt, locum ei extra tectum quaerere, in vestibuloque, in quo Domini pecora stabant et supellex rustica, quae est Graece *αὐλή*, ut *Io. X, 1*. seqq. (v. *Perizon.* ad Aelian. V. H. III, 4) lat. *cohors*, eratque cincta area illa septo e cratibus ligneis, quo fures accerentur, veteres latini *herstium* dicebant, quod *cieri* dicebatur, cum diuiderentur greges heredibus, idem post de hereditate vniuersa dictum, quod priscis temporibus Latinorum res familiaris fere in pecore erat.

Atque si rem ita intelligimus, facilius etiam intelligi potest, quomodo pastores quaerentes infantem repererint. Nam in vulgari modo intelligendi, difficultas est non parua ex eo, quod et locus, vbi infantem diuinum
quae.

quaererent, parum definitus erat, et reperiendi facultas vix relinquebatur. Si in stabulo, nostris simili, cincto parietibus et tecto, atque adeo tenebricoso, aut spelunca quaerendus erat infans, unde initium quaerendi facerent, quando finis quaerendi futurus erat. Quodsi vero eo, quo diximus modo res intelligenda est, pastores, vias oppidi percurrentes, facile per septa cohortium e cratibus videre licebat, vbi ad praesepia essent homines aliquid agentes, atque ita ingredi in aulam, percunctarique, quinam essent, et quid agerent, cognoscere ac reperire, quod quaererent.

An vero, dicat aliquis, credibile est, parentes Iesu ausos esse, infantem vix natum, ac tenerrimum adhuc, in loco reponere patente et subduali, vbi aëri, noctu diuque expositus esset, et eius iniuriis, frigore et pluuiâ facile violari posset? Sed nihil tale erat in ea re timendum. Nam infans erat aduersus hæc bene munitus pannis, quibus inuolutus a matre erat; nec erat tempestas frigida; quippe et oues et pastores earum noctu sub dio poterant agere. Atque etiam tecta esse super praesepibus solebant, ad pluuiam arcendam a pecore, eiusque generis praesepe potuit delectum esse a Iosepho et matre prouida. Quis vero dubitet, illum locum, aulae longe salubriorem fuisse infanti, quam speluncam, in qua vulgaris opinio eum reponit, tenebricosam et stercoreis foetore plenam.

Denique etiam non diuturnam fuisse illam infantis in praesepi commorationem, probabile est. Nam census ille in oppido tam paruo, vbi praesto essent omnes et parati ad nominum professionem tum edendam, tum accipiendam, diuturnus esse non potuit: quo exacto, cum non cunctarentur aduenae domum abire, locus iam amplior fuit parentibus infantis in hospitio suo, vt comode eum secum in aedibus habere et curam eius agere e propinquq possent, donec, exacto legitimo tempore, Hierosolyma deportari et in templo sacra legitima fieri possent.

Iam nemo dubitet, maxima laetitia pastores fuisse adfectos, cum infantem illum diuinum, in quo esset ille diu expectatissimus populo vniuerso Seruator Messias, reperissent, et oculos eius adpectu possent pascere: erat ea tanta, tamque viuida, vt pectore premi non posset, sed per omnem occasionem erumperet, et cum popularibus obuiis communicaretur, ad quos omnes hanc laetitiam pertinere ex Angelo audierant.

Enimuero illud tantum bonum, quod per diuinum illum infantem de coelo demissum erat, etiam ad nos pertinet, et eius aduentus laetissimus etiam nobis per diuinos nuntios innotuit: nec minori laetitia animos nostros replevit, quam pastorum Iudaicorum, et si eum non oculis cernimus, vt illi, si modo eum animo diligenter contuendo aditum eius diuinæ perfectioni in animos nostros aperiamus. Videamus, quanta sit benignitas diuina, quæ salutis nostræ causa filium de coelo demiserit, quanta filii ipsius, qui hoc tam graue negotium salutis nostræ per dolores acerbissimos atque mortem reparandæ suscepit, sapientiam denique Dei, quæ tam digno se consilio in illo benignitatis suæ opere sit usus; profecto laetabimur Dei benignitate et filio eius ad salutis nostræ opus perficiendum humana natura induto, et in laudes vtriusque toto pectore effundemur. His talibus piis cogitationibus alendis materiam proximis diebus festis, memoriae nati Messiae sacris, doctores Ecclesiæ nostræ orationibus suis suppeditabunt. Ad eas igitur audiendas, et cantibus sacris beneficium tantum celebrandum congregemur in templis ciuitatis nostræ: sed etiam propria Academiae Sacra in aede Paullina die illorum sacrorum prima hor. XII. frequentes conueniamus, inter quæ audiemus Viri doctissimi *Io. Frid. Hilscheri*, A. M. orationem disertam, qua Iesum Christum non modo Iudæis, sed etiam gentilibus natum demonstrans nos ad laudes benignitatis diuinæ prædicandas excitabit. cet.

AD

AD

PHILIPP. II, 6-11.

PP 4

• • • • •

• • •

AD

PHILIPP. II, 6-11.

Vidimus adhuc Iesum Christum, Servatorem nostrum ac Dominum, oppressum aerumnis et contumeliis ac cruciatibus, denique ad mortem raptum contumeliosissimam: nunc adest dies lactissima, qua ab omnibus istis malis liberatus ad vitam reuocatus est, et redire coepit ad personae suae dignitatem et gloriam, quae ei a patre diuino destinata erat pro illo opere, cuius perficiendi causa ab eo in hanc terram erat missus, ut genus humanum obedientia sua ab illa pernicie liberaret, quam ei peccata contraxerant: quod opus erat eiusmodi, ut a nemine, nisi ab ipso, perfici posset, ut qui solus et facere et perferre posset, quibus agendis et tolerandis pernicies illa depelli et salus hominibus restitui posset. Atque hoc est illud, quod Paulus Apostolus I. C. docuit Philippenses, C. II, v. 6-11. quem locum nobis hoc tempore explicandum summus, quod in eo explicando non consentiunt viri docti.

Apostolus volebat Philippensibus concordiam fundere, cuius fontem demonstrabat esse modestiam et studium aliis bene consulendi; in quo exemplo Iesu Christi utebatur, cuius sensum eos assumere volebat. Nam eum fuisse ἐν μορφῇ Θεοῦ, id est, conditionis diuinæ, et tamen ad conditionem seruilem se demisisse, ut salutem humanam restitueret. Ita puto optime verti illud ἐν μορφῇ Θεοῦ, quod alii permulti capiunt de ipsa diuinitate, et maiestatis diuinæ vel possessione vel usu. Et negari non potest, eum, qui sit ἐν μορφῇ Θεοῦ, habere diuinam naturam: nam mox ei substituitur τὸ εἶναι ἵσα Θεῷ. Sed mox est ἐν μορφῇ δούλου, quæ non potest aliud esse, quam conditio seruilis, quæ est humillima et vitima vitæ humanæ, ut Cicero ait Offic. I, 13. conditio. Ergo cum Iesus Christus esset conditione diuina, haberetque vim et maiestatem diuinam, ἔχ ἀεπαγμὸν ἠγάτατο illam conditionem, in quo non magis consentiunt interpretes. Maximam veri speciem habet sententia Lamberti Bosii, qui intelligit in Exerc. Philol. ad N. T. non facile esse putabat illo tanto bono potiri et uti. Nam Græci dicunt ἔχ ἀεπαγμα τὸ πρᾶγμα, hoc sensu, res non facilis est, ut quilibet sibi arrogare possit aut comparare. Sed malim iam vertere non raptum iuit illam tantam maiestatem, τὸ εἶναι ἵσα Θεῷ, i. e. non festinauit cupide ad illius tantæ rei usum: nam sic rapere hæreditatem dicuntur, qui nimis cupide ad usum bonorum hæreditate acceptorum festinant et ruunt, et Tacitus imperator factus dicitur a Vopisco non raptum iuisse imperium, qui ciuiliber et modestè imperare coepisset, liber ab omni insolentia et superbia. Atque hic sensus bene conuenit sequentibus; nam dicitur Iesus κενῶσαι ἑαυτὸν, in quo non minus hæcisse interpretes reperiuntur, quod etymologiam verbi tenerent, cum deberent potius hebraici verbi, quod ei respondet, פָּרַךְ usum sequi, secundum quem κενῶσαι ἑαυτὸν est extenuare se in quocunque genere. Sed

Sed quod h. l. genus intelligendum sit, tota oratio docet, nempe idem est, quod mox *ἠταπείνωσεν*, quomodo accepit Dionysius Alexandrinus in Epistola contra Paullum Samosatenum, ubi coniunxit utrumque verbum *κενώσας καὶ ταπεινῶσας ἑαυτὸν ἵως θανάτου*. Similiter *ἄνδρες κενοὶ* sunt *tenuēs, pauperes, humiles*, qui Hebraeis sunt *עֲנָוִים*: ut Iudic. XI, 3. dicuntur cum Iephtha exiisse *עֲנָוִים עֲנָוִים*, quod αὖ ὁ vertere *ἄνδρες κενοὶ*, ubi tamen ed. Aldi et alii libri habent *λετοί*. Vnde fit, ut *ἐκένωσεν ἑαυτὸν* optime vertatur, *sed depressit semetipsum*, sc. ad servilem conditionem et humilitatem, *μορφῇ θύλης λαβὼν*, et hominibus aliis similis factus in omni genere humilitatis, ac tenuitatis: *ἠταπείνωσεν ἑαυτὸν*, *depressit se*, inquam, obedientem se praebens eo usque, ut et mortem subiret, et eam quidem contumeliosissimam in cruce, quod est supplicium servile. Quid ergo? non poenituit Iesum huius tantae humilitatis? nequaquam, imo vero habuit ea fontem vberimum et perpetuum et dignitatis summae, et laudis ac gloriae. Nam Deus pater hanc humilitatem in celsitudinem convertit, eamque summam et maximam, qua maior cogitari non posset, quippe ei hoc datum fuit a Deo, ut ab omnibus naturis intelligentibus adoraretur: qua celsior conditio et maiestas esse aut cogitari non potest. Est enim divina, omni alia maior illa et sublatior: itaque sibi eam Deus vindicat soli Es. 45, 23. *mihī omnia genera flectantur*.

Haec igitur est illa *ὑψώσις*, exaltatio, quae humilitatem I. C. consecuta est, in quam se ipse demiserat ex consilio Patris, ut illud opus perficeret, cuius perficiendi causa homo factus erat. Eius autem initium factum est per reditum eius in vitam, cuius laetam memoriam hoc tempore celebramus. Et quanta sit in ea materia laetitiae, quis potest cogitando ac dicendo assequi?
Etenim

Etenim quis non videt, hæc re veritatem religionis et doctrinae Christianae maxime firmari, atque cum ea spem nostram salutis omnem, quae tolleretur penitus, si Iesus in illa humilitate mortuus mansisset, nec dicta die in vitam se restituisset, ut praedixerat esse futurum. Omne refugium nostrum in malis et periculis est apud Iesum exaltatum et ad dextram patris sedentem. Ille solus potest opem ferre vi sua et deprecando pro nobis apud patrem. Id autem periret totum, nisi rediit in vitam et exaltatus viueret paratus ad res nostras curandas, et nos tuendos: nunc vero salua sunt nobis omnia, et in omni genere necessitatum nostrarum patet nobis perfugium apud exaltatum Dominum nostrum ac seruatorem Iesum Christum, ubi certa cum spe auxilium quaerere possumus.

Enim vero, cum Apostolus totum hoc de Christi humilitate exempli causa attulerit, ut eo commoti Christiani Philippeneses imitarentur Christi modestiam, nonne id fauet eorum opinioni, qui in Iesu Christi passionibus, non satisfactionem pro peccatis humanis agnoscunt, sed tantum exemplum patientiae et obedientiae putant esse propositum generi humano, quod sibi imitandum ducerent, qui salutem consequi per Christum vellent? Longe abest. Nam utrumque potest esse coniunctum, nec alterum altero tollitur. Et passiones quidem Iesu Christi ad satisfaciendum Deo pro peccatis humanis spectasse, ita planum fieri potest multis librorum diuinorum testimoniis, ut id negari nullo modo possit. Quomodo enim v. c. peccata humana suscepisse ac tulisse dici posset, nisi poenas eorum subiisset, quibus luendis satisfecit legibus earumque auctori: id autem quomodo ab eo factum dicemus, nisi illis malis sustinendis, quae cum in ista humilitate inuaserunt. Sed cum illas poenas innocens tulerit, nihil ille tale meritus,

meritus, quis non agnoscat etiam exemplum patientiae et obedientiae et aliarum virtutum, idque sibi imitandum putet. Atque in utroque agnoscendum est magnum beneficium Christi, qui nos non modo a peccatorum culpa et poenis liberandos duxit, sed etiam a peccatis ipsis, alliciendo nos exemplo suo ad veram virtutem, qua nos ipsi similes fieremus. Quod enim exemplum maiorem in ea re vim habere possit, quam ipsius, qui tantum pro salute nostra fecit, ac passus est, et cui animos gratos pro tanto beneficio praestare debemus: quod facile intelligitur non posse melius fieri et ad eius gratiam ineundam aptius et efficacius, quam si eius exemplum sequamur, et ei imitatione virtutum eius similes fieri studeamus: in quo ipsa bona voluntas valere ad placendum potest, quod in ea est argumentum amoris, qui non potest ei displicere, sed potius mouet, ad iuuandos nos in illò imitationis studio, praesertim cum ei non ignota sit imbecillitas nostra in recte faciendo, cupiatque nos in rebus honestis sibi similes fieri, sicut ipse nobis in humilitate nostra similis factus est.

Quod si igitur hos dies festos recte ac pie peragere velimus, animi nostri toti occupandi sint utriusque generis cogitatione assidua, primum vt magnitudinem beneficii a I. C. nobis tributi per illam demissionem e conditione diuina ad humilitatem humanam, atque adeo seruilem cogitemus ac ponderemus, vt expiare peccata nostra posset; deinde vero exempli ab eo nobis propositi excellentiam contueamur, et contuendo ad amemus, iisque cogitationibus ad laudes diuini seruatoris excitemur et ad imitationis studium. Sic ergo animis nostris comparatis, atque his sensibus repletis adeamus sacra publica, in his et illa, quae die primo paschali in aede Paullina hora duodecima fient, inter quae etiam
oratio-

2 10 100 1000 10000

100000 1000000 10000000

100000000

DE
T E S T I M O N I O S P. S.
QVOD NON SIT IN VERBIS, SED
IN REBVS.

Cum omnia opera diuina habeant impressa signa diuinae originis, non potest dubitari, id etiam cadere in libros diuinos, per quos hominibus ratio salutis consequendae patefacta est, et maiestas diuina magis quam toto visibili mundo illustrata. Itaque permulti Theologi in illis signis obseruandis et demonstrandis illustrandisque diligenter laborarunt. Sed in iis principatum tribuerunt ei, quod in testimonio Spiritus Sancti posuerunt, ad quod cetera omnia redeant in mente humana mouenda ad auctoritatem librorum illorum diuinam agnoscendam. In quo etiam necessitatis ratio habetur. Nam si ea per argumenta subtiliter tractata modo cognoscenda esset, quando cognosceret plebs ac puerilis aetas? quae difficultas sublata est, cum sapientiae et benignitati placuerit, eius persuasionis opus Spiritui Sancto permittere, et eius testimonio diuino, quo nihil ad persuaden-

Ernesti Opusc. Theol.

Qq

den-

dendum efficacius intelligi possit. Ergo sicut olim doctrinae Iesu Christi Spiritus Sanctus testimonium perhibuit veritatis et diuinæ auctoritatis, eoque modo maximum numerum hominum ad fidem Christi adduxit, sic et postea omni tempore verbo diuino se testem veritatis coelestis exhibuit atque etiam nunc exhibet in animis hominum, vt de ea nihil dubitationis relinquatur. Sed hoc testimonium Spiritus Sancti multis recentiori aetate displicuit, qui omnia ratione humana mirentur, et per eam solam et eius argumenta diuinitatem librorum sacrorum cognosci ac demonstrari vellent; ex quo genere fuere Socinus, Limborchius, Episcopus, Curcellaeus et alii, qui in signis diuinæ originis et auctoritatis librorum sacrorum omisere, aut etiam impugnauerunt et ei vim persuadendi negauerunt. Quo magis consentaneum videtur, ei succurrere, et ei vim suam et dignitatem vindicare.

Testimonium autem illud Spiritus Sancti non intelligimus, quod sit in verbis, sed in rebus, non dicentis, libros hos esse diuinæ originis et auctoritatis, sed agentis in hominum animis, per eos libros lectos vel auditos, et eos sensus motusque scientis, qui diuinitatem eorum, quae legerint vel audierint, ita manifeste arguant, vt dubitationis nihil relinquatur, sitque manifestum, eam vim esse humana maiorem, et Deo ipsi tribuendam. Nec vero dicimus, eo testimonio aduersarios librorum sacrorum refutari, aut eorum diuinitatem, vt argumento, demonstrari ad persuadendum posse: nam Christianorum hominum persuasionem non per sensum nostrum efficere ac demonstrare veritatem possumus, vel excitari vel confirmari ita, vt in promptu sit, illos sensus non esse humano modo natos, sed originem coelestem habere: quo tollitur Limborchii ratio, qui Theol. Christ. I, 4, 17. in

in circulum incidere putabat eos, qui testimonio hoc Spiritus Sancti vtantur. Nam, id esse a Spiritu Sancto, dicere, e scripturis cognosci: quod secus esse, ex iis, quae diximus, patet. Non porro hoc testimonium sapit Enthufiasmum. Nam eos sensus ac motus, quos diximus, et in quibus testimonium Spiritus Sancti ponimus, Spiritus Sanctus efficit per verbum Dei, cognitum, et cogitatum animo. In quo actio quidem ratio intelligi debet, quod sine ratione testimonium in nobis existere non posset, sed in sentiendo nihil agit ratio aut intelligentia, sed tantum recipit sensum ab actione Spiritus per verbum. Werenfelsius in Disp. de triplici teste de verbo Dei S. III. ita defendit sententiam de testimonio Spiritus S. aduersus eos, qui in ea circulum esse, et aliquid fanatici dicunt, vt eam sententiam exprimere dicat certam mentis dispositionem et *διάθεσιν* a Deo et Spiritu Sancto acceptam, per quam plena et firma de scripturae sacrae diuinitate persuasio existat; atque ad hanc dispositionem consequendam pertinere preces, quibus rogemus Deum, vt oculos nobis aperiat et cor aperiat mentemque illuminet atque ita disponat ac praeparet, vt, quae in ea diuina sint, animaduertamus, iis ita, vt par est, moueamur, atque ita de libri huius diuinitate magis magisque persuadeamur. Sed ea dispositio ac praeparatio non est ipsum testimonium Spiritus Sancti, sed id praecedit, et locum facit illis sensibus ac motibus animi, in quibus nos illud posuimus. Hi autem nascuntur illi quidem ex notis diuinitatis, quae Scripturae diuinitus impressae sunt, vnde argumenta, quae proprie dicuntur, deriuantur, sed non solis iis, verum etiam ex aliis rebus. Nam non omnia signa interna rerum sunt eadem argumenta talia, etsi eorum vim habent. Hoc qui-

Qq 2

dem

dem testimonium Spiritus Sancti maiorem habet omnibus argumentis, quibus in docendo diuinitatem librorum sacrorum demonstrare solemus. Sed id totum est ab actione Spiritus Sancti in mente humana per verbum Dei praelens ei et pie cogitatum. Atque huius talis testimonii exempla perspicua in ipsis libris sacris occurrunt, in quibus inprimis insigne est id, quod Act. III. est, vbi post effusionem Spiritus Sancti in Christianos congregatos, cum Petrus Apostolus ex eo, quod acciderat, demonstraret, Iesum esse Christum Dominum, eo sensu tacti sunt, qui aderant, v. 37. vti non possent non agnoscere veritatem, et multa millia ad fidem Christianam accederent.

Quod quidam, in his Limborchius, dicunt, Spiritum Sanctum dari iis, qui iam credant, et quibus sit de diuinitate Scripturae Sacrae iam persuasum, id etsi verum est, tamen ea res non tollit testimonium hoc Spiritus, quod et ad iam credentes pertinet, et ad eos, qui nondum eo perducti sunt, vt eo venire, et deinde dona Spiritus Sancti maiora accipere possint, et qui Spiritus S. bonum opus in hominibus perficit, idem etiam incipit, Phil. I, 6. Homines illi, qui a Senatu Hierosolymitano missi erant, vt Iesum caperent et captum ad eum adducerent, nondum credebant in Iesum, sed cum eum docentem audirent, ita commoti sunt eius oratione, vt eius diuinitatem non possent non agnoscere, dicerentque, neminem vnquam hominem sic esse locutum, itaque se non sustinuisse ei manus iniicere. Io. VII, 37. Hunc sensum illi acceperant haud dubie a Spiritu Sancto per verbum Christi in iis operante: a quibus initiis an ad perfectionem fidei peruenerint, non traditum est a Ioanne: nec est tamen improbabile, in quibusdam
saltem

saltem eorum, Deum opus coeptum paulatim absoluisse et iis veram fidem in Christum contulisse per Spiritum suum, nec adeo bonum illud initium irritum fieri fuisse.

Est igitur beneficium huius testimonii ad cognoscendam diuinam verbi originem et inde aditum rependiendi ad fidem et eius *πληροφορίαν* assequendi omnibus commune, qui verbum audiendo aut legendo cognoscunt, eoque nomine praedicanda benignitas diuina singularis in curanda omnium fide et salute, quae est, vt apparet, in hac re tanta, vt etiam fidem hominum superet. Etsi autem ex propositis exemplis patet, homines in hac re benignitate diuina saepe praeueniri, cum iis contingat non cogitantibus: tamen non ignorari debet officium, quod in ea re obseruari debet ab iis, qui se Christianos dicunt, et libros sacros diuinæ originis et auctoritatis esse profitentur, vt, quoties illos libros attingant, iisque vti velint religionis causa, precibus adeant Deum, vt id testimonium vim in animo suo perhibeat, et nos ea re vel ad fidem perducatur, vel eam corroboret, et ad sanctitatem efficacissimam efficiat, auxilio Spiritus sui, testimonium verbo suo perhibentis.

Sed huius officii communis opportunitas dabitur diebus festis instantibus, quibus memoria effusi in Christianos Spiritus Sancti religiose celebranda venit. Admirabile opus illud benignitatis et sapientiae diuinæ fuit, per quod religioni Christianae primus in omnem terram aditus factus est, cum fama eius exiret per incredibilem multitudinem Iudaeorum, qui spectatores eius operis ac testes fuerant, in omnes populos, inter quos illi sedes habebant, et vnde ad sacra Hierosolymitana celebranda venerant. Id igitur opus et eius praestantiam

tiam diligenter consideremus, et laudibus piis extollemus per hos festos dies, tum domi et priuatim, tum publice in aedibus sacris, tum caeteris tum Paullina, feria prima hora duodecima, in qua et audiemus accommodatam ei rei orationem Viri doctissimi *Christiani Gottlieb Hundii*, Artium Magistri, *de testimonio Spiritus Sancti pro veritate religionis Christianae omnium certissimo, cet.*

DE
NECESSITATE
REVELATIONIS DIVINAE
A D V E R S V S E O S
Q V I E I V S C O G N I T I O N E M
R A T I O N I H U M A N A E A S S E R T V M E V N T.

Q94

THE
JOURNAL
OF
THE
ROYAL ANTHROPOLOGICAL INSTITUTE
OF GREAT BRITAIN AND IRELAND
VOLUME 40 PART 1 1910

DE
NECESSITATE
REVELATIONIS DIVINAE
A D V E R S V S E O S,
QVI EIVS COGNITIONEM RATIONI
HVMANAE ASSERTVM EVNT.

Cum ita accidisset, *Friderico Schultzi*, vir maxime re-
uerendus, ut quodam affinitatis vinculo inter nos
iungeremur: coepi, cum primum Tecum esse, Tecum-
que loqui mihi contigisset, id quod factum scis esse tum,
cum scholae Portensis disciplina contineret; coepi igi-
tur, non dubiis signis, magnum Tuum quendam erga
me singularemque amorem perspicere. Is cum esset
mihi per se, uti debebat esse doctissimi hominis amor,
iucundus, tum vero erat hoc iucundior, quod mihi vi-
debar intelligere, id quod a Te postea memini audire,
eum non magis affinitati tribui, quam incredibili discen-
di cupiditati, et ingenio, quod Tu siue audieras, siue,
quod mihi propius fidem videtur, ipse, amanter magis,
quam vere, iudicaras, posse, nisi voluntas mihi studium-
que defuisset, aliquando, ad quamcunque se literarum
partem dedisset, in ea longe procedere. Postea, quam-
quam multi intercesserunt anni, cum Tuo in me amori
usus defuit, a quo vel maxime amorem ali scimus ac su-
sultentari: tamen nihil ea res apud Te valuit ad amorem
eum, quem semel suscepisses, deponendum. Itaque,
ut primum mihi reddita est consuetudinis Tuae facultas
aliqua, ita ex vultu Tuo, omnibusque Tuis et dictis et
Qq 5 factis,

factis, amor in me Tuus eminuit, ut facile intelligerem, nihil esse de superiori illo amore Tuo detractum. Sed, cum in illo primo post tantum interuallum congressu, tum, quotiescunque postea vna fuimus, plurimum nobis meministi iucundissimumque sermonem de communibus literis, de Philosophia et Theologia fuisse, magnamque saepe diei partem disputando esse suauiter absumentam. In quo illud me maxime delectabat, quod sine cupiditate disputabamus, eodemque vultu dissentiebamus inter nos, cedebamus etiam interdum et vincebamus, quo consentiebamur: ut facile intelligi posset, non tam suae quemque, ut sit, opinionis, sed veritatis causam agere, honestioremque nobis veritatis agnitionem in victo, quam vincentis in disputando errorem videri. Itaque tam iucunda mihi est harum disputationum nostrarum sermonumque memoria, ut iampridem, quod Tu, quoniam prae me tuli, non ignoras, constituerim, eorum quoddam quasi monumentum, libello ad Te perscripto, ponere; ut non solum disputationum nostrarum, sed etiam amicitiae memoriam testatam relinquerem. Atque huius mei consilii perficiendi opportunos monitores habui et communes nostros, et Tibi proprios amicos, qui honores Theologiae Academicos Tibi sunt gratulati: quorum ad me cum perlata essent carmina, hoc potissimum tempus Tuum mihi ad perficienda destinata sumendum ratus sum, quod non modo amicitiae nostrae, et sermonum nostrorum, sed etiam honoris Tibi a Theologis Vitebergensibus tributi memoriae accommodatum videbam. Itaque nihil mihi fuit potius, quam ut locum aliquem communibus literis deligerem, de quo perscribere ad Te, quantum et ingenium et tempus pateretur, possem. De quo dum cogito, subit animum eius sermonis recordatio, quem superiori aestate Tecum habui, cum ita dicerem: quae sapientissimi veterum Philosophi de summo bono disputauiissent, ea non esse comparanda cum his, quae nobis de eadem re sacrorum librorum auctores primi, quantum,

tum, omnem veterem memoriam repetens, potuissem inuenire, tradidissent, eosque esse solos, qui in boni summi sede rem eiusmodi reposuissent, qua intelligens et immortalis natura, cum summa voluptate, per infinita secula, sine villo eius perdendae periculo, et sine satietate, perfrui posset. Is locus erat memoriter depromptus ex commentariolis nostris, in quibus quasdam disputatiunculas, sed inchoatas eas adhuc et rudes, habemus, quibus impietatem, cum omnium eorum, qui omnem, praeter naturalem, religionem tollunt, tum in primis Tindalii, hominis acutissime impii, conuellere cogitamus. Nam, cum primae disputationes versentur in eo, vt, quatione plerique in hoc impietatis genere conuincendo vtantur, eam mihi non satis probari doceam, necessario etiam attingenda fuit ea ratio, quae ex historia philosophica arcessitur, cum ita disputant, multa esse de moribus a sacris scriptoribus diuine praecepta, tanquam de inimicis amandis, quae veteribus philosophis cognita non fuissent. Atqui certis testimoniis me sciebam posse demonstrare, nihil esse ex eo, de quo tradunt, genere, quod non et in veterum philosophorum praeceptis reperiatur. Sed idem etiam videbam, esse alia, et ex eodem de morum praeceptis, et ex diuerso genere, si quis hac ratione vellet vti, quae a veterum philosophorum intelligentia abfuissent, cum nunc in sacris libris tradita teneamus. Atque in his erat etiam illud de summo bono, in quo loco cum omnium propemodum veterum philosophorum et ingenium et oratio maxime consumpta sit, nemo tamen repertus est, qui verum ad finem bonorum aditum muniisset. Ex eodem genere disputatiuncularum nostrarum est etiam ea, qua ostendimus, quod multi se putent argumentis ex humano ingenio repetitis necessitatem reuelationis alicuius diuinae, vt Theologorum verbo vtamur, demonstrare posse, id longe a vero alienum iudicandum esse. Atque huius disputationis summam Tibi, Vir summe Reuerende, hic breuiter exponendam statui: non, quod

quod eam omnium maxime dignam eruditione Tua putem, sed quod eius hanc quoque vim spero fore, ut eorum hominum superbia aliqua ex parte retundatur, qui ita se ἀποδεικτικούς arbitrantur, ut nihil sit, cuius se certam et mathematicam rationem afferre posse desperent, et hac demonstrandi scientia subnixi, et ἀποδεικτικὸν Φύσσημα φυσῶντες incedunt.

Sit igitur nobis propositum hoc, ut quaeramus in uniuersum, *utrum necessitatem reuelationis alicuius ratio humana possit assequi, nec ne?* Nam argumenta omnia, quibus vsi sunt, aut uti solent hi, qui id fieri posse putant, commemorare, dialecticeque refellere, et nimis longum foret, nec est instituti nostri. Neque adeo, si verum velimus dicere, opus est ista disputatione. Nam si vicerimus, rem esse eiusmodi, ut per ipsas dialecticas praeceptiones, rerumque naturam fieri non possit; quid opus erit, in singulis eorum, qui aliter sentiunt, angustis et contortis ratiunculis dissoluendis frustra orationem consumere? Atque illud quidem longe a me abest, ut dubitem, quin et ad veritatem religionis Christianae confirmandam certissimum, et ad naturalis religionis iactatores Christianaeque contemptores reprimendos efficacissimum disputandi genus foret, quod a necessitate reuelationis ex ipsa ratione humana cognoscenda duceretur, si posset ad dialectica praecepta exactum probari. Sed non omnia fieri possunt, quae, si fierent, salutaria forent. Quod autem, si fieri posset, ad consilium nostrum opportunum esset, id propterea existimare, etiam fieri posse, et hoc persuasum ire, id est profecto philosophi non docentis, sed optantis, hoc est, valde pusilli et minuti. Est hoc profecto verum, et ad hanc nostram quoque causam pertinet id, quod saepe ex doctissimis hominibus audiui, cum dicerent: qui causam religionis Christianae, contra impios homines, agendam susciperent, optimam illos quidem causam agere; sed quando plerique, aut non satis cognita causa, aut ab ingenii literarumque idonea facultate

tate et copia destituti, ad causam accederent, neque susceptum onus sustinere possent, verendum esse, ne bonae causae, tanquam mali caussidici, et rauci de fori fece clamatores, obsessent, acutisque aduersariis causa cecidisse putarentur: ex quo fieri, vt, quae res ad impietatem eorum debellandam comparata fuisset, haec ad eam confirmandam conuerteretur. Sed habet fortasse etiam in his quasi Phaëthontibus locum illud Graecorum:

μεγάλως ἀπολισθαίνειν, ἀμάρτην' εὐγυνίς,
eorumque institutum Tu, aequissimi Vir animi, e consilio magis, quam euentu, spectandum putas.

Verum antequam in ipsam aciem veniat oratio, seruet militarem morem lente ingrediendi, vt ab ipso ingressu, et in consistendo locumque obtinendo firmitatem, et in currendo vim et celeritatem, sumat. Itaque, cum omnis, quae via et ratione progreditur disputatio, a definitionum initiis proficiscatur; ab iisdem exordiis eam procedere iubeamus. Haec autem, quod Tu, Doctissime Schulzi, qui multum et temporis et studii in philosophorum scholis consumsisti, non ignoras, haec ergo omnis rei, quam *necessariam* recte velimus dicere, vis esse debet, vt aliter esse non possit: quod, qui enucleatius subtiliusque explicant, ita interpretantur, vt dicant, necessitatis vim hoc obtinere, cuius contrarium repugnet. Necessarii autem duas formas faciunt: alteram eius, cuius contrarium per se sibi repugnet ipsum; quod fieri dicunt tum, cum ex ipsa definitione eius repugnantia perspicui possit; cuius generis sunt omnia, quae absolute et simpliciter *ἀδύνατα* putantur: alteram autem formam necessarii dicunt esse eius, cuius contrarium cum adiunctione demum aut conditione quadam repugnet, qua remota, possibile iudicetur: tamquam, cum necessarium esse dicimus, vt Deus id faciat, quod optimum esse intelligat.

Iam facile intelligis, qui de *necessitate reuelationis* demonstranda disputent, non de illa absoluta necessitate, sed de altera illa, quae est cum conditione, intelligi vel-
le.

le. Faciunt autem adiunctionem duplicem, neque praeter has duas alia esse potest. Nam primo adiungunt proprietates diuinas, tamquam bonitatem sapientiamque: deinde naturae humanae eam, qua nunc laborat, corruptionem. Ex quibus adiunctionibus duplex huius, de reuelationis necessitate, placiti interpretatio intelligitur: quarum altera haec est: *Vtrum diuinae bonitati, sapientiae, aliisque perfectionibus repugnet, si quis nullam esse reuelationem dicat, eaque repugnantia ingenii humani viribus intelligi possit, nec ne?* altera autem haec: *Vtrum humanae naturae, eiusque, quae nunc est, conditioni repugnet, nec ne, si quis dicat, nullam esse reuelationem, et posse tamen hominem post mortem felicem fieri; et, num eam rem definire humana ratio possit: siue: an possint philosophicis argumentis vinci haec duo: animus humanus post mortem beatus esse potest: nulla est reuelatio: repugnare, et simul consistere non posse.* Explicauimus vnam partem quaestionis, veniamus ad alteram.

Reuelatio, quam ex graeco (ἀποκάλυψις) dicimus, in vniuersum est omnis a Deo ipso, nullo humani ingenii interuentu, tradita rerum quarumcunque scientia. Sed interdum arctius eius verbi vim cohibent: atque id faciunt duobus modis. Nam primo dicunt, reuelationem esse parum rerum omnium, quas suis mens humana viribus assequi non potuisset, ex quo genere etiam res futurae sunt: deinde vero, rationis et viae felicitatem aeternam consequendi, et eius quidem eiusmodi, quae sit ab ea, quam ratio humana tradit, hoc est, a lege naturali, diuersa. Iam, qui de necessitate reuelationis disputant, scis Doctissime Schulzi, omnem disputationem ad hoc postremum genus referre. Ex quo nobis exoritur interpretatio quaestionis propositae haec: *An possit certis, et iis quidem e philosophia sola repetitis, argumentis, demonstrari, primo, repugnare diuinis perfectionibus, si quis nullam a Deo viam felicitatis aeternae obtinendae traditam hominibus dicat, quae sit ab ea, quam ratio humana tradit,*

tradit, diuersa: deinde, fieri non posse, ut beatus homo post mortem fiat, nisi ei noua ratio felicitatis post mortem consequendas a Deo tradatur. Atque hanc nostram interpretationem vides esse eiusmodi, vt primo in ea nihil possit dialectica subtilitas reprehendere: deinde vt eius auctores habeamus omnes eos, qui necessitatem reuelationis defendunt: ex quibus vel vnum I. A. Turretinum, Theologum nuper Geneuensem longe doctissimum et clarissimum, sufficit nominasse. Nunc, cum satis constituta sit causa, vt, de quo concertetur, plane appareat, sitque adeo tamquam in aciem, et intra iactum teli ventum, age commissio fiat, videamusque, cuius

- mage sit penetrabile telum.

Qui necessitatem reuelationis e diuina natura repetunt, primo haec sumunt: Esse homines eo consilio a Deo effectos, vt sint in omnem aeternitatem beati: sapientis autem et beneficae naturae diuinae esse etiam, eius felicitatis, quam hominibus destinari, consequendae certam rationem ostendere, et tamquam praesidia suppeditare: In hac porro naturae humanae corruptione legem naturalem non esse idoneam felicitatis perpetuae consequendae rationem. His tamquam hastis sumtis, sic contorquent, rationemque concludunt: Si Deus, in hac naturae humanae corruptione, non aperuit hominibus nouam ad felicitatem viam, efficitur, vt aut deserit homines felices velle, aut non possit felices efficere. Atqui ea est primo diuina et vis et sapientia, vt possit, deinde tanta bonitas, vt velit: est ergo absurdum et falsum id, quod ponebatur. Ex quo necessario consequens est, vt sit aliqua reuelatio, quae nouam et a naturali lege diuersam felicitatis rationem demonstret.

Iam ex tribus illis, quae sumuntur, primum et secundum reprehendi non potest. In tertio autem, quis non videt, alteram quaestionis partem parum subtiliter adhiberi. Quis enim tibi philosophus, siue ignarus reuelationis diuinae, siue contemptor, hoc, quamquam verissimum,

mum, dabit, naturam humanam esse corruptam, et legem naturae non satis idoneam felicitatis rationem tradere? sed sumamus hoc iam ita esse, quando nihil magnopere ad primam hanc certaminis partem refert, et ad alteram partem de ea re disputationem differamus. Vere igitur potest conclusum hoc paullo subtilior Dialecticus arbitrari? Non profecto. Ne ego quidem, qui haec non subtilissima illa Dialecticorum ratione iudico, sed prope modum populari trutina pendo. Mihi vero valde anguste videntur humiliterque de naturae diuinæ vi et perfectionibus opinari, qui hac concludendi ratione, non modo in hac quaestione, sed in aliis etiam vtuntur, magnamque impudentiae suscipere notam, qui in hac ingenii humani infirmitate et his angustiis, quid sit sapientiae bonitatisque diuinæ consentaneum, et quo usque progrediatur in administratione rerum humanarum, audent definire, similisque imperitis de infimo popello mulierculis esse, quae, quid regi iusto et aequo et prudenti faciendum sit, decernunt. Quid vero? nonne summa atque infinita Dei est bonitas? Est profecto. Quis negat? Verum idem, qui illud scio, hoc quoque didici, quam nos infinitam esse bonitatem diuinam recte dicimus, eius tamen certis finibus circumscriptos effectus esse. Quomodo? vt, quod limites nullos habebat, id limitibus cohibeatur? Minime vero: nam id fieri non potest. Quomodo igitur? Nempe, non capiunt angustiae naturae humanae; aut vllius rei naturalis, immensam bonitatis diuinæ vim et amplitudinem. Nemo est, in cuius quasi sinu omnis ille infinitus bonitatis diuinæ tamquam Oceanus effunderi se possit. Neque id per se modo fieri non potest, sed etiam propterea, quod infinitae bonitati diuinæ comes adiuncta est sapientia non minor, cuius tamquam consilii et decretis bonitas gubernatur et coercetur. Haec est dispensatrix beneficiorum diuinorum: haec ab illo bonitatis diuinæ fonte flumina et riuos, per omne vniuersum, ad omnia Dei opera, certis iustisque legibus et men-

menfuris, pro fua cuiusque capacitate, diducit. Quid igitur faciunt, qui, quorum progrediatur bonitas diuina, definiunt, qui dicere fufinent: huc vel illuc bonitas diuina patet; hoc Deus falua fapientia iuftitiaque facere potest; hoc Deus, fi bonus elle velit, faciat neceffe eft: quid, inquam, faciunt, nifi vt fibi illam ipfam diuinam et infinitam fapientiam arrogant, cuius folius eft, ifta definire: quod quid aliud eft, nifi impudenti conatu coelum petere, et fe in Dei fede reponere?

Eft hoc profecto veriffimum, quod dicam, omnibusque cum philofophis, tum theologis tenendum in primis: Elle nobis quidem per fe et in vniuerfum cognitas naturae diuinae perfectiones, et vel natura auctore nos fcire, quae fit bonitatis, potentiae, fapientiae, iuftitiaeque vis et ratio: fed eisdem nos elle ignaros maxime et hebetes, ac prope dicam caecos, cum hoc agitur, vt, quo vfque ei fit in quaque re procedendum, conftituatur, et quibus tamquam limitibus eius fe in fingulis cauffis debeat continere. Nulla eft in hac noftra confiliorum diuinorum ignorantia fallacior concludendi ratio, quam haec, cum dicunt: Hoc ita factum eft, aut fiet, quia Deus ita facere pro bonitate et fapientia debuit, aut debet. Saepe enim videtur Deus facere debuiffe, aut debere, quod neque faciet, neque fecit. Itaque vehementer mirari foleo, qui fiat, vt philofophi, qui vel maxime acuti videri velint, in pluribus rebus vtantur hac concludione, quae aut a bonitate aut fapientia diuina ducitur: tamquam in Idealiftarum opinione refellenda, qui nullum elle corpus, nullam materiam, arbitrantur; quam nonnulli hoc vno fe conuincere poffe putant, fi eam bonitati et fapientiae diuinae repugnare dicant. Frequenter vfus eft eadem ratione in placitis fuis confirmandis etiam *Leibnitius*, et qui eius feftam fequuntur; vt mirum non fit, fi ea concoquere non poffunt, qui huius concludionis vim magnam elle negant. Omnino, fi huic rationi aditum in philofophiam aut theologiam dederimus,

Ernefti Opufc. Theol.

Rr

nemo

nemo erit philosophaster aut theologaster tam ieiunus et pusillus, qui non sit ita Deum in sua potestate et sibi obnoxium habiturus, ut eum ad omnia, quaecunque velit, facienda et constituenda possit hac conclusiuncula, *tamquam machina aliqua*, adigere. Erit aliquis, qui *volet* aeternas improborum sceleratorumque poenas certis temporum finibus cohibere? Nihil facilius erit, quam cum Origenianis iustitiam diuinam in ordinem cogere, et bonam poenarum illarum partem, tamquam Tenedica securi, praescindere. Quid enim? si Deus nullum poenarum illarum finem faceret, efficeretur, ut aut non posset, aut non vellet, miseris hominibus, operibus suis, quos felices esse vult, felicitatem reddere. Sed est ea ipsius potentia, ut possit, ea autem bonitas, ut velit homines omnes felices reddere: absurdum igitur est et falsum id, quod sumebatur. Atque huius nos cantilenae odio ita defatigabunt et enecabunt, ut nos cito sit poenitentia huius facilitatis nostrae subitura: nisi forte inconstantiam eorum volemus imitari, qui rationem eandem in alia causa admittunt, in alia repudiant; quo nihil indignius philosopho cogitari potest. Neque enim, ut vere ait *Cicero*, tam ex singulis sententiis philosophi spectandi sunt, quam ex perpetuitate et constantia.

Age vero, si quis esset, qui, sumto hoc, esse naturam humanam corruptam, nec posse solius rationis viribus ad aeternam felicitatem adspirare, ipsa illa sapientia diuina contra eos, quibuscum nobis certamen est, pugnaret: quid esset, quod ei posset ratio humana respondere? Quid enim? Nonne fateamur necesse est, bonitatem diuinam sapientia temperari? Atque hac temperatione iustitiam diuinam contineri? iustitiae autem hanc vim esse, ut suum cuique tribuat? Quid vero est suum cuiusque in hoc genere morum, nisi, quod ex hominis cuiusque actionibus, aut naturali quadam necessitate, aut constitutione quacunque legislatoris, consequitur? Quare ergo ratione philosophus, nisi ad ipsam reuelationem confugiat,

fugiat, reprimere potest eum, qui sic disputat: Deus in prima rerum institutione rectum hominem innocentemque fecit: dedit ei legem naturalem, cuius luce collustratus, viribusque adiutus, ad felicitatem certa spe contenderet: sed sua se sponte et sua culpa corrumpi passus est: non est illa opportunitate data vsus: lumen illud naturale ignauia, secordia, verbo, culpa sua, passus est obscurari ac paene extinguui. Si igitur Deus est iustus, ut est profecto, ea omnia consequi permittet, quae naturalis quaedam consequitio affert, neque vlla ratio eam potest adigere, ut nouam felicitatis consequendae viam hominibus aperiat. In magno beneficio esset ponendum, si faceret: sed quae potest idonea ratio asserri, qua eum commotum id facere diceremus? Iustitiae hic, non bonitati locus est: suae sunt ignauiae homines et improbitati, suis tenebris suisque vitiis ac poenis relinquendi. Ita enim demum Deus faciet id, quod est Iustitiae, hoc est, suum hominibus tribuet. Ac ne insolens Tibi, Vir Doctissime, haec ratio, aut non probata doctis hominibus videatur; redi mecum in memoriam, et cogita, quae Theologi nostri contra *Caluini* familiam in eo loco disputant, quem de gratia vniuersali Theologi in arte sua appetant. Nempe inter ea, quae Lutheranae formulae Theologis, cum fructus mortis Christi ad omnes omnino homines pertinere contendunt, ab ea secta opponuntur, etiam hoc esse scis, cum dicunt, sententiae ipsorum aduersari vel maxime hoc, quod barbaris in America nationibus doctrina Christiana aut nunquam tradita sit, aut cum perdita esset, non restituta. Quid hic Theologi nostri? Nonne ad vnum omnes pugnant, *) neque bonitatem, neque aequitatem diuinam hanc Deo necessitatem imponere, ut, quod semel traditum barbari non retinissent, sed sua culpa perdidissent, id ipsis restituat? Quae autem in hac causa valet ratio, eam in nostra quoque valere sinamus, fateamurque, verum esse illud *Bulfi*

R r 2

fingeri,

*) vid. *Hulsem.* de Auxil. Graeciae p. 149.

*fingeri, in subtili illo de origine mali libro: *)* *Tale quid non postulandum quidem est, sed accipiendum, si offeratur.*

Sed illa, quam frangere cœpimus, conclusio, non modo a bonitate et aequitate diuina ducebatur, verum etiam a potentia. Nam ex eo, quod ponebatur, nullam nouam felicitatis consequendae rationem esse a Deo traditam corruptis hominibus, cœgi dicebatur hoc, ut aut non posset Deus id facere, aut nollet. Sed neque posse, neque non posse, quia sit et summa bonitate, et summa potentia. Iam, de bonitate, vicimus, consequens non esse: restat, ut de potentia doceamus: in quo breuior erit disputatio. Nam si vel maxime concedat philosophus, Deum facere posse, quod sumitur: nihil tamen ea res ad quaestionem propositam pertinet, quae non tam, quid possit, quam quid velit debeatque facere, quaerit. Deus omnia potest facere, inquit mihi aliquis huius necessitatis defensor. Credo; quis negat? Nempe te etiam subtilem Dialecticum et regem Galliae poterat facere, si voluisset. Neque tamen philosophum acutiores paullo tam facilem fore in ea re concedenda puto: non, quo quem putem tam impudentem esse, qui infinitam Deo potentiam ereptam velit; sed quod in omni disputatione de eo, quid Deus possit efficere, illud imprimis quaeritur, vtrum ea res, de qua sermo est, sit natura sua eiusmodi, ut fieri possit. Nam *aduersaria*, id quod inter omnes constat, non cadunt in potentiam diuinam. Quid ergo? si rationi diuino lumine non collustratae tota res de via ad felicitatem ea, quae sit a lege naturae diuersa, *aduersaria* videatur: poteritne tibi hoc concedere, ut Deus hominibus eiusmodi aliquam viam possit aperire? Sed de hoc quid philosophos ratio statuere iubeat, in altera disputationis parte videbimus: ad quam mihi nunc velim, Doctissime *Schulzi*, animum refferas.

Eam

*) pag. 449.

¶ Eam autem interfectam suspensam in hoc vertice
videmus; possitne philosophice demonstrari, ad felici-
tatem aeternam pertinendam non sufficere legem natura-
lem; sed nova aliqua ratione opus esse, quae obseptum
et interclusum ad illam felicitatem aditum nobis rechi-
dat. Iam, uti ego Te acumenque novi Tuum, duabus
rebus totum hoc, de quo disputabimus, contineri videa-
sursum nempe, quibuscum nobis res est, primo, huma-
num genus a sua integritate descivisse, et omnium vitio-
rum femina in animis humanis, tanquam foecundo quo-
dam agro, sparsa esse: deinde, hanc ipsam ob causam
eo reductum esse hominem, ut leges naturae, quibus ser-
vandis ante, quam corrupti homines essent, omnis feli-
citatæ consequendae ratio continebatur, servare non
possit, etique adeo novis felicitatis comparandae praesi-
diis opus esse: quae quia non a natura humana arcessi
possunt, necessarium esse, ut divinitus hominibus tra-
dantur. Haec quin vera sint, non profecto sum is, qui
dubitem. Res est ergo confecta? Minime vero. Nem-
pe haec ego libris divinis edoctus scio, planeque credo.
Illi autem, quibuscum mihi iam est contentio, ingenio
se suo et ratione assecutos iactant. In quo ego, credo
etiam Tu, Vir Doctissime, vehementer ab iis dissentis.
Atque ut dicam in uniuersum, quid de his hominibus
sentiam, simillimi videntur mihi esse iis, qui, ingenii
gloriam vanitate quadam animi captantes, se *αὐτοδίδα-
κτοι* crepant, cum nihil sit, quod non aliunde hause-
rint. Nam profecto, nisi haec e libris sacris didicis-
sent, nunquam iis in mentem venissent.

Sed ut de utroque dicam separatim: unde tandem
hoc colligit ratio, genus humanum olim ab omnibus er-
roribus vitiisque liberum fuisse, a suaque integritate de-
fecisse? Si ita accidit, ut accidit profecto, res est ex eo
genere, quod in facto ponitur. Et mihi praeclari Dia-
lectici *αὐτοδιδῆν* eius iactant? Ego vero ex Aristotele,
summo omnis *αὐτοδιδῆν* magistro, ad quem omnes, qui

hodie eiusdem praecepta literis tradiderunt, tirones et propemodum infantes iudicandi sunt, ab hoc igitur Aristotele didici, rerum fortuitarum, quae in facto sunt, nullam esse *αἰσθησίν*, sed rerum tantum necessariorum. Nulla alia hic, nisi testimoniorum auctoritate, opus est. Atque ea nulla sunt, praeter ea, quae libris sacris continentur. Est igitur hoc totum ex his, non ab humano ingenio, sumtum ac repetitum. At sua, quisque conscientia et sensu naturam corruptam esse cognoscit. O! totum plumbeum! Hottcine nos sentire? Acutum vero sensum, qui, quae in sensus non cadunt, percipiat! Nempe hoc est illud, quod plerisque in causis rerum explicandis accidit, ut nobis iudicium suum de rerum sensibilibus causis, pro ipsis causis sensu perceptis, venditent. Sensi me ab ultima pueritia facilius praece fecisse, quam recte: quae recte fecerim, antequam mihi in quoque genere consuetudinem comparassem, minus suauiter fecisse, quam quae male: consuetudinem recte faciendi tardius difficiliusque venire, quam praece agendi: consuetudinem rerum bonarum facilius abiici, quam rerum malarum: haec, inquam, et sensi saepe et sentio. Nihil amplius? Nihil, si me recte noui. Vnde autem illa in rectis tarditas, in prauis facilitas sit, qua sit, causa culpaue exorta, nec sensi vnquam, nec sentio. Video mali fontes, sed non ratione ad eos adductus, verum auctoritate diuina compulsum. Nisi me diuina lux cellustrasset, causamque mali mihi quaerenti demonstrasset, non aliter de tota hac re statuerem, quam vnus aliquis ex acutissimis veterum philosophis, in primis summus auctor *Plato*. Humanam naturam ita ferre existimarem, neque aliam vnquam fuisse, aut esse potuisse, Deumque, ut omnes res, ita et homines bonos fecisse *κατὰ τὴν φύσιν*, ut est in *Timaeo Platonis*, hoc est, quemadmodum interpretatur *Cicero*, quoad natura pateretur. Itaque, si qui meliorem olim hominum conditionem fuisse dicerent, mihi viderentur, idem facere, quod illa

de

de fabula testudo. Nam, cum adhuc loquerentur bestiae, ferunt testudinem, cum celeritatem ceruorum, canum, equorum, leporum in currendo, auiumque in volando, vidisset, ita coepisse de tarditate sua statuere, vt diceret, necesse esse, vt olim genus suum celeritate lepores atque ceruos aequarit, et culpa aliqua sua ab huius possessione boni deiectum sit et deturbatum.

Quodsi vero nemo potest hoc, vel mediocris Dialecticus, concedere, vt ingenii animique eae, quibus culpa sua laborat humanitas, infirmitates possint ratione, vnde sint, intelligi: quid fiet alteri, quod totum est ex hac sumtione aptum et nexum; cum dicunt, ex eo, quod corrupta sit humana natura, consequens esse, auctore ratione, vt lex naturae non amplius valeat ad felicem hominem reddendum? Sublato enim eo, quod ponebatur, id quod ei adiungitur, etsi falsum nondum conuincitur, tamen, nisi aliunde confirmes, verum esse vix vincas, Quid autem asserre ingenium philosophi potest, ex quo possit hoc, de quo quaeritur, cogi? Nonne omnia potius philosophia decet, ex quibus totum hoc de noua aliqua et diuersa a naturae lege ad felicitatem via alienum a ratione esse videatur. Quid enim? ii, qui docent, et necessitate mathematica contendunt effici, vt ab vna lege naturae sit felicitatis consequendae ratio arcessenda, vt haec ratio ita immutabilis sit, vt ne diuinae quidem voluntati in eam vlla vis sit, vt repugnet rationi naturae, que et essentiae humanae, cuius tanquam fundamentis erecta lex naturae consistat, huic ergo vt repugnet, aliam felicitatis consequendae rationem cogitari: hi, inquam, mihi persuasum cupiunt, se ratione doceri, esse aliquam necessario a Deo traditam ad beatitatem viam, quae a lege naturae differat? Qui haec consistere posse contendat, eum ego prope, aut parum acutum valdeque hebetem iudicem, qui tantam rerum repugnantiam non videat, aut, si ita essem vel illiberalis, vt suspicionibus indulgere, vel ieiunus et pusillus, vt inuidiam facere cuiquam possem,

fem, in re seria et longe maxima ludere velle arbitror. Sed bene habet: nihil horum in quemquam confero. Scio quid cupiditas possit, et quas tenebras in bonis etiam rebus studium offundat. Huic ergo tribuamus, quicquid hic parum subtiliter et parum constanter dicitur, et omnem hanc inconstantiam consilii bonitati concedamus.

Sed hic nobis exoritur aliud genus eorum, qui ita hanc disputationem instituunt, ut necessitatem revelationis ab alio tamquam fonte deducant. Horum summa disputatio in eo vertitur, ut dicant, primo, neminem esse, quin necesse habeat fateri, multa esse a se commissa, quibus legum naturalium sanctitas sit violata, sibi que non satis esse ad eas perfecte seruandas virium. Deinde hanc earum legum vim esse, ut contra se facta iis poenis vindicent, quae naturaliter sint peccatis adiuncta, et necessitate quadam consequantur. His duobus constitutis, effici dicunt, ut homini necessaria sit diuinitus demonstrata ratio, qua possit primo, imbecillitati suae succurrere, et quod naturae desit, supplere; deinde, malis illis necessario consecuturis mederi, atque ita etiam illos morfus lenire, quibus improborum animi exeduntur, beatusque fieri. Nam, si natura hanc tanquam medicinam velit facere, necessarium esse, ut, quod factum est, et infectum efficiat, et ex animi conscientia memoriaque funditus tollat: quorum neutrum posse fieri sciamus. Haec omnia si vere dici negem, amens sim. Sed hoc nunc non quaeritur: verum illud, ex quibus haec fontibus hausta sint atque libata. Nempe ego diuinitus ea nobis praecepta esse, et e sacris theologorumque libris repetita contendendo: illi autem ea se a ratione doceri pugnant: quod mihi verum non videtur: non, quo rationis me poeniteat, aut ea contemnenda et criminanda velim apud certos homines crescere: sed, quod arbitror etiam atque etiam cauendum, ne limites rationis humanae iniuste proferantur, et omnibus interdictis veterem theologorum possessionem defendendam, ex cuius magna parte eos philosophi

lophi quidam nunc defectum eunt. Est suapte natura magnifica et superba ratio. Demus ei hunc in theologorum fines aditum: quam se immoderate iactabit, quam per omnem theologorum fundum cum illa sua contortularum et vibrantium conclusiuncularum caterua volitabit!

Videt igitur hoc ratio, neminem posse legibus naturalibus seruandis, hoc est, virtutis pietatisque aduersus Deum studio, beatum fieri, quia nemo sit, quin ab iis interdum aberret, qui summam virtutem et omnibus numeris modisque absolutam consequatur? Mirum profecto, quod per tot secula non viderit, id eam nunc repente, tanquam depressa cataracta, videre. Sed videat sane. Credam: modo, quoniam non ex ipsa audio, verum ex iis, qui se cum hac Egeria assiduos iactant congressus habere, et omnium arcanorum eius arbitri et spectatores volunt videri, modo, inquam, iidem mihi auctoribus idoneis probare possint, rationem vnquam ad felicitatem virtutem perfectam omnibus numeris postulasse: quod valde vereor, vt faciant. Fuit hoc quondam Stoicum, omnia peccata esse paria, eosque, qui natura doctrinaque longe ad virtutem processissent, nisi eam plane consecuti essent, summe esse miseros, neque inter eorum vitam, et improbissimorum, quidquam omnino interesse: vt *Socrates*, si stoice sapiens non fuerit, nihilo melius, quam quiuis improbissimus, nec beatius vixerit. Nempe, sumto illo de peccatis paribus, alterum necessario consequitur. Quid igitur? haec cuiquam potuerunt Stoici probare? Nemini, nisi qui ad eorum auctoritatem ita se contulisset, vt, quae Zeno dixisset, non, quia vera esse idoneis rationibus cognouisset, sed quia dixisset, certa esse crederet. Nam ceteri philosophi, et ii quidem, qui maxime subtiles et elegantes putantur, Platonici et Peripatetici, totam eam rationem vehementer repudiarunt. Itaque etiam Cicero libro quarto de Finibus bonorum et malorum eam sententiam sensui communi repugnare dicit, et hoc nomine ridendam putat.

Sed, agamus pressius. Ac primo quidem, quod suae sibi imbecillitatis conscius quisque videt, non posse se legibus divinis plane satisfacere, sed in multis errare ac labi; iam in superioribus vicimus, rationem non posse veram eius rei causam perspicere, sed omnem hanc imbecillitatem ad necessitatem naturae referre. Quod si est: quomodo potest existimare, sibi aliqua divinitus demonstrata ratione opus esse, quae imbecillitati illi medeatur, hoc est, quae naturam humanam tollat, eique aliam substituat: quod rationi *adversus* videatur necesse est. Libri sacri hoc nos docent, qui iidem causam huius imbecillitatis non ad humanam naturam et essentiam referunt, sed vitio, et culpa humana contractam ostendunt. Iam, quae contra leges divinas acta sunt, in iis aut infirmitas nostra leuiter lapsa est, aut improbitas grauius deliquit. In quo non potest non intelligi, vtrique generi valde diversas esse poenas constitutas, neque eandem vim vtrumque genus ad felicitatem turbendam habere. Quid ergo de illis statuet ratio, quae leuia sunt, errore aliquo, aut ignorantia, aut alia infirmitate quadam, admissa? Nonne, quemadmodum de voluptate *Epicurus* dicebat, quae minimae sint voluptates, eas, quia valde parvae sint, non apparere, sed obscurari et obrui: sic ipsa in iis peccatis, propter eorum exiguitatem, obscurationem consequi dicet, ut non magis aliquem miserum possint, quam *Croesus* demti aliquot diuitiis eius oboli pauperem, efficere? Quid? Deum, legum suarum custodem et vindicem, nonne putabit, quoniam summa sit aequitate, et ita cum hominibus, ut pater cum liberis, comparetur, totum hoc genus imbecillitati ac necessitati naturae remittere? In grauius autem delictis ac sceleribus, neque hoc postulabit, ut infecta fiant, neque tanquam de Lethaeis aquis bibere iubebit: quorum neutrum ne diuina quidem sacris literis consignata auctoritas desiderat: sed primo iubebit vitia superioris vitae virtutibus emendare, et ita maculas susceptas eluere; deinde, quoniam conse-

cutiones

cutiōnes scelerum et vitiorum plane tolli posse et obrui diffidet, felicitatis quosdam quasi gradus et classes faciet; ut, quemadmodum diuitis nomen non est vni pecuniae summae assignatum, sed in plures ac diuersas numerum summas cadit, sic felicitatis nomen faciat commune pluribus, diuersa virtute ac merito. Ita fiet, ut quos classicos esse in felicitatis censura non sinet, quintae tamen classi annumeret, aut, capite cenfos quidem, sed ciues tamen, haberi patiatur. Ita veteres philosophi statuerunt, quibus nulla alia, nisi rationis lux, affulserat: ita et nos omnes iudicaremus, nisi nouum nos sacrarum literarum lumen collustrasset.

Quid ergo? rationi, hoc est, naturali philosophiae repugnat et contraria est auctoritas diuina? Vti interpretabere illam repugnantiam, ita respondebo. Si quæris hoc: Num libri sacri tollant aliquod rationis placitum eiusmodi, quod sit simpliciter et per se verum? multum abest, ut concedam. Nam id fieri non potest. Sin hoc: Num diuina auctoritas discrepare possit ab auctoritate rationis, in iis rebus, quæ cum adiunctione verae sunt, hoc est, posita aliqua, quemadmodum philosophi loquuntur, hypothesi? facile concesserim. Tamquam hæc, de quibus disputatio est, vera sunt rationis iudicio placita: sed sumto hoc: infirmitatem illam hominum esse eis non culpa aliqua aut vitio cuiusquam, sed naturae necessitate propriam, et ab essentia humana ne cogitatione quidem seiungi posse. Id autem aliter ratio iudicare non potest, quia eius in rebus intelligibilibus et necessariis est omnis dominatio: quæ autem facta sunt, ipsa assequi per se non potest, sed testimoniis idoneis est docenda. In hoc ergo cum ratione potest sacrarum literarum auctoritas pugnare. Quamquam hæc vera pugna non est. Nam si diuina auctoritas rationem doceat, falsum esse id, quod sumserat, neque a naturae necessitate, sed ab hominum culpa esse istam imbecillitatem repetendam, et in ea re esse corruptelam quandam naturae humanae, non naturam

turam ipsam; facile, quae ex sumptione sua concluderat, falsa esse fateatur ipsa, auctoritatieque divinae concedat.

Omnino fatendum est, rationem humanam in toto hoc genere valde hebetem iudicari oportere. Neque solum his, quibus diximus, de causis, hoc est, quod originem mali humani ignorat, et, quid bonitati, sapientiaeque divinae consentaneum sit, intelligere suis sua sponte non potest, verum etiam propterea, quod, quae sit hominum post mortem conditio futura, vix per caliginem videt: in quo tamen magna vis ad huius totius causae diiudicationem inest. Nempe, ut breviter dicam, quod alio loco fortasse differetur fufius, primo, ratio de immortalitate animi non nisi dubitanter pronuntiat: quam si vel maxime posset certis rationibus nobis probare; tamen, id quod est maximum, qui sit animi post mortem status futurus, quae sit felicitatis aut miseriae ratio futura, ignorat. Et habet quidem, quae de ratione beatorum dicat: sed ea sunt eiusmodi, ut si hic sit, quem fingit, beatorum status futurus, credam, uti nunc est, intra tri-duum eius me satietatem capturam esse. Nam quoniam eum totum a superiori vita honeste acta repetit, confequitur, ut nihil in eo sit praeter tranquillam recte factorum conscientiam futurum, ex qua vacuitas doloris quidem et animi quies, non autem ea voluptas existit, quae sine satietate in omnem aeternitatem beatorum animos delectet. Itaque illi beati philosophorum, mihi simillimi videntur esse *Epicuri* in intermundiis Diis, qui in omnem aeternitatem nihil agunt, nisi, ut cogitent: *belle mihi est*. Quid enim aliud possunt illae beatae mentes, quibus nihil praeter recte factorum memoriam ad felicitatem datum est, per infinita secula facere, nisi ut cogitent: *honeste vixi; nullius grauioris culpa mihi conscius sum*. Atque hunc sibi animorum statum fingit ratio, etiam hac de causa, quod nihil videt de corporum in vitam reditu, in quo hic sunt prope omnia. Nam eo constituto, necessarium est, ut magna pars felicitatis nostrae sit in illis rebus

rebus futura, quae nullam necessariam coniunctionem cum vita anteaeta habeant. Corpus animusque ita fere adficiuntur, ut sunt eae res, quibus utuntur, et quibus undique circumdantur. Sed eae res, quibus nunc circumfundimur, nullo necessario vinculo cum actionibus nostris cohaerent, sed ab arbitrio eius pendent, qui hoc totum uniuersum constituit. Ipsa quoque vis, quam eae res habent in nos, diuinae cuidam constitutioni est adscribenda, neque villo modo necessaria est habenda. Abundamus iam incredibili copia rerum, quae ad aspectum amoenae, ad auditum iucundae, ad gustum dulces, ad olfactum suaves, ad tactum molles sunt, sine vlla opera nostra. Sed quemadmodum in artificiosissimo horologio, vna rotula, rotula vero? imo vno rotulae dente dempto, tota machina turbatur: sic omnis illa sensuum perceptio parua re perturbari potest, ut, quae antea amoena, iucunda, dulcia, suauia et mollia videbantur, eadem foeda, tristia, amara, tetra et aspera fiant. Parua cerebri commotione opus est, ad illam vim concipiendarum imaginum, quam nos vulgo imaginationem vocamus, ita perturbandam, ut totus ille iucundus et magnificus mundi conspectus auferatur, et omnia nobis horrenda et terribilia obiciantur. Vidit *Pacciolatus*, Vir Clarissimus, hominem, cetera sanum, qui se milii granum diceret, vixque domo exiret, veritus, ne a pullis comederetur. Non procul Patauio fuit, qui se rapam affirmaret. In Anglia Theologum in Oxoniensi Academia fuisse tradit *Crofa*, qui lagena vitrea videretur sibi se intuens. Quae et quam terribilia spectra obiciuntur saepe vigilantibus, qui vel sanguinis, vel cerebri vitio laborant, aut quorum cerebrum febrili aestu est commotum. Obeamus carceres, quibus mente moti detinentur: quot his similes homines reperiemus? Sed quod in vno genere fieri potest, quis neget fieri posse in omnibus, et quae in vnum hominem cadunt, ea quis omnibus accidere posse ambigat? Si igitur hoc est totum arbitrii diuini, in quibus Deus

omne

omne animal rebus esse, et quomodo iis affici velit: cogitur, ut, quoniam auctoritate sacrorum librorum edocti tenemus, in corporis possessionem esse animum rediturum, maxima pars felicitatis futurae arbitrii divini sit, non cum vita hac necessario vinculo coniuncta. Quod si est, illud quoque consequi arbitror, ut non minus sit arbitrii divini, qua nos via et ratione ad hanc felicitatem peruenire velit; atque adeo non esse absurdum, quemadmodum Sociniani, et quos Deistas vocamus, criminantur, si, in primis auctoribus libris sacris, a Deo legi naturali adiunctum aliquid dicamus, quod quia ipsi placet, ad felicitatem aeternam consequendam sit necessarium, idque, a Deo nobis traditum, esse firmiter tenendum. Sed horum nihil videt ratio, quoniam illum corporum in vitam creditum necessario ignorat. Equidem scio, philosophis nonnullis ita placere, ut animus etiam post mortem corpusculum aliquod habeat: quod intelligens natura, eaque finita, in primis, quae corpori animali iuncta fuerit, sine corpore omni vere vivere non posse videatur: qua ratione etiam inductos summos veteris ecclesiae doctores quosdam statuisse arbitror, ut hoc obiter addam, animos humanos post corporis mortem dormire, neque plena felicitate frui, donec corpus vi divina receperint: ut primis a Christo nato seculis, quemadmodum est apud *Iustinum Martyrem*, non probaretur, qui animos humanos statim a morte, et non demum post corpus receptum, felicitatis coelestis participes fore crederet, Florentinoque demum Theologorum conuentu, qui habitus est XV. a Christo nato seculo, id quod nunc tenemus omnes et defendimus, constitueretur, ut animi humani statim a morte, etiam diuulsi a corpore, beati putarentur. Sed nihil hic certi ratio habet, et quae habet, si tamen habet, coniecturis huc illuc trahi possunt; cum diuina sacrorum librorum auctoritas certissima omnia tradat.

Vides, Venerande *Schulze*, qua via necessitatem revelationis e libris sacris demonstrandam putem: nempe hac,

hac, vt probata relictis omnibus eorum diuinitate, quod argumentis minime dubiis fieri posse scis, ex iisdemque futurae post hanc vitam felicitatis ratione explicata, doceatur, eam fore eiusmodi, vt non possit, quemadmodum Deistis placet, necessaria virtutis consecutio putari: ex quo fiat, vt sit beneficium diuinum, quod quibus legibus et conditionibus tribuere velit, ipsius arbitrio sit relinquendum. Hac sua potestate, porro docendum est, Deam esse et in primorum hominum innocentia vsum, et in hac hominum corruptione: et in hac quidem eo magis, quod legibus diuinis, ipso Deo iudice, non possunt homines tantum, quantum ab iis iure suo postulare Deus potest, satisfacere. Cui autem rei felicitatem aeternam Deus proposuerit, eam esse non modo dignam iustitia et sanctitate diuina, sed etiam eiusmodi, vt vires legum diuinarum seruandarum afferat augeatque.

Sed haec nunc latius differere neque otii mei est, neque instituti. Erat enim mihi hac tantum constitutum, vt necessitatem reuelationis nullo modo posse assequi rationem humanam demonstrarem: quam si Tibi demonstrationem probauero, magnum eius fructum me cepisse arbitrabor. Eum enim Te cognoui, qui de his rebus acute possis subtiliterque iudicare. Quod vel maxime viderunt Venerandi Viri, qui in Schola Vitebergensi Theologiam docent, cum Te vniuersis suffragiis Theologiae Doctorem crearent. Quae res mihi opportunam occasionem faceret, de Tuis laudibus plurimis et maximis dicendi: neque tam, vt alii tali tempore faciunt, amicitiae et gratiae causa, quam, quia possem vere omnia dicere. Sed eo Te scio esse animo, vt libentius laudanda facias, quam laudes Tuas audias, easque malis a Tua Tibi conscientia, quam ab aliis narrari. In quo Tu secus quidem facis, quam hi eruditorum mores sunt, qui valde ad ambitionem incubuere, sed sapienter tamen et magnifice facis. Nam quemadmodum nullum amplius theatrum virtutis est, quam sua cuiusque conscientia, a qua virtus potissi-

(144.127)

Am

my. 12. 12. 12.

